


BIBLIOTEKA  
Zakl. Nar. im. Ossolińskich

4841













SIMONIS STAROVOLSCI

# BREVIARIUM

IVRIS PONTIFICII

In vsum simplicium Parochorum

LIBRIS SEPTEM

Simpliciter collectum.

*Encomiario Camerata  
Montis Argenti ex  
Legato Patis et AL  
Joannis Mri  
Sostomi Godwin  
ta 1722 V.D.  
Cann. Patis AL  
1678.*



R O M A E

Sumptibus Io. Baptistæ, & Iosephi Corbi Bibliopolarum

*Per Adm. L. B. B. B.*

Ex Typographia Francisci Monetæ. M D C L I I I

Superiorum Permissu.

16.344

16.344

SIMONIS STAROVOLSKI

BREVIA

PARIS PONTIFICII

In vltima simplicitate Parochorum

PARIS PONTIFICII

Simpliciter collectum.



XVII-4844-III

Topographia Francisci Monaci M. P. C. L. M. L.

Superiorum Francisci Monaci M. P. C. L. M. L.

1774



REVERENDO VIRO

D. CAZIMIRO

PROCZYNSKI

PAROCHO IVANOVICENSI.

AMICO EX ASSE.

SIMON STAROVOLSCIVS

*Vtramque Salutem.*

ELICI sanè omine, Cazimire,  
Ornatissime; Magnus ille Zamo-  
scius (cuius elucet in Sarmatia no-  
stra virtutes eximiæ, nomen verò  
æternis consignatum, atque impressum inge-  
nij monumentis, per Orbem terrarum fama  
dissipavit) urbem vestram, à suo nomine Za-  
moscium appellatam, & in ea florentissimam  
Academiam condidit. Vnde centenariò an-  
norum ab origine nondum expleto, tot iam  
centuriæ virorum ingenio, doctrina, pietate,  
prudentia, militariq; laude conspicuorum pro-  
diere; qui, non obscuras tantùm Russiæ no-  
stræ oras, in qua iam pridem; post emissos il-

<sup>4</sup>  
los Sarmatas, Bulgaros, Vandalos, Hunnos,  
Vfos, Gothos, atque Longobardos.

*Abstulerat claros indigna obliuio ciues,*

*Raraq; nominibus fama superstes erat.*

Sed vniuersum ferè Orbem Polonum, & scriptis doctissimis, & rebus pro patria, pace, ac bello præclarè gestis, egregiè illustrarunt. Quos inter, cum Te etiam Cazimire Amantissime, felix illud ac fertile solùm, insignem ingenij dotibus virum protulisset, Academiaque illa summis humaniorum literarum apicibus informasset, decorasset laurea Alma Vniuersitas Cracouiensis. Non abs re fore putauì, si Breviarium Iuris Pontificij, quod Simplicium Parochorum vsui confeci, Tibi, inter mille amplissimæ illius Dicecesis Cracouiensis Curatos, Parocho haud postremo, amico verò meo charissimo, ac veluti nouo Pyladæ, dicarem & offerrem, Tibi, inquam, cui & priscae honestatis cura præcipua est, & veterum doctrinarum arcana quæque patent, & in omni disciplinarum colore, formaque non limatum tantùm, sed lynceum iudicium adest. Literatorum verò amor tantus, vt omisis, quomodo alios liberaliter

iuua-



iuvare soleas, tenuioribusq; studiosis benefacere consuesti, vel ipsam quam non rogatus mediocritati meę ultro munificentiam, dum in Italiam pergerem exhibuisti, diligentius perpēdens, palam pronunciare non dubitem. Vnum te esse, cui, si facultas daretur, voluntas etiam esset fugientes literas à situ, atque ab interitu vindicandi.

Cæterum, cum ea sit Superum voluntas, ut cum ferentibus Fatis feramur, & ea quæ destinata è cœlo est sorte simus contenti: postquam in Pastoralis officio hoc quod geris, triplici isto radio resplendeas luculenter, virtutis, doctrinæ, humanitatis: non est quod Prælationes ambigas, aut honores in Ecclesia: tui nominis memoria, nunquam scæda occidui temporis oblivione teretur, sed proprio honestatis splendore coruscante, luminosius per redeuntia sæcula reuiuiscet omni posteritatis curriculo veneranda. Hæc siquidem tua in diuinis exacta, sacrorum & religionis cura; hæc assidua decoris domus Domini sollicitudo & amor; hæc indefessa circa commissum tibi gregem vigilantia; hoc inconcussum in vindicandis ab impijs deten-

detentoribus Ecclesiæ tuæ bonis animi robur;  
 hæc denique in vniuersæ vitæ curriculo morū  
 æqualitas & constantia; præstabunt sufficienter,  
 in quo te pia posteritas veneretur, & colat. Nos  
 verò qui te nunc nouimus, qui tua constanti  
 amicitia fruimur, quique te procliuem vide-  
 mus virtutis studio in Religionem, doctrinæ  
 in iustitiam, humanitatis in Musam; plenissi-  
 mo affectu, liberisque votis rependemus amo-  
 rem humanitati, venerationem doctrinæ, cul-  
 tum virtuti. Interim excipe hæc, quæ in Bre-  
 uiarium retulimus Sacrationis Iuris effata, eo-  
 dem affectu quo me ipsum, quo omnia mea ex-  
 cipere consuesti. Cumq; ea reliquis etiam, qui  
 precum Breuiarium assidue manibus terunt,  
 pari ratione, qua & ipse, reuoluenda commen-  
 daueris, hanc sinceram animi mei propensio-  
 nem in te, nouo beneuolentiæ calore foue, &  
 in æternum vale, decus Mystrarum singulare.

anda. Hæc siquidem tua in diuinis exactis  
 factorum & religionis cura; hæc assidue deco-  
 ris bonus Domini sollicitudo & amor; hæc in-  
 delecta circa conuictum tibi gregem vigilan-  
 tia; hoc in concilio in iudicandis ab ipse  
 detent-



## LECTORI.



VIA post Deum & Religionem, maius non est vinculum, aut quod dissolvere causa vlla humana valeat, quam Patrij amor soli.

CANDIDE LECTOR: Idcirco illud mihi semper propositum fuit ac constitutum, vt post defensionem, patrio sermone, Catholicâ Religionem, qualiqua stilo, pro posse meo, eorum res gestas non tam laudatione, quam narratione percurrerem, quos Sarmatia nostra vniuerso terrarum Orbi, vel Sanctitate, vel singulari eruditione colendos, vel egregijs virtutibus admirandos, vel insigni armorum gloria timendos, vel denique præcipuarum dignitatum luce spectandos dedit. Atque ita Sanctorum nonnullorum indigetum vitas, Scriptorum insigniorum præconia, Clarissimorum Oratorum laudes, fortissimorumq. Sarmatiæ bellatorû elogia. quorum iam memoria, vel iniuria temporum, vel incuria historiographorum penè interierat, specialibus libellis protuli, & ab interitu vindicaui. Viuunt siquidem nomina Heroum, consumptis etiam corporibus, Scriptorum industria ad memoriam prolata: & cum qualemqualem præconem virtus inuenit, elucet honestissimè, & ad sui amorem imitationemq. allicit, cum alios quosuis, tum tribulos maximè, ac de sanguine descendentes. Si verò caret encomiaсте literato, aut delitescit in tenebris obliuionis, aut penitus extinguitur barbarie. Quod ædepol cum maioribus nostris factum est, antequam Poloni luce Euangelij, & litterarum splendore imbuti fuissetus. Nec satis diuinare poterimus; quid à Lecho primo Imperij Sarmatici funda-  
tore

tore, siue bello & armis, siue toge studijs pacatisq. artibus, vsque ad tempora Miecislai primi Christiani Principis in Polonia gestum fuerit; nisi ex Scriptoribus alienarum gentium, qui Gothos ex nobis profectos, Vandalosq. describendo, nonnullam maiorum nostrorum mentionem fecerunt. Qui alias rudes tunc temporis, & barbari quamuis, nominis attramen aeternitatem tanti aestimauerunt semper, vt eam & summis laboribus, & ingentibus periculis, & ipso sanguine, ac vita sibi comparandam præclarum esse duxerint: prout & diuersis ex Historicis, & ex ipso cognomine gentis colligere poterimus. Slouanie siquidem (quorum Poloni pars præcipua sumus) propria vocis significatione, homines gloriam armis quærentes intelliguntur, & Polanie, in campo aperto aciem, seu victoriam obtinentes. Sed quia, non armis tantum & bello, verumetiam mitioribus studijs & virtute immortalitas paratur: multosque claræ opes euexerunt ad decus, & honestas; multis mœchanicæ etiam artes diligentius tractatæ claritudinem decreuere, nonnullis pax togaq. gloriæ fuit. Cæteros lingua, ac literæ adeo commendarunt posteritati, vt obliuioni superiores, liuidæ iam vetustatis iniurias non pertimescant; maximè quos Ecclesiastica munera, & sanctitas morum astris iam intulerūt. Eapropter Poloniam iuuentutem (cui dudum Bellonæ præcepta, militarisq. rei instituta præscripsimus) ad humaniora quoque studia allicere cupientes, cum Historiarum suauitatem, dulcedinem Poeticæ, Suadæ præstantiam, harmoniæq. Musicalis iucunditatem, singularibus libellis commendauimus: tum ad pietatem, et iustitiam formare intendentes, Sacros sermones tomis aliquot, et Iuridica rudimenta nonnullis opusculis cōnotauimus. Hoc est Monita primò Legalia, seu methodum studendi in iure, præscripsimus, Accessum deinde ad Iuris vtriusq. cognitionem breuē parauimus. Mox commentaria in Iustiniani



Imp. Institutiones dedimus. Nunc demum Pontifici  
Iuris summam collegimus (idque simpliciter, absque  
allegationibus textus, eruditissimi Lancellotti exem-  
plo. Cum & Gregorius Papa XIII. Corpori Iuris Ca-  
nonici, nil quicquam addere, vel immutare, aut inter-  
uertere, nullaue interpetramenta adiungere premise-  
rit) ne tanquam inter fluctus maris, cupidi huius sacre  
Scientiæ adolescentes, inter tot Canonistarum libros,  
& infinitas allegationum ab ipsis adnotatarum tricas,  
cum periculo ingenij vagare cogantur, aut difficultate  
abdiscendi illas, à studio ipso deterreantur. Fecimus  
itaque quod potuimus, quo & Patriam ornare, & op-  
timam studiosorum indolem iuuare valeamus. Ve-  
strum autem erit, ò Candidi, ingenuique Lectores, quo-  
rum laudes nostris in scriptis admiramini, eorum vir-  
tutes imitari; siue illi bellatores, siue literati fuere; &  
quibus gloriamini maioribus, nihilo minores apparere;  
vestroque docere exemplo, inter quas cumque gentes  
nati estis, eosdem igniculos virtutis vbique populo-  
rum nasci, quos olim sola in Græcia elucere antiqui  
Romani mirabantur. Valete.

### Admonitio ad Lectorem.

**L**ector Aduerte Auctorem ne Breuiarij, quod intendebat li-  
mites excederet, multa ex Iure Canonico summam  
transcripsisse, qua maiorem desiderant explicationem. Quia  
propter ubi occurrerit aliquid ingerēs difficultatem, scias id ip-  
sum Auctorem ex Sac. Canonibus haurisse, tu tamen Benigne  
Lector in huiusue difficultatibus, ne tantum Breuiario fidas,  
quin prolixiores Canonistas, & Summistas non consulas. Er-  
rata autem tua corrigas discretione, & vale.

20  
*Imprimatur, si videbitur Reuerendiss. P. Mag. Sac. Pal. Apost.*

*A. Episc. Verul. Vicefg.*

---

**L**ibrum Adm. Reu. Simonis Starouolscij *Breuiarium Iuris Pontificij* intitulatum, summa attentione, & diligentia de mandato Reuerendiss. P. Vincentij Candidi Mag. Sac. Pal. Apost. perlegi, & non solum in eo nihil, quod Christianæ Religioni, aut bonis moribus repugnet offendi, sed totius Iuris Pontificij materias omnes summa claritate, & admirabili compendio digestas altè sum admiratus; Quare censeo maximo Reipublice Christiane bono cessuram illius publicationem, & hinc non minorem Ecclesiam sensuram esse vtilitatem, quã totus Orbis receperit ex tot alijs Operibus, quæ eruditiss. iste Auctor maxima cum sui nominis gloria edidit.

*Nicolaus Seuerolus Sac. Consist. Aula Advoc.*

---

**I**ussu Reuerendiss. P. Magistri Vincentij Candidi Sacri Apostolici Palatij Magistri Opus hoc accuratè legi, & cum in eo nihil inuenerim, quod Catholica fidei, sacris canonibus, & Christianæ vitæ moribus conforme non sit, censeo ipsum esse dignum, quod publicæ utilitati exponatur. In fidem Datum in Conuentu Sanctorum duodecim Apostol. die 29. Octobr. 1653.

*F. Modestus Gauatius Ferrariensis Ord. Min. Conuent. S. Rom. & vniuersalis Inquisitionis Consultor, & Qualificator.*

---

*Imprimatur.*

*Fr. Vincentius Candidus Sac. Pal. Apost. Mag. Ordinis Prædicatorum.*

INDEX



# INDEX, ET SVMMMA

## Titulorum Iuris Pontificij.

### LIBRO PRIMO

De Personis Ecclesiasticis, in gradu altiori constitutis,  
& eorum officijs, tractatur Titulis 24.

- D** *De Comparatione utriusque Iuris, Cesarei nimirum, & Pontificij.*
- 2** *De Iure Canonico, seu Pontificio.*
- 3** *De Ecclesiasticis Constitutionibus.*
- 4** *De Iure personarum Ecclesiasticarum.*
- 5** *De Episcopis, & eorum auctoritate.*
- 6** *De Electione Episcoporum.*
- 7** *De Postulationibus.*
- 8** *De Confirmatione Electi.*
- 9** *De Consecratione Episcopi.*
- 10** *De Auctoritate, & usu Palij.*
- 11** *De Vita, & honestate Prælatorum.*
- 12** *De Officio, & potestate Ordinarij.*
- 13** *De Officio Archidiaconi.*
- 14** *De Officio Archipresbyteri.*
- 15** *De Primicerio, & Custode.*
- 16** *De Officio Vicarij.*
- 17** *De Coadiutore.*
- 18** *De Translatione Episcopi.*
- 19** *De Renunciatione.*
- 20** *De Depositione, seu Degradatione.*
- 21** *De Officio, & Potestate Capituli, Sede vacante.*
- 22** *De Officio, & Potestate Legati.*
- 23** *De Officio, & potestate Iudicis delegati.*
- 24** *De officio Conservatorum.*

LIBRO SECVNDO.

De Personis Ecclesiasticis, in inferiori gradu constitutis, eorumq. officijs, tractatur Titulis 10.

- 1 **D**E Sacerdotibus, seu Presbyteris.
- 2 **D**E ijs, qui sunt in sacris constituti.
- 3 De his, qui sunt in Minoribus Ordinibus constituti.
- 4 De ijs rebus, quæ tam maiorum Ordinum, quàm minorum sunt communia.
- 5 De his, qui potestatem habent ordinandi, & litteras Dimissorias seu commendatiteas dandi.
- 6 De his, qui ad Ordines promoueri non possunt.
- 7 De Votis, & Castitate Clericorum.
- 8 De Vita, & Honestate Clericorum.
- 9 De Regularibus, & Monachis.
- 10 De Sanctimonialibus.

LIBRO TERTIO.

De rebus Ecclesiasticis Spiritualibus, & earum administratione, tractatur. Titulis 23.

- 1 **D**E Rerum diuisione.
- 2 **D**E Sacramento in genere.
- 3 De Baptismo, & eius effectu.
- 4 De Sacramento Chrismatus.
- 5 De Pœnitentijs, & Remissionibus.
- 6 De Sacramento Eucharistiæ.
- 7 De Extrema Vnctione.
- 8 De Sacramento Ordinis.
- 9 De Sacramento Matrimonij.
- 10 De Sponsalibus.
- 11 De Nuptijs.
- 12 De Impedimenti Matrimonij.
- 13 De Triplici Cognatione.
- 14 De Claustrina Desponsatione.
- 15 De illis, qui Matrimonium accusare possunt, vel contra illud testificari.
- 16 De Diuortijs.
- 17 De Rebus Sacris, Sanctis, & Religiosis.



- 13
- 18 De Construendis, consecrandis, & reparandis Ecclesijs, & Altaribus.
  - 19 De Vnionibus Ecclesiarum.
  - 20 De Immunitatibus Ecclesiarum.
  - 20 De Capellis Monachorum.
  - 22 De Religiosis domibus.
  - 23 De Sepulturis Christianorum.

## LIBRO QVARTO.

De rebus Ecclesiasticis Temporalibus, & earum administratione, tractatur Titulis 13.

- 1 **D**E Præbendis, & alijs Benefitijs.
- 2 De Collationibus Beneficiorum.
- 3 De Vacatione Beneficiorum.
- 4 De Prohibita Beneficiorum multiplicitate.
- 5 De Pensionibus.
- 6 De permutatione Beneficiorum.
- 7 De Institutionibus, & Iure Patronatus.
- 8 De Clericis non residentibus.
- 9 De Canonica Portione.
- 10 De Censibus, exactionibus, & procurationibus.
- 11 De Decimis.
- 12 De rebus Ecclesiæ non alienandis.
- 13 De Peculio Clericorum, relictis, & successionibus eorum.

## LIBRO QVINTO.

De Indicijs Ciuilibus, ad forum Ecclesiasticum spectantibus, tractatur Titulis 24.

- 1 **D**E Diuisione Iudiciorum.
- 2 De Iudicijs Delegatis.
- 3 De Procuratoribus.
- 4 De Pactis, & Transactionibus.
- 5 De Arbitris.
- 6 De in Ius vocando.
- 7 De Dolo, & Contumacia, & in Possessionem missione.
- 8 De Vsucapionibus, & Prescriptionibus.
- 9 De Libelli conceptione, & oblatione.
- 10 De Exceptionibus, & Replicationibus.
- 11 De Mutuis petitionibus.
- 12 De Restitutione Spoliatorum.
- 13 De Litis contextatione.



- 14 De Iuramento Calumnie .
- 15 De Litis pendentia .
- 16 De Probationibus .
- 17 De Inductione Testium .
- 18 De Instrumentis, & Scriptura .
- 19 De Iureiurando .
- 20 De Præsumptionibus .
- 21 De Sententijs, & re iudicata .
- 22 De Exequutione rei iudicate .
- 23 De Appellationibus .
- 24 De restitutione in integrum .

## LIBRO SEXTO

De Iudicijs Criminalibus, ad forum Ecclesiasticum  
spectantibus, tractatur Titulis 13.

- 1 **D**e Accusationibus, Denunciationibus, & Inquisitionibus.
- 2 De Duplici purgatione .
- 3 De Simonia .
- 4 De Hæreticis .
- 5 De Schismaticis .
- 6 De Apostatis .
- 7 De Sortilegis, Maledicis, & Sacrilegis .
- 8 De Furtis .
- 9 De Vsuris .
- 10 De Adulterijs .
- 11 De Crimine falsi .
- 12 De Homicidijs .
- 13 De Iniurijs, & Damno dato .

## LIBRO SEPTIMO

De Poenis, seu Censuris Ecclesiasticis, tractatur  
Titulis 5.

- 1 **D**e Appellatione Censura .
- 2 De Excommunicatione .
- 3 De Suspensione .
- 4 De Interdicto Ecclesiastico .
- 5 De Cessatione à Divinis .



SIMONIS STAROVOLSCI

## BREVIARIUM

IVRIS PONTIFICII

LIBRIS SEPTEM

Comprehensum.

## LIBER PRIMVS.

*De Personis Ecclesiasticis, in gradu altiori  
constitutis, & eorum Officijs.*

## PROOEMIUM.



VIA Sacrorum Canonum, Decretaliumq;  
 Epistolarum, rebus ita exigentibus, tam  
 magnus hodie factus est cumulus, vt nume-  
 rum prope legum Ciuilium exæquare vi-  
 deantur: vixq. à paucis ob suam multitudinem, diutur-  
 no studio cognosci valeant. Eapropter, Studentium  
 vtilitati consulere volentes, multi veteres, recentiores-  
 Iureconsulti, Summas breuiore conscripserunt; in-  
 quibus vniuersa propè ea, quæ Pontificij Iuris libris  
 sparsa conspiciuntur, certa quadam via, & ratione  
 complexi sunt. Sed quia eas pro more, & consuetudi-  
 ne Iurisperitorum, partim assiduis allegationibus, quæ  
 obtu-

obtusioribus ingenio cognitu difficiles sunt; partim notis diuerforum Interpretum, frequentioribusque partitionibus in Paragraphos, Capitula, Numeros, Paratitla, & sectiones, quæ debiliorem memoriam offuscant, perp tuò inumbrarunt, quod primo intuitu horrorem quendam, & impossibilitatem addiscendi lectoribus iniicit: Ideò ingenuos adolescentes hoc metu inani liberare volentes, cupientesque rudiores, & nondam inchoatos tyrones, ad altius Canonicae doctrinae studium attrahere, prius quam lecturæ Iuridicæ, & citationibus legum assueuerint, hæc simplicia sacrarum Sanctionum effata, pernoscenda, proposuimus: Et quicquid in tanta Pontificij Iuris librorum mole dispersum, dissipatumque cernitur, sub vnum velut aspectum, in hoc nostro Breuiario, collecta, conglutinataque posuimus. Quo vel sic, sacratio-  
ris doctrinae dulcorem, studiosi iuuenes, quasi in massa quadam degustantes, alacriores deinceps ad ipsos fontes & capita Iuris Pontificij currant, diligentiusque per se, & Sanctorum Patrum Decreta, & solertissimas circa illa Doctorum commentationes euoluant, & perscrutentur assidue. Quibus eam ob causam, & *Accessum ad Iuris Vtriusque cognitionem* olim, ante Commentarios nostros in Iustiniani Imp. Institutiones præmisimus, & nunc *Monita Legalia*, seu Methodum in utroque Iure studendi præscripsimus, quò minore cum fastidio, ac facilius studijs hisce canonicis, tanquam sacris quibusdam initiari volentes, artem ipsam percipere valeant. Hinc ultra consuetum vsum allegationum, etiam verborum compositionem apud eruditos fieri solitam, volentes omisimus, ne stilum potius, quam utilitatem studentium affectare videremur; sed potius exemplo serio discere cupientibus possimus esse, quo & illi quauis in arte, disciplinaque altiori, non inania vocabulorum ornamenta, salubria rerum emolumenta sectari



sectari velint, memores illius Senecæ, ad Lucilium  
Epist 49. *Quæ Veritati dat operam ratio, incomposita esse  
debet, & simplex.* Et licet facundia sit interpres sapien-  
tiæ, non multitudine attamen illa verborum instru-  
cta esse debet, sed pondere sententiarum. Igitur  
iuxta Diui Saluiani dictum, *In scriptis nostris non leno-  
cinia esse volumus, sed remedia.*

## T I T V L V S I.

### *De Comparatione Vtriusque Iuris, Cæsarei nimirum, & Pontificij.*

1 **L** E G E S omnes & iura, quæ diuersos inter  
populos in Orbe vniuerso reperiuntur, ad  
dirigendas humanas actiones institutæ, vt  
secundum earum præscriptionem benè, beateq; om-  
nes suis in prouincijs viuere possint. Quarum sanè le-  
gum vbique, aliæ delinquentibus poenas pro delictis  
ac sceleribus inferunt, aliæ rectum agentibus præmia  
& honores inter conciuēs conferunt.

2 Inter omnium autē populorum, qui in orbe sunt,  
vel fuerunt, ciuilis societatis, ac regiminis ordina-  
tiones, præcipuæ sunt etiamnum leges, & iura Ro-  
manorum, quibus non modo Romani Imperij subdi-  
ti, sed vniuersa ferè Christianitas, ordinariè vtitur;  
& in omnibus ferè regulatur.

3 Hoc autem ius Romanum duplex est. Aliud  
Pontificium seu Canonicum, Et aliud Cæsareum, vulgo  
Ius commune dictum. Illud Romani Pontificis autho-  
ritate nititur. Istud authoritatē Imperatoris Ro-  
mani.

4 Ius Cæsareum constat Imperatorum Constitutionibus ; Senatus , populi , & diuersorum Magistratum placitis ; tum & Iureconsultorum prudentibus responsis . Ius verò Pontificium , Romanorum Antistitum Sanctionibus ; Sacrorum Conciliorum , tam Generalium quàm Prouincialium decretis , & Sanctissimorum virorum salutaribus sententijs .

5 Ius Cæsareum dirigit hominem ad bene viuendum in societate ciuili . Ius verò Pontificium ducit hominem ad perpetuam beatitudinem in societate ciuium coelestium . Illud proximi , dilectionem docet , istud amorem ipsius Dei . Vtrumque autem ad perfectionem , & aternam felicitatem tendit .

6 Ius Cæsareum tractat in suis libris , de personis secularibus , prout liberi aut serui sunt , deq; earum differentijs , & qualitatibus : secundo , de rerum diuisione , & acquirendo ipsarum dominio : & tandem de actionibus , seu iure persequendi in iudicio , quod sibi debetur . Ius Canonicum itidem tractat in suis libris , de personis Ecclesiasticis , earumq; officijs , ac beneficijs : de rebus tam spiritualibus quàm temporalibus , vt statum Ecclesiasticum concernunt : & demum de iudicijs ciuilibus , & criminalibus per iudicem Ecclesiasticum exercendis , deq; Censuris Ecclesiasticis , quas quis incurrit ob commissa crimina voluntariè .

7 Ius Cæsareum præcipuè continetur Codice , Digestis , Authentico siue Nouellis , libro Fœdorum , & Institutionibus Iustiniani . Ius quoque Pontificium continetur , Decreto , Decretalibus , Sexto , Clementinis , Extrauagantibus , & Institutionibus Lancelotti .

8 Decretorum librum ( cui princeps locus inter libros Canonum tribuitur , quod & præclaris aureisq; sententijs abundat , & auitæ religionis Ecclesiasticam seueritatem , & disciplinam præfert ) ex antiquis codicibus



dicibus Conciliorum, qui asseruabantur in Vaticano (semper enim in Romana Ecclesia, quæ omnium aliarum Ecclesiarum est Magistra, Conciliorum Canones, & Acta, Pontificumq; Summorum decreta asseruabantur, & alijs Ecclesijs per vniuersam Christianitatem communicabantur) temporibus Eugenij III. circa An. 1151. collegit Gratianus, Monachus Benedictinus Sancti Felicis Bononiæ, natus in Clissa ciuitate Thufciæ. Cuius libri autoritas, ne vacillaret aliquo modo, quod à priuato homine compositus esset, iusserunt patrum nostrum memoria, corrigere, Pontifices, Pius IV. Pius V. & Gregorius XIII. viris eruditissimis, & Cardinalibus assignatis. Qui vltra collectionem Canonum Isidori Hispalensis, Burchardi Vormaciensis, Iuonis Carnotensis, Anselmi Panormij, Deus dedit Cardinalis, Gregorij Presbyteri, & Dionisij Exigui, qui Græcorum Synodos in linguam latinam conuertit, conquisitis vndique vetustissimis Codicibus, cum Codice Vaticano, Moguntino, atque Cresconij collationem fecerunt, & emendarunt, Synodorum Generalium, Summorum Pontificum, Prouincialium Conciliorum, & Patrum Sanctorum decreta, ac sententias diligentissimè relegendes.

9 Per eosdem statim, & Decretalium Gregorij Papæ IX. compilatio, per F. Raymundum Ord. Præd. suum Capellanium, & Pœnitentiarium facta, Anno 1230. suæ integritati restituta est. Similiter & liber Sextus Decretalium Bonifacij Papæ. VIII. vna cum Clementinis, & Extrauagantibus. Anno siquidem 1294. Bonifacius Papa prædictus, Decretales Epistolas prædecessorum suorum, per Gulielmum Archiepiscopum Ebrudunensem, & Berengarium Episcopum Biterensem, ac Magistrum Richardum de Senis S. R. E. Vicecancellarium diligenter fecit recenseri: & quibusdam Decretis nouis à se additis in vnum librum sub

debitis titulis redigi, & quinque alijs Gregorij Papæ IX. libris annecti, Sextumq; nuncupari iussit.

10 Ioannes quoque XXII. Anno Christi 1316. Constitutiones prædecessoris sui Clementis V. sub congruis titulis collocatas edidit, & Clementinas appellauit. Quas verò ipse publicauit, & quas sanctiones post illum diuersi Pontificis ediderunt, eas Doctores Iuris, speciali nomine Extrauagantes nuncuparunt.

11 Ex his autem omnibus prænominatis legum Ecclesiasticarum libris, Paulus Lancelottus Perulinus, Iureconsultorum vnicum decus, summam totius Iuris Canonici, Institutionibus, ad imitationem Institutionum Iustiniani Imp. conscriptis, singulari methodo comprehensus, opus suum in quatuor partes, seu libros diuisit. De quibus vide hosce versus.

*Personas nos prima docet pars, Resq; secunda.*

*Tertia dat iudices. Crimina quarta premit.*

## TITVLVS II.

### *De Iure Canonico, seu Pontificio.*

**I**VS Canonicum est, constitutio Ecclesiastica, quæ fidelium actiones dirigit ad finem æternæ beatitudinis. Et dicitur à Greco verbo Canon, quod Latine regulam significat. Vnde ius Canonicum ius regulare, non male dixeris; quod ex regulis præscorum Patrum, ad rectam viuendi formam institutis, deductum fuerit.

2. Constat autem ius Canonicum hisce tribus rebus. Diuinæ legis præceptis, Consuetudinibus fidelium, & Constitutionibus Pastorum Ecclesiæ Catholicæ.

3. Præ-



3 Præcepta legis diuinæ, vocantur absolute *Ius Diuinum* veteri ac Nouo Testamento, contentum, quod semper immutabile permanet; & diuiditur in præcepta Moralia, & Mystica. *Moralia dicuntur*, quæ mores informant, secundum rectæ rationis dictamen; quæ in homine non possunt extinguere nec immutari. *Mystica vero*, seu figurata, & arcana sunt, quæ aliud significant, quam quod litera sonat. Exempli causa. Non arabis in boue & asino. Non feres vestem lana, & lino contextam. Non feres agrum diuerso semine.

4 *Consuetudo est*, ius quoddam moribus institutum, quod pro lege obseruatur, quia rectæ rationi, & iuribus scriptis non contradicit. Alioquin, moribus bonis, aut legi Diuinæ contradicens non iam consuetudo, sed vetustas erroris appellanda est; quæ non ligat, etiamsi iuramento firmata sit. Et vocatur communiter, *Praua consuetudo, seu abusus*.

5 *Consuetudo demum est*, lex scripta; siue secularis in fauorem Ecclesiæ promulgata; siue Ecclesiastica, præcipiens, aut vetans aliquid fidelibus.

## TITVLVS III.

### De Ecclesiasticis Constitutionibus:

1 **E**cclésiasticæ Constitutiones, aut statuuntur à tota Ecclesia in Concilium aduocata, (& appellantur proprie Canones) aut à capite Ecclesiæ tantum, Pontifice nimirum Romano, (& tunc appellantur Decreta) aut denique à priuato aliquo, (& tunc vocantur dicta Sanctorum) quæ postea approbantur ab vniuersa Ecclesia.

2 Concilia verò, alia sunt Vniuersalia, alia Prouincialia seu Nationalia, & alia Diocesana, à singulis Episcopis cum suo Clero celebrata.

3 *Vniuersalia Concilia sunt*, (quæ & Oecumenica consueuerunt appellari) quæ Sancti Patres ex vniuerso Orbe in vnum conuenientes, iuxta fidem Euangelicam, & Apostolicam condiderunt. Vnde Concilia dependent ab Euangelio, & non è contra.

4 Primum autem Concilium est celebratum Hierosolymis, sub Petro Apostolo, & primo Pontifice. Anno Christi nati 70. vt habetur in Actis Apostolicis cap. 15.

5 Atque hinc legitima celebrandorum vniuersalium Conciliorum potestas, & auctoritas, ab exemplo Diui Petri, est penes Sedem Apostolicam. Quod si verò Pontifex Romanus, qui est successor Petri, interesse Concilio personaliter impediatur, vnum, vel plures speciales ad hoc legatos constituere solet.

6 Inter cætera autem Concilia Generalia, quæ, pace Ecclesiæ per Constantinum Magnum donata, celebrata fuerunt, quatuor sunt, quæ totam principaliter Christianam fidem complectuntur, quasi quatuor Euangelia. Nicænum scilicet, Constantinopolitanum, Ephesinum, & Chalcedonense: in quibus velut in quadrato lapide, Sanctæ Fidei structura consurgit.

7 *Nicænum*, celebratum Anno Christi Nati 325. à trecentis octodecim patribus, sub Pontifice Syluestro, qui fuit trigessimus primus à S. Petro Pontifex, imperante Constantino Magno, in quo Concilio fuit condemnata blasphemia Arrii, de inæqualitate Sanctiss. Trinitatis.

8 *Constantinopolitanum* celebratum à centum quinquaginta Patribus, Anno Domini 381. sub Damaso Papa, imperantibus Gratiano, & Theodosio Imp. in quo



quo fuit condemnatus Macedonius , negans Spiritum Sanctum esse Deum .

9 *Ephesinum* , celebratum Anno Domini 424. sub Coelestino Primo , à Petro 44. Pontifice , imperante Theodosio Augusto . in quo fuit damnatus Nestorius , duas personas in Christo asserens .

10 Chalcedonense , sexcentorum triginta Patrum , actum Anno Domini 442. temporibus Leonis , & Martiani Augg. in quo fuit damnatus , Eutyches , & sequaces , perniciosè circa naturam Christi errantes .

11 *Prouincialia Concilia sunt* , quæ propter reformandos mores , & seruandam Ecclesiasticam disciplinam ' in Generalibus Concilijs descriptam , & stabilitam fidem , per singulas prouincias , conuocante Metropolitano Episcopo prouinciæ suæ , quoquo triennio celebrantur . Quæ neque definiendi , neque generaliter constituendi , vim aliquam habent : sed tantum curandi , vt id seruetur , quod alias in Concilijs Oecumenicis statutum est ; & quod generaliter , seu specialiter obseruari à Sede Apostolica præceptum est . Licet interdum , & quæ ab his rectè statuta sunt , etiam Catholica Ecclesia suscipiat .

12 Hæc autem Prouincialia Concilia traxerunt originem , à Concilio , quod celebrauit B. Paulus in Mileto , congregatis maioribus natu prouinciæ Ephesinæ , vt in Act. s Apostolicis cap. 20. habetur . Primumque post Apostolos Prouinciale Concilium fuit celebratum Carthaginæ . Anno Domini 255. Sedente Papa Cornelio I. Quamuis antea multæ fuerint congregationes Episcoporum Asiaticorum , sed non formaliter , & legitimè à suo Metropolitano conuocatorum .

13 *Diocesana Concilia sunt* , quæ Ediscopus in sua Diocesi , singulis annis conuocat , dum iuter suos Abbatas , presbyteros , & clericos congnoſcit , omiſſamq;  
di-

disciplinam restaurat. In ijs, si quid ab Episcopo statutum fuerit, nec subditi extra Dioecesim constituti, nec ignorantes (nisi sit ignorantia supina) ligantur.

14 Decreta quoque Pontificum Romanorum, quæ pro Catholica fide, proq; sacris dogmatibus, diuerso tempore scripta sunt, debent ab omnibus pari reuerentia recipi, ac si voce ipsius Petri firmata) quia omnes aliæ Constitutiones Ecclesiasticæ vim suam habent, à potestate Summi Pontificis.)

15 Demum, dicta Sanctorum Patrum sunt, quæ illi sacram paginam interpretando scripta reliquerunt: quæ deinceps sacris Canonibus interfecta, parem cum eis obtinent firmitatem; cæterum verò post scita Pontificum auctoritatem tenent. Cum enim in negotijs definiendis, non solum necessaria sit scientia, verum etiam potestas; ideo licet diuinarum scripturarum interpretes scientia Pontificibus interdum præcellant, quia tamen statuendi potestate destituuntur, in scripturis quidem exponendis, illis quandoque præponuntur; in causis verò definiendis, secundum post eos locum habere merentur.

## TITVLVS IV.

### *De Iure Personarum Ecclesiasticarum.*

**Q**VIA Ius Canonicum versatur circa personas, res, & iudicia, & posteriora duò ad personas referuntur; ideo parum esset hæc  
duo



duo noscere , si personæ ignorentur , quarum causa illa ipsa constituta sunt : & per quas ea omnia admittantur . Quapropter prius de personis videamus , quomodo differunt inter se , & distincta obtinent officia .

2 Christianorum itaque , quidam sunt Laici , quidam verò Clerici . *Laici sunt* , qui & populares dicuntur , quibus licet temporalia possidere , uxorem ducere , causas agere , inter virum iudicare . *Clerici verò sunt* qui diuinis officijs mancipati sunt , & quos ab omni strepitu cessare conuenit , ne sæcularibus curis auocentur à diuinis . Appellantur autem isto nomine , à verbo Græco Cleros , quod latinè fors , siue hæreditas sonat ; quia ipse Dominus fors , id est , pars eorum est .

3 Horum , quidam sunt in Sacerdotio , vt Episcopi & Presbyteri : quidam in sacris , vt Diaconi , & Subdiaconi : quidam nec in sacerdotio , nec in sacris , vt in minoribus ordinibus constituti , Conuersi , Templarij , Hospitalarij , Cantores , & quibus ministeria domus Dei sunt commissa .

4 Rursus , eorum qui in Sacerdotio constituti sunt , quidam sunt in altiore gradu , vel ordine positi : quidam verò in inferiore . De quibus singillatim titulis suis .

# TITVLVS V.

## De Episcopis , & eorum auctoritate

IN altiori gradu constituti sunt Episcopi , quorum ordo tripartitus est . Alij enim sunt Patriarchæ , siue Primates : alij Archiepiscopi , & alij simpliciter Episcopi .

2. Patriarchæ considerantur , aut respectu totius Orbis ; & sic Summus Pontifex vocatur Papa , id est , Patrum siue Patriarcharum pater : aut resp. Etu maioris partis Orbis , & sic sunt quatuor Patriarchæ , qui primum post Papam locum tenent , & repræsentant quatuor Euangelistas ; Constantinopolitanus ; Alexandrinus , Antiochenus , & Hierosolymitanus : aut ratione minoris partis , & minime , & sic sunt Primates , Archiepiscopi , & Episcopi .

3. Appellantur autem Patriarchæ , quasi patrum Principes , quibus ob dignitatis excellentiam , & crucem deferre , & Pallio uti , & ab Episcopis , atque Archiepiscopis existentibus in prouincijs deputatis ipsi Patriarchæ , appellationes recipere permittitur .

4. Archiepiscopi verò , sunt vnius prouinciæ Episcoporum Principes . Primates autem plurium prouinciarum Præsules , in quibus aliquot Archiepiscopi , seu Metropolitanæ numerantur .

5. Ad hos igitur inter suos Suffraganeos cognoscere pertinet : à quibus tamen , si durius illi habiti , & accepti fuerint , ad Patriarchas , & deinceps ad Sedem Apostolicam appellare poterunt . Sed & Archiepiscopus habet iurisdictionem in subditos suffraganei per appellationem , in appellantem , & appellatum : illosque qui se spontè offerunt liti , super illa re , de qua est quæstio .

6. Simples demum Episcopi sunt , qui maioribus populis , & frequentioribus ciuitatibus , cum Diocesi præsunt . Latine , speculatores dici possunt : quod mores , & vitam populorum infra se positorum speculantur , & perspiciant . Dioceses autem , seu circumscriptiones terminorum custodiæ vniuscuiusque Episcopi , primus Dionysius distinxit .

7. Horum autem Episcoporum , non modica in Ecclesia est auctoritas : nam præter ligandi soluendique po-



potestatem, & visitandi diligentiam, soli sacrum Chryisma conficiunt, soli Dei altaria, & Ecclesias consecrant, & pollutas repurgant. Clericos ordinant suspendunt, & deponunt. Ad hos etiam pertinet excommunicatio, purgationis indictio, dispensatio, atque solennis poenitentiae impositio.

8 Quia & ipse Romanus Pontifex eodem Episcoporum Ordine censetur; sed potestatem habet ceteris longè maiorem. Nam ipse alios iudicat omnes, à nemine ipse iudicatur (excepta hæresis causa, in qua Concilij Generalis iudicio subijcitur) & ab eo, quasi à quodam capite dona in Ecclesiam vniuersam, velut in corpore omne diffunduntur. Quemadmodum ergo tempore Noë, omnes extra arcam positi diluuii vastitate consumpti sunt: sic extra Petri nauiculam constituti, æternæ damnationis fluctibus obruentur.

9 Cardinalatus verò dignitas & officium, non est ordo separatus, quia illorum alij sunt Episcopi, alij Presbyteri, alij Diaconi aut Subdiaconi; sed est dignitas Ecclesiastica, prout & Archidiaconatus, Archipresbyteratus, Prioratus, Præpositura, Abbatialis dignitas, aliæque inter Canonicos Prælationes. Habent tamen Cardinales propter suæ dignitatis prærogatiuam, Pontificiam iurisdictionem, in Ecclesijs sibi in Titulum assignatis, à ijsque ipsi titulo subiectis. Episcopalibusque insignibus uti eis fas est: & minores Ordines conferre, solenniterque benedicere, etsi ipsi in Episcoporum Ordine cooptati non sint.

10 Officium demum Cardinalium est, Summum Pontificem eligere, eius lateri adhærere, & sententiam suam in grauissimis quibusque Ecclesiæ negotijs impertiri. Vnde & fratres à Summo Pontifice, sicut & Episcopi appellari solent. Prout & Episcopus Canonicos suos fratrum nomine appellare tenetur.

*De Electione Episcoporum.*

**D**Vpliciter ad Prælationem Ecclesiasticam promonentur Clerici: aut per Electionem, quæ est ordinarium remedium: aut per Postulationem, quæ extraordinarium.

2 *Electio est*, alicuius personæ ad dignitatem, vel frater nam societatem canonicè facta vocatio. Quæ, primo debet esse libera: deinde, omnibus præsentibus qui ius eligendi habent: demum maiori parte electorum consentiente. Aliàs, committitur error, & fit verum, quod hisce versibus quidam expressit.

*Quattuor, Ecclesias portis intratur ad omnes,  
Cæsaris, & Simonis, Sanguinis, atque Dei.*

*Prima patet Magnis, sed nummis altera, charis*

*Tertia, sed paucis quarta patere solet.*

3 Quod si quis non fuerit citatus ad electionem, & adueniens ratam voluerit habere eam, confirmanda erit electio. Quod si verò noluerit, irritam reddet electionem. Sæpe enim rescriptum est; magis hac in re vnius obesse contemptum, quàm multorum contradictionem.

4 Sed si quis casu aliquo ad electionem accedere fuerit impeditus, votum suum vni, vel pluribus de Capitulo demandare minimè prohibendus erit. Vocati verò ad electionem, & contumaces, priuantur iure eligendi, quia suum ius pro illa vice censentur transfudisse in alios præsentis electioni.

5 Sed hæc quidem in aliorum Episcoporum, non in Romani Pontificis electione obtinent. In huius enim, nec vlla necessaria est citatio, nec alij quis absens votum suum demandare permittitur. Eligi autem debet,

à dua-



à duabus partibus Cardinalium præsentium in electione : aliàs nisi maior concordia intercesserit, nullatenus ad Apostolatus officium assumendus est.

6 Celebratur autem electio tribus modis communiter. Per inspirationem. Per scrutinium. Et per compromissum. *Per inspirationem*, cum nullo electionis ordine seruatò, diuini Spiritus impulsu simul omnes in vnum consentiunt, & repente cum nominant : vt accidit in electione Sancti Ambrosij, Martini, Synesij, Nicolai, & aliorum. *Per scrutinium*, cum omnes legitimè congregati, tres de medio sui assumunt, qui secretè, & singulatim vota cunctorum, qui ius eligendi habent, diligenter exquirunt, & demum in scripturam redacta publicant. Quo facto, collatione habita, is demum censetur electus, in quem vel omnes, vel maior, & sanior pars Capituli statim consenserit. *Per compromissum* verò, cum plures idonei viri eliguntur, in quos omnium vice, eligendi certo modo facultas, & potestas transfunditur.

7 Quod si eligentium vota, ita se diuiserint, vt hinc quidem electorum pars numerosior consistat, inde sanior, auctoritatem, zelum, & merita electi ponderans; facultas erit illis ad infringendam partis numerosioris electionem, de auctoritate, & qualitate ipsorum eligentium. Si tamen altera pars non est duplo maior numero ipsis: tunc enim contra huiusmodi electores ad extenuationem meriti, vel auctoritatis ipsorum, paucioribus, vel electo ab eis, opponendi facultas non erit.

8 Similiter, & arbitri compromissi in electione fines diligenter custodire debent, scituri, si quid non secundum demandatam formam egerint, nullum habiturum esse iuris effectum. Quod si vero

rò intra terminos constiterint, quod ab eis gestum fuerit, vsque adeo ratum habendum erit, vt etiam non secuta electione, re tamen non integra, deman- data sibi potestas reuocari non possit.

10 Non possunt autem eligere impuberes, & sa- cris ordinibus non decorari. Sicut nec innoda- ti vinculo maioris excommunicationis, aut suspen- si per iudicis sententiam; & quibus à superiore, ne eligant, interdictum est. Similiter hæretici, schismatici, anathematizati, & voluntariè abien- tes; aut qui per tempus constitutionibus defini- tum in eligendo negligentes fuerint: quo casu ad proximum superiorem eligendi potestas deuolui- tur.

11 Alia sanè causa eorum est, qui scientes indi- gnium eligunt, aut postulant. Nam licet & ij eligen- di iure priuentur, id tamen non ad Primatem, aut aut Archiepiscopum, sed immediatè ad Summum Pon- tificem deuoluitur.

12 Laicis quoque, etiamsi Principes sint, nullo neque consuetudinis, neque præscriptionis, neque conuentionis iure, ad electionem aspirare permitti- tur; (nisi ex permissione Papæ) Patroni tamen circa iam factam electionem non indecenter postulatur as- sensus.

13 Oportet autem eum, qui in Episcopum eligen- dus sit, cum ars sit artium regimen animarum, æta- te maturum esse natalibus illæsum, corpore integrum; fama candidum, literis instructum, religiosum, pru- dentem, temperatum, castum, hospitalem, mansue- tum, atque irreprehensibilem in omnibus. Si enim ad sæculares honores, sine suffragatione meritum indi- gnum est perueniri; & notari ambitus solent, quos



probitatis documenta non adiuvant : quam diligens ac prudens habenda est dispensatio diuinorum munerum, & Ecclesiasticarum dignitatum ?

14 Igitur is, qui ad Episcopalem dignitatem promouendus est, annos natus esse debet non minus triginta. Nam ea ætate Dominum, & baptizatum esse, & concionatum fuisse legimus. Alioqui si quis minor fuerit, eligi non poterit. In alijs autem inferioribus dignitatibus, sufficit legitimum annum attigisse.

15 Idem iuris est in ijs, qui aut excommunicationis, aut suspensionis vinculo sunt innodati. Sed nec ij eligi possunt, qui in sacris ordinibus non sunt constituti, saltem Subdiaconatu: neque Schismatici eligi debent.

16 Neophyti quoque in Episcopos ordinari prohibentur. Indecens est enim, & valde præposterum, cum fieri magistrum, qui nondum didicit esse discipulus. Appellantur autem Neophyti, qui propositum sacræ religionis nouiter assumpserunt.

17 Qui itaque scienter indignum eligunt, non solum eligendi potestate priuandi sunt, verum etiam per triennium, ut ab alijs eligi possint, se ipsos inhabiles reddunt.

## TITVLVS VII.

### *De Postulatione.*

**P**ostulatio est, eius, qui eligi non potest, in Prælatum concursus Capituli petitio. Existunt enim interdum viri, quorum optima indoles magno posset esse vsui Ecclesiæ, veluti literarum doctri-

strina, magnus rerum usus, & morum vitæq; integritas. Verùm tamen aliquid in eis desideratur, quod impedimento est, ne Ecclesijs præfici possint, veluti ordines, ætas, natales legitimi. Quapropter ne his causis Ecclesia viris idoneis careat, solet interdum collegium utilitatis publicæ gratia, ab Antistitibus sibi Prælatos dari petere. Qui Antistites huius rei causa aditi, egregijs eorum qui postulatur moribus, & disciplinis moti, postulationem admittent, si eis ita videbitur. Post quod (vt euitetur circuitus, & Ecclesiarum dispendium) alia electione, vel postulatione confirmatus non indigebit, sed omne ius consequetur, non secus ac si electus verè confirmatusque fuisset.

2 Ex hoc apparet, eum qui trigessimum annum nondum complevit; item in minoribus ordinibus constitutum, aut laicum; item natalibus læsum, licet eligi non possint, postulari tamen posse.

3 Sextuplices autem personæ, quæ non ob animi vel corporis vitium, sed ob alterius defectum qualitatis eligi non possunt, postulari tamen possunt. *Primo*, Episcopus ad Archiepiscopatum. *Secundo*, Archiepiscopus ad alium Archiepiscopatum, & Primatum. *Tertio*, Episcopus propriæ alligatus Ecclesiæ, ad alium alt iorem Episcopatum. *Quarto*, Laicus, vel Clericus in Minoribus Ordinibus constitutus, ad Episcopalem dignitatem. *Quinto*, illegitimè natus, irregularitate, vel crimine aliquo irretitus. *Sexto*, nondum in legitima ætate constitutus.

4 Non idem iuris est in Abbatibus, & cæteris Prælati, infra Episcopalem dignitatem constitutis. Isti enim licet propriæ Ecclesiæ videantur alligati, nihilominus eligi possunt: proprium tamen non deferant Monasterium, nisi licentia impetrata.

5 Duplex itaque est Postulatio. *Alia sollemnis, quando*



do aliquo defectu postulatus impeditus, ad regendam Ecclesiam licentia Pontificis Summi admittitur. *Et alia simplex*, quando nullo defectu postulatus impeditus, consensum tantum superioris Antistitis requirit, ne illo inconsulto ad dignitatem Ecclesiasticam promoueri videatur. Sic inuito aut inscio Abbate, eius Monachus ad Episcopatum assumi non potest; ne videlicet Patre ignorante filius Ecclesiæ præficiatur.

6 Postulatio autem facta, & Summo Pontifici, alijue Antistiti, qui admittendi eam ius habeat, oblata, reuocari deinceps non potest. Qua in re manifesta deprehenditur differentia inter Electionem & Postulationem: siquidem Electio publicato scrutinio amplius mutari non potest, vt supra docuimus. Hoc tamen Postulationi cum Electione commune est, quod non minus examinanda est, quam Electio; & eandem formam exigit, quâ supra in Electione esse necessariam demonstrauimus.

7 Postulationi affinis est *Nominatio*, Cuius itidem duæ sunt species. Altera Simplex, Et altera solennis. *Simplex est*, cum Canonici, vel alij electores, priusquam ad scrutinium faciendum se accingant, ipsi inter se aliquos ex omnibus nominant eligi dignos. *Solennis autem est*, cum collegium duos vel tres, qui omnium præstantissimi videantur seligit, eorumq; nomina in scriptis solenniter deposita, ad Summum Pontificem, vel alium, qui in hoc potestatem habeat, transmittit supplicans, vt eorum vnum Ecclesiæ dare Præsidentem velit. Et talis nominatio à Postulatione in eo discrepat, quod Postulario de vno tantum fit, Nominatio verò de pluribus. In hoc autem conuenit, quod si solenniter est facta, ab ea resilire non licet; sicut neque à Postulatione, Superiori iam reddita: nisi Prælarus ipse postulantibus, vel nominantibus, morem gerere velit: quo casu etiam ipso postulo, vel nominatione repugnante, retractatio permittetur.

## TITVLVS VIII.

*De confirmatione Electi.*

**Q**VI ad aliquam Præfecturam electus est, non tamen idcirco plenum ius dicitur consecutus, nisi electionis confirmationem à suo Antistite impetrarit. Quare, si quis, antequam confirmatus esset administrationi temere se ingesserit, non solum confirmationis spe, sed etiam omni iure ei per electionem quæsito priuatus erit; adeò, vt neque Oeconomi, neque Procuratoris titulus ei vlllo auxilio esse possit.

2 Est igitur Confirmatio, iuris prius habiti corroboratio; per quam initiatum electione spirituale matrimonium à superiore Prælato ratificatur.

3 Electores itaque quamprimum commodè possunt, operam dent, vt electi consensum habeant, quem si infra mensem, sine causa legibus cognita, electus accommodare distulerit, iure si quod ei fuerat ex tali electione quæsitum, statim carere debet: electoresque ad aliam electionem libere posse conuocare.

4 Electus post consensum electioni præstitum, vel notitiam habitam, debet infra tres menses (si nullum iustū impedimentum obsistat) confirmationem à superiore Prælato petere. Alioqui trimestri spatio elapso, electionem esse penitus irritandam.

5 Et quia ad eundem pertinet examinatio electi, ad quem & manus impositio spectat; idcirco is, ad quem confirmatio pertinet, diligenter examinare debet, & electionis processum, & personam electi, ne quis non idoneus promoueri possit. Et cum omnia ritè facta comperiet, tunc munus ei confirmationis impendat. Quod si secus factum fuerit, non solum deiiciendus erit indignè promotus, verum etiam indignè promouens puniendus.



Nihil est enim quod Ecclesiæ Dei magis officiat, quàm si indigni ad regimen assumuntur animarum.

6 Quod cum in cunctis sacris ordinibus sibi locum vendicet; in Episcopo tamen multo fortius, qui ad curam aliorum positus in se ipso debet ostendere, quomodo ceteros in domo Dei oporteat versari. Ideo, vbi maius periculum, ibi plenius consulendum est.

7 Petet igitur is qui confirmatus est, ab Apostolica Sede literas confirmationis suæ tenorem continentes, illisq; ostendet ad quos ea res pertinet: alioqui nulli eam absque dictarum literarum ostensione recipere tenebuntur. Quod & in promotione apud dictam Sedem facta, & in consecrationis, vel benedictionis munere locum sibi vendicat.

8 Quod si fortè eligentium vota in duas se diuiserint partes, is confirmatoris iudicio alteri præferendus erit, qui maioribus iuuatur studiis, & meritis.

9 Et si vacante Ecclesia, scisso in duas partes Capitulo, alius quidem electus fuerit, alius verò postulat, & vterque pariter idoneus; tunc si postulantium numerus, sit eligentium duplo maior, vtrique postulationem esse admittendam: sin id minus, electionem confirmandam. Sed si postulantes indignum nescij postulauerunt; nec postulatio, nec electio rata habenda erit: si scientes & prudentes, erit electio confirmanda.

10 Est autem differentia inter postulationem, & electionem ista, quia postulatio non dicitur confirmari, sed admitti; & hæc admissio habet vim electionis, & confirmationis: Electio autem dicitur confirmari à superiori Antistite. Confirmandi verò ius ad eum Prælatum spectat, cui ea dignitas immediate subest, quæ confirmari prebitur. Hinc ad dignitatem inferiorem electum confirmabit Episcopus, adhibito interdum Capituli sui consilio: Episcopum confirmabit Metropolitanus; Metropolitanum Patriarcha: ipsum denique Patriarcham, Summus Pontifex.

11 Quapropter confirmantem obseruare oportet, ne dum nimia in confirmando celeritate utitur contra doctrinam Apostoli, proprium affectum iuri, & æquitati præponat. Itaque, si coelectus aliquis, vel contradictor apparet, ante confirmationem nominatim vocandus est: alioqui si nemo apparet, in foribus Ecclesiæ, in qua electio facta est, generaliter edicendum erit, ut si qui sint, qui confirmationi futuræ velint opponere, ad contradicendum in assignato peremptorio termino, præsentibus esse debeant. Quæ omnia locum habent, siue concorditer electio fuerit celebrata, siue non.

12 Sciant tamen ij, qui contra electionem opponendū duxerint, se, si probationibus destituti fuerint, ab omni poenitentiae præsidio exclusos, legitimis poenis esse subiiciendos.

13 Quod si contingat electum fuisse aliquando Schismaticum, & ante electionem ad vnitatem Ecclesiæ rediisse, tunc si à Schismaticis nullum suscepit ordinem, & eius electio canonicè celebrata deprehendatur, posse illam dispensatione confirmari. Similiter & in hæresi natum, si antea hæresim suam abiurauerat, dispensatiuè confirmabit Papa.

14 Interdum tamen accidit, ut qui ad confirmationem accipiendam non admittitur, non tamen omnino repellatur: aut si quis ante iustam ætatem sit electus, quæ aut necessitas, aut certè poscebat utilitas, is enim, etsi confirmari non possit, poterit tamen Procurator à Sede Apostolica fieri, cum libera tam in spiritualibus, quam in temporalibus administratione. Siquidem illa, quæ ordinis sunt, & quæ ministerium exigunt consecrationis, poterit mandare per alios Episcopos exerceri.

15 Confirmatus autem, & nondum consecratus, quæ iurisdictionis sunt, ut puta corrigendi, excommunicandi, iusiurandum à vasallis exigendi, conferendi beneficia, inuestiendi, confirmandi, & ijs similibus, liberam habet tractationem. Ea verò, quæ non iurisdictionis, sed ordinis



dinis sunt, veluti, Clericorum ordinationes, benedictiones virginum, depositiones, Ecclesiarum & altarium consecrationes, ante propriam consecrationem peragere prohibetur. Neque enim ratio suadere videtur, ut quis in alios id conferre possit, quo eundem indigere dignoscitur, Quod si consecratus sit, non solum quæ iurisdictionis, verum etiam quæ ordinis sunt, exequi poterit.

## TITVLVS IX.

### *De Consecratione Episcopi.*

**E** Lectus ad Præationem, ut non solum iurisdictionis, sed & quæ ordinis sunt exercere possit, plenumq; & integrum ius habeat, debet post confirmationem conservari: idque post electionem intra tres menses, nisi legitimum sublit impedimentum, ne Ecclesia pastoris destituta solatio & cura, aliquod interim patiatur incommodum. Alioqui, si Metropolitanus, aut ij, ad quos ea res pertinet, negligentes fuerint, Ecclesiasticis condemnationibus subijciendi erunt. Abbatissæ verò, intra annum à suæ confirmationis tempore computandū, munus benedictionis suscipere debent: alioquin à iure suo, nisi causa iusta subsit, cecidisse intelligantur.

2 In consecratione autem Episcopi, hæc tria seruanda sunt. *Primo*, ut sacerdos sit. *Secundo*, ut consecratio die Dominico fiat. *Tertio verò*, ut ordinationi tres Episcopi interfint. Archiepiscopus enim ab omnibus prouinciæ suæ Episcopis consecratur, in sede Metropolitana. Consecratio autem, inter Epistolæ recitationem, & Euangelij celebrari solet, sicut etiam cæterorum omnium, præter Romanum Pontificem; qui vnus ante hymnum Angelicum consecratur, & mox ipse incipit Missarum solennia, & perficit consecratus.

3 Ordinationi Episcopi debet interesse Metropolitanus, suosque Suffraganeos ad illum actum euocare: qui si omnes concurrant, bene est; si aliqui venire non possunt sui presentiam per epistolam facere debent.

4 Quod si Metropolitanus, vel infirmitate, vel alia iusta causa ita præpediatur, vt suorum Suffraganeorum aliquem consecrare non valeat, alicui Episcoporum vires suas demandare poterit. Deficientibus autem Episcopis comprouincialibus, si vnum tantum remanere cõtigerit, bello aut aliquo alio casu reliquis sublati, aduocabit vicinæ prouinciæ Episcopos, & cum eis comprouinciales sibi met Episcopos ordinabit.

5 Congregatis igitur die Dominico, hora tertia diei Episcopis, consecratio noui Episcopi fit, vnctione capitis & manuum Chrismate, solennibusq; verbis, precibusq; additis, examinatione etiam præmissa, qualem Carthaginense Concilium Quartum præmonstrauit. Demum, fidelitas Summo Pontifici, secundum formam Gregoriani rescripti, iuramento firmatur. Et sic consecratus, debet Archiepiscopum suum visitare intra duos menses, si in persona suæ consecrationi non aderat. Et si adire ipse non poterit, significabit ei de sua consecratione.

## T I T V L V S X.

### *De Authoritate, & Usu Pallij.*

1 **P**allium est Metropolitanorum insigne ornamentum, quod de corpore B. Petri sumitur, pastoralis officij plenitudinem designans. Et dicitur sumi de corpore B. Petri, quia super altare B. Petri, vbi corpus eius situm est, benedicitur & consecratur.

2 Forma Pallij est, stolla quædam albi coloris rotunda, quæ brachijs Archiepiscopi superposita clauditur ad



modum circuli : habetque quatuor cruces nigras , ante pectus primam , retro secundam , & super brachia duas , quæ significant quatuor affectionum mortificationem in Prælato .

3 Potestas conferendi Pallij soli Romano Pontifici cōpetit ; qui inprimis plenitudinē dignitatis in quatuor Principes Patriarchas , scilicet , Constantinopolitanum , Alexandrinum , Antiochenum , & Hierosolymitanum , elargitur , postea in alios inferiores . Sed & illi quatuor Principes Patriarchæ Sedis Apostolicæ autoritate , in alios Episcopos Metropolitanos in suis Diœce sibus illud conferre possunt , recepto ab illis fidelitatis , & obedientiæ Sedis Apostolicæ Sacramento .

4 Itaque Archiepiscopus non prius plenam eius dignitatis administrationem consecutus dicitur , quam Pallium impetrarit , quia nec prius poterit , Concilium vocare , Basilicas dedicare , & Episcopos consecrare , quam illo insigni plenariæ potestatis decoratus fuerit . Quapropter prospicere debet , ut eius petitionem & receptionem non differat .

5 Eo verò Pallio utetur Primas ille , in quem fuerit collatum , in qualibet sibi creditæ provinciæ Ecclesia : sed non extra provinciam ; & non semper , sed certis dumtaxat diebus . Romanus autem Pontifex semper dum sacra facit , & ubique Pallio uti potest , nullo dierum vel locorum habito discrimine .

6 Solet tamen Pontifex nonnunquam indulgere , ut Archiepiscopus Suffraganeos suos consecraturus , si ad ditionis suæ Ecclesias accedere non possit , in aliena etiam Ecclesia Pallio vestiatur : dummodo eius Ecclesiæ Episcopus hoc ei permittat .

7 Nomini autem alij quis Pallium suum commodet , personæ enim hære debet ; eaq; defuncta simul sepulchro tradi . Quod si ad aliam sedem , seu ecclesiam fortè translatus fuerit , nouo Pallio exornandus erit , quo utatur vetere omisso ; quod debet remanere apud propriam

Ecclesiam, vel ut alij volunt, debet cum ambobus sepeliri.  
 8. Volens aliquid palliando obijcere, debet iurare de calumnia, & intra duos menses obiecta probare: alioquin tenetur ad poenam talionis. Quod si contradictores ista renuerint facere, eorum obiectionibus nequaquam obstantibus ad ipsius traditionem Pallij procedendum erit.

## TITVLVS XI.

### *De Vita & honestate Prælatorum.*

1. **E**xplicato ingressu Prælatorum ad dignitatem ecclesiasticam, consequens est, ut etiam tractemus de eorundem progressu, officio, & sanctimonia vitæ; hoc enim ab illis requiritur, ut quemadmodum præcellunt dignitate, ita etiam præcellant & pietate, innocentia, sanctitate. Quia in sua consecratione obligantur ad statum perfectionis, & nuncupantur columnæ ecclesiæ, ut possint antecellere statum Religionum arctissime viuentium. Hinc Apostolus scribens ad Thessalonicenses præcipit, ut non solum à malo, sed etiam à mali suspitione se abstineant.

2. Debet igitur Episcopus esse iuxta doctrinam Apostoli, irreprehensibilis, hoc est, sine crimine & scandalo, ut cunctam populum cui præest, conuersatione, & innocentia præcellere possit. Qualis enim erit edificatio discipuli, si se magistro intelligat esse præstantiorem? Nam Episcopus instruere & admonere omnes debet. Nemo autem rectè monitoris personam suscipit, nisi qui moribus suis, aliorum errata condemnat. Quod non solum de Episcopo, sed etiam de omnibus, qui domui Dei deserviunt intelligi oportet. Quæ enim in alijs membris Ecclesiæ vacant à culpa, sæpè in Sacerdotibus habentur illicita.



3 Ab improborum quoq; commercijs abstinebit Præ-  
latus : quia cum sancto sanctus eris; malorum verò con-  
sortia vt plurimum bonos corrumpunt . Habebit igitur  
secum honesti testimonij clericos , qui possint irrepre-  
hensibiles inueniri . Et si quando illos , siue etiam laicos  
inter se dissidere contigerit, ad pacem magis, quàm ad iu-  
dicium compellat : inque illis corrigendis plus agat be-  
neuolentia, quam seueritas: plus charitas, quam potestas.  
Neque dominari magis, quam consulere subditis cupiat ;  
ne quod prouisum est ad concordiam, tendat ad dissidiū.

4 Et quamuis Apostolus dicat, *Instruite in spiritu leni-  
tatis*, intelligendum tamen est, Apostolum hæc non de  
correctione & iudicijs dixisse, sed de doctrina & prædi-  
catione verbi . In corrigendo enim Prælatus debet mi-  
scere seueritatem lenitati . Nam misericordiæ multum  
demitur si seueritate omnino sit destituta . Ideoq; recto-  
ribus inesse debet iustè consulens misericordia, & piè sæ-  
uiens disciplina, vt nec in disciplinæ rigore benignitatem  
manusuetudinis, nec rursus in mansuetudine distractionem  
deferant disciplinæ : quoq; seuerius castigare necesse est,  
non sæuiens plectatur animo, sed medentis . Et hoc est  
quod Apostolus voluit scribens ad Timotheum . *A. que ,  
ut secura, increpa cum patientia & doctrina .*

5 Præterea cauendum est, ne Prælatus peruersè agen-  
tes, conuiuendo toleret . Culpam enim facientis habet,  
qui quod potest negligit emendare : & error, cui non re-  
sistitur, approbatur .

6 In primis autem orationi & prædicationi insistat. Nā  
præconis officium suscipit, quisquis ad sacerdotium acce-  
dit . Hinc est quod super Pastores primos, in linguarum  
specie Spiritus Sanctus insedit . Populum itaque Præla-  
tus prædicando doceat : sed illa doceat, quæ a Deo ipse  
didicerit, non quæ illi caro, vel humanus sensus suaserit.  
Eapropter sacris libris iugiter insistere illum oportet .  
Nec enim sufficit Prælatis bona conuersatio, nisi addatur  
scientiæ doctrina . Est ergo proprium munus Episcopo-  
rum

rum prædicatio verbi, iuxta doctrinam Apostoli ad Corinthios dicentis. *Non misi me Dominus baptizare. sed Evangelizare.*

7 Episcopus ergo singulis diebus, vel celebret, vel audiat Missam: obq; sarcinam pastorem non deserat delectationem contemplationis, & orationis, cui plus fidat, quam suæ industriæ, vel labori.

8 Debet præterea Episcopus hospitalis esse & liberalis in egentes & mendicantes, alienam inopiam suam credens. Quomodo enim alijs prædicabit opera pietatis, si ipse ea non exercet, & domum propriam hospitibus aut peregrinis claudit? Domus itaque Episcopi debet esse commune hospitium omnium ut inquit D Hieronymus. Laicus enim unum aut duos recipiens, implevit hospitalitatis officium; Episcopus nisi omnes receperit, inhumanus est.

9 Episcopus non abutatur rebus suis, nec eas inter histriones, venatores, aut aucupes dispenset: pauperes potius in hospitio recipiat, & facilius exemplo suo ad hospitalitatem subditos attrahat. Domus enim Episcopi, & conuersatio illius, est magistra publicæ disciplinæ; & quicquid fecerit, id sibi omnes faciendum putant. Hinc Diuus Gregorius. Validiora sunt exempla quàm verba; & plenius operatione docetur, quàm voce.

10 Sobrius quoque sit Episcopus, non vinolentus; & abstinens à spatiosis domibus, lautis conuiujs, & epulis acquisitis multo labore, quia teste Iob, *Non inuenitur sapientia in terra suauiter viuentium*: idest, in hominibus vacantibus epulis & delicijs huius mundi: qui lege euangelica proijciendi sunt in tenebras exteriores, *ubi erit fletus & stridor dentium*. Peccat igitur Episcopus si excedit in victu vestitu, domo, & familia,

11 Non sit etiam percussor, & ad vindictam facilis: immo in omni genere rerum agendarum prudentiam secum habeat. Si enim mancum, aut debilem, Sancta contingere nequaquam lex Diuina permittit, quanto magis  
doni



43.  
doni coelestis dispensatores esse non conuenit, id quod  
est deterius, mente debilitatos ?

12 Sicut autem Episcopum nullo errore conuenit in-  
uolui, ita nulla debet cupiditate corripitur: & propterea lu-  
cri cupidus esse prohibetur, & alicui etiam honesto ne-  
gotio (puta, medicina, chirurgia, aduocatione, tabellio-  
nato, procuratione, aut mercimonio) vt sibi victum &  
necessaria quærat, operam dare. Nam & Dominus ne-  
gotiatores de templo verberatos expulit; & Apostolo te-  
ste, *Nemo militans Deo, implicat se negotijs secularibus.*

13 Pudicus quoque debet esse, & moribus & verbis  
pudorem præferens. Eapropter Moguntino Concilio  
statutum legiur, vt nullus Sacerdos foeminas, de quibus  
suspicio potest esse, retineat. Sed neque matrem, aut  
amitam, aut sororem retinebit; quia in illis, instigante  
diabolo, scelus perpetratum reperitur, aut in pedisequis  
earum. Itaque domesticarum quoque personarum im-  
moderaram familiaritatem vitabit.

14 Oportet item Episcopum, ceterosq; secclesiasticis  
officijs mancipatos, per decentiam habitus extrinseci,  
morum intrinsecam honestatem indicare. Et ideo, si, præ-  
terquam ex causa vrgenti, (puta, terras infidelium, vel  
hæreticorum transeundo) indumentis, præter ordinis  
ac officij decorem præsertim publicè luxurietur, illorum  
impudentia varijs modis, non minus recentioribus, quã  
antiquis Pontificum decretis coercetur.

15 In summa, cum pro populo Episcopi suffragatores  
ad Deum parentur, necesse est, vt omni genere virtutum  
eius gratiam habere nitantur: quia cum is qui displicet,  
ad intercedendum mittitur, irati animus ad deteriora  
Prouocatur.



*De Officio, & Potestate Ordinarij.*

1 **V**ideamus nuuc, quæ sint Prælatorum partes, & quæ potestas, & Ordinariorum in primis, id est eorum, vt Ostiensis docuit, qui suo iure, vel Põtificis beneficio iurisdictionem vniuersaliter exercere possunt: cuiusmodi sunt Legati apostolici, Patriarchæ, Primates, Metropolitæ, Episcopi. Item quibus collegiatæ Ecclesiæ Præfectus, quamuis Episcopo inferior, eiq; subditus. Nam & is iurisdictionem in plebem suam habet, eiusq; excommunicationem in subditos contortam, etiam Episcopus seruare tenetur: nec potest eam auferre, nisi excommunicatus satisfecerit, & ipse Prælatus admonitus de relaxatione ab Episcopo fuerit.

2 Gubernacula verò episcopalia nonnisi maioribus populis, & frequentioribus ciuitatibus præsidere oportet, ne dignitas vilescat absque Clero numerosiore, & Diœcesi, cui dominetur cum imperio spirituali.

3 Horum igitur Ordinariorum, qui episcopali gradu sunt illustrati, officium, & potestas erit, in suis Diœcesibus adulteria, hæreses, & scelera inquirere, vlcisci, & iudicare, præsertim vbi officium Sanctæ Inquisitionis non est separatum. Et cum opus fuerit, manum quoque secularem sibi auxiliarem adsciscant.

4 Item hæc sunt iura Episcoporum, in ecclesijs & sacellis suæ Diœcesis canonicam obedientiam habere, ac institutionem, & destitutionem (cum Capituli tamen sui consilio) correctionem & reformationem, & censuram ecclesiasticam, & iurisdictionem causarum omnium ad forum ecclesiasticum de iure spectantium, Sacramentorum quorundam collationem, Synodum, & Synodatici, seu Cathedratici nomine (vbi vsus & consuetudo est) certam portionem, quartam decimationum, & mortuario-  
rum



rum; visitandi etiam ius, & visitationis nomine procur-  
 rationem moderatam, & charitatis subsidium.

5 Item possunt Episcopi suæ Diocesis Ecclesias vnire:  
 Ecclesias, altariaq; sacrare, & post pollutionem abluerè, &  
 purgare. Chrisma, Oleum Catechumenorum. & Infirm-  
 orum conficere, ad Ordines promouere, & literas di-  
 missorias dare. Abbates, & Abbatissas, & Moniales be-  
 nedicere, & sacrare Episcopos; aliosque sibi subditos  
 Prælatos confirmare. Cum illegitimis benignè agere, vt  
 ad minores ordines, simpliciaque beneficia promoueri  
 possint. Causas matrimoniales cognoscere; hæ enim  
 præcipuè Episcopo cognoscendæ referuantur. Publicas  
 poenitentias iniungere, indulgentiarum literas concede-  
 re. Multaq; alia munia exercere.

6 Cum autem Episcopus in tota sua Diocesi iurisdic-  
 tionem ordinariam habeat, dubium non est, quin quo-  
 cunque in loco Diocesis non exempto possit per se, aut  
 per alium, pro tribunali sedere, causas fori ecclesiastici  
 audire; personas ecclesiasticas, si earum merita exposcant,  
 capi iubere, & in carcerem detrudi; cæteraq; ad eius offi-  
 cium spectantia exercere

7 Sanxit quoque sacrosancta Synodus Tridentina, vt  
 nemo secularis Clericus, cuiusvis dignitatis, vel Clericus  
 regularis cuiusvis Ordinis, & Societatis, extra monaste-  
 rium degens, (cum autem de Regularibus seu Religiosis  
 iura loquuntur, intellige etiam Societatis Iesu Clericos  
 includi per Bullam Urbani VIII. Anno Christi 1634. publi-  
 catam; nisi per expressum sint in casu aliquo exempti)  
 etiam sui Ordinis priuilegij prætextu censeatur tutus,  
 quominus, si deliquerit, ab Ordinario loci, tanquam su-  
 per hoc à Sede Apostolica delegato, secundum canoni-  
 cas sanctiones visitari, puniri, & corrigi valeat.

8 Archiepiscopus verò, & si in omnes prouinciæ suæ  
 Suffraganeos habeat iurisdictionem, in suorum tamen  
 Suffraganeorum subditos potestatem non habet; qui-  
 busdam exceptis articulis. Sic & Patriarcha non potest  
 de

de causis eorum cognoscere, qui Archiepiscopi sui, vel Episcopi sub ditione sunt: nisi appellatione ad eum legitime interposita: aut consuetudinis alicuius, vel priuilegij iure.

9 Si contingat varias linguas, & ritibus nationes, eiusdem tamen Christianæ religionis, & doctrinæ cultores, eandem ciuitatem, vel Diocesim incolere, Pontifices eorum locorum, viros idoneos conquirere debent, qui pro linguarum, & rituum varietate eis diuina officia celebrent, & sacramenta Ecclesiastica propinent, instruentes eos verbo pariter, & exemplo.

10 Episcopis qui se pontificijs quibusdam muneribus obeundis non esse idoneos sentiunt, puta, verbo Dei ad populum ferendo, Ecclesijs inuiscendis, reatibusq; subditorum audiendis, & poenis condignis ob crimina inurendis: vel qui aliqua iusta causa perpetuo impediti sunt, ægritudinis fortè, vel senij, vel alia: idoneos viros de Capituli sui, vel maioris partis consilio, & assensu, auctoritate apostolica sibi adsciscant, qui has partes eorum vice strenuè obire possint, qui homines Coadiutores, vel Cooperatores appellantur, & de prouentibus Prælatorum, quibus cooperantur, sumptus moderatos capiunt. Cuiusmodi virorum copia, vt ne vnquam desit, pro vñibus Ecclesiæ, multi his artibus, & disciplinis optimis præditi in Ecclesijs instituendi sunt.

11 Coadiutores verò Episcopis, alijsq; Prælati, non aliàs cum futura successione dari solent, nisi causa prius à Summo Pontifice cognita. Hinc generaliter sciendum est, neminem esse in officio, quod præten dit à Sede apostolica sibi collatum, facile accipiendum, qui apostolicos codicillos non ostendat: nisi, & qui eos receperint, & ipsi recepti poenas canonicas experiri velint.





*De Officio Archidiaconi.*

**Q**uoniam verò grauis, & lata est pastoralis officij cura, rectè constitutum est, vt aliqui in Ecclesia sint, qui vnà cum Episcopo onus ferant, & sui Prælati valeant subleuare sollicitudinem. Talis est Archidiaconus, qui maior post Episcopum, & eius à iure Vicarius constitutus est. Cuius vigilantia, & solertia, vsq; adeo in domo Domini excubare debet, vt *oculus Episcopi* non immerito meruerit appellari.

2 Archidiaconus itaque Cleri vniuersi curam habet, tam in vrbe, quam in parochijs: præest Archipresbytero, Primicerio, Custodi, Sacristæ, & vt iniuncti sui muneris sollicitudinem diligenter exequantur, dispiciet. Imperat Subdiaconis, & Leuitis: parochiarumq; sollicitudo & ordinatio ad ipsum perlinet. Iurgia singulorum cognoscit, & quæ corrigenda aut emendanda viderit, corrigere, & emendare tenetur: instaurandisq; Ecclesijs præest.

3 Quod si qua fuerint ita ardua, quæ per eum commodè non possunt terminari, ad Episcopum suum deferret. Ipse Leuitas de eorum officio instruit, & iubet eos sacras vestes induere; omneq; officium ecclesiasticum ipse disponit. Lectiones, aut responsoria in matrice Ecclesia præscribit, vel audit, ita vt nemo Euangelium sacræue Epistolam, aut responsoria, aut aliam quamlibet lectionem in Ecclesia legere, aut canere possit, nisi prius ab Archidiacono exauditus. Acolythis quoque ipse officia diuidit, præcipiendo quis eorum candelabra, quis thuribulum gestare, & quod quisque minorum in Ecclesia munus obire debeat.

4 Qui ad sacros Ordines promouendi sunt, eius examini subiei debent. Eius quoque officij est, examinatio eorum qui sunt Ecclesijs præficiendi, quos nam ipse coram Episcopo sistere debet. Idem Prælatos in sede locat

nam missio in corporalem beneficiorum, & officiorum possessionem, eius officij est. Non tamen aut animarum curam citra Episcopi mandatum committere potest, aut in aliquos sententiam excommunicationis promulgare; aut aliquem extero Episcopo sistere debet aut commendare ordinibus suscipiendis, aut in monasteria iurisdictionem habere; nisi consuetudine præscripserit.

5 Dicitur itaque Archidiaconus, quasi princeps ministerij, & administrationis iurisdictionis: & ideo non potest ad nutum Episcopi remoueri, quia in dignitate positus est primaria post ipsum, ante Præpositum, & Vicarium in spiritualibus.

6 Debet quoque Archidiaconus quolibet tertio anno, si Episcopus non poterit, vniuersam Dioecesim circumire visitando, & cuncta, quæ ordinatione, vel emendatione indigere viderit, secundum canonicas sanctiones corriget. Et si Episcopi autoritas accesserit, excommunicationis etiam sententiam feret.;

## T I T V L V S XIV.

### *De Officio Archipresbyteri.*

1 **A**rchidiaconus olim inferior ordine habebatur Archipresbytero, quia tantum Diaconus erat in dignitate tamen, & ad administrationem propter curam fori contentiosi maior habebatur, cum Archipresbyter solum exerceret curam fori poenitentius. Nunc postquam dignitas archidiaconalis deuenit iam ad Presbyteros, nemo est qui dubitet Archidiaconum præcellere Archipresbytero. Cæterum quia & hic Prælati sui curam circa spiritualia subleuat non abutimur se. Archidiacono dicitur, præsertim cum tiara, quoque episcopali, ex permissione Sedis Apostolicæ, utitur.

v Sciendum autem est, quod Archipresbyter in alijs pro-



prouincijs, præsertim Septentrionalibus, in Cathedralibus, & Collegiatis Ecclesijs, vocatur Præpositus, qui in diuinis gerit vices Episcopi, sed quia non est in iurisdictionalibus, nec potest procedere contra Canonicum, vel alium delinquentem, quemadmodum Archidiaconus (nisi habeat talem iurisdictionem ex priuilegio, vel consuetudine, aut præscriptione) ideo inferior Archidiacono dicitur esse, tamen cæteris Præsbyteris aut Canonicis cminet, ac præest.

3 Duplex autem est species Archipresbyterorum, alij urbani sunt, & alij rurales, seu exteri. *Urbani sunt*, qui Præsulis sui absentia, circa diuina in Cathedrali vicem sustinent, aut præsentis curam minuunt, vt officium, inchoando, celebrando, benedicendo in matutinis, quando legi debent lectiones, & cunctis prouidendo, quæ sacerdotum ministerio perfici debent. *Exteri sunt*, qui circa singulas plebes in oppidis aut villis constituti, nō solum vulgi sollicitudinē gerunt, verum etiam presbyterorū, qui per minores titulos gubernant plebem, vitam iugi circumspectione custodire debent, (& vulgo dicuntur in partibus Septentrionalibus, *Decani Rurales*) qui licet suis præsent plebibus, vt Episcopus matrixi præest Ecclesiæ, nihil tamen contra sui Præsulis ordinare decretum audire debēt.

4 In ciuitate vbi habetur Archipresbyter Collegiatam gubernans Ecclesiam, cura animarum dicitur pertinere ad omnes Canonicos, quibus ille potest præcipere vt administrent sacramenta, etiam sub poena excommunicationis, cum ipse non valeat omnibus ministrare. Vnde si quis ex eius negligentia sine confessione moriatur, reus erit animæ illius.

5 Idem cæteris sacerdotibus poenitentiam iniunget: horas dicendis officijs partietur: sacrisq; diebus aut ipse missam solennem dicet, aut alij hoc munus delegabit. Et quæ corrigenda viderit, Episcopo renunciabit.

6 Admonendi sunt autem ij, qui Præposituræ alicuius administrationem canonicè volunt obtinere, vt non so-

50  
lum nomen, verum etiam ordinem habere studeant. Unde nisi, qui Archidiaconatum tenenti, Diaconi; aut qui Archipresbyteratum; presbyteri infra annum fiant, amittent honorem, etiam si iusta causa prohibente presbyteri, aut diaconi esse non potuerunt.

## TITVLVS XV.

### *De Primicerio, & Custode.*

1 **P**rimicerius, qui & alio vocabulo à quibusdam appellatur Cantor, seu Præcentor, Archidiacono subest; quemadmodum etiam Archipresbyterum ei subesse diximus; curamq; hanc præcipuam gerit, vt Diaconis docendi, reliquisq; gradibus, & ordinibus Ecclesiasticis incumbat, & iuxta consuetudinem Diaconis præscribat lectiones, quæ ad nocturna officia Clericorum pertinent.

2 Eiusdem officium est præfigere, qua hora signum Campanæ officijs celebrandis dari debeat, & ipsorum officiorum munia per Clericos diuidere.

3 Item ordinem, & modum canendi in Choro præfigere pro solemnitate, & tempore. Et si qua re Basilicis faciendis opus esse viderit, Sacerdotem monere. Ipse Epistolas Episcopi pro diebus ieiuniorum Sacerdotibus, Parochis, per Ostiarios reddi curabit. Clericos, quorum errores cognouerit, idem coercebit: quos verò ipse coercere non valebit, eorum commissa Episcopo retegat.

4 Basilicarum ipse ponet custodes; & tabulam, quam matriculam vocant; ipse disponet. Eo autem absente, hunc curabit qui illi lege, vel eruditione proximus fuerit.

5 Custos verò Ecclesiæ is dicitur (qui & thesaurarius vocatur) cui ea, quæ Ecclesiæ competunt, custodienda traduntur; munimenta, & priuilegia, libri, regestra, census; vasa & vestes sacræ, omniaq; ornamenta quæ in Sa-



crario asseruantur. Hic Sacristam seu Vicecustodem constituit, atque Ostiarios Basilicarum; thus incendendum, & luminaria per eos præparat; curam Chrismatis suscipit conficiendi, & Baptisterij instruendi. Subest autem Archidiacono, vt & alij.

6 Vicecustos seu Sacrista hæc propria munera habet, vt horarum Canonicarum signa det tintinnabulorum, pulsatione Archidiaconi iubente. Pallia, vel linthea altaris, omniaq; Ecclesiæ vrensilia, nitide ac decenter perpetua custodia seruare debet: parietes & pauimentum, purgare sæpeseptius ostiarijs iubebit. Panis & vini ad Missæ sacrificium copiam suppeditabit. Eleemosynas, & proventus diuersos Archidiacono consentiente presbyteris diuidet; & in omnibus se vigilem præstabit, ne qua negligentia aut soccordia in Ecclesia Dei notari possit.

## TITVLVS XVI.

### *De Officio Vicarij.*

**D**VAE sunt species Vicariorum. *Alij à iure constituti*, qui proprio nomine deseruiunt Ecclesiæ, vt Archidiaconus, Archipresbyter, & alij de quibus supra egimus latiùs. *Et alij constituti ab homine*, vt sunt Vicarij Generales Episcoporum, Archiepiscoporum, Patriarcharum, in Spiritualibus. Et Vicarij foranei, vulgò Officiales, qui in diuersis prouincijs magnæ alicuius Diœcesis (quales sunt in partibus Septentrionalibus, & præcipue in Polonia) vices Episcopi sui in spiritualibus gerunt. Itemq; Parochorum, & Canonicorum vicarij, qui sacramenta administrant populo, & in choro loco Canonicorum (vt est vsus in Polonia) officium diuinum decantant. Quibus addas, & tertiam speciem vicariorum, qui à sede Apostolica ad certam prouinciã regendam deputantur.

2 Cum enim frequenter eueniat Episcopos, aliosue inferiores Prælatos necessarijs causis impeditos, non posse officijs suis tam in diuinis celebrandis, ministerijs, quàm in iure dicendo superesse, idcirco permittunt leges aliorum opera vti, & sibi legere viros idoneos, quibus tutò possint vices suas mandare, quos propterea vicarios vocant. Qui *vel sunt Perpetui*, appositij beneficijs vnitis alijs Ecclesijs, vel Collegijs Religiosorū. *Vel temporales*, qui solummodò ad tempus, & voluntatem, aut obitum constituentis fiunt. Prout & officium vicariatus Episcopi durat solummodò viuente Episcopo. Reuocatur autè translatione ipsius ad aliū Episcopatū: vel cessat obitu illius.

3 Licet per generalem officij commissionem vicario factam, causarum cognitio transferatur, potestas tamen Episcopalis, inquirendi, corrigendi, aut puniendi aliquorum excessus; seu aliquos à suis beneficijs, vel administrationibus amouendi; vel beneficia conferendi (nisi specialiter concessa sit) non transfertur.

4 Cum autem Episcopi, & sui Officialis Generalis idē sit auditorium, & subsellium, tunc à Vicario Generali non ad Episcopum, sed ad Archiepiscopum erit appellandum. Ab Officialibus verò foraneis, ad ipsum cui immediate subiacent Episcopum datur appellatio.

5 Habens curam animarum in diuersis Ecclesijs, non potest Vicarius esse: neque commendarius alicuius Parochi. Similiter & Laicus Vicarius aut Commendarius esse nequit: quia indecorum esset hominem laicum viros Ecclesiasticos iudicare, aut gubernare. Prout & Honoriana constitutione cauetur, vt Episcopus eum, qui perpetuam vicariam obtinet, per subtractionem prouentuum, vel ipsius vicariæ ablationem compellat, vt se in presbiterum promoueri faciat.





## TITVLVS XVII.

*De Coadiutore.*

**I**Nter illos qui adiuuant Episcopum in sua cura pastoralis, connumeratur etiam Coadiutor. Accidit enim persæpe vt Episcopus senio, vel corporis valetudine impeditus, aut sanè mentis consilio destitutus. super suum gregem excubias ducere non possit, captopter vir prouidus, & honestus illi in Coadiutorem adiungendus est, per quem tam Episcopo, quàm populo vtiliter consulatur. Cuius datio, cum de causis maioribus esse constet, ad Sedem Apostolicam, nulla obstante consuetudine, referenda est.

2 Duplex autem est Coadiutor, *Perpetuus scilicet*, cum futura successione, vt post cessum, vel decessum Coadiutori conferatur beneficium Coadiutori. Et tales dari prohibentur, quia successionem, & quasi hæreditatem petunt, non gloriam Dei. *Et Temporalis*, quia nulla spe futuræ successionis ad labores pro Episcopo obeundos datur legitimè Et talis cum consensu Episcopi, habet liberam potestatem in spiritualibus, & temporalibus.

3 Non solùm Episcopis datur Coadiutor, sed etiam, si res exigat, inferioribus Prælati; si vel morbo aliquem contigerit impediri, vt ecclesiasticis ministerijs, vel nullo pacto, vel nonnisi cum scandalo interesse possit. Ita tamen res temperanda erit, vt vtrique, coadiuto scilicet, & Coadiutori, iuxta facultates Ecclesiæ, vitæ necessaria ministrantur.

4 Olim quibus cum Episcopis communis erat ministeriorum dispensatio, Corepiscopi, & quasi socij laborum vocabantur: quorum nunc vsus, & in Romana Sede, & in alijs Orbis Ecclesijs sublati sunt.



## TITVLVS XVIII.

*De Translatione Episcopi.*

1. **H**Atenus de spiritualibus coniugij foedere egimus, quod inter Episcopum, & ecclesiam cōtrahitur, initiaturq; electione, vel postulatione; ratificatur confirmatione, & consummatur consecratione. Similiter vidimus de moribus Prælatorum, deq; vicarijs, & Coadiutoribus Episcoporum; nunc necesse est vt tractemus quibus modis Episcopus ab ecclesia remouetur, & sic quomodo tale coniugium præter mortem dissoluitur. Contigit autem id tribus modis, translatione, Renunciatione, & Depositione seu Degradatione; de quibus singulis videamus.

2. Antiquitus non licebat Prælati ecclesiæ transire ad alias ecclesias, tum propter obligationem personaliter seruiendi ecclesiæ, quàm in suam curam quis susceperat; tum ob vinculum matrimonij spiritualis per ingressū cōtractū. Nunc Translationes (quæ, & mutationes nuncupari possūt) institutę sunt vtilitatis, & necessitatis gratia.

3. *Vtilitatis*, cum Episcopus ab ea ciuitate, cui præpositus est, in aliam transfertur, in qua magis proficere posse verisimiliter existimatur. Sic olim Princeps Apostolorum de Antiochena ciuitate se Romam transtulit, vt scilicet ibidem copiosius proficere posset.

4. *Necessitatis*, cum vrbe capta, ab hoste ecclesia deuastatur. Sed hoc casu, si ciuitatem, de qua effugerit Episcopus, ab hostibus liberari, & ad priorem statum contigerit reuocari, ad eam expulsus redire cogitur.

*Et itaque Translatio*, de sede in sedem facta commutatio. Vel aliter. Est ab vna ecclesia ad aliam ecclesiam, regulariter facta transitio. Id est, cum scitu Sedis Apostolicę. Ad solum enim Romanū Pōntificem Episcopos transferre pertinet. Quod obtinet non solum si Episcopus est cōsecratus, verum etiam si tantum Canonice fuit electus,  
& con-



& confirmatus. Cui, vt supra diximus, post electionem, & confirmationem inter personas eligentium, & electi coniugum sit spirituale contractum.

6 Quicumque autem avaritia ducti, aut ambitione impulsī, ecclesie suae mediocritate despecta, ad maiorem sese plebem propria auctoritate transtulerint, etiam si à populo fuerint attracti, à Cathedra debent repellī aliena, & carere propria: vt nec illis praesideant, quos per superbiam spreuerunt; nec illis, quos ob avaritiam, vel ambitum concupuerunt.

7 Non absimilis iuris ratio obtinet in praesbyteris, & ceteris infra Episcopalem dignitatem constitutis. Nam si vel qualibet causa propria quis auctoritate cum altero suum beneficium permutare voluit: vterque proprii beneficii iacturam faciet. Beneficiorum enim, & praebendarum permutationes generaliter fieri prohibentur; praesertim pactione praemissa, quae circa spiritualia, vel spiritualibus annexa, semper labem Simoniae continet. Licet possit Episcopus de vno loco ad alium aliquos transferre, vt qui vno loco minus sint vtilēs, alibi se valeant vtilius exercere.

8 Debet autem permutatio esse libera, & sine fraude, vel alio pacto illicito facta. Si enim esset fraudulenta, vel metu aut dolo facta, esset nulla. Et idem est de renuntiatione, ac resignatione sentiendum. Idcirco si permutatio beneficiorum completa fuerit ex vna parte, & per alterum fiat quo minus impleatur, restituitur pars ad suum beneficium, cum iura deceptis, non decipientibus subuenire debeant.

9 Permutatio fiat cum iusta causa, pro vtilitate, seu necessitate ecclesiae principaliter, non personarum permurantium. Quod si aliqua beneficia ex causa permutationis ab aliquibus resignata, alijs quā ipsis permutare volentibus conferantur, nullius firmitatis erit collatio.

10 Quini no, si in Dioecesi aliqua, quidam forte auctoritate Apostolica beneficia proxime vacatura expectant:

stant : illi tamen, qui secundum formam iuris sua beneficia in eadem Diœcesi ad Ordinarij collationem spectantia, liberè ac sine fraude in manibus Episcopi resignauerint, non nisi ex causa permutationis resignaturi, ab huiusmodi expectantibus circa faciendam permutationem minimè impediuntur,

## TITVLVS XIX.

### *De Renunciatione.*

1. **R**enunciatio est, rei vel iuris proprij spontanea facta refutatio. Alienis siquidem rebus, quæ in sua facultate, & potestate non sunt, nemo renunciare potest. Ita, si coactus renunciasset, renunciatio esset nulla.

2. Causæ verò propter quas Episcopus potest à Summo Pontifice cedendi licentiam postulare, sunt sex. Conscientia criminis. Debilitas corporis. Defectus scientiæ. Malitia plebis. Graue scandalum, & Irregularitas personæ; quas omnes causas Innocentius III. epistola sua ad Arelatensem Episcopum, dilucidè complexus est. Alias Prælati, qui Summo Pontifici immediatè subest, pro crimine quantumuis graui, non potest ab alio, quàm ab ipso Summo Pontifice, Præfecturæ quam gerit, vacationem impetrare. Comprehenduntur autem supradictæ sex causæ his versibus.

*Debilis, ignorans, male conscius, Irregularis*

*Quem mala plebs odit, dans scandala cedere potest.*

3. Crimen conscientiæ est illud, propter quod ipsius officij executio post peractam poenitentiam impeditur, vt si homicida sit, vel Simoniacus, vel intrusus, adulter, aut concubinariarius, vel aliquod aliud peccatum committat quod ipso iure irrogat infamiam, & cum post monitionem non resipiscens sustinet excommunicationem.

per



per annum vel vltra . In alijs verò criminibus de quibus potest poenitere remanendo in officij administratione, non tenetur quis petere cessionem .

4 Non absimilis ratio in debilitate corporis obtinet : nam non quælibet, sed solum illa legitimam renunciandi præstat causam, per quam quis ad exequendum officium pastorale redditur impotens . Siue illa debilitas proueniat ex morbo accidentali, siue ex senectute . Non tamen omnibus debilibus permittitur officium, vel dignitatem suam arbitrio suo deponere; nam & senes, & valetudinarii si Ecclesiæ sunt vtilis, & necessarij, vacationem ab officio non impetrabunt .

5 Magnus quoque defectus scientiæ tribuit legitimam causam renunciandi : quia cum illa circa spiritualium administrationem sit potissimum necessaria, circa curam temporalium opportuna; Præsul, qui in vtrisque commissam sibi debet Ecclesiam regere, salubriter ei renunciat, si quomodo ipsam regere debeat ignoret . Quamquam autem desideranda sit eminens scientia in pastore, in eo tamen mediocris tolerari potest, quia imperfectum scientiæ potest supplere perfectio charitatis . Tenetur autem Episcopus addiscere cum potest, quia alios docere tenetur; ideoque aliorum doctrina indigere non debet . Alias si non habet cōpetentē literaturā, remoueri potest,

6 Similiter malitia plebis iustam tribuit renunciandi causam, præsertim quando plebs tam duræ ceruicis existit, vt apud ipsum amplius proficere non possit . Hoc fecisse leguntur etiam Apostoli ipsi, qui Iudæis incredulis & duræ ceruicis dixerunt . *Ecce conuertimur ad gentes, quia verbi Dei vos indignos fecistis*, vt legitur in Actis cap. 13 . Vnde si quis aperto mortis in discrimine versatur, dum Episcopatus sui administrationem strenuè gerere studet, ac in Ecclesia sua morari conatur, poterit missionem impetrare . Quamdiū autem est aliqua spes profectus, non potest Prælatus renunciare, quia iuxta D. Gregorij doctrinam, æquanimiter portandi sunt mali .

7 Item pro graui scandalo virando, cum aliter sedari non potest, licet Episcopo petere cessionem, ne plus temporalem honorem, quam æternam videatur affectare salutem. Alioquin vtilius scandalum nasci permittitur, quàm vt veritas relinquatur. Quia veritas bonæ vitæ, vel iustitiæ nunquam deferenda est; veritas verò disciplinæ nonnunquam; puta, quando multitudo peccantium est in causa, non tamen volunt defendere malum, quod faciunt, vt sunt commestrationes, ebrietates, fornicationes, & alia peccata. Si verò volunt defendere malum, quod faciunt, & illud excusare quasi ex auctoritate, tunc multitudini parcendum non est, propter scandalum.

8 Est autem scandalum, secundum Diuum Hieronymum Græcum verbum, quod offensionem, siue ruinam significat. Et definitur ab eo sic. Est dictum vel factum minus rectè, præbens occasionem ruinæ. Et quia peccatum contra charitatem est, qua Prælati tenentur complecti subditos; & propter id debet renunciare Episcopatum, non exacerbare subditos temeritate sua.

9 Item ob Irregularitatem potest renunciari, puta, si sit bigamus, & non manifestauit impedimentum temporis promotionis. Similiter, si de legitimo matrimonio non sit natus. Vnde imponi sibi debet poenitentia, cum dispensatur. Tamen si culpa talis, & causa, id est, ipsa Irregularitas occulta est, dispensatur cum ipso propter vtilitatem Ecclesiæ, si suum laudabiliter impleuit officium.

10 Cæterum, ob alias causas renunciationem affectantes audiendi non sunt, dum fortè aliqui laboris angustias declinantes, ad otium, aduersus gloriosi Pontificis Martini exemplum, aspirare contendunt, qui dixit ad Deum. *Domine, si adhuc populo tuo sum necessarius, non recuso laborem.*

11 Quando autem aliquis Episcopus, humilitatis, & poenitiæ causa, Apostolica concessione, ab episcopali sede, ad monachalem descendit subiectionem, ille iam rursus, verante Constantinopolitano Concilio, non potest ad episcopalem dignitatem reuerti, quia ob humilitatis



iustmodi ingressum dicitur mortuus mundo.

12 Sed si quis persecutionis rabie saeuente; vel praepeditus aduersa valetudine corporis, non potuit administrare Episcopatum, & propterea Sedis apostolicae auctoritate factus fuit Monachus: persecutionis, vel egritudinis impedimento cessante, potest reuerti ad episcopalem dignitatem. Cum status Episcopalis sit altioris ordinis, quam sit status Religiosorum. Hinc & Monachus qui nunquam fuit Episcopus, bene potest esse Episcopus, quia ad altiorem, & perfectiorem gradum promouetur. Qui verò conuictus est de crimine, & ob id detrusus est in monasterium, ille non poterit amplius redire ad Episcopatum.

13 Ceterum, qui humilitatis causa, transiit ad Monachatum de licentia Papae, is licet per se non possit redire ad Episcopatum, poterit tamen de mandato Papae. Sicut & ille, qui propter doctrinae defectum locum regiminis deferens, auctoritate apostolica, ad otium se contulerat monachale, si per exercitium lectionis scientiae reperit margaritam, proculdubio denuo vocatus ad Cathedram, pastorem redire poterit.

14 Rursus, si quis cupiditate parentum, simoniace fuerit Episcopatum adeptus ignoranter, & hoc comperito de licentia superioris illum dimittens, obseruantiam elegerit regularem: Si fiat postea per poenitentiam aptus ad officium pastorale, licet ad primum reuerti non possit; alium tamen Episcopatum bene consequi potest.

15 Renunciatio autem ad eum fieri debet, ad quem spectat & confirmatio. Vnde Abbas, qui Romanae immediate subditus est Ecclesiae, nisi licentia à Romano Pontifice legitime impetrata, sui regiminis oneri renunciare minime poterit. Quod si Episcopo subiectus sit, cum eiusdem permissione locum suum licito iure poterit relinquere. Et hoc generale est in praebendis, & ceteris minoribus beneficijs, ut apud eum fieri debeat renunciatio, ad quem pertinere dignoscitur confirmatio. Ex quo ap-



60  
parere potest, quod resignatio facta laico; nullam iuris  
obtinet firmitatem.

16 Papa etiam potest libere renunciare Papatui, in ma-  
nibus eligentium, si se insufficientem ad regimen vniuer-  
salis Ecclesiæ reperit. Licet pauci reperiantur, qui hoc  
fecerunt.

17 Potest autem quis, non solum per semetipsum re-  
signare, verum etiam per procuratorem. Nec intererit  
vnus constituatur, an plures in solidum, vel coniunctim.  
Et licet postea poenitentia ductus procuratorem reuoca-  
re voluerit, si procurator iam renunciationem fecit, cessio  
per eum facta iam tenebit. Nisi forte dolo malo factum  
fuerit, quod ad procuratorem reuocatio ante cessionem  
peruenire non potuerit.

18 Qui verò impetrauit cedendi licentiam, & postea  
poenitentia ductus renunciare non vult, talis Conciliorū  
statutis ad cedendum compellitur, ne authoritas superio-  
ris sit in contemptu, & illusione.

---

## TITVLVS XX.

### *De Depositione seu Degradatione.*

**V**ltimus modus quo Episcopus ab Ecclesia re-  
mouetur, est Depositio seu Degradatio, quæ  
instituta est ad similitudinem exauctorationis  
militaris. Quando enim aliquis crimen contra dignita-  
tem armatæ militiæ committit, tunc illi & ordo militaris,  
& insignia militaria ob delictum detrahuntur. Sic cum  
Episcopus de gradu deicitur, coniugium inter illum, &  
Ecclesiam dissoluitur; priuaturq; & dignitate episcopali,  
& ordinibus sacerdotalibus.

2 Degradatio itaque est, omnibus gradibus, & ordinibus  
spoliatio. Quæ licet videatur idem esse cum Depositi-  
one, hanc tamen secundum proprietatem verbi differen-  
tiam

tiam habet : quod degradatio propriè dicitur respectu Ordinum, depositio verò respectu honorum & dignitatum. Item, depositio propriè est verbalis, quæ non eximit Clericum à potestate iudicis ecclesiastici, ut cum iudex secularis puniat cum solemnitate: degradatio autem est actualis, quæ eximit Clericum à manibus iudicis ecclesiastici, & tradit curiæ seculari.

3 Ideo duplex est Degradatio. Verbalis & Actualis. *Verbalis degradatio est*, cum ab eo qui auctoritatem habet, assistente certo Episcoporum numero, (puta duodecim) depositionis fertur sententia. *Actualis verò, sive, sollemnis est*, cum non solum fertur sententia, verum etiam ab eo, qui degradandus est, vestes, & singula insignia sui Ordinis gradatim auferuntur. Cuius ordo ac series, latissime Bonifacii VIII. responso, ex Concilio Carthaginensi secundo desumpta, ad Arelatensem Episcopum describitur.

4. Et hæc Degradatio, licet auferat omnia privilegia clericalia, tamen non auferat characterem Ordinis, nec votum continentiae. Ideo degradatus non poterit contrahere matrimonium si erat in sacris; & multo minus depositus ab ordine.

5 Quod si degradandus est in minoribus tantum constitutus, ex forma Sacri Concilij Tridentini, proprii Episcopi sententia, absque ullorum Episcoporum interuentu, satis erit. Similiter in degradatione Sacerdotis, ob causam hæresis, solus Episcopus conuocatis Abbatibus, & alijs Prælatibus, virisque suæ diocesis pietate, ac bonis artibus instructis, degradare poterit.

6 Clericus igitur ob graue flagitium degradatus, cum ab ecclesiastico foro fuerit projectus, seculari curiæ traditur puniendus. Vnde celebranda erit talis degradatio seculari præsentate potestate: & cum perfecta fuerit, pronuntiandum ut secularis iudex degradatum, tanquam clericali privilegio exutum, in forum suum recipiat puniendum. Pro quo tamen Ecclesia debet intercedere, ut citra mortis periculum in eum sententia moderetur. Et si impe-



impetrauerit, & degradatus poenæ superstes fuerit, ab administratione sui Ordinis debet abstinere. Officium autem dicere non solum non vetatur, verum etiam grauius peccat non dicendo.

7 Degradatio eiusmodi non solet fieri, nisi in tribus criminibus. Falsi commissi in litteris Apostolicis, Hæresis, & parricidij Episcopi, vel Presbyteri. Assassini verò, & in alijs atrocissimis criminibus deprehensi, possunt puniri etiam ultimo supplicio à curia seculari, sine degradatione, tanquam incorrigibiles.

8 Quod si cingulo militiæ coelestis exauctoratus, ausu temerario sibi dudum commissum audebit in posterum attrectare ministerium (tamen celebrando conficeret corpus Dominicum) etiam ab Ecclesia ex canone Apostolorum erit abscindendus.

## TITVLVS XXI.

### *De officio, & potestate Capituli Sede Vacante.*

1 **C**oniugio spirituali inter Episcopum, & Ecclesiâ dissoluto, morte vel translatione illius, aut renunciatione, depositioneue; eius munerum partem subit Capitulum; omnisq; iurisdictio & potestas ordinaria, quæ Episcopo competeat, tam in spiritualium, quam temporalium administratione, interim ad ipsum spectat.

2 Quocirca Sede vacante Capitulum electiones confirmat, vel infirmat; & oblatos sibi ab Ecclesiarum Patronis, tam Laicis, quàm Clericis in Ecclesijs instituit. Iudices dat. Condit statuta. In omnibus illis casibus dispensat, quibus etiam Episcopus. Et potest vicinos Episcopos conuocare, qui Chrisma, & Catechumenorum,

*Infir-*

infirmorumq; oleum conficiant, vt de more quotannis fieri consuevit solenni Coenæ Dominicæ die Missa celebrata. Quiq; candidatos ad Ordines promoueant, Ecclesiasque Coemeteria, altaria, calices cōsecrent & reconcilient. Confirmationis Sacramentum, cum sancto Chrysmate conferant: Abbatibus, Abbatissisque, campanis, & mappis benedicant; cæteraq; omnia quæ Episcopalis Ordinis sunt, exercçant.

3 Quin & Metropolitanæ Ecclesiæ Capitulo, dum ea Sedes vacat, potestas est, Suffraganeis eius prouinciæ mādare, vt aliquem Suffraganeū confirmatum consecrent.

4 Concēdit etiam Capitulum Sede vacante, literas dimissorias. Et ius visitandæ Diœcesis suæ habent.

5 Item Capitulum pensioni transactionis causa beneficio imponendæ author non minus fieri potest, quam idem ipse Episcopus posset.

6 Præterea potest beneficium eius qui in curia decesserit, Summi Pontificis largitioni seruatum, post mensem conferre, si illud Summus Pontifex non contulerit, quæ admodum & Episcopus posset. Sed & menses, quos Episcopus ad conferendum habet, Capitulum eosdem pariter Episcopo defuncto, aut aliter ecclesia vacante, præcipuos habet: adeò, vt non possit quis Literarum pontificiarum vi beneficium expectans, his mensibus vacans beneficium assequi.

7 Potest etiam Capitulum Sede vacante, vicarium Episcopalis iurisdictionis creare, (vulgo administratorem vocant) & creatum arbitrio suo reuocare. Quem infra octo dies post mortem Episcopi constituere, vel existentē confirmare omninò tenentur: sin secus factum fuerit, ad Metropolitanum deputatio huiusmodi deuoluatur. Et si ecclesia ipsa metropolitana pro tunc vacans fuerit, vel exempta, cuius Capitulum in creando vicario negligens fuerit, liceat tunc temporis antiquiori Episcopo, ex Suffraganeis in Metropolitana, propinquiore autem Episcopo, in exempta, Oeconomum & Vicarium idoneos con-



stituire; à quibus deinde Episcopus ad vacantem ecclesiam promotus, rationem exigat officiorum, iurisdictionis, & administrationis. Et si deliquerint, poterit eos punire. Similiter eidem Episcopo promotus tenetur Capitulum de scripturis ad ecclesiam pertinentibus rationem reddere, si quæ ad Capitulum peruenerint.

8 Similiter fructuum percipiendorum munus, eidem Capitulo incumbit, Oeconomum vnum, vel plures assignando, qui rerum ecclesiasticarum, & prouentuum curam gerant, quorum rationem ei, ad quem pertinebit, sint reddituri.

9 Item, si ad Episcopum, & Capitulum communiter pertineat collatio præbendarum, defuncto Episcopo, vel à beneficiorum collatione suspensio, vel aliter vacante Sedem suam relinquire, poterit Capitulum vacantes conferre præbendas, etiam si Episcopus collationi tanquam Prælatus, non vt simplex dumtaxat Canonicus interesse potuisset. Et versa vice, idem poterit Episcopus, si contigerit Capitulum à collatione suspendi, vel singulariter ipsius Capituli vnumquemque excommunicationis vinculo innodari.

10 Cum verò ad solum Episcopum, præbendarum spectat collatio, cum consilio Capituli sui, vel assensu; defuncto Episcopo, vel suspensio ( nisi Episcopus in petenda suspensionis relaxatione sit in mora ) Capitulum proculdubio eas non confert: quodammodo enim alienare dicitur & donare, qui beneficium confert; at ius alienandi Capitulo competere nemo dixerit. Adde, & quod, cum beneficiorum conferendorum potestas in fructu iurisdictionis Episcopalis sit, fructus successoribus seruandos, nemo dubitat.

11 Sede autem vacante nihil nouari contra eam potest; & ideo prius vnita illi ecclesia dissociari non debet: & iudicium contra ecclesiam Sede vacante legitimo defensore carentem institutum non tenet.

## TITVLVS XXII.

*De officio, & potestate Legati.*

1 **C**VM multa sæpe accidant, quæ ita ardua sunt, vt per locorum Ordinarios absolui non possint, sed supremi Pontificis potestatem auctoritatemq; desiderent; ipse autem Romanus Pontifex omnibus vbique præsto esse non possit, suam auctoritatem impertiturus; necessarium fuit, vt aliquis in prouincias latissima cum potestate mitteretur, qui Romani Pontificis gerens vicem ea administraret, quæ alioqui Sedis Apostolicæ potestate eguissent, eò factum est, vt Legati à Sede Apostolica in prouincias mittantur: quos, si qui nõ admitterint, aut impederint, ipso facto in sententiam excommunicationis incidunt, eorumq; terræ ecclesiastico subiiciuntur interdicto, nulla cõsuetudine cõtraria attēta.

2 Atque hi *Legati triplicis generis sunt*. Nam aut Cardinalium è Collegio sunt, qui & propterea de latere Summi Pontificis Legati dicuntur; quod ab eius latere, cui hære eos decet, cum in prouincias mittuntur abscedunt, nec frequenter curiam exeunt, nisi cum tali officio, & potestate legationis.

3 Aut sunt Cardinalibus inferiores, quibus ipsorummet ratione, & meritis id munus concessum est, qui *Legati Constituti* dicuntur.

4 Aut qui hoc legationis officium alij dignitatis suæ annexum habent, vnde & *Legati Nati* appellantur, quod vnà cum dignitate, (puta Archiepiscopatus) quam habent, id officium nascatur, vt eius speciei esse dicuntur, Archiepiscopus Eboracensis & Cantuariensis, in Anglia: Remensis in Francia: Pisanus in Italia: Gnesnensis in Polonia. Omnes enim hi, & si qui similis in prouincijs sui Archiepiscopatus, præter Archiepiscopalis dignitatis potestatem, hanc quoque Legati auctoritatem obtinent.

5 Atque omnes Legati, cuiuscumque ex supradictis



tribus speciebus sint, ordinariam proculdubio iurisdictionem habent: quare nec cum Pontificis Romani vita, à quo Legati sunt, eorum iurisdictionis expirabit. Et Legati quidem Cardinales ferè Proconsulibus comparari possunt: qui verò Legati Cardinalibus sunt inferiores, cæteris Præsidibus antiquorum Romanorum comparantur quibus certæ sunt decretæ prouinciæ regendæ.

6 Horum autem Legatorum omnium officium est, causas audire eorum, qui in prouincijs suis ad se accedunt, & de querelis ad se delatis cognoscere, & Concilium prouinciæ vocare.

7 Beneficia autem vacantia iure legationis conferre Legato Cardinali tantum à iure permittitur: alijs autem Legatis non: nisi nominatim à Summo Pontifice eis concedatur. Sed si beneficium, de quo conferendo agitur, in alicuius Laici patronatu sit, hoc neque Legatus à latere conferre potest. Quamuis tunc possit, cum sub patronatu Clerici est, ratione Ecclesiæ, quam Clericus ipse habet.

8 Possunt etiam Legati cuiuscumque generis sint, facere statuta in prouincia sibi commissæ, post depositum quoque officium vim nihilominus habitura. Et nemo dubitat posse etiam eos delegare, quorum tamen delegatorum iurisdictionis vnà cum Legati officio, nisi citatione præmissa, perpetuata sit, extinguetur.

9 Indubitati quoque iuris est, posse Legatum à latere suæ prouinciæ beneficia, suæ collationi reseruare: quæ tamē reservationes suæ legationis authoritate factæ, post legationis officium obitum, nullius erunt momenti; & processus super eis agitati, nihil virium tunc habebunt. Cuiusmodi sunt (exempli gratia) decreta super hiscæ reservationibus interposita, nec non denunciationes, & inhibitiones per eum, vel per executores ab eo datos factæ, dummodò ad ipsorum beneficiorum collationem, nondum ventum sit. Et hæc quidem reservationes strictè procedunt; quare nec in eadem ecclesiâ collegiata, vel  
cathæ.

cathedrali, nec beneficiorum, quæ ad eiusdem pertinent iurisdictionem, duas eodem tempore reservationes Legatus, vel habere, vel facere potest.

10 Item potest Legatus Cardinalis quoscumq; etiam, propter manuum in Clericos iniectionem excommunicatos absoluerè, tam in prouincia illi decreta, quàm extrà; tam subditos, quàm extraneos, & aliunde profectos, dum ipse Legatus extra urbem Romanam agit. Nec minus hoc ei licebit, quamuis iniuria, propter quam excommunicationem incurrit, grauis fuisset, vt celeberrimis interpretum sententijs receptum est. Grauemq; iniuriam æstimant, *vel ex persona*, cui illata est, vt si in Episcopum, vel Abbatem sit manus iniecta: *vel ex re ipsa*, vt si membri mutilatio, vel maxima sanguinis effusio facta fuerit; *vel ex loco*, vt si loco publico inflicta sit, in ecclesia, in tribunali. Sed hæc tamen postremo loco narrata iniuriæ enormitas, alijs superioribus non videtur cõparanda.

11 Sed ea potestas excommunicatos absoluendi, non ita laxata est alijs Legatis, qui à Pontificis Maximi latere non sunt profecti. Nam illi quidem, quibus non dignitatis quam habent connexitate, sed sua ipsorum contemplatione Legatos esse datum est, prouinciæ suæ homines sibi subditos, dum in ea morantur, absoluendi ius habet, & si crimen alibi contraxissent; sed & non subditos, si in sua prouincia excommunicationis in pœnam inciderint, non minus absoluent. Eos verò, qui neque in sua prouincia deliquerunt, nec in ea morantur, nec aliqua ratione sibi subiecti sunt, dubium non est, quin absoluerè non possint. Imò etiam neque proprios subditos absolunt, dum extra prouinciam agunt.

12 Legati verò, qui legationis officium dignitati suæ, Episcopatus fortè, vel Archiepiscopatus annexum habet, ideoq; *Legati Nati* appellantur, nullo casu huiusmodi excommunicatos expiandi auctoritatem habent, quamuis sibi suppositi essent, iurisdictionisq; suæ oras incoherent, & ibi delictum excommunicatione dignum patrassent.



Nam cum horum legatio perpetua sit, sicut & dignitas cui inhæret, si eis excommunicatos huiusmodi absoluedi ius potestasq; esset, leue esset medijs fidijs priuilegium Clericis eorum locorum à iure communi concessum, quando tam prompta & facilis esset perpetuò delinquentis indulgentia, dempro ei Romani itineris labore.

13 Illud tamen certum est, Legatum, qui plurium locorum iurisdictionem habet, posse in omnibus locis officium suum exercere, & loci vnus negotia, moram alibi trahentem explicare.

14 Legati Cardinales illis quoque ius dicere possunt, qui Ordinariorum iurisdictioni proprijs priuilegijs subtrahi sunt, quos *exemptos* vocant. Et cum legati Cardinales in sibi decreta prouincia existunt, minoris Legati officium ibi interea cessat, quamuis dignitati coherens.

15 Sed neque causæ alij specialiter à Summo Pontifice delegate se ingerere potest, nisi vt sententiã iustè latam confirmet, ac executioni demandet. Neque ex generali legationis potestate, quamuis à latere Summi Pontificis sit, Episcopos transferre, vel ecclesiam cathedralem alteri item Cathedrali subijcere. Nec duos Episcopatus vnire, vnumue in duos partiri potest. Nec Cathedrales, vel regulares, aut alias collegiatas ecclesias, aut vllas cathedralium Ecclesiarum dignitates, quæ primæ post Episcopatum in ipsis ecclesijs sint, & ex electione conferri soleant, vel conferre, vel referuare potest.

16 Nec potest Legatus alicui, vel generaliter, vel nominatim concedere, vt ille possit beneficia intra suæ legationis fines sita, in suis manibus canonicè resignata, cui voluerit conferre. Nec valet collatio beneficii per eum facta illi, qui aliud beneficium habebat, de quo nullam mentionem fecit. Quod in quibuslibet alijs habentibus conferendi potestatem contra est.

17 Item, cum Legatus causæ susceptam excommunicationem ad Sedem Apostolicam detulerit, amplius ipse de eadem examinationem sumere prohibetur.

## TITVLVS XXIII.

*De officio, & potestate Iudicis delegati.*

**S**olent nonnunquam Summi Pontifices, eorumue delegati, aut alij ordinarij, cum causas ad se spectantes, vel delatas, ipsi vel cognoscere, vel dirimere nolunt, aut non possunt, alteri vices suas mandare, qui ad iudicium vocet, (quod tamen citationes mandandarius, non alij delegato quàm Summi Pontificis permissum est) causam cognoscat, decidat, exequatur: aut vnum, vel plura ex his faciat. Potest enim iure nostro à Summo Pontifice delegatus, etiam causæ media alteri subdelegare, quamuis sibi sententiam referuet. Et si diuersum Cæsareis Constitutionibus caueatur, quæ neminem ab Imperatore delegatum permittunt causæ media, nisi cum sententiæ etiam ferendæ potestate alij demandare.

2 Delegare autem possunt, vt diximus, Ordinarij, & Delegati Summi Pontificis: sed non omnibus tamen facta huiusmodi mandata valebunt, nam præterquàm quod peritum eum esse oportet, cui delegatur, ætatisq; legitimæ, id est maiorem viginti annis, cui ab inferiore Principis facta sit delegatio, (nam à Principe etiam minor viginti annis iudex dari potest) exigitur præterea, vt aliqua in dignitate sit, vel personatu constitutus, aut saltem ecclesiæ alicuius cathedralis Canonicus, qui à summo Pontifice, vel eius Legatis delegatur.

3 Principalis etiam Officialis Episcopi, & Religiosus conuentuallem obtinens Prioratû, quamuis ad eum Prioratum non consueuerit per electionem assumi, à Sede Apostolica, vel eius Legato, delegari possunt. Sed Officialis foraneus, aut Religiosus monasterij sui Prior claustralis, delegari non possunt. Episcopus verò etiam simplici Clerico delegare potest. Et delegatio facta dignitati, etiam ad successorem eius, cui primum facta fuerit, tran-



transibit. Vni tamen personæ facta delegatio, ad alias personas prorogari non potest.

4 Sciendum est, quod quamuis actor Iudicem habere recusans in rei conuenti ciuitate, vel Diœcesi, vbi actor & reus diuersarum prouinciarum sunt, non tamen vtra vnius diei iter eum trahere extra ipsius Diœcesim debet. Quamuis olim vsq; ad duorū dierū iter trahere eū posset.

5 Sin actor, & reus, eiusdem fuerint ciuitatis, vel Diœcesis, non erit dandus extra ipsam Diœcesim delegatus, nisi infrascriptis casibus; quibus tamen casibus pariter vltra vnius diei iter degenti personæ delegatio facienda non erit. Hi casus sunt, vbi Episcopus vel eius Capitulum, aut vniuersitas ciuitatis, villæ, aut castrum, ab aliquo suæ Diœcesis conuenitur, vel eum conuenit. Item vbi actor eam ciuitatem, vel Diœcesim ingredi non audet, vel aduersarij potentiam meritò perhorrescit: dum tamen eum metum saltem proprio iuramento probet.

6 Synodus quoque Tridentina sub Pio IV. constituit, vt in singulis Concilijs prouincialibus, aut Diœcesanis, aliquot personæ eligantur, quæ qualitates habeant supradictas iuxta narratam modo Constitutionem, quæ Bonifacij VIII. fuit, vt præter locorum Ordinarios, his etiam posthac causæ ecclesiasticæ, & spirituales, & ad forum ecclesiasticum pertinentes, in partibus delegandæ committantur. Et si aliquam interim ex designatis mori contigerit, substituatur loci Ordinarius, cum consilio Capituli alium in locum eius, vsque ad futuram prouincialem, aut diœcesanam Synodum; ita, vt habeat quæque Diœcesis quatuor saltem, aut etiam plures probatas personas, ac vt supra qualificatas, quibus huiusmodi causæ à quolibet Legato, vel Nuntio, atque etiam à Sede Apostolica committantur. Alioquin post designationem factam, quam statim Episcopi ad Summum Pontificem transmittant, delegationes quæcunq; aliorum iudicum, alijs quam his factæ, subreptitiæ censeantur.

7 Non tantum vnus, sed & plures ad eandem causam dari

dari iudices possunt: at in pluribus iudicibus dandis diuersæ formæ in usu esse consueuerunt. Nam aut simpliciter causa omnibus simul committitur; quo casu, si vnus, vel aliqui ex ipsis siue alijs sententiam ferant, nullius momenti erit sic prolata sententia. Et vno ex hac forma Delegatis rebus humanis exempto, vel infamia aliqua notato, vel propter suspicionem remoto, omnium officium expirabit; cum nemo eorum in solidum iudex sit, sed loco vnus omnes censeantur, simulque omnes iudicare iussi sint. Non prohibetur tamen is, qui ex eis fuerit impeditus, alteri subdelegare, quem subdelegatum si collega non admiserit, processus irritus fit.

8 Aut delegatio pluribus fit cum clausula illa, vt si omnes interesse nequiverint, duo nihilominus procedant: quod cum sit, necesse est omnes simul procedere, si nullû subsit impedimentum, quo aliquis eorum auocetur. Sed si vnus, vel aliqui eorum sint impediti, vel nolint interesse, oportet in primis horum impedimentum alijs qui expliciti sunt, & qui procedere volunt, notum esse, vel de eorum voluntate constare, vt illi procedere possint. Neque enim valerent acta per eos hoc non obseruato. Pontificis quidem rescriptum eum casum exprimens quo nō possit delegatus interesse, eum quoque ad casum extenditur, quo nolit. Quamuis olim alter casus alterum non comprehenderet; & non solum de impotentia facti, sed etiam de impotentia iuris intelligitur. Vt si aliquem eorum seruum, vel infamem, alioue impedimento legitimo detentum esse constiterit: impotentia autem facti dicitur, vt si constiterit eum casu mortis occumbere, aut inenitabilis necessitatis articulo impediri, quominus valeat interesse.

9 Quin etiam, si is qui impeditus est, alteri quamuis extraneo, id est, ei qui ex collegis non sit, vices suas subdelegauerit, non poterunt alij hunc à suo collega datum substitutum recusare; nisi is qui subdelegauit, perpetuo vel ineluctabili impedimento impeditus sit. Vel nisi de-  
lega-



legatio hoc modo facta esset, vt alijs impeditis, is qui nūc subdelegauit, ipse potissimum procederet; sicq; solus ipse qui subdelegauit, non etiam alij collegæ, sine alijs procedere dignus habitus sit. Quocasu is, qui alijs prælatus est, subdelegare quidem potest, sed ab alijs subdelegatum collegis ipse admittere cogendus non est. Vel nisi in delegationis rescripto, appellationis spes omnis sublata sit.

10 Aut denique hoc modo ( quæ frequentissimè quidem forma in vſu est ) plures delegantur, vt omnes, aut duo, vel vnus procedat: sicq; omittitur illa conditio. *Si omnes non possunt, &c.* Sed facultas simpliciter conceditur cuius ex Delegatis procedendi. Quorum, si quis alios præuenit incipiens de negotio cognoscere, alijs dempta erit potestas interea de eodem se impediendi: nisi is qui præuenit, aliqua iusta causa postmodum impeditus fuerit, causam finire: vel, nisi dolose procedere detrectaret. His enim casibus, alijs fieret locus, nec tenerentur à collega subdelegatum admittere. Sed si is, qui alios præuenit, iurisdictionem suam ita stabilierit, vt Delegatis morte expirare non possit, pura, quia partes iam ad iudicium vocasset, hoc alijs quoque collegis vtile erit: nam etsi hunc mori contingat, poterunt nihilominus alij etiam mandatore mortuo hoc muneris suscipere, quasi à collega sibi traditum, & perpetuum; quamuis ipsi, dum mandator in humanis esset, nihil omnino in hoc iudicio egissent.

11 Delegatus iudex hoc diligenter obseruare debet, ne fines mandati egrediatur: si nulla in mandato alia forma præscripta sit, iuris formam seruabit.

12 Si delegatus à Summo Pontifice in alium hoc munus transferre velit, isq; munere iniuncto fungi detrectet, poterit eum ad suscipiendum compellere: nisi ipse malitiosè exonerare se studeat. Verum in eo compellendo gradus, & dignitatis rationem habebit: alio enim modo aget cum viro sublimi in loco posito, quàm cum cæteris, qui etsi dignitatem habeant, non tamen magnopere  
alios

alios excellunt. Nam (exempli gratia) si Episcopo delegare quis velit, non debet eum confestim his modis cogere, quibus alium inferiorem posset, sed modestia cum eo utetur, Supremi Ordinis rationem habens. Quare ei primo ecclesiæ ingressum interdicet, vel Sacerdotalis officij executionem. Post etiam ab officio suspendet. Et demum, si pertinaci animo perseverauerit, excommunicationem quoque irrogabit. Quod si iam ab initio admodum contumacem se ostenderit, iam tum licebit contra eum ecclesiastica censura uti, quamvis ipse delegatus, qui subdelegare vult, Episcopus non sit.

13. Hinc apparet quanta sit iudicis delegati potestas; in causa ei mandata per Summum Pontificem, cum etiam etiam illis imperandi ius habeat, qui extra causam ipso essent superiores; & cum Episcopos, aliosq. sibi minime subiectos, & quorum causa minimè sibi mandata sit, possit vel Interdicti, vel Suspensionis, aliaue censura compellere. Eiusq; potestas etiam contra extraneos officium suum impedire enitentes exerceri potest: quod & ipsius subdelegato permissum est. Atque eo ipso, quo alicui causa committitur, super omnibus, quæ ad causam ipsam pertinere noscuntur, plena eidem tribuitur potestas, quavis delegationis literæ nequaquam hoc contineant, ut partes compellere, & seueritate ecclesiastica contumaces coercere possit. Atque etiam ubi nulla à iure poena statuta est, arbitrio suo pro delicti, & causæ qualitate poenam statuere in eos, qui in causis delegatis iudicio suo parere contempserint.

14. Potest Delegatus mandatum suum, quo totam causam alij delegauerat, arbitrio suo reuocare, dum res adhuc integra sit: id est, si ille iurisdictione vsus hætenus non sit: & illo rebus humanis exemplo causam resumere poterit, cum iurisdictione, ex quo, ipsa vsus non est, non censeatur in eum efficaciter transiisse.

15. Si Delegatus (quoties cum abesse contigerit) alicui vices suas commiserit, poterit Subdelegatus eo rebus humanis



manis exempto (cum & tunc censeatur abesse) commissum sibi negotium libere diffinire, modò illo viuente iurisdictione vti cœperit; quod non minus licebit, si vices sub ea forma commiserit, donec duxerit reuocandas.

16 Delegatorum à Summo Pontifice potestas in sententia exequenda, vsque ad annum post latam sententiã viget. Possunt etiam, si eis videatur, id onus sententiæ executioni mittendæ, in Ordinarium transferre. Cum verò iudicis delegati sententia executionem fuerit sortita, eius finietur iurisdictionis.

17 Sed & alijs modis iurisdictionis delegata finitur, veluti, si lapsa sit dies, ad quam causa ex mandati forma terminari debuerat: nisi à partibus prorogata sit. Item si re integra moriatur is, contra quem fuerant litteræ impetratæ: vel is, qui ipsas litteras impetrauerat: vel iudex, cui fuerat delegatio facta: vel is qui delegauit. Item per contrarium rescriptum posterius, de priore expressum mentionem faciens: alijsq; modis, qui ex voluminibus & interpretibus Decretalium Epistolarum peti possunt.

18 Hoc demum neminem præterire volumus, non facile alicui fidem esse adhibendam, etsi asserat se Delegatum esse, nisi hoc ipse probet. Quapropter, si quis tanquam à Sede Apostolica Delegatus mihi iniungat, vt palam fieri curem aliquem, puta Titium esse excommunicatum, potero ego hoc mandati munus effugere, nisi ille demandato Apostolico fidem faciat.

## TITVLVS XXIV.

### *De Officio Conseruatorum.*

**I** Vxta Delegatorum tractatum non erit ab reuerentiâ de Conseruatoribus aliqua dicere, quibus à Summo Pontifice mandatur, vt aliquos à manifestis iniurijs defendant: & hi quidem ad ea, quæ iudicij indaginem

ginem desiderant, suam potestatem non extendunt, nisi hanc potestatem à Summo Pontifice nominatim acceperint, vt frequenter hodie in huiusmodi conseruatorijs literis fieri videmus. Nec tamen hi Conseruatores Delegatorum è numero censendi sunt; quamuis Delegatis comparètur in multis, in multis tamen inter se differunt.

2 Conseruator enim dari non potest, nisi qui dignitatem aut personatum habeat in ecclesia Cathedrali, vel Collegiata, puta, Episcopus, Abbas, Archipresbyter, & similes. Sed nec defuerunt, qui etiam Officiale Episcopi Conseruatorem fieri posse crediderint, quamuis declarationem Summi Pontificis, vt res certior fiat exoptarent ( quia non vbique ex Canonicis cathedralibus fieri solent Officiales generales Episcoporum.) Nec sufficit Cathedralis ecclesiæ quem simplicem Canonicum esse, vt Conseruator fieri possit: & tamen ecclesiæ Cathedralis Canonicus delegari ad causas potest.

3 Item non potest quis Conseruator sui Conseruatoris fieri, vel eius, cuius ipse iurisdictioni ordinariæ subiectus est, nisi fortè Regis aut Regina: & tamen mandatum ad causas de quo præcedenti titulo tractauimus, etiam subdito eius de cuius causa agitur, fieri potest.

4 His adde, quod non permittitur Conseruatori extra ciuitatem, aut Dioccesim, in qua fuerit deputatus, contra aliquem procedere; aut aliquem extra locum itinere vnius diei remotiorem protrahere. Quod tamen Delegato partium consensum habenti non denegatur.

5 Item Conseruator vices suas, citationibus, & sententiarum denuntiationibus duntaxat exceptis ( has enim etiam per alios valet exercere ) nulli committere potest, nisi hoc ei competat ex beneficioliterarum. Quo tamen casu non nisi intra ciuitatem, vel Dioccesim in qua deputatus fuerit, hoc ei facere licet. At supra docuimus, Delegatum à Summo Pontifice totam causam, vel partem alij demandare posse. Constat porro Conseruatorem ad futura, non autem Delegatum dari.



6 Sed nec ea levis inter hæc est differentia. Quod, si Conseruatores alijs, quàm manifestis iniurijs, & violentijs scienter se immiscere non dubitarint: seu ad alia, quæ iudicalem indaginem exigunt, suam potestatem extendere, eo ipso per annum vnum ab officio sunt suspensi. Ac pars, quæ hoc fieri procurauerit, sententiam excommunicationis incurrit, à qua absolui non potest, nisi ei, quem sic indebitè fatigauerit, prius de expensis integrè satisfecerit. Quæ tamen poena Delegato potestatis suæ metas excedenti, imposita non reperitur: quod ea ratione factum est, vt Conseruatores limites sibi traditæ potestatis (quos frequenter excedunt) metu poenæ diligenter obseruent. Sed cum hodie, vt diximus, consuescant ferè semper Conseruatores Pontificijs rescriptis dari, etiam cum potestate se immiscendi his, quæ iudicij indaginem respiciunt, non frequenter supradictæ poenæ fiet locus.

7 Sed neque Conseruatorum negotium Sancta' Synodus Tridentina sine debita animaduersione reliquit, dum constituit, vt Conseruatoriæ literæ cum quibuscumque clausulis, aut decretis, quorumcunque iudicum deputatione, quocumque prætextu aut colore concessæ, nemini omnino, cuiuscumque dignitatis, & conditionis sit, etiam si Capitulum fuerit, suffragentur ad hoc, vt coram suo Episcopo, siue alio superiore ordinario in criminalibus, & mixtis causis accusari, & conueniri, ac contra eum inquiri, & procedi non possit: aut quominus, si qua iura ei ex cessione competierint, super illis libere valeat apud iudicem Ordinarium conueniri. In ciuilibus etiam causis, si ipse actor extiterit, aliquem ei apud suos Conseruatores iudices in iudicium trahere minimè liceat.

8 Quod si in his causis, in quibus ipse reus fuerit, contigerit, vt electus ab eo Conseruator ab actore suspectus esse dicatur: aut, si qua inter ipsos iudices, Conseruatorem, & Ordinarium controuersia super competentia iurisdictionis orta fuerit, nequaquam in causa procedatur, donec per arbitros in forma iuris electos super suspicio-

ne,

ne, aut iurisdictionis competentia fuerit iudicarum: familiaribus verò eius, qui huiusmodi literis conseruatorijs tueri se solent, nihil illæ pròsint, præterquam duobus dūtaxat, si tamē illi proprijs eius sumptibus vixerint.

9 Nemo etiam similium literarum beneficio vltra quinquennium gaudere possit: ac statuit, vt non liceat Conseruatoribus iudicibus vllum habere tribunal erectum. Vniuersitates autem generales, & Collegia Doctorum, seu Scholarium, & Regularia loca, nec non Hospitalia actu hospitalitatem exercentia, ac vniuersitatum, collegiorum, locorum, & hospitalium huiusmodi personæ, in prædicto canone minimè comprehensæ, sed exemptæ omnino sint, & esse intelligantur.

10 Officium autem quorumcunque Conseruatorum, ipso iure quo ad non cœpta negotia per obitum concedentis expirat.

11 Sed iam descendamus, ad Sacerdotes in inferiore gradu constitutos, & alios consequenter, qui licet Sacerdotes non sint, in sacris tamen constituti reperiuntur, vel humiliora in domo Dei ministeria peragunt.

## LIBER SECVNDVS

*De Personis Ecclesiasticis in inferiori gradu constitutis; eorumq; officijs.*

### TITVLVS I.

*De Sacerdotibus, seu Presbyteris.*



Actenus locuti sumus de Sacerdotibus altioris gradus, puta Episcopis, & Summo Pontifice, eorumq; delegatis: nunc descendamus ad Sacerdotes in inferiore gradu constitutos, subsequenter postea dicturi de ijs, qui licet

Sa-



Sacerdotes non sint, in sacris tamen constituti reperiuntur : ac demum de his , qui circa humilia in domo Dei necessarium ministerium exhibent, qui in minoribus Ordinibus dicuntur constituti .

2 Sacerdotum in duas classes diuisio , sumpsit originem tam à Testamento Veteri, quàm Nouo . *In Veteri*, Moyses ex præcepto Domini, Aaron in Summum Pontificem, filios verò eius inunxit in minores Sacerdotes . *In Nouo*, Christu Dominus duodecim Apostolos tanquam maiores Sacerdotes, septuaginta duos, quasi minores instituit . Petrum verò quasi Summum Sacerdotem elegit, dum ei facultatem confirmandi fratres tradidit, & præ omnibus clauis Regni coelorum tribuit .

3 Appellatione verò Sacerdotum, veniunt etiam Episcopi : sed dignitate, gradu, & officio, in tantum differunt, vt degradatus ab Ordine episcopali, non censeatur degradatus ab ordine sacerdotali . Cum enim multi olim in singulis ecclesijs presbyteri constituti essent, in remedium Schismatis factum est, vt vnus eligeretur, qui cæteris esset præponendus, & Episcopus appellaretur, personam Apostoli repræsentans . Hinc tantus presbyterorum erga Episcopos creuit honor, vt illis tanquam filij coeperint obedire . Nec iam pro sacerdotibus habentur, qui nullius Episcopi disciplina, & prouidentia gubernantur .

4 *Est itaq; Sacerdos*, vir autoritate diuina ( nempè ex Christi institutione ) firmiter deputatus cultui veri Dei, ad sacrificia offerenda, & ministranda fidelibus Sacramenta . Qui enim ab Episcopis non sunt consecrati ex diuina institutione, & ordinatione, illi non sunt veri ministri, nec sacerdotes, sed latrones, & fures, vt eos vocat ipse Saluator .

5 *Dicitur autem Sacerdos*, à sacris, quia dedicatus est ad sacrificia facienda, & offerenda pro populo . Atque sic intelligitur Sacerdos, quasi sacra dans, & sacra docens : quia tenetur Sacramenta fidelibus ministrare, & docere in rebus necessarijs ad salutem . Vel vocatur sacerdos, quasi

quasi sacer dux, qui ducere debet per viam mandatorum Dei, & præire exemplo, vt sic perueniat cum grege sibi commissio ad montem collium æternorū, & portū salutis.

6 Presbyteri verò nomen, quanquam à senio, & senectute sit sumptum, magis tamen sapientiæ indicat maturitatem, quàm corporis canitiem. Presbyter enim Græcè, senior Latinè interpretatur. Vel presbyter, quasi præbens iter: quia talis esse debet moribus, & vita, vt sit eisdem populo exemplum bonorum operum, in doctrina, integritate, & grauitate. Et vt iram Dei placare possit orationibus suis, & placabilem reddere populo suo, vt Moyse, atque alij Sanctificerunt.

7 Episcopi igitur ac Presbyteri non penitus est absimilis circa sacra ministeriorum dispensatio. Illorum enim quæ gerere potest Episcopus, quædam presbyter suo iure, quædam illius permissione exequitur; quædam verò nullo pacto potest attingere. *Proprio iure presbyter*, Domini corporis, ac sanguinis consecrationem, etiam Episcopo præsentē celebrat, infantes baptizat, sanctificato oleo inungit, benedicit, & de occultis peccatis poenitentes, vel in extremis agentes, ad gratiam reconciliationis admittendi potestatem habet. *Episcopo verò permittente*, aut vltima cogente necessitate, & baptizatos sacro linire chrismate, & virgines Deo dicare presbyteris conceditur.

8 Verùm ecclesias erigere, consecrare, reconciliare, sacrum chrisma conficere, clericos ordinare, excommunicare poenitentes publice reconciliare, vt supra docuimus, solis Episcopis reseruatur. Vnde dicere Episcopum non differre à Presbytero. inter hæretica dogmata numerat S. August. in lib. de Hæresibus.

## TITVLVS II.

*De ijs, qui sunt in sacris constituti.*

**I**N sacris constituti sunt Diaconi, & Subdiaconi, qui assistere, & ministrare tenentur, celebrantibus maioribus.



ioribus, puta, Episcopo aut Sacerdoti. Hinc Diaconus Græcè, minister dicitur Latine, quia est Sacerdotis celebrantis immediatus minister. Subdiaconus verò, vice minister, quia ministrat sacerdoti medio Diacono.

2 Diaconi officium est, Episcopum prædicantem ab insidijs custodire: Sacerdotibus celebrantibus adstare: & Evangelium ad populum decantare. Sed nec baptizare, præsentem Episcopo, aut presbytero potest, nec Dominici corporis Eucharistiam populo erogare; nisi cum ad id extrema necessitas compellat, Episcopo, aut presbytero longius fortasse constituto.

3 Subdiaconi officium est, necessaria ad consecrationem præparare in vasis sacris: Epistolam in missa decantare, & oblationes populi suscipere, supraq; altare ponere.

4 Nemo autem ad subdiaconatum ordinari potest, ante vigesimum tertium annum: sicut nec ad presbyteratum, ante vigesimum quintum. Ut autem mundi sint, qui sacra tractant, ideo æqualiter omnes tenentur in his tribus ordinibus maioribus constituti ad castitatem, Presbyter, Diaconus, & Subdiaconus.

5 Cumq; à multis, an in Episcopum Subdiaconus eligi valeret hæsitaretur; nouissimè post Urbanum II Innocentij III. processit constitutio, quæ, ut is quoque tanquam in sacris constitutus, in Episcopum libere eligi valeat, declarauit, ac statuit.

### TITVLVS III.

*De his, qui sunt in minoribus Ordinibus constituti.*

**S**UNT in Ecclesia Dei præter sacros Ordines maiores, alij etiam minores Ordines, qui sine sacramentali vnctione, sola Episcopi benedictione, cum quadam vasorum, vel indumentorum distributione præ-

præstantur, vt sunt *Acolytus*, *Exorcista*, *Lector*, *Ostiarus*.  
Prima verò tonsura, quæ confertur ante ordines, est corona Clericalis, qua deputatur homo ad cultum, & seruitium Dei, & non censetur inter Ordines, sed est dispositio quædam, & præparatio initiati ad Ordines. Nihilominus tamen prima tonsura initiatus adscribitur militiæ Dei, & consequenter fit de foro Ecclesiastico, si incedit in habitu, & tonsura, & alicui Ecclesiæ ex mandato Episcopi inseruit: vel in seminario Clericorum, aut aliqua Schola, quasi in via ad suscipiendos Maiores Ordines versatur.

2 *Ostiarus* est idem quod, & *Ianitor*, qui ianuis templi præficitur. Ad eum pertinent clauēs Ecclesiæ, vt claudat, & aperiat templum Dei, & omnia quæ sunt intus extraq; custodiat, fideles recipiat, excommunicatos, hæreticos, & infideles prouido iudicio repellat. Idē pulsare debet campanas ad conuocandos fideles ad Ecclesiā.

3 *Lectoratus* est spiritualis potestas, qua *Lector* potest ex officio suo lectiones scripturæ sacræ in Ecclesia pronunciare; & ea quæ Prophetæ vaticinari sunt, populis prædicare.

4 *Exorcistatus* est spiritualis potestas, qua *Exorcista* potest manus super energumēnos, & catechumenos imponere, arctando dæmones per adiurationem, ne dominantur in corporibus obsessorum.

5 *Acolyratus* est potestas, per quam hoc Ordine insignitus potest ex officio portare vrceolos cum vino, & aqua ad sacrificium Missæ. Ad eum quoque luminum præparatio spectat: qui & cereum, à quo nomen quoque ducit, deferre debet, quando legendū est Euangeliū.

6 Est & *Psalmista*; id est, *Cantor*, qui absque scientia Episcopi, presbytero solum iubente, officium suscipit cantandi, qui & ipse, licet apud antiquos dubitatum fuerit, inter minores Ordines, sicut & Primæ Tonsuræ Clericus, coeptus est adnumerari. Prout & Conuersi in Monasterijs, Templarij, Hospitalarij: quos si quis pulsaue-



rit, excommunicationi obnoxius erit non minus, quam si Clerico eam iniuriam intulisset.

7 Horum autem & sacrorum valde dispar est conditio; siquidem illis ita est continentia imperata, ut nunquam ad matrimonium aspirare valeant; his autem, si ad superiores Ordines prouehi noluerint, matrimonium contrahere minimè interdicitur. sed eo casu non solum ad sacros Ordines, & Ecclesiasticas dignitates, & administrationes admittendi non sunt; sed etiam beneficijs quicumque forte habuerint, priuandi erunt. Nam nec ea sine prauo exemplo, & graui scandalo possunt tenere: & tales communiter bona Ecclesiastica dilapidare solent.

## TITVLVS IV.

*De ijs rebus, quæ tam Maiorum quàm Minorum Ordinum sunt communia.*

1 **V**idimus hætenus de omnibus, tam maioribus quàm minoribus Ordinibus, sequitur nunc videre, quid inter se commune habeant, ut seruetur ordo in Ecclesia, & pax inter Clerum, charitate inuicem, & obseruantia deuinctum, euitenturq; scandala inter fideles, & eos qui nobiscum non sunt.

2 Meminerint igitur Prælati se in inferiores suos politicam potius retinere potestatem, quam despoticum dominium, quos iussit Apostolus imperare cum omni mansuetudine, ut non solum præsent, verum etiam present. Quapropter honorent, & diligant Clericos, non tanquam subditis dominantur. Minores verò monendi sunt, ut maioribus qui eos ordine præcedunt, & officio, reuerentiam, & obedientiam exhibeant; nec per temeritatem alter alterius partes sibi vendicat.

3 Ordinatores verò debent instruere ordinandos in diui-

Ordines, & Confirmatione. Con-  
cedendos in Sa-  
cramentis, & in Ordinibus viros (puta Ar-  
chiepiscopum, cuius hoc nunc est) super diuinis offi-  
cijs, Ecclesiasticisq; Sacramentis diligenter examinent,  
instruant, & informant. Præcedatque ordinationem  
diligens scrutinium in præsentia peritorum sacerdo-  
dotum, de recta conuersatione ordinandorum, vt non nisi  
testimonio clarorum virorum, præsertim Ecclesiasticorū  
probatī admittantur ad Ordines. Inquirant diligenter  
genus ordinandorum, patriam, ætatem, locum vbi ordi-  
nati sunt: tum si litteras callent, si instructi in lege Dei  
sunt, & ante omnia si fidem Catholicam firmiter tenent,  
& Confirmationis Sacramentum susceperunt. Alioquin  
Episcopus promouens indignum peccat mortaliter.

4. Idem & in beneficiorum collationibus observandū erit : à suo prius Archidiacono examinari debent , quam Ecclesiasticis beneficijs præficiantur , & per ipsum postmodum Episcopo præsentandi sunt . Quia si cæcus cæcum ducet , ambo in foveam delabentur .

§ Ipsi verò, quibus talis cura examinandi committitur, cauere debent, ne aut cuiusquam gratia, aut cuiuscunque muneris cupiditate illecti à vero deuiant, vt indignum, & minus idoneum, aut non examinatum ad sacros gradus suscipiendos Episcopo præsentent. Quod si aliter fecerint, & qui indignè accesserit ab altari remouebitur, & qui donum S. Spiritus vendere conati sunt, coram Deo iam, condemnati, Ecclesiastica dignitate carebunt.

6 Certa præterea tempora statuta sunt, extra quæ nefas sit Ordinibus quempiam aggregari. Examinati ergo & probati debent Sabbato præsentari Episcopo, vt eos in quatuor temporibus promoueat: nisi adsit licentia Summi Pontificis, extra statuta tempora ordinandi. Tunc secundum diuersitatem Ordinum, temporis quoque seruabit diuersitatem Episcopus: quia nec vna, nec duabus continuato ieiunio duo sacri Ordines conferri de-



bent. Minores tamen Ordines, omnes simul, & quibuf-  
libet festis diebus conferri possunt.

7 Per saltum verò si promotus fuerit quis solemniter,  
Ordine prætermisso repetito, ex misericordia dispen-  
santis, ministrare permittendus est: sed prius iniuncta  
poenitentia peracta.

8 Quod si furtiuè quis ad sacros Ordines irrepperit,  
contra prohibitionem Prælati, non potest ad Sacerdota-  
lem Ordinem promoueri, nisi Regulari habitu suscepto  
poenitentiam egerit, & laudabilem aliquandiu duxerit  
vitam; quo casu secum misericorditer dispensari poterit.  
Alioqui nulla præcedente inhibitione, condigna satisfac-  
tione imposita, pro suo arbitrio cum illo poterit Episco-  
pus dispensare.

9 Quod si is, qui nullum adhuc penitus attigit Ordi-  
nem, diuinum aliquod officium exercuerit, & ab Ecclesia  
erit abijciendus, & nunquam ordinandus. Et Diaconus,  
qui missarum celebrationem vsurpare, nondum sibi ma-  
nu ab Episcopo imposita præsumpserit, ad Sacerdotis  
officium non poterit promoueri. Et à Diaconatu bien-  
nio, vel triennio Episcopi arbitrio suspendetur.

10 Si verò quis non baptizatus Ordines susciperet, de-  
bet baptizari, & iterum ordinari. Cum enim baptis-  
mus omnium Sacramentorum ianua sit, & fundamen-  
tum, superædificari non potuit, vbi fundamentum defuit.

11 Illud quoque omittendum non est, quod inter mi-  
nores, & sacros Ordines illa est differentia, quia Maiores  
ab Episcopis, minores verò etiam ab alijs minoribus Præ-  
latis quandoque conferuntur, vt latius titulo sequenti  
patebit.



## TITVLVS V.

*De his, qui potestatem habent ordinandi,  
& litteras dimissorias seu Com-  
mendatitias dandi.*

**O**Rdines supradictos assignandi potestas penes Episcopos est, qui statuto Sacrosanctæ Trid. Synodi Minores Ordines nonnisi his conferre debent, qui linguam Latinam intelligant, & in rebus necessarijs ad statum Clericalem spectantibus sint benè edocti. Qui ad Maiores Ordines postea promouendi, bonum à Parocho, & à Magistro Scholæ in qua educantur testimonium habere debent. Parochusq; nominibus eorum publicè in ecclesia propositis, de ipsorum natalibus, ætate, moribus & vita, à fide dignis diligenter inquirat; & litteras testimoniales, ipsam inquisitionem factam continentes, ad Episcopum, aut Examinatores ordinandorum transmittat.

2 Addit insuper eadem Synodus Oecumenica, vt Subdiaconi, & Diaconi, si per annum saltè in suo officio non sint versati, ad altiore gradum (nisi aliud Episcopo videatur) ascendere non permittantur. At, qui ad Presbyteratus Ordinem assumendi sunt, non modo oportet eos in Diaconatu ad minus per annum integrum ministrasse, sed etiam aptos esse decet ad populum docendum ea, quæ scire omnibus necessarium ad salutem, & ad Sacramenta ministranda.

3 Cauere quoque sibi debent Episcopi, ne in alienam messem seicem immittant; alienos subditos ad Ordines promouere sibi arrogantes, licentia ab eorum Episcopis non habita. Nam si hoc admiserint, totum annum ad Ordines quempiam cooprandi potestate priuari erunt. Sicut enim alienum parochianum Episcopus iudicare, & excommunicare non potest, ita & ordinare non valet.



6  
ordinat, nisi ab eo vocatus, cuius iuris ea  
cognoscitur, ut quicquid ibi disponat, ordinet, & iudicet. Idcirco Sacrosancta Synodus Tridentina constituit, ut nulli Episcopo liceat cuiusvis privilegij prætextu Pontificalia in alterius Dioecesi exercere, nisi de Ordinarij eius loci expressa licentia, & in personas eidem Ordinario subiectas tantum. Et si secus factum fuerit, Episcopus ab exercitio Pontificalium; & sic ordinati, ab executione Ordinum sint ipso iure suspensi.

5 Item nemo Episcoporum, qui titulares vocantur, etiam si in loco nullius Dioecesis, etiam exempto, aut aliquo Monasterio cuiusvis ordinis resederint, aut moram traxerint, vigore cuiusvis privilegij sibi de promouendo quoscumque ad se venientes pro tempore concessi, a lterioribus subditum etiam prætextu familiaritatis, continuæ commensalitatis suæ, absque sui proprij Prælati expresso consensu aut literis dimissorijs, ad aliquos sacros aut minores Ordines, vel primam tonsuram promouere seu ordinare valeat. Et ut contrafaciens ab exercitio Pontificalium per annum, taliter quoque promotus ab executione Ordinum sic susceptorum, donec suo Prælato visum fuerit, ipso iure sint suspensi.

6 Episcopi, qui conferendi Ordines ius habent, per semetipsos eos conferant. Quod si aegritudine fuerint impediti, subditos suos non aliter, quam probatos iam, & examinatos ad alium Episcopum ordinandos dimittant.

7 Si quis ab alio, quam à proprio Episcopo promoueri perat, nullatenus id ei; etiam cuiusvis generalis aut specialis rescripti, vel privilegij prætextu, etiam statutis temporibus permittatur: nisi probitas ac mores Ordinarij sui testimonio commendentur. Si secus fiat, ordinans à collatione ordinum per annum, & ordinatus à susceptione Ordinum executione, quamdiu proprio Ordinario videbitur expedire, sit suspensus.

8 Sed neque familiarem suum, sibi non subditum Episcopo.

scopus ordinare potest, nisi per triennium secum fuerit commoratus; & nisi beneficium quacunque fraude cessante statim re ipsa illi conferat, consuetudine quacunque etiam immemorabili non obstante. Episcopo autem quis tribus modis subesse potest, videlicet, origine, beneficio, & domicilio.

9 Cæterum alij Prælati Episcopis inferiores, tam Religiosi, quam Sæculares, puta, Abbates, Archipresbyteri, Archidiaconi, non possunt Clericis, subditisve suis potestatem facere, alienos Episcopos adeundi, vtab eis ad Ordines promoucantur: nisi hoc priuilegium specialiter à Summo Pontifice eis concessum sit.

10 Nec Officiales Episcopi, litteras commendatitias dandi ius habent, nisi mandato speciali à suo Pontifice hoc iuris consecuti sint: vel nisi Episcopus in oris agat longinquis. Tunc enim cum Episcopus longè abest, Vicarius ipsius in spiritualibus Generalis litteras commendatitias dare potest.

11 At si Sedes Episcopalis vacet, Capitulum, vel is, ad quem Spiritualium deuoluta fuerit administratio, huiuscemodi litteras concedent: idq; habentibus tantum beneficia curata. Si secus fiat, Capitulum contraueniens Ecclesiastico subiaceat interdicto: & sic ordinati si in minoribus Ordinibus constituti fuerint, nullo priuilegio Clericali, præsertim in criminalibus gaudeant: in maioribus verò ab executione Ordinum ad beneplacitum futuri Prælati sint ipso iure suspensi.

12 Item sanxit Concil. Trid. vt facultates de promouendo à quocunque, non suffragentur nisi habentibus legitimam causam, ob quam à proprijs Episcopis ordinari non possint, in literis exprimendam. Et tunc non ordinentur nisi ab Episcopo in sua Dioecesi residente, aut pro eo pōrtificalia exercente, & diligenti præuio examine.

13 Sciendum verò est, quod Episcopus ille, qui Episcopatu renunciauit, potest rogatus Ordines conferre, si tantum loco renunciauit. Sed si dignitati quoque, non



potest maiores conferre, sed tantum minores. Ab eo vero qui renunciat loco, & Ordini Episcopali, sacri Ordines non sunt recipiendi. Si vero quis scienter receperit, quia indignum se fecit, officij non habebit executionem: si autem non scienter, propius Episcopus poterit cum illo dispensare. Nisi crassa, & upina fuerit ignorantia; quo casu vni Romano Pontifici ius dispensandi erit.

14 Abbas sacerdos si ius habeat deferendi mitram, potest conferre Ordines minores suis subditis Regularibus tantum. Subdito autem suo in temporalibus, non potest: nisi cum licentia: & dimissorialibus literis proprii Episcopi. Et idem esset quo ad alios Regulares ei non subditos, respectu suorum Prælatorum, quorum similiter dimissorias habere deberent: præhabita semper facultate, & consensu Episcopi illius loci, in cuius Diocesi Abbas alienum subditum in prædictis casibus ordinare vellet.

15 Præfati vero locorum non exemptorum, eorumque socij, ab Episcopis promoueri possunt, quorum in Diocesi sedent, quamdiu ibi morantur; quamvis inde oriundi non sint.

16 Græci quoque à Latinis, & versa vice, vbi eorum ritus differunt, ad Ordines prouehi non possunt, ne rituum fiant commixtiones. Sed Episcopus qui varios linguis, & ritibus populos regit, viros idoneos præficiat, qui iuxta eorum ritus, eis Sacramenta ecclesiastica propinent, & diuina officia celebrent.

17 At si quis Transalpinus ab Italo Episcopo Ordinum consociationem postulet, non debet eum Episcopus promouere, nisi vel à Summo Pontifice specialem licentiam habuerit: vel Episcopi cui ille subest, litteras patentes legerit, quæ causam ad hoc idoneam testentur, quare, ipse noluerit, aut non potuerit ad Ordines petitos admittere.

18 Hæretici demum, excommunicati, & depositi, vera Sacramenta, verosque Ordines conferunt, si intentionem habeant, & si traditam ab ecclesia formam, ritusque præ-

scriptos conferendo seruarint : quamuis Ordinati eos , qui sibi manus imposuerunt , ab Ecclesia præcisos esse non ignorarent . Quos tamen sic collatos Ordines executio nequaquam sequetur ; nec cum scientibus erit dispensandum . Et multò minus , si illi , qui Ordines contulerunt , extremam manus impositionem , idum scilicet in Episcopalem Ordinem cooptantur , extra Ecclesiam Catholicam acceperint . Quemadmodum nec infra scriptis quoque casibus executionem accipient , nec dispensatione digni erunt , etiamsi extremam manus impositionem eorum collator in Ecclesia acceperit , ut cum iterata vñctione maculati sunt , vel simoniacè à Simoniacò ordinati , vel rursus baptizati : vel cum in Fidei nostræ perniciem , ad eamque euertendam , & in contemptum Ecclesiæ hæreticis adhæserunt , & ab eis ordinari voluerunt . Magna tamen est in supradictis omnibus , Summi Pontificis potestas .

19 Non omittendum est ; eum qui à Summo Pontifice ad aliquem Ordinem euectus sit , non posse ad sublimiores Ordines ab alio pariter , quàm à Summo Pontifice promoueri , licentia ipsius Summi Pontificis non impetrata . Non idèò tamen Ordinarij subtrahitur potestas .

## T I T V L V S V I .

*De his , qui ad Ordines promoueri non possunt .*

**Q**uoniam præcaueri debet , quod vel infirmari , vel vituperari potest , idèò sciendum est , non quemlibet hominem aptum esse ad suscipiendos Ordines , idquè quatuor ob causas . Aut enim quis promoueri impeditur ratione subiectionis , aut ratione delicti patrati , aut suspitione futuri lapsus , aut ob corporis læsionem .



2. *Ratione subiectionis* promoueri non possunt serui ; nisi à Dominis libertatem consecuti fuerint. Liber enim esse debet , qui diuinæ aggregandus est militiæ . Quapropter non solum serui , sed nec qui retento obsequio manumissi sunt , cùm adhuc seruitutem quandam seruire videantur , sunt ad Clericatus Ordinem promouendi . Quod si contra factum fuerit , tam Ordinantis , tam eius , qui sacro præcinctus est cingulo , canonicis poënis coerenda est audacia . Si tamen seruus sciente Domino fuerit ordinatus , ex hoc liber erit , & ingenuus .

3 Si verò nesciente Domino seruus ordinetur ad minores , tunc redigitur in pristinam seruitutem . si Subdiaconus , vel Diaconus sit ordinatus , vel etiam Sacerdos , & id euenerit sciente Episcopo , vel Præsentatoribus : tunc Episcopus , vel Præsentatores tenentur Domino restituere pretium serui : vel ipsemet Ordinatus tenetur substituere alium seruum loco sui , vel dare pretium suæ redemptionis , quando nec Episcopus , nec Præsentatores id scierint .

4 Qui matre ingenua editus est , etsi patrem habeat seruum , cum seruus ipse non sit , ab Ordinibus non arcetur .

5 Quod si quis Ecclesiæ seruili conditione obnoxius , ab eadem manumittatur , vt insignitus Ordine Clericali , in ea perpetuò seruiat , in diuinis liber factus , & ordinatus , ad aliam Ecclesiam transferri non poterit . Sed si absolutè missus fuerit liber , ad aliam transeundi non erit licentia deneganda .

6 Monachi non ordinantur , nisi licentia sui Abbatis . Qui si licentiam Monacho concesserit , vt possit consentire prouisioni de se factæ , quia ambitionis vitio viam parat , talis licentia nullius firmitatis existet . Poterit autem Monachus cum licentia sui Abbatis ordinari , non solum ab illo Prælato , in cuius Diocesi constitutum est Monasterium ; verùm etiam eius Diocesis , in qua natus est .

7 Pari ratione constitutum est, ne quis alienæ Diocesis virum præter proprii Superioris licentiam ordinare audeat. Si tamen quis beneficium obtineat prius ab alio Episcopo; tunc enim cum ratione beneficii incipiat esse subditus conferentis; poterit ab eodem ordinari securè.

8 *Patrati delicti ratione* quis ordinari prohibetur, ut cum homicidium, aut aliud capitale crimen, facto, vel præcepto, aut consilio perpetraverit, & per surreptionem promotus, deijciendus erit, dicente Domino. Si quis per industriam, aut per insidias hominem occiderit ab Altari meo euellens eum. Quod de eo homicida intelligendū est, qui voluntate committit homicidium. Cæterum si qui necessitate maxima arctati, effugere nullo pacto valentes, homicidium in defensione vitæ suæ admiserint, nullam ex hoc irregularitatem incurrunt.

9 Fortuitum homicidium commissum, dum datur opera rei illicitæ, impedit à suscipiendis Ordinibus. Bello autem contra infideles sese immiscens, volensque Christiani nominis hostem interficere, si homicidium, commisit, nec ad sacros Ordines promouendus est, nec promotus ad altiores ascendere potest, sed in suo inferioris ex dispensatione sustinendus erit. Sed & licitæ rei operam dans, si ex negligentia homicidium commisit, irregularitatem incurrit. Vndè qui puerum intuitu disciplina percussit, ut ex percussione in infirmitatem incidere, & postea expirauerit, ab omni ministerio Altaris excludendus erit.

10 Diuersum statuitur de eo, qui mero casu homicidium commisit, nimirum, pulsante aliquo campanas, ut populus conueniret ad Diuina, tintinabulum cadit, & puerum occidit; cum ipse culpæ penitus expers fuerit, nullam incurrisse noscitur irregularitatem. Similiter infantes minores septennio, furiosi, dormientes, si hominem mutilent, vel occidant, nullam ex hoc irregularitatem contrahunt.



11 Medicus laicus, qui adhibuit ægrotantibus debitam diligentiam, licet ad manus suas aliqui mortui sunt, non propterea efficitur irregularis.

12 Clerici de iniurijs sibi illatis apud Iudicem conquerentes, protestantes autem quod ad vindictam, sed sanguinis poenam non intendunt, nullam incurrunt irregularitatem, si Iudex iustitia exigente mortem delinquentibus inferat. Alioquin, si conqueri non auderent, daretur plerisque materia trucidandi eos, & ipsorum bona passim inuadendi.

13 Publicè Poenitentes non possunt promoueri etiã ad minores Ordines. Et Episcopus ordinans scientes poenitentem publicum, per annum à celebratione suspensus est. Publica autem poenitentia non imponitur, nisi pro enormi crimine, quod totam Ciuitatem commouet; & semel tantum in Ecclesia conceditur. Placuit tamen Tolerano Concilio, si necessitas, aut vsus exegerit, inter Ostiarios, vel Lectores, huiusmodi poenitentes posse collocari. Quos etiam vel facti euidentia, vel Iudicis sententia, vel propria ipsorum confessio palam facit graui cuiuspiam crimini esse obnoxios, veluti adulterio, periuurio, falso testimonio; tales nullo modo promoueri possunt. Sicut & illi, qui in facinorosos homines gladij ius exercent, vel exercentibus consulunt, & iudicijs criminalibus assident.

14 Qui negotijs & officijs secularibus seruiunt, quales sunt Procuratores, Actores, Tutores pupillorum, Artifices, Negociatores; si post deposita onera, & redita rationia, eorum vita deprehensa fuerit inculpata, omnibus possunt Ordinibus honestari. Similiter obligatum ex causa mœni ab ordinando non repelli.

15 Sed qui negotiando vsuras exercuit, is non potest ordinari, & ordinatus est deponendus. Mens enim auaritia, nec abstinere nouit vetitis, nec gaudere concessis.

16 Simoniaci, seditiosi, & inimpetunati in pertinacia vltro.

95  
vltiores ordinari non possunt . sed fur occultus post restitutionem , & poenitentiam , si idoneus fuerit , nec super furto manifesta respersus sit infamia ; ad sacros Ordines promoueri potest .

17 Si quis in ægritudine constitutus baptizatus fuerit , quia fides eius non ex voluntate , sed ex necessitate videtur esse , ac propterea , vel de fide eius , vel continentia sit suspicio , ordinari non debet : nisi fortè postea ipsius studium , & fides emicuerit , & hominum raritas id exegerit . Pueri verò ab hæreticis etiam baptizati promouentur . scienter autem rebaptizatis , ad Ordines promoueri permittendum non erit .

18 Filij Presbyterorum ex fornicatione suscepti , nō possunt ordinari ; nisi fiant Monachi , vel in Congregatione Canonica regulariter viuentes : nullo tamen modo ad præfecturas admittantur . Sed benè possunt ordinari , nati ex legitimo matrimonio ante Ordines suscepti . Græcorum verò sacerdotum filij legitimi sunt , etiam post Ordines sacros suscepti ex vxore ante ducta , & possunt ad Ordines promoueri .

19 Item repellendi sunt , bigamus , poligamus , & qui vxorem viduam , quam per adulterium primò cognouerat , vel eiectam à marito , vel meretricem , vel ancillam duxerit , Qui verò honestam viduam ante minimè cognitam ; is impediri non debet à Sacerdotio , sicut & monogamus .

20 Fornicatus cum pluribus concubinis , non incurrit irregularitatem bigamiæ : sed cum eo , tanquam simpliciter fornicatus sit , quo ad executionem sacerdotalis officij , per Episcopum dispensari poterit .

21 Corpore vitiatum notabiliter ordinari non potest : modica verò læsio non impedit ordinandum , si potest sine scandalo celebrare . Qui verò caret aliquo membro corporis ad usum Ordinum necessario , vel defectū aliquem corporis deformem habet , aut oculo priuatus est , irregularis erit . Ceterum , si sacerdotali in Ordine consti-



91  
constituto, tale quid acciderit; vel ex verbo, vel ab hoste; irregularis non erit.

22 Idem iuris est de eo, cui vel vi, vel in cunabulis, vel de Medicorum consilio, metu imminentis periculi, virilia fuerint amputata. Quod si volentes, & carnali vitio repugnare fortè cupientes, seipsos absciderint, quia sic homicidæ sunt, ad Clerum peruenire non possunt. Corpore enim vitiati, non casu, sed propria voluntate sunt intelligendi: & sicut in illis veniam casus impetrat, ita vindictam in ijs voluntas postulat.

23 Is quoquè, qui in furorem aliquando versus insaniuit, aut quolibet modo vexationis incursum efferatur, aut quod propè furorem accedit, in scæna luserit; vel afflictione diabolica vexatus fuerit, ordinari non poterit. Clerici etiam qui in adolescentia à Dæmonibus cognoscuntur obsessi, ad superiorem gradum ascendere non possunt.

---

## TITVLVS VII.

### *De Votis, & Castitate Clericorum.*

1 **V**otum est, alicuius boni operis cum deliberatione Deo facta promissio, vt B. Thomas de Aquino censuit. Vel, vt alij. Est propositi supererogantis promissio Deo facta propter bonum finem, ex deliberatione firmata.

2 Quapropter sciendum est, non idcirco adstringi aliquem Voto, quòd tantum animo conceperit, se aliquam operam Deo acceptam operaturum, nisi etiam id firmo, certoquè animo stabilierit: quare etsi quis cum animo agitare de Religionis habitu suscipiendo, verba huius sententiæ edidisset. *Non diù hic commorabor;* voti reus non propterea est censendus; tunc enim duntaxat initiatum est votum; nondum autem confirmatum.

matum . At si deliberatio matura præcessisset, dehinc in ea fixus perstitisset, tunc utique etiam confirmatum dici posset . Cum verò præterea etiam verba profert, quibus fixam animi sui deliberationem aperit, consummatum iam votum dicetur .

3 Intelligendum tamen, nisi ulterius sit processum, hoc votum simplex adhuc erit, non solenne . Nam, quamdiù ad aliquam solennitatem ventum non sit, qua voti executio initium accipiat, simplex appellatur . Sed cum executioni ipsius per solennitates aliquas ei rei necessarias initium datur, tunc iam solenne effectum dici potest . Veluti, si quis vouerit, se Religionem probatam ingressurum, susceperitque sacram vestem, quæ professorum propria est, & orans ante Altare Deo vouerit; vel si expressè in manibus Prælati Religionem, & Regulam professus sit: vel sacros Ordines acceperit, qui eis se deuouerat: his & similibus modis solenne effectum dicetur . Ante verò, quam ad huius generis solennitates ventum sit, quamuis expressa pollicitatio clarè pronunciata sit, simplex appellatur .

4 Quod tamen Votū simplex non minus Deo obligat, quam solenne, etsi in alijs quibusdam differant; veluti in eo, quod Votum solenne non solum matrimonium contrahi impedit, sed etiam contractum dirimit; quam vim simplex Votum non habet: contrahendum enim duntaxat impedire solet .

5 Et hinc adeò castitas in Clericis commendatur, ut non solum secundum supradicta, abstinere à libidine etiam in laicis damnata pontificijs Legibus iubeantur, sed ipsi etiam matrimonio alioqui sancto, & à Deo instituto, aliqui eorum aspirare prohibeatur .

6 Quare Episcopus, Presbyter, Diaconus, & Subdiaconus, etsi irregularitatem etiam contraxerint, ad matrimonium tamen accedere prohibentur . At si matrimonium de facto contraxerint, nulla habita irregularitatis ratione separabuntur . Hinc & Alexander III.

olim



olim Cenomanensem Episcopum rescripto suo commendauit, quod compulisset Subdiaconum eam abiutare, quam sibi inconiugium copulauerat. Iussitquè eum Subdiaconū prohiberi in Subdiaconatu ministrare & ad maiores Ordines promoueri: sed in minoribus tantum Ordinibus eum ministrare concessit. Et Religionem ingredi volentem, & laudabilem sui ipsius conuersationem præstantem, ad Maiores quoque Ordines promoueri permisit.

7 Potest tamen Episcopus Sacerdoti, qui post nuptias, vel contubernia verius contracta, eaque dimissa diu se continuerit, & poenia acta bonum sui ipsius specimen præbuerit, officium ademptum, & executionem restituere. Vel Diacono eadem præstanti, Diaconatus officium reddere, & ad Presbyteratus etiam Ordinem eum admittere.

8 Qui verò est intra minores Ordines Clericus, nuptiarum incapax non est: verum beneficio quod habet spoliatur. Recipit tamen expensas, quas in rem illius Ecclesiæ irrogarat. Nec prodest Clerico, quod beneficium ei sit collatum post nuptias ab eo contractas, ut retinere illud possit: nam etsi ipse idem, qui ea beneficia post initum matrimonium sciens, contulit Episcopus, auferre illa non possit, Prælatus tamen, cui ille Episcopus subest, illa adimere, etiam appellatione remota poterit.

9 Item, hi Clerici vxorati amittunt priuilegium, quo rerum suarum immunitate potiebantur: saluum tamen eis remanet priuilegium, nè sub Iudice laico conueniri possint; neque citra excommunicationis poenam manus iniuriosas quis in eos inferat: dummodò Clericorum in habitu incedant, vestibus Clericalibus vtentes, & tonsuram gestantes. Et vxor quam habet hic Clericus, prima, vnaque, & nupta fuerit, & virgo, quemadmodum Bonifacius VIII. constituit, & Sacrosancta Synodus Tridentina disposuit; & ille ipse  
ali-

97  
alicuius Ecclesiæ seruitio , vel ministerio ab Episcopo deputatus fuerit .

10 Sed , sicut Clericus à matrimonio repellitur , secundum proximè supra à nobis dicta , ita è conuerso , dum quis iugo vxorio adhuc premitur , neque ad beneficia , neque ad Ecclesiasticas administrationes , sed nec ad Ecclesiasticos Ordines accessum habet ; nisi fortè castitatem vouerit , cum vxoris consensum haberet . Vel nisi , cum adolescens vxor esset , Religionem ingressa fuisset , & eam vnā eandemque virginem habuisset vxorem . Atque ex his vnusquisque iudicio assequi potest , quanto maiore ratione Clerici coniugati à dignitatibus Ecclesiasticis summoueantur : vel qui dignitatibus Ecclesiasticis aucti sunt , à matrimonijs repellantur .

## T I T V L V S V I I I .

### *De Vita , & honestate Clericorum .*

1 **D**iximus libro superiore , de vita , & honestate Prælatorum , qui lux mundi , & sol terræ sunt à Salvatore nostro appellati ; tenenturque sanctitate sua , & Clero inferiori , & fidelibus omnibus præluere : Nunc dicendum est de probitate , & sanctimonia vniuersi Cleri , in inferiore gradu constituti , quibus congruit , vt quemadmodum in sortem Domini sunt vocati , & à populo officijs , & ordinibus diuisi , ita summa ope nitantur , & studeant vitæ innocentia , bonitate , & integritate morum cæteris præstare , quo & documento eis sint disciplina Christianæ , & ipsi lucernas suas ardentes palam manibus præferentes , olei copiam nunquam non habeant .

2 Curare igitur debent , vt grauitatem in actibus , sermonibus , vestibus , moribus , & omni denique vita

N

præse-



præferant. Quod vt facilius præstent, Innocentius III. sanxit, ne Clerici officia, & commercia secularia exer-  
ceant: minus ioculatoribus, & histrionibus operam ne  
impendant: tabernas, comessationes, atque ebrieta-  
tem fugiant: aleis, & taxillis ne ludant, neuè ludenti-  
bus intersint: cauponationem aut propinationes non  
exerceant; nec publica telonia, aut contributiones Rei-  
publ. redimant, aut ipsi extorqueant. Mercaturam  
minimè exercent; choreas & saltationes non faciant;  
laruati non incedant: luxuriam atque lasciuiam quam  
maximè vitent; nec in domibus suis suspectas foeminas  
foucant, imò nec consanguineas iuuenes, etiam proxi-  
mo affinitatis gradu, aut sorores germanas. Coronam  
& tonsuram in capite ferant: seque in officijs Ecclesia-  
sticis tantum, alijsque honestis, & vtilibus studijs, ma-  
ximè verò in lectione sacrae Scripturae exercent. Quod  
sanctius etiam postea firmatum est per Leonem X. in  
Concilio Lateranensi.

3 Clemens quoque Quintus, in Concilio Viennensi,  
pœnas sanxit aduersus eos Clericos, qui decori sui me-  
tas non seruantes, vestibus nimium mollibus, vel su-  
perbiæ, aut leuitatis aliquod indicium præbentibus, aut  
ceteris corporis ornatibus vti fuerint. Sed vtantur ve-  
stibus secundum formam Innocentij exactissimè præfi-  
nitam: neque effusa prolixitate nimium luxuriantibus,  
neque angusta supra modum breuitate sordescantibus.  
Quod si verò aliqui prohibitas vestes gestauerint, be-  
neficia habentibus simplicia, fructus semestres adimit:  
quibus verò cura animarum incumbit, anni vnus fru-  
ctuum iactura suorum beneficiorum multari iussit.

4 Quam Clementis Constitutionem Tridentina Sy-  
nodus innouando, atq; ampliando, constituit, vt omnes  
Ecclesiasticæ personæ, quantumcunque exemptæ, quæ  
aut in sacris fuerint, aut dignitates, personatus, officia,  
aut beneficia qualiacunque Ecclesiastica obtinuerint, si  
postquam ab Episcopo suo etiam per edictum publicum  
moniti

moniti fuerint, honestum habitum clericalem, illorum Ordini, & dignitati conuenientem, & iuxta ipsius Episcopi ordinationem, & mandatum non detulerint, per suspensionem ab Ordinibus, ac officio, & beneficio, ac fructibus, redditibus, & prouentibus ipsorum beneficiorum: Nec non, si semel correpti denuò in hoc deliquerint, etiam per priuationem beneficiorum, & officiorum huiusmodi coerceri possint, & debeant.

5 Item, prohibentur Clerici causa lucri negotiari, piscationes, aucupia, & venationes exercere: & Monachi suo nomine conductas possessiones tenere. Præterea Clerici sacriati prohibentur procuratores, spenditores, & causarum actores, aut ministri in iudicio seculari, laicorum esse. Quemadmodum etiam prohibentur gubernationes Oppidorum, procurationes Villarum, Prædiorum, aut quaslibet iurisdictiones seculares, hominum secularium vice, & nomine suscipere, & exercere: Nisi ab Ecclesiastico ministerio velint esse alieni: ac Religiosi Clerici seuerius etiam puniri velint.

6 Cuiusvis autem Ordinis Clericus, quamuis nondum sacer effectus, sanguinis iudicium ad mortem, vel membri mutilationem inferendam exercens, honore priuatur & loco. Et non modo sanguinis sententiam dictare, aut proferre, aut sanguinis vindictam exercere debet, sed neque ubi exerceatur interesse; aut litteras dictare, aut scribere in sanguineam vitionem mittendas, nec viris sanguinum ullis tanquam eorum Dux præfici potest.

7 Item sacer Clericus à chirurgicæ artis exercitio repellitur, qua adustio, vel incisio aliqua irroganda sit; aliisque artibus, quibus similia officia inesse necessarium sit.

8 Arma quoque portantes Clerici, & vsurarij excommunicantur. Et Clericus percussor, qui se non corrigit, deponendus est. Episcopus autem, cuius mandato mulier seuerè nimium flagris, seu fustibus ob de-



lictum cæsa fuerit, duobus mensibus à Missarum administratione, Gregorij Magni rescripto suspensus fuit.

9 Venationes item & aucupia, prout supra diximus, non modo cum sclopetis, sagittis, bipennibus, lanceis, alijsque armis prohibitis, & canibus venaticis, sed etiam cum accipitribus, falconibus, huiusmodique auibus ad prædam natis, à Clericis omnibus aliena esse debent.

10 Religiosis verò Clericis adeò negocia humana sunt interdicta, vt Alexander III. olim edixerit, vt nulli Religioso post factam professionem, ad Physicam, vel Leges sæculares legendas exire liceat; poena etiam excommunicationis, præter alias poenas, transgressoribus addita.

11 Quam Alexandri Constitutionem, Honorius III. postea sic declarauit, siuè extendit, vt eius violator ipso iure ex Canone latæ sententiæ excommunicationi censeatur obnoxius: atque vt Archidiaconos, Decanos, Plebanos, Præpositos, Cantores, & alios Clericos personatus habentes, & presbyteros complectatur. Nec humanarum rerum, litterarumue illecebris capti, Theologiæ, atque Sacrorum Canonum studia omittant, quibus eos omni cura vacare conuenit; cum infectas Philosophiæ, & Poësis radices, & aliunde ortas pestes, per diuinorum scientiam sanare, & purgare debeant.

12 Demum Sacrosancta Tridentina Synodus constituit, vt quæ aliàs à Summis Pontificibus, & à Sacris Concilijs, de Clericorum vita, honestate, cultu, doctrinaque retinenda; ac simul de luxu, commensationibus, choreis, aleis, lusibus, ac quibuscunque criminibus, nec non sæcularibus negocijs fugiendis; copiosè, ac salubriter sancita fuerunt, eadem in posterum iisdem poenis, vel maioribus, arbitrio Ordinarij imponendis obseruentur. Nec appellatio excusationem hanc, quæ ad morum correctionem pertinet, suspendat. Si qua verò ex his in desuetudinem abiisse compererint, ea quam-

quamprimum in vsum reuocari, & ab omnibus accurate custodiri studeant, non obstantibus consuetudinibus quibuscumque.

13 Iam verò ex supradictis nemo non iudicare potest, quam deforme existimetur in Clerico incontinentiæ, & fornicationis vitium, cum supradicta, quorum multo minora sunt flagitia, tam acerbam vindictam expectent. Quare Clericus fornicator potest ab officio suspendi, si ita Iudici videbitur. Quod si verò Clericus suspensus contempta suspensione diuina celebrare ausus fuerit, & in vetere flagitio perseverare, non beneficijs Ecclesiasticis tantum exuetur, sed etiam perpetuò deponetur. Quæ poena etiam Prælatos manet, qui huiusmodi subditorum Clericorum vitia æquo animo tulerint, nec in eos animaduenterint.

14 Et Clericus concubinam palam habens, ipso iure ab officio est suspensus, nec partem ab Ecclesia suscipere potest: & concubinam dimittere recusans, interdicto, suspensione, ac demum excommunicatione punietur. Olim verò simplex fornicatio iusta causa Clerico deponendo existimabatur.

15 Hinc prohibentur Clerici mulieres domi habere, quæ incontinentiæ suspitionem præbere possint, vt amitæ, sorores, cognatæ, & affines, earumque pedisequæ. Sed egentibus illis in domo longè à sua conuersatione posita necessaria subministrent. Et Clericus sine manifesta, & probabili causa, ad sanctimonialium cœnobîa frequenter accedens, per Episcopum arceri debet: seque non corrigens Ecclesiastico officio priuari.

16 Episcopi quoque, si ab huiusmodi crimine non abstinuerint, & à Synodo Prouinciali admoniti se non emendauerint, ipso facto sint suspensi. Et si perseverent, etiam ad Sanctissimum Romanum Pontificem ab eadē Synodo deferantur, qui pro qualitate culpæ, etiam per priuationem, si opus fuerit, in eos animaduertet.



## TITVLVS IX.

*De Regularibus, & Monachis.*

1 **Q**uoniam in Ecclesia Dei præter Leuitas, & Sacerdotes, sunt etiam alij, qui non minus in laicatu, quàm in clericatu constituti Domino deferuiunt, vt sunt Regulares, & Monachi; restat vt de his quoque pauca subiiciamus. Quorum, cum eadem ferè iura sint, quicquid de Monachis dicitur, idem intelligendum est, & de cæteris Regularibus. Nam similitum eadem est disciplina, vt inquit Philosophi, atque Iureconsulti.

2 Et quidem Regulares dicuntur omnes illi, qui Regulam aliquam ab Ecclesia approbatam, & tria substantialia vota, paupertatem videlicet, castitatem, & obedientiam profitentur. Et in hoc Monachi cum Regularibus conueniunt; istoque respectu aliquando Monachorum appellatione omnes Regulares continentur. Quo ad cætera verò, laxiorem quandam, quàm Monachi Regulam habent, certumque modum viuendi, ac vestiendi, secundum maiorem, & minorem perfectionem.

3 *Sunt autem quatuor Regule ab Ecclesia approbate.* S. Basilij, S. Benedicti, S. Augustini, & S. Francisci, sub quibus militant omnes ferè Monachi, & Religiosi; exceptis Charchusianis, Iesuitis, & Minimis; qui pro Regula suis Constitutionibus reguntur.

4 Sed Monachi propriè à Latinis solitarij possunt dici, quod antiquitus remoti à populo, in montibus, aut syluis solitariam ducerent vitam, dicebanturque Eremitæ, seu Anachoretæ. Ducit itaque etymologiam Monachus, à Græco verbo monos, quod Latine sonat vnus, vel solus. Et differunt à Conuersis, & Oblatis per hoc ipsum, quod ad Ordines promouentur. Nam *Conuersi sunt*, qui offerunt se, & sua, mutando habitum,

bitum, & profitendo; laici tamen sunt, quia non promouentur ad Ordines. *Oblati Verò sunt*, qui se, & sua offerunt Monasterio, habitu non mutato, & absque professione Regulæ viuunt, licèt eam voluntariè obseruent.

5 *Fiunt autem Monachi ex triplici capite præcipuè*. Aut ex paterna deuotione, aut ex propria professione, aut ex voti emissionè. Nemo tamen debet cogi ad intrandum Religionem, neque à patre, neque ab alijs; licet benè potest induci suauiter persuadendo: sed non violenter, aut simoniacè, aut mendacijs aliquibus.

6 *Ex paterna deuotione Monachus quis efficitur*, cum pater filios impuberes Monasterio offert. Quo casu si impuberes sacram tonsuram, vel velamina susceperint, sextodecimo ætatis anno, moneri debent, & inquiri, vtrum in ipso habitu permanere cupiant. Si permansuros se professi fuerint; vel professionem à se prius factam ratam habuerint, vltèrius pœnitendi locum non habebunt. Si verò ad sæcularem habitum reuerti maluerint, redeundi licentia concedenda erit: quia satis inutile est, vt coacta seruitia Domino præstentur. Quæ etiam ratione constitutum est, ne quis inuitus ordinari debeat.

7 Quod si impubes præter parentum voluntatem tonsuram accepit monachalem: parentes id factum irritare valent. Sed si intra annum ad proprium Episcopum, vel alium competentem iudicem non reclamauerint, reuocare amplius non poterunt. Si verò in grandiori ætate adolèscentes seruire Deo elegerint, non est potestas parentibus prohibendi...

8 *Propria professione Monachus efficitur quis*, aut expresse, aut tacitè. *Expresse*, vt si quis post annum probationis habitum suscipiens monachalem, Regulis Monasterij obstringi se velle profitetur. Si tamen ante tempus probationis regulariter præfinitum, is conuerti desiderat, habitum recipit, & professionem emittit, Abbate per se, vel per alium professionem recipientem, regulari



gulari obseruantia obligatur, & verè Monachus est censendus.

9 Quemadmodum autem discretus Abbas, ex causa ante probationis tempus professionem recipere potest; ita ex causa interdum post annum potest eam differre. Vnde si quis incognitus Monasterium ingredi voluerit, ante triennium monachalis habitus concedendus non est: ne si fortè post annum statim præstetur, postea seruus, aut maritatus, aliàsue inhabilis ad Monasterium deprehendatur. Quod si seruus per triennium in Monasterio commoratus, postea Monachus effectus fuerit, ex hoc liber etiam efficietur.

10 Quinimò, si prius ignorante Domino ad sacra ministeria ordinatus Monachus fieri elegerit, iugum seruitutis euadet: aliàs intra vnius anni spatium Domino, & seruilem formam probare, & seruitium suum absque vilo impedimento recipere licebit.

11 Prædicatores tamen, & Minores, alijque Mendicantium Ordines omnes, ante annum probationis elapsum, neminem ad professionem admittere debent. Quod si forte contra fecerint; & is qui sic receptus fuerit, eorundem Ordini minimè alligabitur; & receptores à receptione ad professionem quorumlibet suspensi, tam excommunicationi, quàm alijs poenis grauioribus subiiciendi erunt.

12 *Tacitè verò profitetur quis*, cum vltra tempus probationis in Monasterio permanet, & habitum desert, qui profitentibus tantùm datur. Hinc Doctores dicunt, quod si quis expleto anno probationis, per triduum habitum monachalem intra Monasterium portauerit, iam ipso facto professionem fecisse præsumitur.

13 Vtrum autem quis expressè professus fuerit, an tacitè, interdum multum interest. Expressa enim professio, etiam sæculari habitu non mutato, illi Religioni præcisè obligat, quam quis professus fuerit. Tacitè verò facta infra probationis annum, per habitus qui profi-

proficientibus tantum datur susceptionem, non illi specialiter, cuius est susceptus habitus; sed generali Religioni recipientem obligat: dum tamen legitimæ sit ætatis, ac sciens, & prudens triduo in eius habitus delatione perseverauerit.

14 Qui vitam regularem vouit, Monasterium ingredi debet, non obstante quod fuerit Prælaturam consecutus, quia votum à principio est voluntatis, sed ipsum obseruare est necessitatis. Debet igitur Prælaturam dimittere, & Monasterium ingredi; licet postea canonicè electus Episcopatum recipere possit.

15 Et quia in proposito ingrediendi Religionem, votum est simplex; solenne verò est, quando quis per professionem tacitam, vel expressam, comprobauit illud quod vouerat Deo; idcirco faciens votum de certa Religione intranda, si aliam laxiorem ingrediatur, & in eadem profiteatur, per solenne votum professionis, derogat voto priori simplici, quod animo tantum conceperat, & iã debet remanere in ea Religione in qua professus est. Sed nihilominus pro voto nõ completo poenitentiam impositam peragere debet.

16 Is igitur, qui in legitima ætate constitutus, habitum semel induit spontè, religiosum propositum vtrò susceptum, deferere non poterit; sed proprio Superiori obediens in castitate in proprio deget Monasterio.

17 Sed nec aliquid proprium possidere debet: & si quid habet, totum in continenti resignabit. Nam abdicatio proprietatis, adeò est annexa Regulæ monachali, vt contra eam, nec Summus Pontifex possit licentiam indulgere. Et si proprietas apud quenquam inuenta fuerit in morte, is est Christiana sepultura priuandus, & sepultus exhumandus; prout etiam B. Gregorius se fecisse narrat. Quod si quispiam Monachus proprietatem aliquam fuerit deprehensus habere, monitione regulari præmissa de Monasterio expellendus est, quemadmodum Innocentius III. olim constituit. Gregorius verò IX.



posteriori Constitutione, intra arcti Monasterij septa-  
ergastulo includi religiosum iubet.

18 Potest tamen Monachus ad aliam strictiorem  
Religionem transire, cui suus Superior nullo obstante,  
priuilegio, debet sine difficultate omni licetiam indul-  
gere, ne videatur propositum impedire. Transire au-  
tem de vna Religione in aliam debet, aut zelo perfectio-  
ris Religionis à debita perfectione, & tunc requiritur Su-  
perioris iudicium: aut propter infirmitatem, seu debi-  
litem, & tunc necessaria est dispensatio. sed quia  
modo data sunt multa priuilegia Religiosis, ideò non  
est facile sine licentia Papæ, de vna Religione transire  
in aliam, ne incidat in excommunicationem Bullæ Mar-  
tini V. & Sixti IV.

19 Monachus verò electus in Papam, potest inuito  
Superiore acceptare Papatum, cum talis electio credi  
debeat inspirata diuinitus.

20 Mendicantibus verò approbatis, qui prætextu ar-  
ctioris ducendæ vitæ ad Monasterium confugiunt, Mar-  
tinus IV. omninò vetuit ad aliam Religionem transire,  
excepto Ordine Carthusiensium, sine speciali Sedis Apò-  
stolicæ concessione, tam recipientibus, quàm receptis  
ipso facto excommunicationis poenam incurfuris.

21 Fugitiuos verò debent Abbates sollicitè perqui-  
rere, vt ad Monasterium, & frugem melioris vitæ reuer-  
tantur, opportunitis remedijs prouidere: Nec Ordina-  
rios, qui eorum suppleant negligentiam, expectare. Qui  
verò habitu, & nomine fingunt se Monachos esse, & nò  
sunt; corrigi debent, vt veri Monachi sint, vel veri Cle-  
rici.

22 Singuli quoque Monachi per villas, & oppida  
non debent discurrere: nec per quasunque Parochia-  
les Ecclesias disponi. Quod in Regularibus, cum Re-  
gulæ inferuiant laxiori, specialiter cautum non inue-  
nitur, ideòque illis cum minori difficultate Parochia-  
libus Ecclesijs præesse permittitur.

23. Beneficium autem illius, qui Religionem ingreditur, non est intra probationis annum alicui conferendum, nisi, vel ipsiusmet accesserit assensus; vel manifestis indicijs colligatur, decreuisse eum vitam absolute mutare: vel professionem expressam ediderit: vel demum professorum habitum sciens susceperit. Sed interim, alius ei beneficio minister dabitur, assignata ei congrua de illius prouentibus portione.

24. At regularia beneficia in titulum Regularibus professis prouideri consueta, cum per obitum, vel resignationem, vel aliàs illa in titulum obtinentis vacare contigerit, Religiosis tantum illius Ordinis, vel his qui habitum omnino suscipere, & professionem emittere teneantur, & non alijs conferri debent, vt sacrosancta Synodo Tridentina statutum est.

25. Sanxit etiam eadem Synodus sub Pio IV. vt nulla renuntiatio, aut obligatio ante professionem facta, etiam cum iuramento, vel in fauorem cuiuscunque causae piæ valeat; nisi cum licentia Episcopi, seu eius Vicarij fiat intra duos menses proximos ante professionem: ac non aliàs intelligatur effectum suum sortiri, nisi professione secuta. Aliter verò facta, quamuis eum huius fauoris expressa renuntiatione, etiam iurata, sit irrita, & nullius effectus.

26. Hoc etiam prouidendum est, ne quis in diuersis Monasterijs locum Monachi habere præsumat. Nec vt vnus Abbas pluribus Monasterijs præsideat. Item ne cui Monacho, de Monasterio in Monasterium migrare permittatur; sed Monasterium suum deserens, ad illud competenti coercionem redire compellendus est.

27. Sed quia Regulares de vno ad alium Ordinem translati, facile à suo Superiore licentiam standi extra Monasterium obtinere solebant; ex quo vagandi, & apostatandi occasio tribuebatur: propterea eadem Synodus Tridentina decreuit, vt nemo cuiusque Ordinis Prælat, vel superior, vigore cuiuscunque facultatis, aliquem



ad habitum, & professionem admittere possit, nisi in Ordine ipso, ad quem transfertur, sub sui Superioris obedientia in clauistro perpetuò maneat. At taliter translatus, etiam si Canonorum Regularium fuerit, ad beneficia secularia etiam curata incapax omninò existat.

28 Mendicantes verò, qui non ad Mendicantium Ordines, etiam auctoritate Apostolica transferunt, iuxta Clementis V. Constitutionem, (à Prioratus administrationibus, officijs, vicariatibus, & alijs præminentijs, quoquo nomine vocentur, repellere debent. Nec locum aut vocem in Capitulo eis concedi oportet, etiam si hoc eis à Collegis liberè permetteretur.

29 Ut autem inuiolabiliter monastica disciplina custodiat, de congregatione Monachorum Abbas eligendus est (Clericus ergò secularis non eligetur in Abbatē) quem ordo vitæ, & meritum magis poposcerit ordinari. Qui cautus sit in regimine, humilis, & discretus: & cui Monachi cum omni obedientia, & deuotione subiaceant.

30 Et propterea, sicut in Magistrum assumi non potest, qui nusquam discipulus fuit; ita & in Superiorem præficiendus non est, qui subesse non nouit, regularemque Prælaturam non assumat, qui primo professus non fuit. Quamquam ad Episcopalem dignitatem talis in secularibus, vel regularibus Ecclesijs eligi minimè prohibeatur.

31 Quod si in aliqua Congregatione non reperiatur idoneus, qui possit in Abbatem eligi, tunc sumendus erit de alio Monasterio: & qui in alio Monasterio Abbas constitutus, iam amplius non habebit vocem in primo Monasterio, etiam si ex consensu Capituli hoc sibi reseruauerit.

32 Visitatores quoque in Capitulo creandi sunt, secundum formam Generalis Concilij, qui visitationis officium exequantur; & omnia quæ Viennensi Concilio constituta sunt, fideliter obseruari faciant, & de statu Monasteriorum, & obseruantijs regularibus diligenter in-  
inqui-

inquirant; & tam in spiritualibus, quam in temporalibus corrigant, & reformat, quæ viderint corrigenda, & omnia secundum Honorianæ constitutionis formam prosequantur.

33 Nouissime sciendum est, nemini licere nouam Religionem instituere, sed quicumque ad Religionem sese conuertere voluerit, vnam ex olim institutis, & ab Ecclesia receptis assumat. Et consequenter, qui voluerint religiosam domum fundare, ex Religionibus veteribus Regulam, & Institutionem accipere debent; ne temere recedatur ab eo, quod diu bonum iudicatum fuit. Qui autem cogitata sua, & inuentiones sanctorum Patrum Constitutionibus anteponunt, illi errorum Magistri sunt, quia veritatis discipuli esse noluerunt.

## T I T V L V S X.

### *De Sanctimonialibus.*

**P**rouidit etiam Sacrosancta Synodus Tridentina, sub Pio IV. libertati professionis virginum Deo dicandarum, ne habitum suscipiant ante annum duodecimum expletum, ne uel seductæ, aut coactæ professionem emittant. Propterea sine scitu, & examine Episcopi professionem facere non debent. Quod si Præfecta certiolem Episcopum non fecerit ante menssem de eius professione, quamdiu Episcopo videbitur ab officio suspensa sit.

2 Eadem sacrosancta Synodus anathemati subijcit omnes, & singulas personas, cuiuscunque qualitatis, vel conditionis fuerint, tam Clericos, quam Laicos, seculares, vel regulares, atque etiam qualibet dignitate fungentes, si quomocunque cocgerint aliquam virginem, vel viduam, aut aliam quamcunque mulierem inuitam, præ-

ter-



terquam in casibus à iure expressis, 'ad ingrediendum Monasterium', vel ad suscipiendum habitum cuiuscunque Religionis, vel ad emittendum professionem: quique consilium, auxilium, vel fauorem dederint. Quique scientes eam non spontè ingredi Monasterium, aut habitum suscipere, aut professionem emittere, quoquo modo eidem actui, vel præsentiæ, vel authoritatè interposuerint.

3 Simili quoque anathemati subiicit eos, qui sanctarum virginum, vel aliarum mulierum voluntatem veli accipiendi, vel voti emittendi, quoquomodo sine iusta causa impedierint. Decreuitque vt omnia & singula, quæ ante professionem, vel in ipsa professione fieri oportet, seruentur non solum in Monasterijs subiectis Episcopo, sed & in alijs quibuscunque. Ab his tamen, exceptit mulieres, quæ Poenitentes, aut Conuertitæ appellantur; in eis enim constitutiones ipsarum seruari vult.

4 Hoc quoque circa Sanctimonialès eadem Synodo statutum fuit, vt earum Monasteria Sanctæ Sedi Apostolicæ immediatè subiecta, etiam sub nomine Capitulorum Sancti Petri, vel Sancti Ioannis, vel aliàs quomodocunque nūcupentur, ab Episcopis tanquam Apostolicę sedis delegatis gubernentur, nō obstantibus quibuscunque. Quæ verò à Deputatis in Capitulis Generalibus, vel ab alijs Regularibus reguntur, sub eorum cura, & custodia relinquuntur.

5 Item sanxit, vt Sanctimonialès earum Constitutionibus admoneantur, quò saltem semel singulis mensibus confessionem peccatorum faciant; & sacrosanctā Eucharistiam suscipiant. Atque vt præter ordinarium Confessorem, alius extraordinarius ab Episcopo, & alijs Superioribus bis aut ter in anno offeratur, qui omnium confessiones audire debeat.

6 Id quoque in mulieribus Religiosis præcipuum statutum est, vt hæ cuiuscunque Religionis, vel Ordinis

nis sint; tacitè, vel expressè professæ, intra claustra sui Monasterij perpetuò permaneant, nec quacumque ratione, vel causâ egredi possint: nisi tanto morbo laborarent, vt manifestum sit, non posse eas cum alijs, citra periculum, vel scandalum commorari. Nec cuiquam, etsi alioqui honestæ personæ, accessus, vel ingressus ad eas pateat, nisi rationabilis causâ subsit, ac Prælativenia intercedat.

7 Prohibentur prætereâ per seipsas litigare; sed litem exercere volentes, procuratores constituere debent: quemadmodum etiam in prosequendo electionis negotio apud Sedem Apostolicam: siue illud electarum nomine agatur, siue eligentium: aut earum, quæ ab electione appellat, vel contra eam opponunt, non debent ad ipsam Sedem ipsæ accedere, sed procuratores mittere.

8 Præcepit quoque sacrosancta Synodus Episcopis, vt in omnibus Monasterijs sibi subiectis ordinaria; in alijs verò Sedis Apostolicæ authoritate, clausuram Sanctimonialium, vbi violata fuerit, diligenter restitui; & vbi inuiolata est, conseruari maximè procurent. Decernens etiam, vt nemini Sanctimonialium liceat post professionem exire à Monasterio, etiam ad breue tempus quocumque prætextu: nisi ex aliqua legitima causâ ab Episcopo approbanda, indultis quibuscumque, & priuilegijs non obstantibus.

9 Ingredi autem intra septa Monasterij nemini licet, cuiuscunque generis, aut cõditionis, sexus, vel ætatis fuerit, sine Episcopi, vel Superioris licetia in scriptis obtenta, sub excommunicationis poena, ipso facto incurrenda. Dare autem tantum Episcopus, vel Superior licentiam debet in casibus necessarijs: neque alijs villo modo possit, etiam vigore cuiuscunque facultatis, vel indulti hætenus concessi, vel in posterum concedendi.

10 De electione autem Abbatissæ animaduertendū est,



est, quod debet esse triginta annorum, quæ octo an-  
nis post expressam professionem laudabiliter vixerit; & sit  
virgo. Quia vidua Abbatissa esse nequit, quantumcun-  
que castè vixerit in Monasterio. Similiter nec illegiti-  
mè nata, patiensque defectum in natalibus.


II Et quia Monasteria Sanctimonialium extra mœ-  
nia Urbis, vel Oppidi constituta, malorum hominum  
prædæ, & alijs facinoribus, sine ulla sæpè custodia sunt  
exposita; præceptum est eadem Synodo Episcopis, &  
alijs Superioribus, vt curent, si ita videbitur expedire,  
vt Sanctimoniales ex eis ad noua, vel antiqua Monaste-  
ria intra Vrbes, vel Oppida frequentia reducantur. In-  
uocato etiam auxilio, si opus fuerit, brachij sæcularis;  
impedientesque, vel non obediens per censuras Ec-  
clesiasticas parere compellant.

# LIBER TERTIVS.

De rebus Ecclesiasticis Spiritualibus,  
& earum administratione.

## TITVLVS I.

*De Rerum diuisione.*

I UPERIORIBVS libris, de iure personarũ  
Ecclesiasticarum, altioris nimirum, & in-  
ferioris ordinis, exposuimus; modo vi-  
dendum est de rebus Ecclesiasticis, illa-  
rumque tractatione, tam respectu animæ,  
quàm respectu corporis, quia ex his duabus rebus, ho-  
mo terrenus compositus est.

2 Res itaque Ecclesiasticæ, aut Spirituales sunt,  
aut

aut Temporales. *Spirituales sunt*, quæ spiritui deseruiunt, atque animæ causâ institutæ sunt, vt Sacramenta Ecclesiæ, Altaria, & his similia. *Temporales sunt*, quæ corporis gratia pro Ecclesiasticis ministerijs, sacrorumque ministrorum vsu sunt comparatæ, vt sunt prædia, villæ, domus, ciuitates, & fructus decimales.

3 Rursus Spiritualium rerum, quædam sunt incorporales: quædam verò corporales. *Incorporales sunt*, quæ neque tangi, neque vllò sensu corporeo percipi possunt: quales sunt virtutes, & dona Dei, aut quæ in iure consistunt. *Corporales sunt*; quæ & cerni, & tangi, & humanis sensibus percipi possunt. Harum autem, quædam sunt Sacramenta, quædam res sacræ, quædam sanctæ, quædam verò religiosæ.

4 Et quia spiritualia incorporalia à Theologis tractantur, nos spiritualia corporalia, vel quæ pèr corporalia recipiuntur, hic diligenti trutina examinabimus. Primumque de Sacramentis, deque rebus sacris, sanctis, atque religiosis tractabimus; postea de rebus temporalibus, atque illarum administratione agemus.

## T I T V L V S II.

### *De Sacramentis in genere.*

**S**acramentum est, inuisibilis gratiæ, visibile signū, ad nostram iustificationem institutum. Vel. *Sacramentum est*, corporeum quoddam elementum, extrinsecus cum sensu infictum, inuisibilia, & incorporalia propter similitudinem referens, & propter institutionem significans. Ideoque dicuntur sacramenta, quia in eis aliud videtur, aliud intelligitur. Quod cernitur, speciem habet corpoream; quod percipitur, fructum habet spirituale. Vnde à secretis virtutibus,



vel à sacris Sacramenta dicuntur, quia sub tegmento corporalium rerum, diuina virtus secretius salutem eorundem Sacramentorum operatur.

2. Sunt autem hæc septem infraſcripta Eccleſiæ Sacramenta, ſecundum ſeptem diuerſitates hominum in Eccleſia inſtituta. Primum eſt Sacramentum intrantiũ in Eccleſiam. *Baptiſmus*. Secundum pugnantium cum hoſtibus ſalutis animarum, *Confirmatio*. Tertium vires reſumentium in pugna, *Euchariftia*. Quartum, reſurgentium à labe, *Pœnitentia*. Quintum eſt executiuum, *Extrema vñtio*. Sextum miniſtrantium circa ſalutem, *Ordo*. Septimum nouos milites introducentium in Eccleſiam, *Matrimonium*.

3 Cautum autem eſt ſacroſanctæ Synodi Tridentinæ Canonibus, vt ſi quis dixerit eſſe plura, vel pauciora, quam ſeptem enumerata Sacramenta, aut etiam aliquod horum ſeptem, non eſſe verè, & propriè ſacramentum, ſeu non fuiſſe omnia à Ieſu Chriſto Domino noſtro inſtituta, anathema ſit.

4 Similiter, qui dixerit ea ipſa legis Sacramenta, à Sacramentis antiquæ legis non differre, niſi quia ceremoniæ ſunt aliæ, & alii ritus externi: Ac etiam, ſi quis dixerit hæc ſeptem Sacramenta, ita eſſe inter ſe paria, vt nulla ratione aliud ſit alio dignius. Vel Sacramenta nouæ legis propter ſolam fidem nutriendam inſtituta eſſe. Vel non continere gratiam quam ſignificant: aut gratiam ipſam non ponentibus obicem non conferre, quaſi ſigna tantùm externa ſint acceptæ per fidem gratiæ, vel iuſtitie, & notæ quædã Chriſtianæ profeſſionis, quibus apud homines diſcernuntur fideles ab infidelibus, anathema ſit.

5 Horum verò ſacramentorum hæc ſumma diuiſio eſt, quod aut ſunt neceſſaria, aut voluntaria. *Neceſſaria ſunt*, quæ ſine interitu ſalutis æternæ prætermitti, & contemni non poſſunt, vt ſunt Baptiſmus, Confirmatio, Pœnitentia, Euchariftia, Extrema vñtio: quæ omnia

ad particularem cuiusque profectum sunt principaliter instituta. *Voluntaria sunt*, quæ sine dispendio salutis, pro cuiusque arbitrio recipi possunt, & refutari, qualia sunt Ordo sacer, & Matrimonium: & hæc ad totius Ecclesiæ profectum, & subsidium principaliter pertinent.

6. Rursus necessariorum Sacramentorum, quædam ad ingressum Ecclesiæ sunt comparata, vt Baptismus: quædam ad progressum in Ecclesia, vt Confirmatio, Pœnitentia, Eucharistia: & quædam ad egressum ab Ecclesia, vt Extrema vñctio.

7. Item Sacramentorum quædam characterem, seu signum quoddam spirituale, & indelebile in anima imprimunt, & iterari non possunt, vt Baptismus, Confirmatio, & Ordo: quædam verò nullum characterem imprimunt, iterariq; minimè prohibentur, vt Eucharistia, Vñctio, Pœnitentia, & Matrimonium.

8. Constant autem Sacramenta, elemento, & verbo. Elementum hic accipimus, quidquid sub visibili natura, inuisibilem gratiam designat, & cōtinet. Verba sunt, quæ formæ visibilis efficaciam exprimunt. Ergo accedente verbo ad elementum, Sacramentum fiet.

9. Et dicuntur Ecclesiæ sacramenta, propterea (quæuis illa ipse Christus instituit, non Ecclesia) quia per ea Ecclesia sanctificatur, cœlestique Sponso matrimonij foedere coniungitur: tum quia illa ministrat, & illorū dispensationem sibi creditam habet.

10. Ergo qui baptizat, qui absoluit, & in singulis Sacramentis diuinitus operatur Dominus est: ministri verò Ecclesiæ in conficiendis sacris mysterijs, vel dispensandis, præter nudum ministerium nihil sibi vendicare valent, cum non propriam, sed eius qui Sacramenta instituit personam referant, nec vlla ex ipsis sanctificandi virtus emanet. Vnde quanquam eos inculpatores esse deceat, si tamen mali sint, vel à Catholica communione seiuncti, nihilominus & conficere Sacramenta, & dispensare poterunt. Veluti enim per lapideos canales ad



areolas aqua transfunditur, & solis radij per loca foetidissima transeuntes nulla contactus maculatione contaminantur: sic multo magis Sacramenta nulla ministri foeditate commaculantur. Ergo etiam malus minister, & hæreticus potest ministrare Sacramenta.

11 Hoc tamen sic intelligi oportet, si tales ministri intentionem Ecclesiæ concordem habeant. Ceterum, si aliud agere intendat, puta sacris illudere mysterijs, vel aliud quod Ecclesiæ non consentiat, nihil agitur. Sine fide enim spiritualis potestas exerceri quidem potest, sine Ecclesiæ intentione non potest.

12 Si quis ergo dixerit, Sacramenta nouæ legis non esse ad salutem necessaria, sed superflua, & sine eis, aut eorum voto per solam fidem homines à Deo gratiam, iustificationis adipisci, licet omnia singulis necessaria non sint, anathema sit.

13 Similiter si quis assereret Christianos omnes in verbo, & omnibus Sacramentis administrandis habere potestatem. Vel in ministris, dum Sacramenta conficiunt, & conferunt, non requiri intentionem saltem faciendi, quod facit Ecclesia: Vel ministrum in peccato mortali existentem, modo omnia essentialia, quæ ad Sacramentum conficiendum, aut conferendum pertinet, seruauerit, non conficere, aut conferre Sacramentum. Vel receptos, & approbatos Ecclesiæ Catholicæ ritus, in solenni Sacramentorum administratione adhiberi consuetos, aut contra, aut sine peccato à ministris pro libito admitti; aut in nouos alios per quemcunque Ecclesiarum Pastorem mutari posse: Qui inquam hæc, vel eorum aliqua dixerit, eadem Sacrosancta Synodo Tridentina anathema decernitur.

14 His circa Sacramenta generaliter cognitis, exordiamur nunc de singulis etiam specialiter dicere: & quia Baptismus fundamentum est, & ianua ceterorum, merito ab eo principium sumamus, disquirentes, quid sit Baptismus, vnde dicatur, quotuplex sit, quæ-

quæque eius materia, atque forma.

## T I T V L V S I I I.

### *De Baptismo, & eius effectu.*

**B**aptismus est Sacramentum regenerationis, per quam in verbo vitæ homo renascitur ex aqua, & Spiritu Sancto, & fit Filius Dei adoptivus, secundum illud Ioannis, *Dedit eis potestatem filios Dei fieri.* Vel. Baptismus est, exterior hominum ablutio, cum certa forma verborum, originarium peccatum delens. cuius figura in veteri Testamento erat Circumcisio, in Fidei, iustitiæque signaculum instituta. sed longè maiorem vtilitatem adfert nobis Baptismus: quia licet Circumcisio culpā ingenitam populo Dei remittebat, Cœlum attamen circumcisis occlusum tenebat. Modo verò post Baptismum regeneratus ianuam cœlestem sibi reſeratam inuenit. Quin etiam, & propria voluntate labem contractam in adultis præter originariam delet. Dicere attamen, peccata, quæ post Baptismum fiunt, sola recordatione, & fide suscepti Baptismi, vel dimitti, vel diminui, & fieri venialia, anathema esset, ex Tridentinæ Synodi constitutione.

2 Dicitur Baptismus à nomine Græco, quod Latine significat immersionem in aquam, seu ablutionem; tam exteriorē corporis, quàm interiorē animæ, quæ fit per Spiritum Sanctum. Nam aqua, & verba nil prodesſent baptizato, nisi Spiritus Sanctus baptizaret interiorius. Vnde & duplex paternitas, & filiatio reperitur in Baptismo: vna exterior, in qua baptizans, est pater: alia interior, in qua Spiritus Sanctus est pater. Et ideo omnes Christiani dicuntur filij Dei, & inter se sunt fratres spirituales, quia habent eundem patrem spirituale in ita  
secun-



secunda natiuitate. Per ipsam verò immersionem in aquam, repræsentatur sepultura Christi, cui secundum Apostolum consepelimur per Baptismum. Hinc à Patribus vocatur principium primum mandatorum, quia est ianua, qua ingreditur in societatem Christianæ vitæ, & omnium Sacramentorum. Sæpè aliàs vocatur Sacramentum Fidei, ac illuminationis: quia in ipso baptizati profitentur Fidem, & per illam illuminantur. Vocatur etiam purgatio, sepultura, plātatio, ac Crux Christi; quia per ipsum expurgatur baptizatus à peccato, illiq; moritur, & complantatur Christo, eiusque Cruci.

3 Triplex est autem Baptismus. Fluminis, Flaminis, & sanguinis. *Fluminis Baptismus*, verè, & propriè Sacramentum est, de quo Ecclesia dicit. *Confiteor unum Baptisma in remissionem peccatorum*. Flaminis verò, & Sanguinis dicuntur Baptisimi in ordine ad Baptismum fluminis, quatenus eius vicem supplere possunt, & producere eius spirituales effectum, nempe remissionem peccatorum, cum infusione gratiæ iustificantis. At non suppleant vicem, & obligationem suscipiendi verum Baptismum fluminis, data commoditate illum suscipiendi. Et sic qui scit necessarium esse Baptismum ad salutem, teneatur habere voluntatem re ipsa suscipiendi Baptismū, & adimplere præceptum Christi. Qui verò hoc nescit, satis est habere voluntatem seruandi totam legem diuinam, & quærendi remedia, quæ à Deo ordinata sunt ad consequendam salutem, & peccata delenda. Quia, virtualiter habet propositum suscipiendi Baptismum, prout colligitur ex Actibus Apostolorum, ex facto Cornelij Centurionis.

4 Baptismus itaque Fluminis fit aqua naturali, nèpè per ipsam immersionem, adhibita certa forma verborum, per quam interior animæ abiectio à sordibus originalis peccati Spiritus Sanctus operatione efficitur. Flaminis verò Baptismus fit per Spiritum Sanctum, cum quis habet intentionem suscipiendi Baptismum, sed cō-

modi-

moditatem non habet se baptizandi. Et proinde requiritur, quod si hic talis habeat peccatum mortale, ut faciat veram peccatorum suorum contritionem, quia sola attritio non sufficit. Sanguinis verò Baptismus fit, cum quis non habens occasionem baptizandi Baptismo fluminis, qui verè characterem animæ imprimit, subit lætus pro Christi nomine Martyrij Sacramentum.

5 Item Baptismus Fluminis diuiditur in Solennem, & simplicem. *Solennis*, multas coëremonias exigit præter verbum Dei, & aquam; nam & Cachechismos, & Exorcismos, & Exsufflationes, & Vñctiones, & salis, saluæque lenitiones, & multas preces, multasque alias solennitates desiderat. *Simplex autem* in casu necessario in usu esse solet, cum quis vitæ in discrimine est, qui baptizandus est; proptereaque sine solennitatibus prædictis absoluitur. Sed solum immersione trina in fonte contentus est, cum prolatione solemnium verborum. *Ego te baptizo, in nomine Patris, & Filij, & Spiritus Sancti. Amen.*

6 Materia Baptismi est aqua naturalis. Non rosacea, aut decocta cum herbis; non lixiuium, aut iusculum aliquod. Forma verò, verba à Christo Domino instituta. *Baptizantes eos in nomine Patris, & Filij, et Spiritus Sancti.* Non in nomine Genitoris, Geniti, & Procedentis ab utroque. Non in nomine sanctiss. Trinitatis, aut Iesu Christi; quia & Baptismus non valeret, & Sacerdos sic baptizans depositionem promereretur.

7 Baptizandi autem cura ad solos Sacerdotes pertinet; eiusque ministerium, nec ipsis Diaconibus exple re permittitur absque Episcopo, vel Presbytero; Nisi his absentibus vltima languoris baptizandi cogat necessitas. Quo casu, & laicis fidelibus, atque ipsis mulieribus baptizare permittitur. Quod si Diaconus, vel Laicus baptizasset non instante necessitate Baptismus quidem valet, sed vsurpatores alieni muneris puniendi erunt. Presbyter verò, cuius negligentia commissum est, ut quis sine baptismo ex humanis excesserit, deponendus erit, siue



siue in prouincia propria sit, siue in aliena; siue vbi cumque inuentus fuerit in hoc deliquisse.

8 Sed & si qui ab hæreticis, siue schismaticis, vel etiã à paganis, aut aliàs à facinorosis baptizati fuerint, non sunt denuò rebaptizandi, si hoc fecerunt cum intentione faciendi id quod facit Ecclesia; & debita materia, atque forma adhibita fuit. Cum non dignitate ministerii, sed virtute vebi Diuini, & Spiritus sancti; Baptismus constet. Sed si de aliquo tamen ambigatur, an sit baptizatus nec ne? poterit ei Baptismus huiusmodi verbis conferri. *Si baptizatus es, te non rebaptizo; sed si nondum baptizatus es, ego te baptizo in nomine Patris, etc.* Et certè, quotiès non inueniuntur certissimi testes, qui infantes baptizatos sine dubitatione testentur, neque ipsi sūt per ætatem idonei de traditis sibi Sacramentis respondere, absque vllò scrupulo baptizandi sunt, ne ista trepidatio eos faciat Sacramentorum purgatione priuari.

9 Nemo autem seipsum baptizare potest, etiam in mortis articulo constitutus, quamuis, si statim decesserit, non propter fidei Sacramentum, sed sacramenti fidem, saluus fiet.

10 Sacrosancta itaq; synodus Tridentina, anathemati subiecit omnes, qui dixerint, paruulos, eò quod actum credendi non habent, suscepto Baptismo inter fideles computandos non esse, ac propterea, cum ad annos discretionis peruenerint, esse rebaptizandos; aut præstare omitti eorum baptismum, quã eos non actu proprio credentes baptizari in sola Fide Ecclesiæ. Vel qui dixerint, neminem esse baptizandum, nisi ea ætate; qua Christus baptizatus est; vel in ipso mortis articulo, vel huiusmodi paruulos baptizatos, cum adoleuerint interrogandos esse, an ratũ habere velint, quod Patrini eorum nomine, dum baptizarentur, polliciti sunt: & vbi se nolle responderint, suo esse arbitrio relinquendos, nec alia interim poena ad Christianam vitam cogēdos, nisi vt ab Eucharistiæ, aliorumque Sacramentorum per-

perceptione arceantur, donec resipiscant.

11 Paruuli igitur alio proficiente baptizandi sunt, quia ahuc loqui vel credere nesciunt: sicut etiam ægri, muti, & surdi, quorum vice alius proficitur, ut pro eis respondeat, dum baptizantur. Dormiens quoque, & amens, si ante somnum, & amentiam habuerunt propositum baptizandi, in necessitatis articulo baptizari possunt. sed & si quis non sponte, dum tamen non omnino coactus, Baptismatis susciperet sacramentum, Christianitatis suscipit characterem, & ad Fidei Christianæ obseruantiam cogendus est. Ille verò qui nunquam consentit, sed penitus contradicit, nec rem, nec characterem Sacramenti suscipit.

12 Is quoque, cuius mater, vel prægnans, vel in ipsa hora qua parturit, mortis urgente periculo, Baptismatis gratiam receperit, baptizari poterit, nec propterea bis baptizatus reputabitur. Cum utique ad maternum corpus, cum esset in utero, pertineret, nec ibi regeneratio reperiri possit, ubi generatio non præcesserit; nec in hoc infanti, qui nascitur, aliquid mater participat, cum vniuscuiusque voluntas in confessione sit attendenda.

13 Quod si quis sciens, & prudens iterum baptizari sustinuerit, arctissimæ poenitiæ subiiciendus erit; quod si ignoranter, nulla quidem imponenda erit poenitentia; sed nisi magna cogat necessitas, ordinari non poterit. Illi verò qui in homine iam baptizato, cœleste lauacrum iterare ausi fuerint, excommunicationis mucrone percussi, ab omni officio, & beneficio ecclesiastico deponantur.

14 Illud quoque obseruandum est, nè quis in priuatis domibus, sed duntaxat in Ecclesijs, in quibus sunt ad hoc fontes specialiter deputati, aliquos audeat baptizare; nisi Regum, vel Principum liberos; vel talis necessitas emerferit, propter quam ad Ecclesiam absq; periculo accessus haberi nequeat.



*De Sacramento Chrismatis.*

**P**ost Baptisimum, qui transitoris ex hoc mundo sufficit ad salutem., Confirmatio quoque est Christiano adhibenda, qua vndequaque munitus sit tãquam duplici thorace aduersus maligni hostis insidias. Spiritus Sanctus enim, qui super aquas Baptismi salutifero descendit lapsu, in fonte plenitudinem tribuit ad innocentiam, in Confirmatione verò robur, & augmentũ præstat ad gratiam, qua nutriatur, & crescat, & confirmetur in Fide ex bonis operibus.

2 *Est itaque Confirmatio Sacramentum*, quo fides, gratia, & vita spiritualis inchoata in Baptismo cõfirmatur, augetur, atque perficitur. Et differt à Baptismo dupliciter. Primo ratione finis, quia finis Baptismi est natiuitas spiritualis; finis verò Confirmationis est augmentum, & perfectio talis vitæ. Secundo, ratione effectus, quia effectus Baptismi est gratia, illuminans baptizatum in Fide. Effectus verò Confirmationis est, gratia confirmans illum, vt nullo poenarum, suppliciorum, ac mortis periculo, vel metu, à veræ Fidei confessione deterreatur.

3 Dicitur autem Chrismatis Sacramentum Confirmatio, quia baptizatum confirmat in gratia, vt sit perfectus miles Christi, & fortis ad pugnam contra demones, & vitia. Et propterea à Patribus hoc sacramentum dicitur *Signaculum Dominicum*, vel signum Christi, quia in collatione huius Sacramenti hodie ex Apostolorum institutione Chrisma adhibetur cum impressione signi Sanctæ Crucis in fronte (quod olim impositione manuum duntaxat celebrabatur) vt externo signo intima vñctio, quam Spiritus Sanctus efficit, significetur septiformis gratiæ donum, *Sapientiæ videlicet, Intellectus, Consilij, Fortitudinis, Scientiæ, Pietatis, & Timoris Domini.*

4 synodus igitur Tridentina meritò anathemate per-

percutit omnes, qui dixerint, Confirmationem baptizatorum ociosam ceremoniam esse, & non potius verum; & proprium Sacramentum: aut olim nihil aliud fuisse, quam Catechesin quandam, qua adolescentiæ proximi Fidei suæ rationem coram Ecclesia exponebant. Vel iniurios esse eos Spiritui sancto, qui sacro Confirmationis Chrismati virtutem aliquam tribuunt.

5 Materia huius Sacramenti est, Chrisma confectum ex oleo oliuarum (quod nitorem significat conscientiæ) & balsamo (quod odorem denotat bonæ famæ) per Episcopum benedicto. Forma verò huius Sacramenti, sunt verba prolata à ministro, scilicet. *Signo te signo Crucis, et confirmo te Chrismate salutis in nomine Patris, et Filij, et Spiritus Sancti, Amen.* Quapropter omnis alia forma dissimilis vitiat hoc Sacramentum, prout dictum est de forma Baptismi.

6 Vnde cum ceteras vñctiones simplex Sacerdos, vel Presbyter valeat exhibere, hanc non nisi Summus Sacerdos, hoc est Episcopus conferre debet: alioqui nulla excusante consuetudine Chrismatio irrita habebitur, & vacua; nec inter Ecclesiastica Sacramenta reputabitur. Cum manum imposuisse, præter Apostolos, quorū hodie vicem sustinent Episcopi, nulli alij legantur.

7 Accedent igitur omnes homines baptizati, cuiuscunque sint ætatis, ad hoc Sacramentum Cōfirmationis, modo sint capaces rationis, vt Paracletum Sanctum recipiant. Nec ante septennium pueris conferri potest hæc Chrismatis inunctio, quia nondum sciunt per rationem, quod hoc Sacramentum sit institutum ad conferendum robur, ad pugnandum contra hostes, nempe demonem, carnem, & mundum. Bene tamen potest conferri amentibus, & agonizantibus, licet non sint vndeque apti ad pugnam, quia carent usu rationis: attamen apti sunt suo modo, vt per characterem consignentur in milites Christi, & perfectionem, seu augmentum gratiæ habitualis recipiant.



8 Nonnisi ieiunis, & à ieiunhis Episcopis ex honestate hoc Sacramentum conferendum est: exceptis infirmis, & in tenui discrimine lethi positis, vel qualibet causa impeditis, nulla de ieiunio habita ratione manus imponi poterit, modo sint in gratia positi.

9 In fine datur pax confirmato, & leuiter in maxilla cæditur, vt intelligat se gratiæ celestis plenitudinem, & pacem, quæ exuberat omnem sensum, consecutum esse pacemque per victoriam, & victoriam per prælium obtineri: & quod non coronatur, nisi qui legitimè certauerit.

10 Illud est còmmune tam his, qui baptizandi sunt, quàm etiam illis, qui Confirmationis munus accipere debent, vt aliquem in patrinum habeant, qui eosdem in Religione Christiana, & Fide Dominica instituat, & pro eis apud Deum quasi fideiussor existat. Ex quo patet, quod is qui Christianus non est, puerum offerre nō poterit, quia nō poterit eum docere in his, quæ Fidei sunt, nec potest pro eo obfes esse, cum ipse Fidem nostram non teneat. Similiter & in Cathechismo patrini debent interuenire.

11 Ad hoc autem vt contrahatur compaternitas, seu cognatio spiritualis inter patrinum, & confirmatum, patrem, & matrem confirmandi, seu baptizandi, necessarium est, vt patrinus tangat personam baptizatam, ac confirmatam, siue suscipiat in vlnas suas. Et si plures patrini eidem actui interuenerint, non contrahitur cognatio spiritualis cum alijs, quia de præcepto Ecclesiæ vnus tantum debet esse patrinus; idemque confirmatus ipse.

12 Parentes verò proprios filios, vel Abbates, vel Monachi alienos de sacro fonte suscipere, aut in Confirmatione tenere non debent.

13 Sciendum denique, quod nec Baptismus, nec Chrisma possunt iterari, eo quod ambo characterem imprimant. Potest autem vtrumque ob imminens pericu-

riculum tempore Interdicti conferri, & pro utroque  
Chrisma confici, vt infra suo loco dicetur.

## T I T V L V S V.

### *De Pœnitentijs, & Remissionibus.*

**E**T si homo per Baptismum renatus ad vitam, habeat augmentum gratiæ ad pugnam per sacramentum Confirmationis, quia tamen habens in se fomitem à natura ad peccandum, sæpius in grauius crimina labitur; quibus ne opprimatur, idè Christus Dominus instituit Sacramentum Pœnitentiæ, vt sit nobis tanquam secunda tabula in naufragio, cuius ope à lapsu nos erigere possimus, si nostra vulnera criminibus contracta Medico spiritali nudauerimus.

2 *Pœnitentia itaque est*, Sacramentum, quod contritione cordis, confessione oris, & satisfactione operis concurrentibus, peccatorum operatur remissionem. Cum enim homo dolet pro peccato commisso, quo offenderat Maiestatem Diuinam, & odio illud habet cum proposito efficaci, amplius non peccandi, consequitur per absolutionem Sacerdotis, cui soluendi, & ligandi potestas diuinitus data est, veniam delictorum suorum, & reconciliatur Deo Redemptori suo.

3 Sunt autem duæ Species Pœnitentiæ in Ecclesia Catholica. Alia publica, & alia priuata. *Publica Pœnitentia est*, quæ à Iudice Ecclesiastico in foro Ecclesiæ imponitur, vt videlicet humi iaceat quis cernuus in templo, dum diuina officia solemniter peraguntur. Vel vt nudis pedibus cum candela accensa in manu, stet per totum officium ante fores templi. Vel quid simile. Et hoc idè constitutum est, vt qui publicè peccando proximo suo scandalum præbuerint, publicam etiam pœnitentiam, à proprijs sibi Sacerdotibus impositam  
pera-



peragentes, emendationis exemplum præbeant. Solennis verò poenitentia, quam olim Episcopus in capite ieiunij, seruata certa rerum serie delinquentibus imponere solebat, hodie iam in vsu esse desijt.

4 *Priuatæ verò Pœnitentiæ est*, quæ in occulto fit, cum sacerdos legitimè sua peccata confitentem, cum iusto dolore, & proposito satisfaciendi absoluit ab eis. statutum est enim ab Ecclesia, vt omnis fidelis, quam primū sapere cœperit, omnia sua peccata proprio Sacerdoti confiteatur, & iniunctam sibi poenitentiam, proprijs viribus adimplere studeat, suscipiens reuerenter ad minus, singulis annis in Paschate Eucharistiæ Sacramentum: Nisi forte de Sacerdotis consilio, ex causa duxerit abstinendum. Alioqui & viuens ab ingressu Ecclesiæ arcebitur, & moriens Christiana carebit sepultura.

5 Constat igitur Pœnitentiæ Sacramentum tribus partibus, Contritione, Confessione, & Satisfactione. *Contritio nihil aliud est*, quam dolor pro peccatis voluntariè assumptus, cum proposito amplius ad ea non redeundi, & pro commissis satisfaciendi. *Confessio verò est*, legitima cum preparatione peccatorum coram proprio sacerdote facta declaratio. *Satisfactio demum*, prompta impositæ poenitentiae executio, atque illatæ proximo iniuriæ compensatio. Non enim sufficit mores in melius commutare, & à præteritis malis recedere, nisi etiā de his, quæ facta sunt, Deo satisfaciatur per contriti cordis sacrificium, cooperantibus eleemosynis, orationibus, & ieiunijs.

6 Tribus autem de casibus, potest quis confiteri nō proprio Sacerdoti. *Primo*, si obtineat licentiam ab eodem, vel ab Episcopo suo. *Secundo*, si veritus imperitiam proprii Sacerdotis; vel mores eius suspectos habens, adierit Regulares, generalem audiendi cōfessiones potestatem habentes, & à loci Ordinario approbatos. *Et Tertio*. Si poenitendi vrgeat necessitas, nec desideranti locus, aut tempus proprium Sacerdotem offerat. Vel  
si pro-

si proprius soluendi facultatem non habeat: aut hæreticus sit; aut sollicitator ad malum; aut pronus ad reuelandum.

7 Sed siue proprius Sacerdos, siue alius pœnitentē audiat, cauebit omninò, ne aut verbo, aut nutu, aut signo, alioque quouis modo confitentem prodatur. Qui verò peccatum in pœnitentiali iudicio sibi detectum reuelare ausus fuerit, non solum à sacerdotali officio deponendus erit, verum etiam ad agendum perpetuò pœnitentiam in arctum Monasterium detrudendus.

8 Illud etiam animaduertere sacerdotem oportet, ne quem scilicet ab his criminibus absoluendo liberare tenet, quorum absolutio, aut Apostolico, aut proprio Episcopo est reseruata. Vt puta, si pœnitens Clericum enormiter læserit, Ecclesiā combusserit, vel fregerit; aut scripturas publicas falsificauerit; Cardinalem, vel Episcopum insecutus fuerit: cum Moniali rem habuerit, & in alijs casibus.

9 Sunt autem casus Papæ reseruati omnes illi, qui fiunt contra Ius Canonicum: hoc est, contra Constitutiones Summorum Pontificum; Sacrorum Conciliorum Generalium; contra omnes Bullas Pontificias; sed maximè Bullam Cœnæ Domini. Item casus violationis immunitatis Ecclesiasticæ: violationis clausuræ Monialium ad malum finem: prouocantium, & pugnantium, in duello: Simonie realis, vel confidentialis scienter contractæ: percussione Clerici, &c.

10 Episcopo verò reseruantur peccata, ex proposito, seu mala intentione facta, vt homicidium voluntarium, mutilatio, & abscissio membri, blasphemia publica in Deum, & Sanctos eius, periurium, falsum testimonium, rapina, furtum in Ecclesia rerum sacrarum, diuinatio, sortilegium, magia, incantationes, veneficia, inuocationes demonum, abusus Sacramentorum, incendiū, & absolutio quarundam censurarum, & irregularitatum, dum adest legitimum impedimentum, quo minus pœnitens



niten s adire possit sedem Apostolicam.

11 Concessa igitur facultas ab Episcopo alicui confessorio absoluedi à casibus Episcopalibus, non continet in se ex proprietate sermonis absolutionem à censuris, & irrègularitate, nec commutationem, aut dispensationem votorum, aut iuramentorū. Sed vt ambiguitatē tollāt tam in edicto reseruatiōis casum, quàm in licentijs quas Confessarijs Episcopi concedunt, exprimerē debent, quos casus concedunt, & quos sibi reseruant. Cum in generali concessione illa minimè veniant, quæ non esset quis verissimiliter in specie concessurus.

12 Medicos etiam admonere oportet ex Constitutione Pij V. vt cum eos ad infirmos vocari contigerit, ipsos ante omnia moneant, & inducant, vt Medicos vocent animarum; vt postquam fuerit ægrotanti de spiritali salute prouisum, ad corporalis medicinæ remediū salubrius procedatur. Si quis autem Medicorum secus fecerit, ab Ecclesiæ ingressu arcebitur, donec pro transgressione huiusmodi satisfecerit.

13 Si quis autem in infirmitate constitutus pœnitentiam petierit, & dum ad eum inuitatus sacerdos properat, morbo oppressus obmutuerit, vel in phrenesim conuersus fuerit, & pœnitentiam moriturus, & per manus impositionem reconciliationem accipere poterit, nec sepultura ecclesiastica priuandus est. Ecclesia enim tanquam pia mater, omnibus fidelibus in quouis statu cōstitutis, piè vult subuenire. Secus tamē in his, qui seipsos cōfodiunt, vel occidūt, & impœnitētes moriuntur.

14 Vltimo verò supplicio damnatis pœnitentiæ Sacramentum, si petunt, non solū negari non debet, verū etiam censura Ecclesiastica ab Ordinarijs locorum coercendi sunt, quicumque aduersarentur, quominus id consequantur: quod ipsum, & de Eucharistia quoque intelligendum erit. Cum quibuscumque pœnitentiæ non negetur, viaticū quoque, quod verè pœnitentibus exhibetur, intelligatur esse concessum.

*De Sacramento Eucharistiæ.*

**E**ucharistia est, Sacramentum Corporis, & Sanguinis Christi, sub speciebus panis, & vini institutum, ad spiritualem hominis refectionem. Vbi enim homo poenitentia ope à lapsa exurrexerit in Domino, tùm verò ei cauendum est, vt in bono perseueret, accrescat, hoc cibo salutari refectus, donec perueniat in vitam æternam.

2 Dicitur autem Eucharistia Græcè, quasi bonam gratiam significans Latinè, quod contineat in se Christum, qui est Fons, & Author omnis gratiæ, & præsignificat nobis vitam æternam, quæ dicitur gratia Dei.

3 Item dicitur hoc Sacramentum, *Gratiarum actio*, tùm quia Christus in eius institutione gratias egit Deo; tùm etiã, quia in hoc Sacramento, quotidie Deo aguntur gratiæ pro omnibus beneficijs ab eo receptis; & præcipuè, pro eius institutione.

4 Vocatur etiam, & *Sacrificium*, quia repræsentat nobis sacrificium illud Christi Domini, in Cruce pro peccatis totius mundi peractum: & quia in ipso immolatur quotidie Christus Dominus, & offertur Deo Patri, ac toti Sanctissimæ Trinitati pro omnibus viuis, & defunctis.

5 Vocatur quoque *Communio*, quia per hoc sacramentum homo communicat, & participat de corpore, & sanguine Christi. Et quidem circa prima Fidei cunabula, frequentissima erat apud fideles, huius sanctissimi Viatici susceptio, sed cum postea paulatim, tepescente charitate, rarius homines communicarent, constitutum fuit, vt nisi quis maioribus fortasse criminibus impediretur, tribus saltem vicibus in anno communicare deberet. Donec refrigescente penitus Religionis ardore, eò tandem ventum est, vt semel sal-



rem singulis annis vnusquisque celestis mensæ debeat esse particeps.

6 Item dicitur *Sacramentum pacis*, & *charitatis*, quatenus significat vnionem fidelium inter se, & cum Christo, per ipsum enim Sacramentum homo copulatur Christo, vt capiti, & sub hoc capite ita connectitur cum alijs membris Christi, id est, fidelibus, vt vnū corpus fiat cum illis. Quod declaratur per vtramque materiam huius altissimi sacramenti: quia sicut ex multis granis panis vnus, & ex multitudine racemorū vnum vinum efficitur; ita ex multitudine fidelium, tanquam ex multis membris fit vnum corpus Ecclesiæ, dum vinculo huius Diuini sacramenti arctissime colligantur, & tanquam vnum corpus efficiuntur.

7 Dicitur adhuc *Viaticum*, quia est cibus spiritualis viatori, nempè homini constituto in via huius vitæ. Nam sicut ad alimentum vitæ corporalis, requiritur cibus, & potus: ita ad refectionem, siue alimentum vitæ spiritualis, datur nobis sub speciebus panis, & vini, corpus verum, & sanguis Christi Domini, cuius sumptio nos munit, confortatq; contra hostes animarum nostrarum, & parat nobis viam ad æternam felicitatem. Et propter hoc tribui solet morituris, vt sic muniti, & fortificati per gratiam ipsius, ad vitam perueniant immortalem.

8 Postremò dicitur *Cæna*, quia vltima cæna Christus illud instituit pridie quam pateretur, vt habetur in Euangelio. Quatenus verò vocatur *Hosia*, significat passionem Christi, qui mortuus est pro nobis, & Deo Patri offertur in Missa, pro salute viuorum, & mortuorum, vt supra iam diximus.

9 Missæ verò celebrationem, Iacobus frater Domini, & Basilus Cæsariensis ordinauerunt: Chrysostomus deindè, & Ambrosius. Sed in eam, quam nunc celebratur formam, redegerunt summi Pontifices Romani. Constitueruntque, vt quemadmodum quoti-  
die

die labimur, ita quotidie etiam Sacerdotes pro Populo, hanc oblationem Deo facerent. In quo tamen illud cauendum est, vt Sacerdos, quamcumque præfulgeat dignitate, amplius quàm semel in die celebret. Nisi aut aliter facien dum Domini Natiuitas suadeat, aut vrgens, cogat necessitas: de qua disponere debent Sedis Apostolicæ Præsides.

10 Nemo autem hoc Sacramentum facere potest, nisi Sacerdos, qui ritè sit ordinatus, secundum clauces Ecclesiæ, quas concessit Apostolis, eorùmque Successoribus Christus. Sed quilibet Sacerdos tenetur seruare ritum, quem profitetur: & proinde si Latinus consecraret in pane fermentato, peccaret grauiter, & puniri posset, tanquam transgressor legis. Sic etiam Græcus ad euitandum scandalum sui Populi, tenetur celebrare in fermentato.

11 Sed nec ab omnibus, nec passim omnibus, tantum sacramentum exhiberi decet: nam veluti solus Sacerdos illud conficit; ita etiam nemo præter eum populo distribuere debet. Quamuis olim præsentem Præsbytero, Diaconus vrgente necessitate Populo erogare poterat. Immo, & Sacerdotes, si qua criminali macula sese infectos esse sentiant, ab huiusmodi exhibitione abstinere debent.

12 Si Sacerdos peccato mortali, vel minori excommunicatione illigatus celebret, & Sacramenta consecrat, licet grauiter peccet, nullam tamen Irregularitatis notam incurrit. Et Sacramenta ab eo collata virtutis effectum non carent, cum non à collatione, sed à participatione, quæ in sola perceptione consistit, videatur esse remotus.

13 Et quamuis nullus ab Altari sit arcendus, sænicis tamen, atque histrionibus, & meretricibus publicis, ceterisque personis huiusmodi, quamdiu tam detestandas artes exercuerint, sacra Communio deneganda erit. Nec enim Euangelicæ disciplinæ congruit,



vt pudor, & honor Ecclesiæ, tam turpi, & infami cōtagione fœdetur. Accedentem tamen ad communionem in manifesto, quamuis sacerdos sciat esse impœnitentem, non debet negando prodere: nam & Dominus noster Iudam impœnitentem communicauit. Quod si impœnitens in occulto peteret Sacramentũ, sacerdos conscius denegare debet.

14 Caueat verò Sacerdos, ne dum Missam celebrat, & Sacramenti mysterium facere simulat, suppressis verbis solemnibus, quibus Sacramentum conficitur, panem, & vinum inane tantummodò sumat, dum fortè veretur Missam celebrare, quod se sciat letali crimini obnoxium, & eam tamen propter aliquam necessitatem intermittere non potest. Nam etsi leuis non sit eius noxa, qui criminis grauis sibi conscius Sacramento impudenter sese ingerit, longè tamen grauius crimen illius existimandum est, qui prædicto modo aliud agere, aliud simulare non formidauit: ille enim Deum solũ, hic & Deum, & Populum lædit, & quod in se est, ludit.

15 Constat autem Eucharistiæ Sacramentum visibili forma, veritate corporis, & virtute spiritali. Forma visibilis est panis, & vini. Vinum verò hoc loco intelligimus aqua permixtum: nec enim in calice Domini, aut vinum solũ, aut aqua soli offerri debet, cum vtrumque ex latere illius profluxisse legatur. Plustamen vini, quàm aquæ ponendum est, vt aqua conuertatur in substantiam vini. Sicut igitur ante consecrationem panis est & vinum, quod natura formauit: ita post consecrationem vera est Christi caro, & sanguis, quem benedictio consecrauit.

16 In hoc autem Sacramento contigit olim dubitari, vtrum Laici, vel etiam Clerici non conficientes id, sub vtraque specie panis, & vini sumere debeant, an verò alterius speciei communio eis ad salutem sufficiat? Sed nouissimè Sacrosancta Synodus Tridentina

tina sub Pio IV. dilucidè diffinuit, nullo Diuino præcepto Laicos, & Clericos non conficientes obligari ad Eucharistiæ Sacramentum sub vtraque specie sumendum, quamuis ab initio Christianæ Religionis non infrequens vtriusque speciei vsus fuisset. Sed sufficere ad salutem sub altera tantùm specie communicare: Contrarium verò dicentes anathemati subiectos esse.

17 Hoc etiam docuit eadem Synodus, paruulos vsu rationis carentes, nulla obligari necessitate ad sacramentalem Eucharistiæ Communionem. Ratione verò pollentes, eam non nisi ieiunio stomacho regulariter suscipi debere: Et coniugatos, qui eam susceperint, tribus saltem diebus ante & post, à propria vxore continere.

18 Presbyter curet sacram Eucharistiam, ad omnem ægri, cuiusque repentinam necessitatem semper paratam habere, nec sine ea ægrotos mori contingat. Et diligenter obseruetur, vt in cunctis Ecclesijs Chistma, & Eucharistia, sub fida custodia clauibus obsignata seruentur, ne ad illa queat temeraria manus extendi, ad aliqua nefanda patranda. Si verò is, ad quē spectat custodia, noctes, diesque stertens ea incautè reliquerit, tribus mensibus ab officio suspendendus erit: at si propter eius negligentiam aliquod nefas inde contigerit, grauiori etiam subdendus erit ultioni.

19 Hunc autem morem asseruandū in sacrario Sanctam Eucharistiam, & deferendi ipsam ad infirmos, iam à tempore Nicæni Concilij receptum, & multis in Concilijs præceptum summa æquitate, & cum ratione coniunctum, ac vetustissimo Catholicæ Ecclesiæ more obseruatum, eadē Sancta Synodus sub Iulio III. retinendum omninò statuit, tanquam salutarem, & necessarium. Decernens insuper, si quis dixerit, non licere sacram Eucharistiam in Sacrario seruari, sed statim post consecrationem adstantibus necessario distri-



tribuendam : aut non licerè, vtilla ad infirmos honorificè deferatur, anathema sit.

## TITVLVS VII.

### *De Extrema Vnctione.*

1. **E***xtrema Vnctio est Sacramentum nouæ Legis à Christo Domino institutum ( vt apud Diuū Marcum insinuatum est, & per Iacobum Apostolum fidelibus commendatum ) vt sacra Vnctione, & Oratione Sacerdotis, in certis partibus corporis, infirmi probabiliter periclitantis de vita, corporis, & animæ efficiatur salus.*

2. *Materia huius Sacramenti Oleum oliuarum cōsecratum, vel benedictum ab Episcopo. Forma verò, illa verba Sacerdotis, quæ ad singulas vnctiones quinque sensuum profert, videlicet. Per istam sanctam Vnctionem, & suam piissimam misericordiam, indulgeat tibi Dominus, quicquid per visum, (per auditum, per odoratū, per tactum, &c.) peccasti, &c. vt in Rituali Ecclesiastico.*

3. *Sunt autem vnctionis duæ species. Exterior, quæ materialis, & visibilis est. Et interior, quæ spiritualis est, & inuisibilis. Exteriores visibiliter inungitur corpus. Interiore inuisibiliter Spiritus Sancti gratia, cor inungitur : Ac propterea datur infirmis eo tempore, quo sunt compotes, & possunt cognoscere quid circa eos agatur, vt ad deuotionem, & fiduciam valeant per hoc Sacramentum excitari. Perpetuò verò amentibus dari non potest ; quia sicut non sunt capaces poenitentiae, ita nec Extremæ Vnctionis, quæ est Sacramentum consummatorium Penitentiae.*

4. *Minister huius Sacramenti est Presbyter, vel Episcopus ; qui infirmos, si post hanc susceptam vnctionem conualuerint, iterùm huius Sacramenti subsidio iuuare poterunt, cum in aliud simile vitæ discrimen*

men inciderint. Cùm enim duo sunt huius Vnctionis effectus, sanitas animæ, & sanitas corporis. Prima est principalis, secunda accessoria. Inde est, quod ex hoc Sacramento non semper corporis sanatio: quia illa non conceditur, nisi quatenus conferat spiritali sanitati.

5 Religiosi, qui Clericis, aut Laicis Sacramentum hoc Extremæ Vnctionis ministrare, non habita Parochi Presbyteri licentia speciali, ausi fuerint, excommunicationis sententiam ipso facto incurrunt, per Sedem Apostolicam duntaxat absoluedi: quos etiam locorum Ordinarij, postquam de hoc eis constiterit, curare debent pro excommunicatis publicari, donec de absolutione ipsorum eis fuerit facta fides; nullo Religiosis eisdem super hoc exemptionis Priuilegio, vel alio suffragante.

6 Religiosi tamen illi, quibus est à Sede Apostolica concessum, vt familiaribus suis domesticis, aut pauperibus in Hospitalibus suis degentibus, Sacramenta Ecclesiastica ministrare possint, à prædictis nõ comprehenduntur.

7 Sciendum verò est, quod tantum Sacramentum absque ingenti scelere, & absque ipsius Spiritus Sancti iniuria contemni non posset. Quæ omnia Sancta etiam Synodus Tridentina declarauit, nouissime sub Pio IV. anathema etiam iniungens his, qui contrarium dixerint.

## TITVLVS VIII.

### De Sacramento Ordinis.

**P**ostquam hucusque de ijs Sacramentis, quæ quoquo modo necessitatis sunt, videlicet Baptismus ad ingressum; Confirmatio, Pœnitentia, & Eucharistia, ad progressum; atque demum Extrema Vnctio ad egressum ex hoc mundo, tractatū habui-



habuimus; reliquum nunc est, vt de ijs quoque loquamur, quæ dignitatis sunt, & voluntatis; hoc est, de Sacramento Ordinis, & Matrimonij, quæ sunt Sacramenta voluntaria, quia nemo ad ea directè cogi potest.

2 *Ordo igitur est Sacramentum*, quo potestas spiritalis significatur, & traditur Ordinato ad conficiendum sacrosanctum Christi corpus. Vel, est habitudo legitima administrantium Sacramenta, cuique ratione sui ministerij conueniens. Quamuis enim Christiani omnes sint Sacerdotes, vt spirituales hostias, id est, semetipsos Deo offerre, & nomen eius laudare, & vtiliter inuocare in omni loco possint, non omnes tamen sunt Ecclesiæ ministri; sed iam inde ab Ecclesiæ initio, selecti sunt quidam, quî muneribus Ecclesiasticis fungerentur; de quorum speciebus, differentiis, & gradibus, satis libris superioribus dictum est.

3 Cum itaque Scripturæ testimonio, Apostolica traditione, & Patrum vnanimi consensu perspicuum sit, per sacram Ordinationem, quæ verbis, & signis exterioribus conficitur, gratiam conferri Ordinatis, dubitare nemo debet Ordinem esse verè, & propriè vnum ex septem sanctæ Ecclesiæ sacramentis. Quique dixerint non esse in Nouo Testamento Sacerdotium visibile, & externum; vel non esse potestatem aliquâ consecrandi, & offerendi verum corpus, & sanguinem Domini, & peccata remittendi, & retinendi, sed officium tantum, & nudum ministerium prædicandi Euangelium; vel eos, qui non prædicant, prorsus non esse Sacerdotes, anathema esse Sacrosancta Synodus Tridentina decernit.

4 Item qui dixerit, præter Sacerdotium non esse in Ecclesia Catholica alios Ordines maiores, et minores; per quos velut per gradus quosdam in Sacerdotium tendatur. Vel, qui dixerit Ordinem, siue sacrâ Ordinationem, non esse verè, & propriè Sacramentum à Christo Domino institutum; sed esse figmentum quod-

quoddam humanum, excogitatum à viris rerum Ecclesiasticarum imperitis; aut esse tantum ritum quendam eligendi ministros verbi Dei, & Sacramentorum. Vel, qui dixerit, per sacram Ordinationem non dari Spiritum sanctum, ac proinde frustra Episcopos dicere. *Accipite Spiritum Sanctum*; aut per eam non imprimi characterem. Vel eum, qui Sacerdos semel fuit, laicum rursus fieri posse. Anathema esto.

5 Item prædictæ anathematis poenæ subiicit eos, qui dixerint, sacram Vnctionem, qua Ecclesia in sancta ordinatione utitur, non tantum non requiri, sed contemnendam, & perniciosam esse: similiter & alias Ordinis ceremonias.

6 Similiter qui dixerint in Ecclesia Catholica non esse Hierarchiam; Diuina ordinatione institutam, quæ constat ex Episcopis, Presbyteris, & Ministris. Vel Episcopos non esse Presbyteris superiores. Vel non habere potestatem confirmandi, & ordinandi. Vel eam quam habent, illi esse cum Presbyteris communem. Vel Ordines ab ipsis collatos, sine Populi, vel potestatis secularis consensu, aut vocatione, irritos esse. Aut eos, qui ab Ecclesiastica, & Canonica potestate rite ordinati, nec missi sunt, sed aliunde veniunt, legitimos esse verbi, & Sacramentorum ministros. Vel si quis dixerit Episcopos, qui authoritate Romani Pontificis assumuntur, non esse legitimos, ac veros Episcopos, sed figmentum humanum; eadem Sancta Synodus anathematizat.

7 Igitur hoc Sacramentum Ordinis, verbis Christi Domini innititur, pluribus locis repetitis, & duplicem potestatem confert. Ordinis videlicet, & Iurisdictionis. Sub quarum altera cadit verbi Diuini ministerium, administratio Sacramentorum, & Ecclesiarum ordinatio ad ædificationem: sub altera potestas excommunicandi, & poenitentes absoluedi, ac etiam peccata retinendi.



8 solus autem Episcopus huius Sacramenti minister est: licet Abbates quoque cōsecrati habeant facultatem à iure, primam tonsuram, Ordinesque minores conferendi. Episcopi verò proprii titulares, etiam si sint hæretici, degradati, depositi, interdicti, excommunicati, suspensi, Irregulares, si de facto ordinare attentauerint, licet mortaliter peccent, Ordines tamen collati valent.

9 Episcopus de iure, sexies per annum, potest Ordines temporibus assignatis conferre, ex dispensatione verò Papæ, quoties acciderit, aut opus fuerit. Sed Ordines minores, potest qualibet Dominica, & quolibet Festo conferre.

10 Ordinati autem in duplici solent esse differentia. Quidam beneficiati: & quidam nullum beneficium habentes. Beneficiati quoque alij simplices: alij curam animarum habentes, & hi intra vnum annum possunt esse sacerdotes, qui licet tantum in minoribus Ordinibus sint, tenentur nihilominus castitatem Ordini annexam seruare; horas Canonicas recitare, & habitum Clericalem deferre. Qui verò in minoribus sunt, & nullum beneficium possident, sicut ad vota matrimonij licite transire poterunt, sic & ad pensum Horarū non obligantur. Sed in maioribus constituti, omnes ratione Ordinis tenentur Horas canonicas recitare, quamuis nullum beneficium possideant Ecclesiasticum.

## TITVLVS IX.

### De Sacramento Matrimonij.

1 **M**atrimonium est, viri & mulieris maritalis coniunctio, inter legitimas personas indiuicem vitæ consuetudinem retinens. Diciturque Matrimonium, quasi matris munium, quia fœmina nubit, vt mater fiat, & matris officio fungatur,

gatur, rectè educando filios, filiasue.

2 Vocatur etiam coniugium, à coniungendo; quia legitimata mulier, cum viro legitimated (id est, non habente impedimentum aliquod dirimens, quia sic non esset matrimonium) quasi vno iugo adstringuntur, vt simul liberorum, & domus curam gerant, & sint animo semper coniuncti.

3 Dicitur adhuc & consortium, quia maritus, & vxor eandem sortem sequuntur, & omnis vitæ consortium ita retinent, vt dicantur duo in carne vna, ob indissolubilitatem matrimonij, quod sola morte tantum soluitur.

4 Dicitur demum & Connubium, quia simul nupti sunt, vt in filiis speciem humanam per naturalem propensionem conseruare possint. Et puellæ, quæ nubebant olim, pudoris gratia se velabant; quo significabatur, quod viris obediens, & subiectas esse oporteret.

5 Vocatur verò Matrimonium sacramentum, duplici de causa. *Primo*, quia significat charitatem indissolubilem, quæ fit in Spiritu inter Deum, & animam iustam. *Secundo*, quia designat vnionem indissolubilem Christi Domini cum Ecclesia, per Incarnationis mysterium contractam. Ideò inter infideles, quia non sunt baptizati, non dicitur Matrimonium Sacramentum, sed tantum contractus moralis. Qui si conuerterentur ad Fidem, Matrimonium illorum efficeretur Sacramentum, & conferret ipsis gratiam: nec opus esset, vt iterum contraheretur coram Parocho. Hinc sacrosancta Synodus Tridentina, anathemati subiicit eos, qui dixerint, Matrimonium non esse vnum verè, & propriè ex septem legis Euangelicæ Sacramentis, à Christo Domino institutum, sed ab hominibus in Ecclesiam inuectum, neque gratiam conferre. Vel licere Christianis plures simul habere vxores, & hoc nulla lege Diuina esse prohibitum. Vel propter hæresim, aut molestanti cohabitationem, aut affectatam



absentiam à coniuge dissolui posse matrimonij vinculum.

6. Item anathema sit, qui dixerit (Ecclesiam errare, cum docet iuxta Euangelicam, & Apostolicam doctrinam, propter adulterium alterius coniugum, Matrimonium non posse dissolui, sed duntaxat thori, mensæque consuetudo separatur) & vtrumque, vel etiam innocentem, qui causam adulterio non dedit, non posse altera coniuge viuente, aliud matrimonium contrahere: moecharique cum, qui dimissa adultera aliam duxerit, & eam, quæ dimisso adultero alij nupsierit.

7. Sed quia Matrimonium bifariam considerari potest, primo *ut futurum*, & hinc dantur sponsalia per quæ initiatur: secundo, *ut præsens*: idque similiter duplici modo. Vel respectu perfectionis intrinsecæ, & sic datur consensus de præsentem, per quod Matrimonium ratificatur. Vel respectu perfectionis extrinsecæ, & hinc requiritur copula, per quam Matrimonium consummatur. Idcirco de singulis partibus distinctius agendum est.

## TITVLVS X.

### *De Sponsalibus.*

1. **S**ponsalia sunt, mentio & repromissio futurarum nuptiarum. Et dicta sunt, à verbo *Spondeo*: quod per ea sibi inuicem se futuros coniuges, viri & mulieres spondent. Spondere autem, est spontè promittere. Vnde ad validitatem contractus sponsaliorum, requiritur spontanea promissio.

2. Contrahuntur autem sponsalia variis modis, vt putat, Re, Verbis, Litteris, & Consensu. Re contrahuntur, per nudam subharrationem, seu anuli immis-

sionem. Verbis verò, vt si inter virum, & mulierem promissio super futuro matrimonio intercesserit, veluti altero alteri vice mutua dicente. *Ego te accipiam in meum maritum. Et ego te in meam uxorem.* Siue in hunc sensum verba similia protulerint.

3 Literis sponsalia fiunt, vt cum absentes inter se de futuris nuptijs per epistolam paciscuntur: quod ipsi & per Nuncium, vel Procuratorem fieri poterit. Procurator tamen ad hoc specialiter constitutus, ob magni, quod ex facto tam arduo posset periculum imminere, alium substituere non poterit; nisi hoc ei specialiter commissum fuerit.

4 Consensu denique contrahuntur sponsalia, vt cum pubes, & impubes; vel duo impuberes non proximi pubertati, & in quibus ætatem prudentia non supplet, Matrimonium per verba contrahunt de presenti. Licet enim verba in præsens Matrimonium sonent, iuris tamen interpretatione in sponsalia de futuro resolvuntur. Quo casu dicta sponsalia, licet contrahentes Matrimonium celebrare intenderent, coniugium, quod ab initio ætate impediens, vt Matrimonium non tenuit, per aduentum pubertatis minimè conualescit, nisi per carnis copulam subsequutam, vel alium modum, contrahentes cum eiusdem perseverantia voluntatis, ad pubertatis tempora peruenisse euidenter constiterit.

5 Hinc sciendum, in duplici differentia sponsalia esse: quædam enim per verba de futuro: quædam autè per verba de presenti. *Sponsalia de futuro sunt*, futurarum Nuptiarum mutua, vel reciproca promissio, (quia ad hoc vt sponsalia dicantur, vtraque pars promittat oportet) *De presenti verò*, quando per verba, Matrimonij Sacramentum conficitur, sed nondum est copula sequuta. Vxor enim, vel coniunx illa appellatur, quæ iam à viro suo est cognita.

6 Rursus contrahuntur sponsalia triplici modo. Aut pure, aut adiecta die, aut sub conditione. *Purè contra-*  
*cta*



*Et sponsalia dicuntur* : Vt cum vir , & mulier se inuicem futuros coniuges pollicentur . Et tales , si postea Matrimonium contrahere nollent , Ecclesiastica censura ( nisi obftet rationalis aliqua causa ) vt se inuicem recipiant , & mutua coniugali affectione pertractent , compelli possunt .

7 *Sponsalia in diem dicuntur* , cum quis intra certum temporis spacium aliquam se ducturum in vxorem conuenit . In qua specie si per eum non steterit, quo minus intra præfixum terminum cum eadem Matrimonium contraheret , libere ad nuptias alterius transire poterit .

8 *Sub conditione celebrantur sponsalia*, cum quis, si quid fiet, vel contigerit, nuptias se contracturum pollicetur: veluti si dictum fuerit . *Ego te in vxorem accipiam , si Pater meus consenserit* . Qua conditione deficiente , ad Matrimonium compelli non poterit . Nisi consensus de præfenti , aut carnalis sit inter eos commixtio sequuta, cum his casibus à conditionibus recessum videatur .

9 Hoc tamen de his conditionibus intelligere oportet , quæ honestæ sunt, & canonicis institutis non contrariæ . Nam si turpes sint, aut impossibiles , ob fauorem Matrimonij debent pro non adiectis censeri . Si autem non solum turpes sint , sed etiam contra substantiam, vel naturam coniugij : puta si alter dicat alteri . *Tecum contrabo , si generationem prolis euitaueris . Vel , donec aliam bonore , vel facultatibus digniorem inueniam : aut si pro quæstu adulterandam te tradideris* . Matrimonialis contractus quantumcunque sit fauorabilis , omni carebit effectu .

10 Sponsalia verò inter minores septennio celebrata , nullius roboris efficaciam sortiuntur . Ideoque , si infantes , vel vnus maior septennio , alter minor , sponsalia contraxerint , ipsi , vel parentes pro eis, nisi per cohabitationem eorum mutuam, siue alias verbo, vel facto, eosdem in eadem voluntate factos maiores perdurare, liquido appareat , sponsalia huiusmodi , quæ ab initio nulla erant , per lapsum dicti temporis minimè conualescunt .

scunt. Et ideò cum fiat nulla, ratione defectus consensus, publicæ honestatis iustitiam non inducunt. Si tamen cum ea, quam nondum septennem domū quis traduxerit, copula intercesserit, aliud statuendum erit; hoc est, induceretur iam publicæ honestatis iustitia. Et per consummationem culpæ, sponsalia de futuro transirent in Matrimonium.

11. Initiatum igitur sponsalibus Matrimonium fide consensus ratificari debet: Quod si qui de contrahendo Matrimonio fidem sibi dederunt, se inuicem admittere omnino voluerint, instar eorum, qui societatem interpositione fidei contrahunt, & postea eandem sibi remittunt, dissolutio tolerari poterit: cum coactio difficiles soleat exitus frequenter habere.

12. Non sunt tamen audiendi impuberes volentes dissolvere sponsalia, sed expectandum est tempus pubertatis. Si verò alteruter istorum ad pubertatis annos peruenierit, infra eosdem annos altero existente, cum sponsalia contraherentur, si is qui minoris est ætatis ad pubertatis annos perueniens reclamauerit, nec in alterum consentire voluerit, iudicio Ecclesiæ separari poterunt.

13. Mulier quoque, quæ nobiles annos attingens, ei qui nondum Matrimonio erat aptus, nupsit, cum in eum semel consenserit, amplius dissentire non poterit: nisi ipse cui nupsit, postquam ad legitimam ætatem peruenisset, in eam suum negauerit præstare consensum. Quæ tamen de his dicta intelliguntur, quæ spontè cum minoribus sponsalia contraxerint. Nam si quæ coacta cum impubere sponsalia contraxerit, & domum traducta fuerit, licet aliquandiu ibi inuita permanferit, si puerum usque ad annum decimumquartum minimè expectandum dixerit, ei alium sibi virum accipiendi libera concedenda facultas erit.

14. Similiter sponsalia contracta à parentibus non tenent; nisi ipsi filij expressè consenserint; vel tacitè, ut si præsentibus fuerint, nec contradixerint, obligantur.

Et



Et ex eis oritur publicæ honestatis iustitia.

15 Idem etiam obtinet, si filij tempore sponsaliorum absentes, & etiam ignorantes, eadem sponsalia post scientes, & prudentes ratificarunt, tacite, vel expresse. Aliàs ex sponsalibus contractis à parentibus profilijs, nec ipsi obligantur, nec publicæ honestatis iustitia inde exoritur.

16 Iam verò sponsalia contracta dissoluuntur, vel ipso iure, vel facto hominis, quæ breuiter his versibus comprehenduntur.

*Crimen, dissensus, fuga, tempus, & Ordo: secundum  
Morbus, & affini: vox publica, cumque reclamatione.*

*Quodlibet istorum, sponsalia soluit eorum.*  
Alij ponunt alios versus, qui sequuntur.

*Lepa superueniens, furor, Ordo, sanguis, & absent:*

*Lesq; Virginitas, membris damnum, minor ætas.*

*In hæresim lapsus, fideique remissio prorsus.*

*Sponsos dissociant, & vota futura retrahant.*

17 Ipso iure, tunc dicuntur sponsalia dissolui, et eum nullam habitam rationem voluntatis, & consensuum partium, ex certa superueniente causa distrahuntur, ut ex contractu Matrimonij sacrorum Ordinum susceptione, Religionis ingressu, & Cognationis interuentu.

18 Si quis igitur eam, quæ tibi desponsata fuerat, per verba sibi iunxerit de præsentì, etiam si inter te, & ipsam sponsalia iuramento firmata extitissent, dum tamen copula, (cuius virtus est, ut faciat transire sponsalia per verba de futuro contracta, in sponsalia contracta per verba de præsentì) nõ interuenerit, iam sponsalia dissoluuntur per subsequens Matrimonium, & de inuito tolluntur. Licet fidem frangentibus salutaris sit iniungenda poenitentia. Quanquam si prius per verba contraxisses de præsentì, ita firmum maneret Matrimonium, ut per secundum, etiam secuta copula tolli non possit. Nec enim ut pactionis fidem, interdum frangi iura sustinent, ita etiam fidem consensus aboleri permittunt.

19 Pari ratione per susceptionem sacrorum Ordinum, & ingressum Monasterij dissoluntur sponsalia, non tantum de futuro, sed etiam de presenti: quia Religio est status maioris perfectionis, & obsequium Deo gratissimum, nec impediendum est per Matrimonium, quando non interuenit iniuria proximi. Poteritque coniugum alter, etiam altero inuito, ad Monasterium transire; & alter in seculo remanens etiam alteris nuptijs operam dare, cum nondum vna caro effecti essent. At Ordines sacri non sunt talis perfectionis, & sic non habent vim soluendi Matrimonium ratum, sed tantum sponsalia de futuro.

20 Quod verò attinet ad Matrimonium consummatum, hoc nec per professionem emissam in Religione approbata solui poterit, debetque ad thori consortium retrahi: Nisi vterque coniunx ingrediatur in Religionem de communi consensu, & professionem simul emittant. Sed si vir consensu per metum, vel dolum, ab vxore extorto, Religioni se deuouisset, vxori petenti esset nihilominus restituendus. Vnus tamen casus est, quo vel renitente vxore, maritus se Religioni addicere potest, cum videlicet vxor adulterij rea est, etiam sub Matrimonij specie contracti.

21 Item affinitas inter sponsum, & sponsam superueniens, dirimit sponsalia de futuro: vt puta, si sponfus propinquam sponsæ cognouisset, aut de hoc sit publice diffamatus: aut spiritualis inter eos cognatio intercesserit. Hinc Concil. Trid. Si quis affinis contraheret Matrimonium in gradu prohibito ante dispensationem, ultra peccatum mortale, incurreret etiam in excommunicationem latæ sententiæ. Præcipue inter ascendentes, & descendentes perpetua prohibitio Matrimonij est, etsi in alias atque alias stirpes, in infinitum essent propagati, in quo nec Papa dispensare potest, quia est de iure naturæ.

22 Facto verò hominis dissoluntur sponsalia, vel con-



trario vtriusque contrahentis consensu : vel cum legitima emergente causa dissoluuntur , alterius tantum voluntati permittitur , veluti ex fornicatione , absentia , membrorum amissione , aut incurabilis morbi interuentu .

13 Contrario consensu sponsalia dissoluuntur , cum illi qui voluntariè inter se contraxerant , iterum voluntariè sese inuicem liberant ; etiam si sponsalia fuerint iurata . Vel impubes contrahens , adueniente pubertate , ratum nolit habere Matrimonium , quod primo contrahere promiserat . Nec aliquid proderit , quod sub certa pœna contraxerant ; cum enim libera Matrimonia esse deceat , pœnarum inanis omnis est adiectio .

24 Ob fornicationem post sponsalia etiam iuramento firmata à muliere commissam , potest quis licitè resiliire . Nam si post contractum coniugium , vir propter fornicationem licitè potest à sua cohabitatione recedere , longè fortius ante coniugium celebratum sponsus , sponsam poterit non admittere . Quod si verò per violentiam opprimatur sponsa de futuro , sponsus non erit cogendus , vt contrahat bigamiam . Secus tamen si fuisset sponsa de præsenti .

25 Idem intelligendum quoque , si sponsus fornicetur ; non enim tenetur sponsa cum illo contrahere , licèt illa bigamiam non incurrar . Sed & sponsus , si post sponsalia intellexit sponsam virginem non esse , quam talem se putabat ; non tenetur illam ducere in vxorem . Idem erit , si sponsus , vel sponsa idolatrando , vel hæresim sequendo , in spiritualem fornicationem inciderit .

26 Sed et si qui præstito iuramento , promittant se aliquas mulieres ducturos , posteaque illis non cognitis , procul recedentes ad alias partes se transferant , liberū erit mulieribus ad alia migrare vota : recepta tamen de periurid , si forte iuramentum præstiterint , pœnitentia , si per eas steterit , quominus fuerit Matrimonium consummatum .

27 Item, si sponsus, aut sponsa leprosus fiat, aut leprosa, paralyticus, vel paralytica: aut nasum, vel oculos amittat; aut quid sibi turpius eueniat, ad consummandam maritalem copulam compelli non debent: licet iam contractum Matrimonium, superueniens lepra, vel alius morbus, non dirimat.

## TITVLVS XI.

### *De Nuptijs.*

**T**Ractauimus hactenus de sponfalibus, tanquā de principio Matrimonij, reliquum nunc est, vt de consensu & copula agamus, quibus substantia, & perfectio Matrimonij continetur. Proinde, videbimus, quid impediat nuptias contrahi, vel quid contractas dirimat, aut quæ ad earum validitatem requirantur.

2 Nuptiarum itaque tres sunt species inter se differentes. Aliæ sunt incestuosæ: aliæ nefariæ: & aliæ legitimæ. *Incestuosæ sunt*, quando cum consanguineis, vel affinibus Matrimonium contrahitur, vsque ad quartum gradum in transversalibus. *Nefariæ sunt*, de quibus non est fas homini loqui, puta, cum quistam audax fuerit & proteruus, vt contra naturam humanæ societatis, cū propria matre, auia, aut alijs ascendentibus; vel descendentibus, puta, filia propria, aut nepte, Matrimonium contrahat. *Legitimæ* Verò nuptiæ sunt, cum aliquis Canonice, nullum habens impedimentum contrahit.

3 Quare, ad validitatem legitimarum nuptiarū hæc tria requiruntur. *Primo*, consensus vtriusque contrahentium. *Secundo*, verba ad probandum eundem consensum. *Tertio*, ætas legitima, seuabilitas ad contrahendum.

4 Hinc duplex solet esse Matrimonij perfectio, Ef-



sentialis, & Accidentalís. Consensus est de essentiali, Copula verò de accidentali. Et sic materia erit Sacramenti huius, vtriusque consensus in præsentia Sacerdotis, & duorum testium: Forma verò verba ab illis prolata, per quæ ille consensus exprimitur, v. g. *Ego te in uxorem accipio: & ego te in maritum accipio.*

5 Quod si ex altera parte, pater tantum puellæ consenserit, & ille ex altera parte, qui se cupit maritum fieri; tunc nihil agitur, quia non potest esse Matrimonium, ubi non est vtriusque consensus. Quamquam honestè faciant filij, si paternæ voluntati minimè reluctentur. Nihilominus tamen contra facientes non debent per hoc ingratitudinis vitium incurrere.

6 Pubertas verò non tam annis, quàm corporis habitu æstimari debet. Licet olim eum impuberem esse dicebant, qui nondum quatuordecim annos impleuerat: & viri potentem, quæ nondum duodecimum expleuerat. Nunc praua opinio existimantium ex habitu corporis pubertatem debere censerì, atque eos, qui generare possunt, etiam si minores annis sint, in proposito puberes reputari. Itaque si malitia ætatem suppleat, etiam minores ea ætate coniungi possunt: præsertim si urgentissima necessitas interueniat, ut pote, quod pro bono pacis talium coniunctio sit toleranda.

7 Muti etiam & Surdi, si contrahere voluerint, quod verbis exprimere nequeunt, si signis declarauerint, proculdubio legitimas nuptias contrahent. Idem & de cæcis intelligendum est.

8 Serui quoque possunt inter se, etiam inuitis Dominis contrahere Matrimonium, dum tamen Dominos non fraudent debitis obsequijs. Quod si verò vnus coniugum comperiatur post contractum Matrimonium seruilis conditionis, potest dissolui Matrimonium: nisi post talem cognitionem fuerit renouatus consensus, vel sequuta copula. Aliàs vtrique libera cum alijs contrahendi facultas non denegetur.

9 Liberi autem sunt ex libero ventre nati ; nisi quis patris conditionem secundum leges , & consuetudinem provinciae sequatur . Multo magis Matrimonium invalidatur , cum quis in persona errauerit , vt puta , si existimans se cum Anna contrahere , cum Dorothea contrahat .

10 Si alter contrahentium utitur verbis dubijs , animo decipiendi mulierem , proprium nomen inentitus , vt sibi carnaliter commisceretur , non debere ex isto facto coniugium iudicari , cum in eo nec substantia coniugalibus contractus , nec forma contrahendi coniugium inueniri valeat : quoniam ex altera parte solummodo dolus adfuit , consensus omnino defuit , sine quo cetera foedus coniugale perficere nequeunt . Iudicatur tamen pro Matrimonio in foro iudiciali ; secus in poenitentiali : nisi sequatur copula , quia sic per ipsum factum praesumitur consensus .

11 Sciendum est autem inter infideles quoque coniugium esse , & quidem legitimum , non tamen ratum . Legitimum quidem esse potest , si legibus , vel moribus Provinciae sit consonum : sed ratum tamen non erit , cum dato libello repudij violari possit , & liceat eis ab inuicem recedere , & alijs lege poli copulari . Sed coniugia inter fideles contracta , non nisi rata esse possunt , quamuis non legitima esse possint : rata quidem sunt , quia semel contracta distrahi non possunt . Tunc autem legitima non erunt , cum debita solennitates omissae fuerint .

12 Sponso verò , & Sponsae benedicendum est à Parocho Sacerdote ; nam à parentibus , vel paranymphis offeruntur in Ecclesia Sacerdoti : qui cum acceperint benedictionem , eadem nocte pro reuerentia benedictionis , in virginitate permanere eos deceret .

13 At si Religiosi Matrimonia solennizare , non habita super his Parochi presbyteri licentia speciali , ausi fuerint , excommunicationis sententiam ipso facto incurunt , per Sedem Apostolicam duntaxat absoluedi .



14 Tridentina etiam Synodus constituit, ut benedictio à proprio Parocho fiat; neque à quoquam, nisi ab ipso Parocho, vel ab Ordinario licentia ad prædictam benedictionem faciendam concedi alij Sacerdoti possit, quacumque consuetudine etiam immemorabili, quæ potius corruptela dicenda est, vel priuilegio non obstantibus. Quod si quis Parochus, vel alius Sacerdos, siue Regularis, siue sæcularis sit, etiam si id sibi ex priuilegio, vel immemorabili consuetudine licere contendat, alterius Parochiæ sponso, sine illorum Parochi licentia Matrimonio coniungere, aut benedicere ausus fuerit, statuit eadem Synodus, ut is ipso iure tamdiu suspensus maneat, quamdiu ab Ordinario eius Parochi, qui Matrimonio inter esse debebat, seu à quo benedictio suscipienda erat, absoluitur.

15 Altero verò coniugum morte sublato, superstite licebit ad alias nuptias transire: nec mulierem infamiæ metus deterreat tempore luctus, à Cæsareis legibus nubenti præfixus.

16 In causis itaque super Matrimonij vertentibus, vel eas quomodo tangentibus proceditur simpliciter, & de plano, sine strepitu, & figura iudicij. Atque causæ Matrimoniales non Decani, Archidiaconi, aut aliorum inferiorum iudicio, etiam visitando, sed Episcopi tantum examini, & iurisdictioni relinquuntur: etiam si in præsens inter Episcopum, & Decanum, seu Archidiaconum, aut alios inferiores super causarum istarum cognitione lis aliqua in quacumque instantia penderet. Coram quo, si pars verè paupertatem probauerit, non cogenda erit extra Prouinciam; nec in secunda, nec in tertia instantia in eadem causa matrimoniali litigare, nisi pars altera alimenta, & expensas litis velit subministrare.

17 Legati quoque etiam de Latere, Nuntij, Gubernatores Ecclesiastici & alij, quarumcumque facultatū vigore, Episcopos in prædictis causis impedire, aut aliquo

quo modo eorum iurisdictionem præripere, aut turbare prohibentur, quæ nuperrimè eadē sancta Synodus Tridentina, sub Pio IV. constituit.

## TITVLVS XII.

### *De Impedimentis Matrimonij.*

**P**ost declarationem eorum, quæ essentialiter requiruntur ad Nuptias actu contrahendas, sequitur videre de impedimentis ipsarum: quæ cum varia sint, & complura, alijs quoque subsequenti-  
bus Titulis, ob meliorem cognitionem explicabuntur; hæc verò summam omnia his versibus concluduntur.

*Error, conditio, votum, cognatio, crimen  
Cultus disparitas, Vis, Ord, ligamen, honestas,  
Si sis affinis, Vel si coire nequibis.*

*Hæc socianda vetant, connubia iuncta retrahant.*

**2** Quia non omnis error Matrimonium impedit, ideo sciendum est pro huius materiæ intelligentia, errorem esse quadruplicem circa Matrimonium; alium conditionis: alium personæ: alium fortunæ: & alium qualitatis. Est autem *Error conditionis*, cum is, qui seruus est, liber creditur. *Error personæ*, cum is qui est Ioannes, Paulus esse putatur. *Error fortunæ*, cum is qui pauper est, diues existimatur: vel contra. *Error demum qualitatis*, cum is reputatur bonus, qui tamen est malus.

**3** Sciendum itaque, quod hi duo vltimi errores, fortunæ & qualitatis, non impediunt Matrimonium. Nam si quis corruptam in vxorem accepit, quam virginem arbitrabatur; vel qui accepit pauperem, quam putabat esse diuitem; vterque quidem errauit, sed neutro tamen isto casu Matrimonium infringitur. Quin potius, qui scientes & prudentes, mulieres pauperes, & publicas de lupanari extraxerint, & in vxores duxerint, quid agant



112  
in remissionem proficiet peccatorum . Cum inter opera charitatis non minimum sit , pauperem subleuare ; & errantem ab erroris semita reuocare .

4. Sed & defectus conditionis vitiat Matrimonium , dū quis ex illius ingenuam esse , seruam ducit in vxorē : quod tunc intelligendum est , cum contrahentis conditio deterioratur : secus si melioratur , vel conseruatur . Similiter dum quis in persona coniugis labitur : credens esse Corneliam , quæ semprouia erat . Vel Titium , qui Mæuius erat . Quod si verò quis cognito errore , ad carnis commixtionem perueniret , iam tum error nuptiarum validitati officere minime posset .

5. Voti quoque solennis emissio , & Sacri Ordinis suscepcio , tam Matrimonium impedit contrahendum , quàm postea contractum dirimit . Secus verò statuitur in eo simplex ; quanquam enim contrahendum impedit , sed iam contractas nuptias nequaquam tollit . Huic tamen , qui nubendo votum simplex fecit irritum , quanto illud manifestius emisit , tanto propter plurimum scādalum , erit durior imponenda poenitentia .

6. Cultus quoque disparitas , Matrimonium & contrahendum impedit , & contractum interdum dirimit . Nam diuersimodè consideratur . Aliquando enim id contingit inter fidelem , & infidelem . Aliquando inter infidelem , & infidelem . Et aliquando inter fidelem , & fidelem ; quorum alter recedit a fide : vel conuertitur ad fidem ; tunc casuum diuersitas , ob diuersas circumstantias , diuersam requirit decisionem . Quia obiectum legis aliquando est *factum præteritum* , quod contingit in approbando , vel reprobando ipsum : aliquando *factum futurum* , quod euenit in præcipiendo , vel prohibendo ; permittendo , vel puniendo .

7. Si quis itaque Iudææ coniugali societate iungi voluerit , siue Christiana Iudæa : vel aliàs infidelis Christiano carnali consortio misceatur : quicumque eorum id commississe deprehenditur , à Christiano coetu , &

Ecclesiæ communione protinus segregandus erit.

8 Item si alter infidelium coniugum ad Fidem Catholicam conuertatur, & alter qui in infidelitate remansit, vel nullo pacto, vel non sine blasphemia Diuini nominis, vel vt Catholicum ad mortale peccatum pertrahat, ei cohabitare voluerit; conuersus quasi priore Matrimonio dissolutum, licite ad secunda vota conuolare poterit, & communis proles ipsi conuerso assignabitur. Hinc versus illi.

*Desere spernente m, vel blasphemare volentem.*

*Vel te credentem secius ad mortale trabentem,*

*Nam sunt absque mora, sic vincula rupta priora.*

9 Quod si conuertum ad fidem, & vxor conuersa sequatur, antequam propter causas prædictas legitimam ducat maritus vxorem, eam recipere compelletur. Nec quidquam conuerso proderit, quod iam secundum ritum suum eandem repudiauerit, cum repudium ipsum, veritas euangelica repudiauerit. Sed nec fornicationem dimissor dimissa poterit obijcere, propterea quod alij post repudium nupserit; nisi aliàs fornicata fuerit.

10 Quia verò Pagani in plures simul sexinas affectum coniugalem diuidunt, vtrum post conuersionem omnes, vel quam ex omnibus conuersus retinere valeat, non immerito dubitari poterit. Et cum nulli vnquam licuerit plures habere simul vxores, nisi cui diuina reuelatione fuit concessum, vt legitur de antiquis Patriarchis: nec cuiquam, vxore etiam ob fornicationem dimissa, aliam liceat superinducere, euidenter apparet, pluralitatem in vtroque sexu (cum inter coniuges seruanda sit æqualitas) circa Matrimonium reprobendam, & de pluribus primam tantum retinendam.

11 Alia sane causa est eorum coniugum, quorum alter, vel in hæresim labitur, vel ad infidelium transit errorem: neque enim hoc casu qui relinquitur, ad secundas nuptias descendere poterit. Nam etsi Matrimonium verum inter infideles sit, non tamen est ratum, vt paulò supra diximus: inter fideles autem, & verum, & ratum existit; quia Sacramentum Fidei, quod semel est admissum, nunquam amit-



titur, sed ratum efficit coniugij Sacramentum, vt ipsum in coniugibus, ipso durante perduret.

12 Nec refert, quod à quibusdam forsan obijci posset, quòd fidelis relictus, non debeat iure suo sine culpa priuari: cum idem multis casibus contingat, vt si alter coniugū infidiatur. Ex hoc quoque quorundam malitiæ occurritur, qui odio coniugum simularent hæresim, vt postmodum nubentibus coniugibus ab ipsa resilirent. Quinimò qui in fide permanferit, ad eum qui ab hæresi, vel infidelitate ad Ecclesiam reuertitur, vel inuitus redire cogendus erit: Nisi ad Religionem transire maluerit, interueniente separatione per iudicium Ecclesiæ. Quod si enim in fornicatione carnali potest innocens inuito peccante Religionē intrare, multò magis poterit, altero coniugum inuito, intrare Religionem innocens in casu spiritualis fornicationis.

13 Ex his apparet, coniugium aliud esse legitimum, & non ratum: aut legitimum & ratum: & aliud ratum quidem, sed non legitimum. *Legitimum, & non ratum coniugium est,* quod legali institutione, vel Prouinciæ moribus contrahitur: hoc inter infideles ratum non est, quia dissolui potest, dato libello repudij lege fori, & non lege poli, quam non sequuntur. Inter fideles verò semper ratum est coniugium, cum coniugia semel inter eos contracta, nunquam solui possint. Horum, *quædam sunt etiam legitima,* veluti cum seruatis nuptialibus ritibus, vxor sponso traditur. Illorum verò coniugia, qui contemptis legitimis solemnitatibus, solo affectu aliquam sibi deligunt in coniugem, *non legitima, sed rata* tantummodo esse creduntur. Quanquam enim spretis ritibus Ecclesiæ Matrimonium contrahi non debeat, non tamen ob id solum Sacramētum coniugij dissolui debeat. Quin potius, si tale Matrimonium fuerit ab Ecclesia postmodum comprobatum, filij generati, & legitimi iudicandi erunt, & hæredes: aliqua tamen illis erit imponenda poenitentia, qui contemptis Ecclesiæ præceptionibus Matrimonium contraxerunt.

14 Coactio quoque, & iustus violentiæ metus Matrimonium

monium impediunt . Cum enim solo consensu coniugium contrahatur , plena debet ille securitate gaudere , cuius est animus indagandus , ne metu impulsus dicat sibi placere , quod odit . Planè quæ inuita probat se sponsalia contraxisse , si comperiat postmodum spontè cognita , ad Matrimonij dissolutionem proclamare , & metum causari non poterit . Hinc Synodus Tridentina statuit , vt inter raptorem , & raptam , quamdiu ipsa in potestate raptoris manserit , nullum consistat Matrimonium . Quod si rapta à rapto- re separata , & in loco tuto , & libero constituta , illum in virum habere consenserit , eam raptor in vxorē habeat ; & nihilominus raptor ipse , ac omnes illi consilium , auxilium , & fauorem præbentes , sint ipso iure excommunicati , ac perpetuò infames , omniumque dignitatum incapaces . Si Clerici fuerint , de proprio gradu decendant . Teneatur præterea raptor mulierem raptam , siue eam in vxorem duxerit , siue non duxerit , decenter arbitrio Iudicis dotare .

15 Vtque magis libera sint Matrimonia , statuit eadem Synodus Tridentina , præcepitque omnibus cuiuscunque gradus , dignitatis , & conditionis existant , sub anathematis poëna , quam ipso facto eos incurrere vult , ne quouis modo directè , vel indirectè subditos suos , vel quoscunque alios cogant , quò minus liberè Matrimonia contrahant .

16 Est autem coactio cum violentia corporali , vel captura . Metus verò est , præter aliquam violentiam , & captionem . Et hic metus est duplex . *Alius iustus* , qui potest cadere in constantem virum . Et *alius minor* . Iustus itaque metus nullum reddit actum in Matrimonio violenter contracto : secus autem si non esset iustus . Ob sexus verò imbecillitatem , minor metus in muliere sufficiat ad impedimentum Matrimonij .

17 Item alius metus est , instantis periculi , & alius futuri . Matrimonium itaque violentia præcisa contractum , mente trepidante ex imminencia instantis periculi , etiam consummatum , est omninò nullum . Contractum verò minis futuri mali perturbato animo , quia multi viri reperiun-



tur, animum habentes effeminatum, relinquitur Iudicis arbitrio, qui considerabit necessitatem actus, & honestatē: quia in materia Matrimonij voluntas coacta non habetur pro voluntate.

18. Furor quoque, quia consensum impedit, nuptias contrahi prohibet: contractas autem dirimit.

19. Item frigiditas, & coeundi impotentia, legitimum Matrimonij impedimentū adferunt. Sicut enim puer, qui debitum reddere non potest, non est aptus coniugio: sic qui ita sunt natura impotentes, vt nec ope Medicorum sine mortis periculo iuuari possint, apti ad contrahenda Matrimonia minimè putantur. Ea quoque, quæ adeò est arcta, vt mulier fieri, & alteri carnaliter commisceri non possit, nisi per incisionem, ad Matrimonium contrahendum, non debet idonea iudicari.

20. Sed quia potest euenire, vt qui à principio propter frigiditatem impotens videbatur, potens deinde ex cursu temporis efficiatur, vt hæc quoque res suos fines habeat, vltra quos omni spe iam consumpta, alteras nuptias contrahere ex coniugibus possit is, qui nullum impedimentū patitur, si frigiditas citius probari non potest, statutum est, vt coniuges triennio simul habitent, à coniugij celebrati die: quo triennio lapso, si alterius impotentiam adhuc subesse fuerit probatum, licebit alteri à tali coniugio discessionem impetrare, aliumque sibi Matrimonio iungere. Sin ambo simul habitare consenserint, potius quàm diuertere, fratris & sororis loco potius sibi inuicem, quàm coniugum erunt.

21. Alia est causa leproforum: nam si mulierem inuenerint, quæ sibi velit nubere: vel mulier leprosa virum, liberum erit illis coniugali vinculo copulari. Et huiusmodi infirmitates impediunt quidem, sed non dirimunt Matrimonium. Alia verò quantumcunque grauis infirmitas non impedit Matrimonium contrahendum: immo & in articulo mortis potest quis contrahere, adeò quod filij etiam ante geniti legitimantur.

22 Publicæ quoque honestatis iustitia , tam Matrimonium contrahendum impedit , quam contractum irritat . Est autem publicæ honestatis iustitia , quæ ex legitimis sponsalibus oritur mulieris , quæ illi coniuncta est , cum qua nunc vir Matrimonium contrahere desiderat: v. g. Cū Dorothea sponsalia contraxi , volo nunc cum Anna , quæ Dorotheæ cognationis vinculo est coniuncta , Matrimonium contrahere , publica honestate impediatur . Inhonestum enim , ac turpissimi visum est exempli , ut ei quis nubere valeat , cuius coniunctam sponsalia frangendo deceperit , ne in eandem , eius nubendo coniunctæ , quasi iniuriam cumulet .

23 Vtique adeo autem ex puris , & certis sponsalibus , impedimentum Iustitiæ publicæ honestatis exoritur , ut etiam si illa consanguinitatis , affinitatis , frigiditatis , religionis , aut alia quavis ratione nulla sint , dum tamen non sint nulla ex defectu consensus , nihilominus , & impedire , & dirimere sequentia sponsalia , vel Matrimonia dignoscantur , licet præcedentia dissolvere non valeant . Quare , qui sponsalia purè , ac determinatè cum aliqua muliere contraxit , & postmodum cum secunda prioris consanguinea idem fecit , ex priorum sponsaliorum vigore ad Matrimonium contrahendum cum prima remanet obligatus .

24 Filij quoque nati ex Matrimonio , quod publicæ honestatis iustitia impediente contractum fuit , cum nec Ecclesiæ permissionem , nec patris allegare possunt ignorantiam , ad susceptionem successivam bonorum paternorum minimè admittuntur .

25 Animaduertendum est igitur , Iustitiam publicæ honestatis esse impedimentum ab Ecclesia inductum , dirimens Matrimonium contractum inter sponsam , & maritum , & omnes cognatos sponsæ suæ , aut mariti , intra primum gradum , ex determinatione Concil. Trid.

26 Item non potest quis eam vxorē habere , cuius ope eiusdem maritum interfecerit : nefariæ enim habentur nuptiæ , quibus conciliandis mariti prioris sanguis , & vita præ-



præmij quodammodo nuptiarũ loco petita fuerint . Quo exemplo, nec quis eam potest ducere vxorem, quæ in prioris vxoris ipsius necem, aliquid fuerit machinata, siue ei fidem dedisset, se eam priore defuncta ducturam, siue non : quæ prohibitio perpetuò est seruanda .

27 Item non valet Matrimonium cum ea, quam per adulterium polluit, scienter contractum. Prout & cum illa, cuius consanguinea ego olim quouis modo etiam sine schemate Matrimonij potitus sum : vel cum qua meus consanguineus rem veneream exercuerit . Quam tamen rem Synodus Tridentina sic restrinxit, vt impedimentum, quod propter affinitatem ex fornicatione contractam inducitur, & Matrimonium postea factum dirimit, ad eos tantum, qui in primo, & secundo gradu coniunguntur, restringatur; in vltioribus verò gradibus statuit huiusmodi affinitatē, Matrimonium postea contractum non dirimere .

28 Et qui cum priuigna sua sciens fornicatus fuerit, neq̃ à matre debitum thori exigere, nec filiam vnquam habere potest vxorem; Imò nec priuigna, nec ipse villo vnquam tempore alij se poterunt Matrimonio copulare: nisi fortè iuuenilis eorum calor mereretur, vt dispensatione cum eis ageretur .

29 Potest autem Papa dispensare super impedimēto publicæ honestatis, quia illud impedimentum non est à iure diuino, sed humano: siquidem dispensat super legitimitate filiorum, etiam respectu hæreditatum, & successionum .

## T I T V L V S XIII.

### *De Triplici Cognatione .*

1 **C** V M cognationis vniculum fortius sit, quam iustitia publicæ honestatis, ideò titulo præsentis de illa, tanquam de proprio impedimento Matrimonij, agendum erit ; quia licet Matrimonium est materia fauorabilis, nihilominus fauores non sunt ibi ampliandi, vnde

vnde sequitur aliquid inconueniens. Iam autem maiora, inconuenientia oriri nequaquam potuissent, si cognationis limites in Matrimonijs non obseruarentur; quorum *impedimenta alia oriuntur à iure naturali, alia à iure humano*. Idque dupliciter, vel ratione reuerentiæ humanæ, vel ratione reuerentiæ alicuius rei sanctæ.

2 Hinc triplex cognatio oritur. Spiritualis, Legalis, & Naturalis. *Cognatio spiritualis est*, Attinentia quædam proueniens ex Sacramenti collatione, vel ad Sacramentum detentione. Et est ex Iuris Canonici dispositione, duplex. *Alia, quæ impedit tantum Matrimonium. Et alia quæ impedit, & dirimit simul*. Prior oritur ex Catechismo; posterior ex Baptismo, & Confirmatione. Vir igitur tenens puellam ad Baptismum, vel Confirmationem, non potest cum illa contrahere Matrimonium: similiter nec mulier infantem tenens poterit postea cum illo contrahere. Et si de facto contrahant, minimè tenet.

3 Et non solum inter baptizantem, & illum qui eum de Baptismo suscepit: itemque inter baptizatum, & suscipientis filios, & uxorem, ante susceptionem à suscipiente carnaliter cognitam, verum etiam inter suscipientem, parentesque baptizati cognatio spiritualis contrahitur, quæ, & contrahendum Matrimonium impedit, & dirimit postea contractum. Et quæ de suscipiente dicta sunt, eadem etiam de baptizante sunt intelligenda. Proinde vnus tantum vir, aut mulier pnerum tenere debet ad Baptismum, & Confirmationem; vel ad summum vnus, & vna. Si tamen plures accesserint, spiritualis cognatio æquè quo ad omnes inde contrahitur, tam Matrimonia contrahenda impediens, quam dissoluens. Hinc sacra Synodus Tridēna sub Pio IV. sanxit, vt Parochus antequam ad Baptismum conferendum accedat, diligenter sciscitetur, quem vel quos elegerint, vt baptizatum de sacro fonte suscipiant, vt eorum nomina, in libro describat, doceatque eos omnes, quam cognationem contraxerint, ne ignorātia vlla excusari valeant. Quod si alij ultra designatos baptizatum tetigerint, cognationem  
spiri-



spiritualem nullo pacto contrahant, constitutionibus in contrariū facientibus nō obstantibus. Si Parochi culpa, vel negligentia secus factū fuerit, arbitrio Ordinarij puniatur.

4 Eisdem modis ex Confirmatione spiritualis cognatio contrahitur, inter Confirmantem, & Confirmatum, illiusq; patrem, ac matrem, atque tenentem consistens, & Matrimonia similiter impediens contrahenda, & postea contracta dirimens. Ex datione verò aliorum Sacramentorum cognatio spiritualis nequaquam oritur, quæ Matrimonium impediat, vel dissoluat.

5 Per Catechismum verò, vel Chrismationem contracta cognatio non est tanta, nam licet per eam contrahendum Matrimonium impediatur, post eam tamen contractum minimè dissoluetur.

6 Sciendum autem, cognationem spiritualem Matrimonia contracta dirimere, non simpliciter, sed postea contracta. Nam si vir, vel mulier ex ignorantia, aut dolo, proprium filium de sacro fonte suscepit, propter hoc separari non debent, nec alter alteri debitum subtrahere; nisi ad continentiam possint induci. Quia si ex ignorantia id factum est, ex ignorantia excusare videtur; si ex malitia, eis proprius dolus patrocinari non debet. Quinimò pro tali casu, Matrimonio in sua firmitate durante, poenitentia imponenda erit.

7 Item sciendum, cognationem spiritualem non contrahi, nisi quoad vnum, aut vnam inter filios verò ad cōpaternitatē accersitorū huiusmodi cognatio nō cōtrahitur.

8 *Legalis verò cognatio est*, proximitas per adoptionem proueniens. Vel, est quædam propinquitas à lege inducta, per quam efficitur quis filius, aut nepos: vel deinceps, aut irater, aut affinis. *Eius autem duæ sunt species.* Vna, quæ temporalem impediendi Matrimonij causam continet. Alia, quæ perpetuam. *Temporalem causam* impedimenti continet ea, quæ inter te & eam, quæ tibi per adoptionem soror esse cœperit, intercedit: nam per adoptionem quæ sita fraternitas eò vsque nuptias impedit, donec manet. *Perpetuam*   
prohi-

*prohibitionis causam continet, vt putā, quæ inter adoptantem, & adoptatum; item, inter adoptantem, & uxorem adoptati: & inter adoptatum, uxoremque adoptantis intercedit. Nam & per emancipationem dissoluta adoptione, Matrimonium impeditur.*

9 *Naturalis demum cognatio est, quæ medio consanguinitatis, vel affinitatis contracta, reperitur. Est autem consanguinitas, vinculum personarum ab eodem stirpite descenditium, carnali propagatione contractum. Et dicitur consanguinitas; quasi sanguinis vnitas, quia scilicet consanguinei de communi sanguine descendunt. Affinitas Verò est, quædam personarum proximitas ex coitu proueniens: ex eo dicta, quasi duorum sit ad vnum finem vnitas. Cum enim duæ cognationes diuersæ per aliquorum culpam coniunguntur, alter ad alterius cognationis quasi quosdam fines accedere videtur. Nec intererit quo ad consanguinitatem, vel affinitatem contrahendam, ex iustis nuptijs. alii qui, an ex damnato coitu inuicem copulati fuerint.*

10 *Hodie sancitum est, vt prohibitio copulæ coniugalis quartum consanguinitatis gradum inclusiue non excedat. Pro cuius rei intelligentia sciendum est, aliam cognationem supra numerari, aliam infra, & aliam ex transuerso.*

11 *Superior cognatio est parentum, hoc enim vocabulo generaliter omnes appellare licet, qui per directam lineam ascendunt, quotcumque personis, seu gradibus à me distet.*

12 *Inferior cognatio est liberorum, quæ vox omnes continet, quicumque à me descendunt; quotuscumque gradus inter me, & ipsos interiectus sit.*

13 *Ex transuerso Verò cognati sunt, qui cum à parentibus meis & ipsi oriantur, in me tamen non influunt, neque ego in illos; sed aliorsum deflectunt, à linea descendentes, quæ ex me perpetuanda est; veluti e. g. Frater mihi transuersalis est, nam etsi ab eodem patre ortus sit, à quo & ego, alium tamen cursum à me tenet, in me enim non influit, nec item ego in illum; & alia ab eo linea ducenda est, alia à me. Sic patruelis frater, vel consobrinus, eundem quem*



& ego auum referunt: sed diuersis tamen riuis ab eo descendimus, cum diuersis patribus orti simus. Quæ exempla, in his duabus speciebus posita, ad multas alias transferri possunt.

14 Contra. Parentes lineâ rectâ nullis flexionibus in me decurrunt: nam Abauus in Proauum:isque in Auum: qui Auus in Patrem, & Pater demum in me influit: quæ ratio pariter in descendantibus constituenda est, quocumque in lineas, vel riuos illi sediuidant. Inter hos igitur ascendentes, & descendentes, perpetua prohibitio Matrimonij est, etsi in alias, atque alias stirpes in infinitum essent propagati. Quocirca haud malè sentiunt, qui tradiderunt, Adamo illi primò totius generis humani parenti, si hodie ageret in humanis nullam repertum iri mulierem, quæ citra violatæ legis poenam nubere posset, à quo tamen quis nescit, quot, quamque sæpè propagatis, & multiplicatis stirpibus deducti simus? Gradus autem hoc modo secundum Ius Canonicum numerantur.

15 Primo gradu supra sunt, Pater, Mater: infra, Filius, Filia. Ex transuerso. Frater, Soror. Quamuis secundum leges Ciuiles, Frater & Soror, in secundo gradu locetur, & Iustinianus Imperator docuerit, lineam, quæ ex transuerso ducitur, à secundo gradu, scilicet Fratris, & Sororis incipere. Neque hæc Iuris Pontificij, & Cæsarei discrepantia ratione caret siquidem iure Pontificio duas personas vni gradui confluendo concurrere necesse est, cum hoc iure propter copulam matrimonialem, quæ quidem non nisi inter duos esse potest, graduum dinumeratio fieri soleat. Quod præceptum etiam in sequentibus gradibus locum habet; semper enim meminisse debemus, duos fratres, duasue sorores lineæ transversalis basem, initiumque esse: nec nisi duarum personarum conjunctarum accessione gradum nouum adijci, neq; ad stirpem respiciendū esse.

16 At Iure Cæsareo vnaquæque persona adiecta nouū gradum parit, quia in gradibus enumerandis hæreditatum, ac tutelarum rationem habuit, quæ quidem de vna persona in

in aliam transire solent, nec duabus personis opus est: quapropter si ad stirpem spectetur, ac vnaquæquæ persona ei adiecta nouum gradum pariat, efficietur, vt cum ego patri sim in primo gradu, qui mihi ortus est frater, is mihi sit in secundo.

17 Secundo gradu supra sunt, Auus, Auia: infra, Ne-  
pos, Neptis: ex transuerso, Frater, Soror: sue filius, vel  
filia. Et conuenienter Patruus, Amita, Auunculus, Ma-  
tertera; Frater patruelis, vel Amitinus; Soror patruelis,  
vel Amitina: Consobrinus, Consobrina.

18 Tertio gradu supra sunt, Proauus, Proauia: infra,  
Pronepos, Proneptis: ex transuerso, Patruus magnus, A-  
mira magna: Auunculus magnus, Matertera magna, pro-  
pior Sobrinus, propior Sobrina: & eorum filius, & filia;  
Frater patruelis, vel Amitini, Sororis patruelis, vel Ami-  
tinæ. Item Consobrini, vel Consobrinæ filius, filia: vel So-  
roris nepos, neptis.

19 Quarto gradu supra, Abauus, Abauia: infra, Ab-  
nepos, Abneptis: ex transuerso, Propatruus, Proamita:  
Proauunculus, Promatertera; & eorum filij & filia. Ne-  
potes, & Neptes; pronepotes, & Proneptes. Item propio-  
ris Sobrini, & propioris Sobrinæ. Nepos, & Neptes. Et  
denum fratris, & sororis, pronepos, proneptis. Et hæc  
vsque ad quartum gradum tradidisse sufficiat: nam cum  
hodie vsque ad quartum gradum duntaxat nuptiæ, vt su-  
pra diximus, prohibeantur, nihil attinet hoc loco vltiores  
gradus cognoscere.

20 Sed, quò vnusquisque per se discat has computatio-  
nes graduum inire, hoc præceptum generale ei tenendum  
est, vt in subducendo graduum ascendentium, & descen-  
dentium calculo tot gradus censeantur, quot intercesse-  
rint personæ vna dempta; quia stipex in numero non re-  
fertur; veluti (gratia exempli) à me ad Abauum quinque  
personæ enumerantur. Ego, Pater, Auus, Proauus, Abau-  
us. Hic igitur inter me, & Abauum, quatuor gradus re-  
censebuntur.



21 In tranſuerſalibus verò, hæc ſit regula generalis, vt quiſque ex collateralibus meis tot gradibus à me diſtare dicatur, quot gradibus à ſtipite is diſtet ex nobis, qui ab ipſo ſtipite remotior eſt. Quare, ſi ego duobus ſtipiti gradibus vicinus ſim, tu ab eodem ſtipite quatuor gradibus abſis; quarto gradu mihi eris coniunctus. At ſi neuter altero longius à ſtipite abſit, tot gradibus cognationis inter nos referentur, quot noſtrum vteruiſ ab eodem ſtipite remotus eſt.

22 Supradictorum autem vocabulorū ſignificatio hæc eſt. *Patruus* dicitur frater patris. *Amita* eſt patris ſoror. *Auunculus* frater matris. *Matertera* ſoror matris. *Fratres patrueles* dicuntur, qui ex duobus fratribus nati ſunt, quemadmodum, & ſorores patrueles. *Fratres amitini*, vel ſorores amitinæ ſunt, qui, quæue ex fratre, & ſorore ſunt orti, vel ortæ. *Conſobrini*, vel *Conſobrinx*, qui, vel quæ ex duabus ſororibus. *Patruus magnus*, & *Amita magna*, ſunt Aui frater, & ſoror. *Auunculus magnus*, & *matertera magna*, ſunt Auiæ frater, & ſoror. *Propior Sobrinus*, & *propior Sobrina* dicuntur, filij & filiæ ex patruo magno, amita magna; & auunculo magno, & matertera magna. *Propatruus*, & *Proamita* dicuntur, Proauj frater, & ſoror. *Proauunculus* *Proamatertera*, *Proauia* frater, & ſoror.

22 Sed & affinitas ſimiliter, quemadmodum, & cognatio, tres ordines habet, videlicet, *Ascendentium*, *Deſcendentium*, & *Collateralium*. Ego verò, & mea vxor inuicem affines non ſumus, ſed ſumus affinitatis principium, & origo. *Conſanguinei* quoque mei, nullo affinitatis vinculo iuncti ſunt conſanguineis foeminæ à me cognitæ.

24 *Ascendentium* itaque *Affinium* nomina ſunt. *Socer*, & *Socrus*, id eſt mariti, vel vxoris pater, & mater. *Vitricus*, id eſt præſens maritus matris meæ, à quo tamen ego genitus non ſim. *Nouerca*, id eſt præſens patris mei vxor, quæ me tamen non peperit. Aliorum, aut ſuperiorum affinum nomina non recenſeo, cum ferè ſint eadem, quæ & conſanguineorum; vel ſola particulæ huius, *pro*, adiectione

155  
ctione distinguantur, vt Profocer, & familia.

25 Infra sunt, veluti *Gener*, id est filiae maritus. *Nurus*, id est, filij vxor. *Pruiignus*, vel *Pruiigna*, id est, vxoris, vel mariti filius, vel filia, ex alio marito, vel alia vxore suscepti: Et vltiores, quibus præpositio, Pro, solet accedere, vt Progener, id est, maritus neptis.

26 Collaterales affines sunt, qui vel marito, vel vxori consanguinei sunt ex transuersa linea iuncti. Eorum autem affinium, qui iustis nuptijs parantur, specialia nomina sunt hæc. Videlicet *Leuir*, qui est frater mariti. *Sororius*, qui est vir sororis. *Glos*, quæ est soror mariti. *Fratrissa*, quæ est vxor fratris, quæ & ipsa glos rectius dici potest. *Inanitrices*, seu *Inateres*, quæ sunt duorum fratrum vxores. Alij autem specialia nomina non habent, sed illo consanguinitatis nomine ferè solent appellari, quo nomine, vel gradu, ab eonuncupantur, cuius causa affinitatem contraxerunt, veluti: Qui vxori meæ Consobrinus, vel Patruelis est, is & mihi Consobrinus vel Frater patruelis appellabitur, & de similibus. In his igitur cum scire voluerimus, an cum eis nuptiæ contrahi possint, non solum inspiciemus quoto gradu affinitatis inter se deuincti sint, sed etiam inspiciendum erit, quo in genere affinitatis existant.

27 Vir itaque qui à stipite quarto gradu, & mulier quæ ex alio latere distat quinto, licitè coniungi poterunt. Aliàs si propiore gradu sese inuicem coniungant, temere contractum Matrimonium adeò erit irritum, quòd nullo poterit annorum numero defendi. Imò diuturnitas temporis auget peccatum, non verò validat Matrimonium.

28 Si tamen infideles, qui secundum veteris, vel propriæ legis instituta, circa gradus qui consanguinitatis, vel affinitatis Canonibus notatos coniuncti sunt, Domino inspirante conuersi fuerint, Matrimonium ante contractum non erit post Baptismi lauacrum irritandum. Cum per Sacramentum Baptismi non soluantur coniugia, sed crimina dimittantur. Vnde & proles inde nata, legitima censetur.



79 Admonendi etiam sumus, perinde virum à consanguineis, & propinquis vxoris abstinere debere, & vxorem à propinquis viri, atque à proprijs. Huius autem rei manifesta ratio illa est, quia si secundum Diuinam sententiã, Ego & vxor mea vna caro sumus, profectò mihi & illi, mea, suaque cognatio vna propinquitas efficiuntur. Quocirca ego, & soror meæ vxoris in vno & primo gradu erimus, filius verò eius in secundo gradu erit à me; nepos tertio, & sic deinceps.

30 Vxorem verò propinqui cuiuscumque gradus sit, ita me oportet attendere, quemadmodum eiusdem gradus femina propriæ propinquitatis existat: quod nimirum & vxori meæ de propinquitate mea in cunctis cognationis gradibus conuenit obseruare.

31 Quanquam autem omnes consanguinei viri, vxoris sint affines inter consanguineos tamen vxoris & viri, nulla intelligitur esse affinitas contracta, vt supra admonuimus, quæ inter eos impediret, Matrimonium contrahi. Pater igitur & filius, cum matre & filia; item duo fratres, aut cognati, cum duabus sororibus, aut cognatis licitè contrahere poterunt.

32 Si quis autem contracto Matrimonio, consanguineã vxoris suæ cognouerit, vt puta, si vitricus priuignam, vel maritus sororem propriæ vxoris adulterauerit, Matrimonium quidem antea contractum non dirimitur, sed qui se ita contra leges alteri commiserit, à coniuge nunquam debitum petere poterit, nec cum aliqua legitima post vxoris obitum, vnquam nuprias contrahere.

33 Vxor quoque, cuius consanguineã à proprio marito fuerit cognita, diligenter est commonenda, vt à commixtione viri abstinere, & in continentia maneat, donec vir viam vniuersæ carnis ingressus fuerit. Quod si fortè monitionibus parere recusans, talis fuerit, vt de lapsu ipsius probabiliter timeri possit, vir eius, & poterit, & debet debitum sibi soluere coniugale, cum affinitas post Matrimonium iniquè contracta, illi nocere non debeat, quæ  
ini-

iquitatis particeps non existit.

34 Præcedens itaque affinitas non subsequens dirimit Matrimonium : sed et si vtriusque coniugum constet assertionem , acclamante etiam vicinia , quòd coniugatus ante contractum Matrimonium vxoris suæ consanguineam cognouerit , propterea coniuges separari non debent, sed dispensationem procurabunt. Alioqui plurimi ad incestus confessionem proflirent, si suæ assertioni Ecclesiæ iudiciũ accessurum crederent , vt se inuicem onere Matrimonij liberarent . Rumor autem viciniæ non est adeò iudicandus validus, vt nisi fide dignæ probationes accedant, possit ritè contractum Matrimonium irritare .

35 Non omittendum est , Tridentinæ Synodi Constitutionibus anathemate plecti eos , qui dixerint, Ecclesiam non potuisse constituere impedimenta Matrimonium dirimentia : vel in his constituendis errasse. Ac qui dixerint, eos tantum consanguinitatis , & affinitatis gradus, qui Leuitico exprimuntur, posse impedire Matrimonium contrahendum , & dirimere contractum : nec posse Ecclesiam in nonnullis eorum dispensare, aut constituere, vt plures impediant , & dirimant.

36 Si qui contra supradicta præcepta Matrimonium inierint ( vbi perpetuum subest impedimentum) nihil agẽt; & si consanguinitas , vel affinitas subesset; vel cum Monialibus , aut Religiosis, aut cum sacratissimis Clericis initum esset, excommunicationis sententiæ ipso iure illigati essent , qui tali Matrimonium contraxissent , eosque Ecclesiarum Prælati , sic excommunicatos publicè pronuciare debent, aut suis subditis , vt notum id publicè faciant , iubere , donec se errore cognito separarint , & absolutionem impetrarint . Et proles ex talibus Matrimonijs suscepta prorsus illegitima habetur .

37 Etiam synodus Tridentina constituit, vt si quis intra gradus prohibitos scienter Matrimonium contrahere præsumpserit , separetur , & spe dispensationis consequendæ careat: idque in eo multo magis locum habeat, qui non  
tan-



tantum Matrimonium contrahere, sed etiam consummare ausus fuerit. Quod si ignoranter id fecerit, siquidem solennitates requisitas in contrahendo Matrimonio neglexerit, eisdem subiiciatur poenis, cum dignus non sit, qui Ecclesiæ benignitatem facile experiatur, cuius salubria præcepta temere contempserit. Si verò solennitatibus adhibitis, impedimentum aliquod postea subesse cognoscatur, cuius ille probabilem ignorantiam habuit, tunc facilius cum eo, & gratis dispensari poterit. Statuitque, ut in contrahendis Matrimonijs, vel nulla omninò detur dispensatio, vel rarò: idque ex causa, & gratis concedatur. In secundo gradu nunquam dispensetur, nisi inter Magnos Principes, & ob publicam causam.

38 Atque ut cæteris negotijs, curisque vacui, maiorem, diligentiorumque operam certis temporibus, orationibus, pijsque alijs operibus nauare possimus, statutum est etiam, ut illis temporibus, quæ Diuino cultui potissimum dicata sunt, nuptias solenniter celebrari quodammodo nefas habeatur. Nempè ab Aduentu Domini, usque in diem Epiphaniæ. Et à feria quarta Cinerum, usque in octauam Paschatis inclusiuè. Quique dixerint, prohibitionem hanc solennitatis Nuptiarum, statutis anni temporibus, superstitionem esse, anathema adiecit.

## T I T V L V S XIV.

### *De Clandestina Desponsatione.*

**C**landestinum Matrimonium dicitur, in quo testes, & denuntiationes deficiunt, & proinde clam celebratur, solennitatibus omissis, non in facie Ecclesiæ, ut est præceptum à Canonibus. Prohibentur autem Matrimonia cōtrahi clandestinè, ne postea oporteat illa dissoluere. Sancitumque est à Concilio Tridentino, ut, antequam Matrimonium contrahatur, ter a proprio contrahentium Parocho, diebus festiuis in Ecclesia, inter,

inter Missarum solemniam publicè denunciatur , inter quos Matrimonium sit contrahendum . Quibus denunciationibus factis, si nullum legitimum opponatur impedimentū, ad celebrationem Matrimonij in facie Ecclesiæ procedatur: vbi Parochus viro , & muliere interrogatis , & eorum mutuo consensu intellecto, iuxta ritum Ecclesiæ eos benedicat . Nisi Ordinarius ipse expedire iudicauerit, vt prædictæ denunciationes remittantur , quod illius prudentiæ, & iudicio sancta Synodus relinquit .

2 At qui aliter , quàm præsentem Parochum , vel alio Sacerdote , de ipsius Parochi , vel Ordinarij licentia, & duobus, vel tribus testibus, Matrimonium contrahere attentabunt , eos sancta Synodus ad sic contrahendum omnino inhabiles reddit , & huiusmodi contractus irritos , & nullos decernit .

3 Et quanquam peccent clandestinè contrahentes , tamen Matrimonium iure Decretalium , si de eo quoquo modo fides fieri potest . Et proinde, eadem Synodus, eos anathemate damnat, qui huiusmodi Matrimonia libero contrahentium consensu facta , & vera ; & rata fuisse negant : quique falso affirmant, Matrimonium à filiis familias sine consensu parentum contracta, irrita fuisse, & parentes ea rata , vel irrita facere posse ; quamvis sancta Dei Ecclesia ea semper detestata sit, atque prohibuerit, & nunc quoque in eadem Synodo irrita decreuerit .

4 Ac insuper , tam Parochum , quàm alium Sacerdotem , qui cum minore testium numero : & testes , qui sine Parochum , vel Sacerdote , huiusmodi contractui interfuerint; nec non ipsos contrahentes grauitè arbitrio Ordinarij puniri præcipit .

5 Admonet etiam eadē sancta Synodus omnes ad quos spectat, ne vagantium genus hominum, incertasque sedes habentium , ad matrimonium faciliè recipiant ; Magistratusque seculares hortatur, vt eos coerceant . Parochis autem præcipit, ne illorum Matrimonij intersint, nisi prius diligentem inquisitionem fecerint ; & re ad Ordinarium

Y delata,



delata, ab eo licentiam id faciendi obtinuerint: quæ per-  
opportuna quidem fuit consultatio, nam huiusmodi genus  
hominum, vt improbi sunt ingenij, prima vxore relicta,  
sæpè aliam, & plerumque plures illa viuente, diuersis in  
locis ducunt: cui morbo prædictæ sanctionis remedio sanè  
quàm præsentissimè occurritur.

## T I T V L V S X V.

*Dè illis, qui Matrimonium accusare possunt,  
Vel contra illud testificari.*

1 **Q**uia accedit interdum, vt ob occulta impedi-  
menta, de quibus ipsi contrahentes nesciebant,  
Matrimonia dissoluantur, necesse est, vt ea re-  
uelentur, dum inferunt damnum. Non tamen  
quandocunque, aut indistinctè omnes ad accusationem  
admittendi erunt, sed illi tantùm, qui illud occultum im-  
pedimentum sciunt, & probare coram Iudice legitimo  
poterunt.

2 Si quis verò tempore factæ à Sacerdote denunciatio-  
nis in ipsa Dioecesi constitutus, nihil contra Matrimonium  
dixerit, eidem mox coniunctos impetere minimè concedè-  
dum erit. Nisi proprio firmauerit iuramento, quod ea,  
quæ obiecturus est, postea didicerit: quodque ad accusan-  
dum dolo non profiliat: Quo casu etiam si quod obiectu-  
rus est, ab illis didicisset, qui denunciationis tempore  
siluerunt, claudi non debet ei accusandi aditus: quoniam  
etsi ab impetitione huiusmodi, culpa ex tali silentio con-  
tracta, auctores excludat, iste tamen qui culpa caret, amo-  
ueri non debet.

3 Idem iuris erit, si tempore denunciationis, vel extra  
Dioecesim commorabatur, vel aliàs denūciatio ad eius no-  
titiam peruenire non potuit: vt puta, si nimix infirmita-  
tis feruore laborans, mentis non erat compos, vel in annis  
tàm teneris constitutus erat, vt ad talium rerum percep-  
tionem

tionem eius ætas sufficere non valeret; siue alia legitima  
causa fuerit impeditus.

4 Sed nec omnes ad accusationem, testimonium e  
dicendum admitti debent; nã si de tali impedimento agē  
dum sit, quod neque coniugum in se delictum continet,  
nec ob id Matrimonium dissolui cuiusquam intersit, præter  
quam ipsorum coniugum, vt puta, si erratum in conditio  
ne status fuerit; vel si mulier ita sit arcta, vt cognosci non  
possit; vel vir ita frigidus, vt coire nequeat: soli ipsi coni  
uges admittentur:

5 Quare, si impedimentum originem habeat ex pecca  
to, vel vitio naturali occulto, prius laboranti hoc impe  
dimento facienda est admonitio, vt desistat à Matrimonio;  
quod si monitus non acquiescat, denunciandus erit, quia  
plus vrget bonũ Matrimonij, vt contrahatur validè, quàm  
fama proximi, qui noluit recipere correctionem fraternam.  
Quod etiam si quis non posset probare impedimentum, te  
netur tamen illud reuelare, quia Prælato aperiet viam, vt  
diligenter inquirat de impedimento, ne tacito impedimen  
to ineat Matrimonium, quia Deum haberent vltorem. Et  
ita seruatur in praxi, quod etiam si conscius esset impedi  
menti ex auditu, à persona fide digna, tenetur impedi  
mentum manifestare, etiam illa persona non denuncia  
te: & hoc eadem ratione, vt Prælatus inquirat, ne inuali  
dè Matrimonium contrahatur.

6 Si ramen obtenta esset dispensatio, etiã in foro con  
scientiæ cessaret onus denunciandi, etiam si præciperetur  
reuelatio per viam excommunicationis, quia cessat iam  
impedimentum.

7 Quod si delictum contineat, vt quia aliqui in gradu  
vetito, vel contraxisse, vel contrahere velle dicantur, tunc  
quilibet quidem ad accusandum recipitur, sed omnium  
maximè parentes; & si ij desint, proximiores, id est, soror,  
frater, patruus, auunculus, amita, matertera, eorumque  
descendentes. Semper tamen antiquiores, & honestiores  
proponuntur in testificando.



8 Vbi tamen alter coniugum, diuitijs, honore, nobilitate, & potentia superior esset, testimonium illius, cuius parens esset inferioris conditionis, admittendum non est; cum parentes filiorum incrementum, & honorem affectare proculdubio comperiantur.

9 Quoties ergo aliqui propter cognationem propinquitatis separari petuntur, duobus, vel tribus eiusdem consanguinitatis testibus adhibitis, vel totidem senioribus, & melioribus eiusdem loci, id debet legitimè probari. Testium autem examinatio, in hac causa, duplicis interuentu iuramenti fieri debet: vt iurent scilicet, & se non priuato odio, neque amicitia, nec alicuius proprii commodi intuitu, ad hoc iurandum inductos: & sicut ipsi dicunt, rei veritatem à maioribus accepisse, & se credere ita esse.

10 Præstitis autem iuramentis, & impedimento Matrimonij legitimè probato, si quis contra præcedentem probationem partibus publicatam, quasi Matrimonium impediri iure non valeat, probare velit, audiendus non erit, sed priori standum erit probationi.

## TITVLVS XVI.

### *De Diuortijs.*

1 **Q**uia ex accusatione Matrimoniorum deuenitur ad diuortia, & repudia, congruè post titulum præcedentē de accusationibus ponitur in calce huius tractatus Matrimonialis, de diuortijs, & separatione coniugum.

2 *Est itaque diuortium, dissolutio Matrimonij, quæ vtroque viuente coniuge contingit. Vel secundum Concilium Tridentinum: Diuortium est, legitima separatio mariti, & vxoris quoad mutuum cohabitationem. Sed & simplicem thori separationem diuortium non malè appellamus; quia hæc separatio aliquando fit perpetua, aliquando tēporalis.*

3 *Dicitur autem diuortium, à diuersitate mentium, quia*  
in

in diuerſas partes, ſeu voluntates eunt, qui Matrimonium diſtrahunt. Et licèt de iure ciuili ex diuortio ſeparabatur, & diſſoluebatur Matrimonium etiam quoad vinculum; & licitum erat vxori poſt factum diuortium, alium ducere virum; & è contra viro licebat aliam ducere vxorem, quod & Hæbreis permiferat in veteri lege Moyſes, ob duritiam cordis illorum. Verùm poſt legem Euangelicam promulgatam, non ſolùm inter Chriſtianos, ſed etiam inter omnes infideles non permittitur amplius tale repudium, ſed manente vinculo Matrimoniali fit ſeparatio thori quoad mutuum cohabitationem, vel ad mortem vnius ex coniugibus, vel etiam ad tempus. Interim verò neuter eorum alteras nuptias experiri poteſt.

4 Vnde, licèt multoties confundantur hæc vocabulo, *Diuortium*, & *Repudium*, proque eodem ponantur: *Diuortium* tamen propriè dicitur à diuertendo, dum coniuges recedunt a vera via matrimonij, & coniugium inter ſe initum diſſoluunt. *Repudium* verò, quando vir vxorem à ſe reiicit ob rem aliquam pudendam, poſt ſequutam carnalem copulam. Vel quando ſponſus ex legitima cauſa reiicit ſponſam, & diſſoluit ſponſalia.

5 Sed iam videamus, ex quibus cauſis fiat diuortium, quia Matrimonium legitimè contractum nequaquam diſſolui poteſt, & homines à Deo coniuncti ſeparari nec debent, nec valent. Si tamen alter coniugum, qui per verba contraxit die præſenti, copula non ſecuta (nam ſi copula fuiſſet ſecuta, etiam & de conſenſu vxoris non poſſet ingredi) ſeſe ad obſeruantiam regularem voluerit aſtringere, poterit id, altero etiam inconfulto efficere, & ei, qui in ſæculo remanere voluerit, alteri ſe iungere permittendum erit; quia nondum vna caro effecti ſunt. Dicenti tamen ſe velle ingredi Religionem, eſt certum tempus arbitrio Iudicis præfigendum, intra quod vel ingrediatur, vel ad vxorem redeat.

6 Diuerſum ſtatuitur, ſi quis per verba de præſenti, aliquam deſponſatam relinquens, ſacros Ordines ſuſceperit;



rit; quanquam enim votum per sacri susceptionem Ordinis firmatum, ad impediendum Matrimonium futurum, ac dirimendum postea contractum habeatur efficax, ad dissoluendū tamen prius contractum etiam non consummatū, inualidum censetur. Ideoq. talium Ordinum non obstante susceptione (si ad profitendam probatam Religionem induci non valeat, & sponsa eius instituerit) contractum Matrimonium consummare, per censuram Ecclesiasticam cōpellendus erit; sed iam ab executione Ordinis suspēdetur.

7 Sed etsi inter infideles Matrimonio contracto sequuta copula fuerit, si alter, qui in infidelitate permanferit, velit à fidei disungi, aut non nisi cum contumelia Creatoris cum altero commorari, licebit Christiano non modò Matrimonium dissolvere, sed etiam vt supra diximus, alteri se Matrimonio iungere. Quibus casibus, cum auctoritate Sedis Apostolicæ Matrimonium distrahatur, non iam humana, sed potius Diuina potestate coniugium dissolutum intelligitur.

8 Diuersum est de eo tenendum, qui cum sit Christianus, labitur in hæresim, vel in alium errorem Gentilitatis, quia tunc non dissoluitur Matrimonium, vt etiam supra admonuimus, nec potest remanens in fide alteri nubere.

9 Item si quis ignarus virginem in vxorem duxerit, quæ adeò arcta sit, vt mulier fieri non possit: vel simile vitium à natura contraxit, vt ope Medicorum non possit adiuuari. Aut mulier virum acceperit, qui adeò frigida sit naturæ, vt eidem carnaliter commisceri non possit: poterunt inuicem separari, & qui Matrimonio aptus erit, ad secundas nuptias liberè transitum facere poterit.

10 Si quis tamen coeundi impotentiam causatus, post separationem aliam acceperit; aut ea, quæ arcta putabatur, aliquem inuenerit, qui sibi seras referaret; ytroque casu, post peractam poenitentiam, ad priora coniugia redire compellendi erunt: quia cognita ab vno, præsumitur cognoscibilis & ab alio. Nisi primus vir adeò esset mentulosus, vt nūquam posset deflorare virginem sine periculo

mor-

mortis ; tunc iam non esset restituenda marito primo, licet per frequentem usum cum secundo, habitu sit apta red-  
dita primo.

11 Dirimitur quoque thorus ob maleficium impediens conjugalem copulam ; ob sortilegia post factas orationes, confessiones, ac alia spiritualia, ut tollatur intensa debilitas genitalis, ac remoueantur fascinationes, & incantationes. Imò si maleficium sit perpetuum, & ab initio fuit decepta Ecclesia, sit totalis separatio iudicio ipsius Ecclesiæ. Quod remedium non solum concedatur vxori contra maritum, sed etiam marito contra vxorem duri capitis, pernoscantem, & liberè vagantem, & sui copiam alijs facientem ; quia de his constituto, vel de eius contagiosa ægitudine, vel etiam ob insupportabilem demeritiam, thori pariter sit separatio.

12 Planè si scienter quis cum ea, quæ maribus impotens est commisceri, Matrimonium contraxerit, vel alterius comperta postmodum impotentia, simul morari consenserit, his casibus Ecclesia iudicare consuevit, ut quas viri tanquam vxores habere non possunt, habeant ut sorores, & viuant in continentia. Quamquam cum huiusmodi impotentibus non potest consistere verum Matrimonium, quia desinunt causæ institutionis Matrimonij, nam nec ob spem sobolis, nec ut vitetur fornicatio, potest stare Matrimonium. Vnde si is, qui contraxit cum impotente, cum alia post contrahat, tenet Matrimonium cum secunda.

13 Ob fornicationem carnalem, vel spiritualement, non soluitur Matrimonium, sed sibi sunt inuicem coniuges etiã separati quoad thorum. Sed & separatio non statim faciendæ erit, accusatione de crimine instituta, sed probata, & peracta. Interim enim pendente iudicio, coniugum alteruter iure quod habet in altero, priuari non poterit. Sed quia sæpius mariti insidiari solent vitæ vxoris propter amorem concubinæ, ob hoc periculum, si ille secum retinet adulteram, semper sit separatio quoad cohabitationem, etiam non expectato iudicio.



14 Multum autem interest, vtrum ob carnalem, an verò ob spiritualem fornicationem thori sit facta sepatatio. Primo enim casu maritus adulteram vxorem, etiam emendatam, nisi & ipse simili fornicatione pollutus fuerit, recipere non compellitur; sed fornicatrix in claustris cum religiosis mulieribus, ad perpetuam agendam poenitentiam erit collocanda. Secundo verò, si fornicatus spiritualiter ab infidelitate reuertatur, cogetur, quæ in fide remansit, illum resumere; nisi & ipsa ad Religionem transitum facere voluerit: quod etiam nolente viro ad fidē reuerso, exequi liberè poterit.

15 Regulariter vir, & vxor non possunt disiungi, vt alter sumat sacros Ordines, aut Monasterium ingrediatur, nisi fortè remanens, & ipsa continentiam vouere voluerit. Alioqui, quanquam de vxoris licentia Monasterium quis ingressus fuerit, & professionem fecerit, non vxor ad continentiam cogi, sed vir ad vxoris thorum euocari poterit. Nisi post coniugis ingressum fornicata fuerit; aut se inuicem continentiam promittendo absoluerint.

16 Qui inuita vxore ingressus est Monasterium, & repetitus ad eam redire coactus fuerit, nō cogitur rursus vxore mortua ad Monasterium reuerti, sed iam non poterit amplius vxorem ducere. Sciente autem vxore, & non contradicente vitam professus monachalem, vxore postmodum defuncta, de Monasterio exire non potest. Vel si temere contraheret, Matrimonium tale dirimendum erit, quia professio facta consentiente vxore, idem operatur, quod ingressus.

17 Quæ autem credens virum suum esse mortuum, habitum Religionis assumpsit, & eo reuerso de Monasterio educta fuit; illo defuncto, consultius faciet, si ad Monasterium iterum redibit. Sed tamen si ad hoc perducì non poterit, cogenda non erit. Quare vxor non planè certificata de morte mariti contrahere non potest, quamuis eius ætatis sit, & fragilitatis, vt continere nequeat.

18 Nisi ergo legitima subsit exceptio, coniugibus temere

matre disiunctis, alterum alterius repetendi integrum ius manet. Erit autem legitima exceptio, cum aliquis consanguinitatis gradus obijcitur, quo quidem casu, licet si petitorio iudicio actum sit, antea de ipsa exceptione cognoscidebeat: si tamen possessorio quis experiatur, antequam de consanguinitate discutiatur, plenaria erit facienda restitutio; nisi is qui conuenitur, & de malitia iuret, & super exceptione promptas probationes offerat. Quo casu, excepta carnali commixtione tantum, quoad reliqua restitutio facienda erit.

19 Præstanda tamen erit idonea cautio, quod nullam restitutæ violentiam vir inferet. Quod si tanta sit viri sæuitia, aut odio tam capitali vxorem prosequatur, ut trepidanti mulieri sufficiens securitas prouideri nequeat, usque ad causæ decisionem, alicui probæ, & honestæ mulieri studiosius custodienda committetur in loco, ubi vir, vel eius coniuncti mulieri nullam possint iniuriam inferre. Et hæc quidem obtinent, secuto inter viros, & mulieres Matrimonio: ceterum si nullis præcedentibus sponsalibus, vel legitimo consensu, mulier ad viri domum iam traducta, postea abscedens, alij forte nubere voluerit, nulla facienda erit restitutio.

20 Fornicationis quoque repetenti obstat exceptio; thorique ob eam causam sequuta separatione, separata viuente, aliam usque adeò superinducere quis prohibetur, ut si de facto duxerit, ex eaque filios susceperit, etiam mortua adultera eandem retinere non possit; quod ipsum & priore vxore minimè cognita sibi locum vendicat; aliam tamen hac secunda dimissa ducere minimè prohibetur.

21 Si mulier Matrimonium contraxit cum eo, quem ignorabat coniugatum, vxore prima mortua, erit in eius potestate virum retinere, vel diuortium petere. Sed ad petitionem viri non sunt separandi, & filij de tali Matrimonio legitimi sunt censendi.

22 Cum ea, quam quis vxore viuente cognouit, non prætextu Matrimonij, defuncta vxore, si nihil in perniciem



olim viuētis vxoris vir, aut mulier cognita, machinati fuerint, nec fidem de contrahendo sibi inuicem dederint, contractæ postea nuptiæ legitimæ reputandæ erunt.

23 Sed etsi fidem quidem sibi inuicem dederint, vel etiam de facto contraxerint, si nec ante, nec post, legitima coniuge superstite, carnalis intercessit copula, quamuis vterque grauitèr deliquerit, & propterea etiam sit imponenda poenitentia; Matrimonium tamen contractum post vxoris obitum, minimè dissoluetur.

24 Vsq̃ue adeò autem machinatio in alterius coniugii obitum adhibita inter superstites machinatores Matrimonij spem excludit, vt infidelis cum Christiano communicato consilio eiusdem maritum de medio sustulerit, licèt postea per studium superstitis vxoris ad fidem Christianā translatus fuerit: non tamen propterea magis cum ea nuptias legitimas contrahere, aut contractas retinere poterit. Nec enim huiusmodi lucro tam detestandum damnum Ecclesia resarciri patitur. Sed etsi machinationem adhibitam in necem coniugis effectus consequutus non fuerit, si infidiator alteri superuixerit, spe coniugij perpetuò destitutus, ad secundas nuptias nunquam adspirare poterit. Id & in ijs casibus accidit, qui incestum admiserunt, Sacerdotem interfecerunt.

25 Illud quoque pro dictis aduertendum est, quod si diuortium fiat culpa viri, filij educandi sunt penes vxorem innocentem expensis viri; quia dos restituitur vxori ex dispositione iuris ob culpam, & delictum viri; & sic fructus sunt vxoris, & alimenta filiorum soluenda sunt de bonis viri. Sic è contra sunt educandi filij penes patrem expensis vxoris, quando culpa illius sit diuortium, & illa amittit dotem, quæ tam de iure ciuili, quàm de iure canonico applicatur viro.

26 Vt autem fiat separatio Matrimonij ob adulterium coniugis, probari debet tale adulterium ad minus per confessionem eiusdem coniugis adulteri, vel adulteræ.

27 Fit etiam diuortium per furorem alterius coniugis, vt

vt si periculum sit sano habitare cum furioso. Magis, cum fauit maritus in vxorem cum graui periculo damni. Secus si modica esset coëctio & castigatio. In fauitia etiam comprehenditur causa insidiarum vitæ; tunc restituitur vxori dos, vnà cum iuribus dotalibus.

28 Ob vitium quoque sodomix fit separatio; sed non sufficit solius vxoris conquestus, se tentatam fuisse à viro suo de vitio nefando, sed requiritur aliud inditium ad probandum, vt si solitus sit maritus cum alijs tale vitium committere.

29 Similiter ob lenocinium fit separatio thori, vt si esset leno vxoris, & viros procaces in domum suam induceret, qui vxorem sollicitarent ad turpia, & maritus rogatus ab vxore nollet desistere. Sunt & aliæ causæ legitimæ ad diuortium, puta si vnus coniugum sit eccliticus, tabidus, intolerabiliter foetens, vel morbo Gallico infectus; quæ omnia arbitrio Iudicis fieri debent.

## T I T V L V S X V I I .

### *De Rebus Sacris, Sanctis, & Religiosis.*

1 **S**acramentorum breuiter explicato tractatu, illorūque sectione, ac natura cognitis, transeamus iam ad Sacramentalia, hoc est, ad res ordinatas pro administratione Sacramentorum: quarum *aliæ sunt Sacra*, vt vasa, imagines, cruces, & vestes ad cultum Diuinum, ornamentum uè Ecclesiæ comparatæ: *aliæ Sanctæ*, vt Ecclesiæ, Altaria, & Reliquiæ Sanctorum: & *aliæ Religiosæ*, vt Monasteria, Xenodochia, Coemeteria, & Sepultura.

2 Ille quoque locus sacer dicitur, qui ritè Deo per Episcopum, aut Papam consecratur; (non per Sacerdotem) neque per priuatam authoritatem laici alicuius Principis, vt olim fiebat. Atque inprimis Ecclesia dicitur locus consecratus, in quo, qui vim aliquam, furtum, aut crimina aliqua alia committunt, sacrilegi vulgò dicuntur. Sed &



qui per vim ædículas Sacerdotum intrant, & inde aliquid arripientes fugiunt, puniuntur minus quam sacrilegi, sed plusquàm fures simplices.

3 Cum autem Ecclesia primum locum teneat inter res sacras, sanctas, & religiosas, & nomen suum æquiuocum habeat, antequam ad modum construendarum, consecrandarum, aut reparandarum Ecclesiarum descendamus, primum decidamus necesse est, de qua nam Ecclesiæ significatione titulo sequenti tractabimus.

4 Primum igitur Ecclesia dicitur, congregatio malignantium, vt Psalmista loco quodam dicit. *In Ecclesiam, malignantium non introibo*. Deinde Ecclesia dicitur, fidelium collectio, de qua in Symbolo. *Credo unam Sanctam Catholicam Ecclesiam*. Tertio Ecclesia dicitur, Corpus Christi, mysticum, præcipuè in Ecclesia illa triumphante. Quarto Prælaturæ Ecclesiasticæ, quando dicimus. *Sic Ecclesia iudicauit*: aut, *iudicio Ecclesia standum erit*. Quinto obuentiones Ecclesiasticæ dicuntur Ecclesia, vt cum dicimus. *Viuit ex Ecclesia*, aut *Ecclesia prouidit illi*. Vltimo Ecclesia dicitur, murorum ambitus, seu structura templi materialis. Hinc Oratorium, Basilica, & Ecclesia, interdum sunt æquiuoca, quod in eis missa celebretur, quæ extra locum sacrum, seu benedictum celebrari non potest: vnde altaria portatilia, vsum suum habere ceperunt.

---

## T I T V L V S X V I I I.

*De Construendis, Consecrandis, & Reparandis Ecclesijs, & Altaribus.*

1 **E**cclesiam hoc loco accipimus, non tam Christianorum multitudinem, fideliumque congregationem, quam ipsum templum Dei manufactum, & orationis domum: & dicimus non licere Sacerdotibus, sicut ipsi sunt sacriati, in locis profanis sacrificia offerre, & Sacramenta

menta ministrare , præterquam in locis Deo consecratis . Nisi quis super hoc speciali sit priuilegio munitus : vel summa coegerit necessitas : vt pote , quia combusta sit Ecclesia , quo casu donec illa restauretur , in capellis cum sacrata tabula super altari portatili celebrari poterit .

2 In itinere quoque constitutis , Ecclesia non reperta , sub dio , siue in tentorijs , si tabula altaris portatilis adfuerit , cæteraque sacra vtenfilia , missarum sollemnia celebrari permittendum erit . Alioqui si quis in oratorijs intra priuatas domos constitutis , sine consensu Episcopi hoc facere ausus fuerit , deponendus erit .

3 Construuntur autem Ecclesiæ , vel ob incrementum populi , vel ob commoditatem plebium , vel certæ vniuersitatis intuitu , aut in pastoralis dignitatis priuilegium . Vel construuntur Ecclesiæ aliquando ratione necessitatis , cum nullum templū habeatur in pago aut oppido aliquo , vt eò populus ad sacra audienda conueniat . Aliquando ratione commoditatis , cum vel multitudinem fidelium vnū templum capere non potest , vel fluuius inundans adire illud festo die non permittit ; aut quid simile . Et aliquando ratione pietatis , vel gratiarum actionis pro accepto aliquo beneficio à Deo .

4 Prohibentur autem extrui noua oratoria in præiudicium alicuius Ecclesiæ Parochialis , nisi de licentia Episcopi : in loco verò exempto , nisi de licentia Sedis Apostolicæ , idque propter ius oblationum , & mortuorum debitorum Parochiæ . Nemoque Ecclesiam nouam ædificare debet suo arbitrio aut temere , antequam Episcopus Ciuitatis eo accedat ; sed vt rei tantæ sua dignitas , quantum fieri potest seruetur , certæ solennitates introductæ sunt , quæ præire debeant in Ecclesia facienda . Primum Episcopus Diocesis illius Crucem ibi figens publicè atrium describat , & qui ædificaturus est eam , coram ipso præfiniat , quæ ad luminarium , & custodum sumptus sufficiant ; & demonstrata donatione sic domum ædificet . Qua erecta atrium aqua benedicta aspergatur , postea Deo per consecrationē



ab Episcopo dedicetur cum Missae celebratione .

5 Sicut autem vnus Episcopatus ob incrementum populi , in duos Antistites accedente Papæ voluntate, diuidi potest : sic etiam Episcopus de Baptifinalibus , & Parochialibus Ecclesijs, Rectorum accedente consensu, duas facere potest , si publica vtilitas id flagitet . Veluti , si ita absit Parochia Ecclesia , vt non facile animabus curæ eius creditis , vbi necessitas exegerit, præsto esse possit; ex quo sæpè eueniat plures animas in periculum adduci. Tunc enim Ecclesia construi altera in eadem Parochia poterit , quæ animabus oportunior sit : & ipsi Ecclesiæ veteri ius Rectoris in ea præsentandi vna cum patrono , qui eam fundauerit , competet . Quod cum factum fuerit , illa pars populi, quæ nouis Ecclesijs supponitur , à iure prioris Ecclesiæ absoluetur . Plures tamen baptifinales Ecclesiæ non debent fieri in vna terminatione : & terminationis controuersia dirimenda est iudicio plebium , vel sorte .

6 Nec quidquam Episcopo obstiterit , quod de rebus Ecclesiæ non alienandis iurauerit : nam & tali non obstante iuramento , populo indigenti super basilicarum institutione salubriter prouidere poterit, & etiam inuitis Rectoribus , iuxta Constitutionem Concilij Tridentini debet . Idem procedit in diuisione beneficij pinguis, cuius fructus per Episcopum diuidi possunt , si adsit consensus patroni ius collationis habentis , & illæ Ecclesiæ sint intra eosdem terminos ; vel illi duo beneficiati in vno , eodemque templo. Translatio attamen Cathedralium non potest fieri sine authoritate Apostolica .

7 Episcopo conceditur pro sepultura propria Ecclesiā edificare, aut nouum Monasterium construere in sua Diocesi , quæ tamen indotata consecrari non debet ; veteresq; Ecclesiæ propter nouas lædendæ non sunt . Modicum tamen damnum respectu decimarum ex rationabili causa sustinere possunt ; præsertim si Episcopus quid concesserit cum consensu Capituli de rebus mensæ suæ .

8 Qui præter Episcopi consensum Ecclesiam construit ,  
facit

facit iacturam iuris patronatus. Basilica autem legitimè extructa, non ante sacris est deputanda mysterijs, quàm munus consecrationis acceperit: quod ne qua Diuino cultui afferatur mora, quantò poterit citiùs conficiendum erit. Sicut autem infans à Sacerdote ritè baptizatus non debet iterùm baptizari, ita nec Ecclesia semel Deo dicata, & consecrata, iterum debet consecrari.

9 Quod si de Ecclesiarum, vel Altarium consecratione dubitetur, nec de ea, aut scriptura appareat, aut testis existat aliquis, sine vlla dubitatione erunt à capite consecranda. Sed si Ecclesia, aut ruina desecrata sit, aut ab igne totaliter exusta, aut fusione iniuriosa sanguinis, vel voluntariè seminis, vel excommunicati humatione polluta fuerit; etiamsi semel antea consecrata appareat, nihilominus diligentissimè expurgata, iterato consecranda, vel reconcilianda erit. Idem & de cœmiterio Ecclesiæ intelligendum est. Nam si Ecclesiæ contiguum sit, polluta Ecclesia, & ipsū cœmiterium pollutum erit, ( sanguine nimirum iniuriosè in Ecclesia effuso in cœmiterium decurrente ) nec debebit quis in eo ante reconciliationem sepeliri. Quod contra erit, si ab Ecclesia seiunctim cœmiterium fuerit. Ipso verò cœmiterio polluto, quamuis Ecclesiæ annexo, non tamen Ecclesia polluta erit. Nec si vulneratus extra Ecclesiam, in Ecclesiam fugiens eam sanguine resperferit, Ecclesia non erit reconcilianda. Similiter, nec si homo occidatur in templo illius, aut homicidium accadat in templo ipso casuale à lapsu lapidis, aut trabis defursum.

10 Plane non dicitur Ecclesia polluta per actus, qui fiunt extra corpus ipsius Ecclesiæ in locis adiacentibus, vt sunt, campanile, criptæ subterraneæ ( in quibus non celebratur ) Sacristia, Cœmiterium. Nec per percussione in iuriosā, absque sanguinis effusione polluitur; nec per sanguinem animalium; nec per naturalem effusionem sanguinis è naribus, vel ore; nec per istum furiosi, vel mentecapti: nec denique per inculpata tutelam, quando quis defendendo se in Ecclesia à percussione violenta, alium nolens occiderit;

aut



aut ab alio ipse læsus duas aut tres sanguinis guttas emiserit. Sed bene consecranda erit, quando omnes parietes de nouo extruuntur à fundamentis, non verò tectum templi ipsius.

11 Quod si Altare motum fuerit, & formam primam amiserit, aut lapis superpositus, qui sigillum continet, fractus, aut diminutus fuerit, tunc ob id Ecclesiæ consecratio iteranda non erit; sed ipsum solum Altare denuò, consecrandum.

12 Poterit autem consecratio Ecclesiarum, & Altarium quibuscunque diebus fieri, honestius tamen fieret, si indies festiuis consecrarentur; idque per Episcopos solos, non per simplices Sacerdotes: quia quæ Ordinis Episcopalis sunt, inferioris gradus Clericis committi non possunt; licet ea quæ iurisdictionis sunt facile committantur. Sed animaduertendum est, quod Ecclesia in qua infidelium corpora sepulta sunt, consecrari non poterit, nisi euulsis inde corporibus, & rasis, seu dealbatis parietibus, & tignis: quia quibus viuentibus Ecclesia non communicat, mortuis quoque communicare non potest.

13 Solemnitates quoque dedicationum ipsarum Ecclesiarum per singulos annos erunt celebrandæ, ipso Domino exemplum dante, qui dum ad festum dedicationis templi celebrandum cum reliquis populis accessit, omnibus idem faciendum suo exemplo ostendit. Hinc regula Canonum orta est; *quod res semel Deo dicatæ, non sunt ad usus humanos amplius transferendæ.*

14 Si verò contingit aliquando Ecclesias instauratione aliqua egere, puta, vt tecta, aut parietes ruinam minantes sarciantur, vel fulciantur, aut iam lapsi restituantur, subire hoc onus debet ipsius Ecclesiæ Rector, si quarta huius prouentus vsui huic à sacris Canonibus assignata non sufficiat. Ad quod onus minores etiam beneficiati in ipsa Ecclesia obligantur, respectu quartæ partis suorum reddituum. Siquidem bona Ecclesiasticis triplici de causa à fidelibus videntur concessa, videlicet ob Ecclesiam restau-

randam

randam, Clericos alendos, & pauperes sustentandos. Nisi aliqua dispositio specialis aliter ordinaret; prout multis in locis videmus Ecclesias habere proventus distinctos pro fabrica. Sed & Episcopus tertiam partem sibi obtingentem impendere debet; & parochiani in subsidium ob inopiam Rectoris, pro posse suo contribuere (ex quo ibi percipiunt Diuina) tenentur, vt monet sancta Synodus Tridentina.

## TITVLVS XIX.

### *De Vnionibus Ecclesiarum.*

1 **V**nio nihil aliud est, quam duarum pluriumue Ecclesiarum facta connexio. Dicta ab vniendo, ex eo, quod plures Ecclesie in vnum coniunguntur. Vbi beneficium minus principale extinguitur, & denominatur à principaliori, cui annectitur per legitimum superiorem, vt si Ecclesia secularis Canonicerum vniatur Ecclesie regulari Monachorum, iam assumit naturam, & qualitatem beneficii cui vnitur, & efficitur Ecclesia regularis eiusdem Ordinis.

2 *Fit autem tribus modis vnio.* Primo, quando ex duobus beneficiis vnum fit, vt supra diximus. Secundo, quando vnum beneficium, seu Ecclesia inferior subiicitur superiori. Tertio, quando duæ Ecclesie, vel duo beneficia, æquè principalia vniuntur sub vna persona, seu Rectore, habentes proprios redditus suos, & honorem, & priuilegia in integro. Tunc talis vnio, aut perpetua est, aut temporalis. *Perpetua est*, dum sine præfinitione temporis perdurat. *Temporalis vero*, cum ad certum tempus tantum, aut alicuius vitam instituitur. Et si administrator horum beneficiorum, poterit residere, vbi maluerit; vel vbi commodius, atque vtilius illi videbitur.

3 Vnio ad tempus fit tribus modis. *Primo*, ad tempus designatum, vt ad triennium. *Secundo*, ad vitam alicuius



180  
tertiæ personæ. *Tertio*, ad beneplacitum Prælati viuentis. Vnio verò perpetua fit duobus modis. *Primo*, nominatim in perpetuum, & æuum. *Secundo*, ad beneplacitum Sedis Apostolicæ; nam tale beneficium facit concessionem perpetuam.

4 Velut ergo ex causa iusta, & rationabili, vna Ecclesia, vel Episcopatus in plures diuidi permittitur, sicutiam rebus suadentibus plures Ecclesiæ in vnam coniungi possunt, necessitatis, & vtilitatis animarum causa. Veluti cum duæ Ecclesiæ adeò sunt pauperes, vt impossibile sit earum prouentus ad victum duorum Sacerdotum sufficere. Vel si altera hostium immanitate desolata sit. Atque ita nominatim in scripturas publicas causis relatis, ne quid detrimenti diuini cultus, & animarum cura patiatur, possunt plura beneficia, vel Ecclesiæ in vnum coniungi.

5 Sicut igitur vnire Episcopatus pertinet ad Pontificem Romanum, sic minores Ecclesias ad Episcopum, cui subsunt. Vnde Abbas Monasterium Monastero subicere, aut vnire, sine loci Ordinarij licentia non poterit, quamuis habuerit consensum, vel confirmationem Metropolitani, cum is in Diocesi sui Suffraganei absque ipsius assensu non debeat aliquid contra Constitutiones canonicas attentare.

6 Vtique adeo autem Episcopo in propria Diocesi facultas vniendi competit, vt si per eundem, consentiente capitulo, Ecclesia Ecclesiæ dignitati, vel præbendæ vniatur, aut religioso loco donetur; ex eo quod Rector ipsius ad hoc vocatus, vel si vacabat, defensor rei super hoc datus non extitit, nequaquam impugari valeat. Nam cum nullum ei præiudicium inferatur, quin possit eam Ecclesiam dum viuit (vt antea solebat) regere & gubernare, nec quidem vocari eum oportet, cum unio fit, nedum consensum suum præstare tenetur. Nihil tamen sibi Capitulum Sede vacante vnire poterit; nihil Episcopus sibi, & Capitulo, sine consensu Papæ, nullamque unionem sine Capituli sui consensu facere potest; nec sine consensu inferioris, ad quæ eius Ecclesiæ conferendæ, quæ vnitur, ius spectat.

7 Nec solum Capituli vnientis Episcopi, in vnione, consensus exigitur, sed etiam illorum, qui ex vnione lœdi possent. Vnde si aut collegiata, aut patronata, aut alicuius Suffraganei Ecclesia sit vnienda, Collegij, Patroni, & Suffraganei assensum interuenire oportebit. Alias vnio erit nulla, & inualida,

8 Secuta verò vnio canonica, statim is, cuius Ecclesia alia per vnionē est applicata, eandē in vnitam nanciscitur potestatem, & ius, quod in eā olim habebat, cui ab initio præsuit: statimq; vnica Ecclesiæ eadē priuilegia cōpetunt, quæ principali Ecclesiæ competere comperiuntur. Duæ tamen Ecclesiæ vnitæ per Sedem Apostolicam, per hoc non eximuntur à iurisdictione suorum Episcoporum, in quorum potestate antea fuerunt, sed singulis Episcopis Papa iura sua inuiolata seruare præsumitur, qui duas Ecclesias in diuersis Dioccesibus existentes vnit authoritate sua. Statuit tamen sacrosancta Synodus Tridentina sub Iulio III. ( ne ordo Ecclesiasticus confundatur, & ne vna & eadem Ecclesia duarum quodammodo Diocesium fiat, non sine graui illorum incommodo, quæ ei subditi fuerint.) ne beneficia vnus Diocesis, etiam si Parrochiales Ecclesiæ, Vicariæ perpetuæ, aut simplicia beneficia, seu præstimonialia, aut præstimonialia portiones fuerint, etiam ratione augendi cultum Diuinum, aut numerum beneficiatorum, alia quacumque de causâ, alterius Diocesis beneficio, aut Monasterio, seu Collegio, vel loco etiam pio perpetuò vniantur.

9 Dissoluetur autem vnio, si temporalis sit, temporis lapsu. Quod si sit perpetua, cessantibus eisdem causis, ex quibus facta fuerat, ab ipsa idem dissolui poterit, quorum consensu, & auctoritate olim fuerit instituta. Nihil enim est tam rationi consonum, quàm vt is destruendi habeat potestatem, cui construendi facultas conceditur.

10 Illud tamen inter instituendam, & dissoluendam vnionem interest, quod licet etiam vacans Ecclesia alter



possit vniri, si tamen Ecclesias per vnionem connexas vacare contigerit, vnio interrim vacantium Ecclesiarum dissolui minime poterit.

## T I T V L V S X X.

### *De Immunitatibus Ecclesiarum.*

1 **P**ostquam de Ecclesiarum substantia pertractauimus, consequense est, vt de pertinentibus ad eas, partim ex priuilegio, partim de iure cōmuni, breuiter agamus. Cum autem ipsas contingat in pluribus priuilegiari, & immunes reddi, meritò igitur videndum erit de ipsa immunitate prius, quid sit, vnde dicatur; quoruplex sit, & qualiter differat à libertate Ecclesiastica.

2 *Immunitas itaque est*, indulta à muneribus, & oneribus exemptio. *Diciturque immunitas* quasi emunitas, id est, extra munia & munera. Vt enim Clerici ab omni grauamine, & tributo immunes, vni Deo omnem operam suam colendo nauare possint, aduertunt Canonice leges, ne vlla eis onera per laicos imponi patiantur, sed plena personarum, & rerum suarum immunitate perfrui debeant. Ideoque ex Concilio Lateranen. sancitum est, ne seculares potestates vllum onus, vel tributum Clericis, aut Ecclesijs imponant; quod si non seruarint, & moniti non destiterint, ipsos, eorumque fautores à Christianorum communitate idem Concilium eos exterminat; nec prius restitui eos permittit, quàm Clericis eo modo læsis integrè satisfecerint.

3 Hinc triplex Ecclesiarum immunitas statuitur, Localis, Personalis, & Realis. *Localis immunitas est*, quæ sacris ipsis domibus, aut aliquibus sacrarum ædium intuitu conceditur. Cum enim Ecclesia secundum Evangelicam veritatem domus esse debeat orationis, meritò à profanis vsibus esse conuenit alienam.

4 Seculares igitur Iudices, causas, præcipuè vbi de  
san-

sanguinis agitur effusione, & de poëna corporali tractatur, in Ecclesijs, vel earũ cēmeterijs, atq; domibus Ecclesiasticis agere, subanathematis interminatione prohibentur. Abfur- dum est enim ibi iudicium sanguinis exerceri, aut ho- spitia sibi in eis quærere, vbi est tutela constituta refugij. Sic etiam conclamationes, seditiones, impetus, & tumultus, publica parlamenta, seu comitia, & conuenticula, communitatum, nundinationes, negociationes, confabulationes, consilia, litigantium concordia, & colloquia, ab his penitus amoueri debent.

5 Similiter conuiuia, hospitia, deambulationes, dormitationes, nec in Templis ipsis, nec in Oratorijs, seu Capellis permitti debent: ne vbi peccatorum est venia postu- landa, ibi peccandi detur occasio. Idem statuitur & de Ecclesia nondum consecrata, in qua Diuina iam mysteria celebrantur: quia cum obsequijs diuinis sit dedicata, nul- lius temerarijs ausibus est profananda.

6 Tandem ne violentia aliqua comittatur, & extra- hantur delinquentes, qui ad ipsam Ecclesiam confugiunt. Quicumque autem inde hominem reluctantem, reclaman- temque violenter abstraxerit, tam alijs pēnis profacrile- gio quod admisit, quàm Ecclesiasticæ subiacebit excom- municationi. Si quis tamen delicti impunitatem ita se cō- secuturum sperans, homicidium, vel membri mutilatio- nem in Ecclesia ipsa, vel eius cēmeterio patrare ausus fue- rit, quæ, nisi ab Ecclesia in quam confugit, defensum se- iri sperasset, non fuerat commissurus, tam impio homini Ecclesia nulli adiumento, vel præsidio esse debet. Fru- stra enim legis auxilium implorat, qui eam violat.

7 Item liber homo ad Ecclesiam confugiens, non est ab atrijs etiam ipsius ad mortem, aliamue pēnam corpo- ream trahendus, quodcumque crimen patrarit: nec à do- mo Episcopi, nec ab Ecclesiæ circuitu intra triginta passus ab ostio (quid de cōmeterio?) quod spaciū Ecclesiæ re- nuerentia defendi sacri Canones voluerunt: Nisi impetrata vita per Ecclesiarum Rectores, & membrorum incolumi-  
tate.



tate. Sed alijs poenis de eo quod iniquè egerint puniendi erunt.

8 Hoc autem de publicis latronibus, vel nocturnis agrorum populatoribus, viarumque obfessoribus intelligi non oportet. Hi enim secundum Canonicas sanctiones ab Ecclesijs extrahi possunt, immunitatis securitate non præstita. Quod si seruus sit, qui ad Ecclesiam confugerit, postquam de impunitate Dominus Clericis iuramentum præstiterit, ad seruitium Domini sui redire compelleretur. Alioqui, si redire nolit, à Domino occupari poterit. Famuli enim, qui Dominos metuunt, si ad Ecclesiæ septa confugerint, intercessionem debent quærere, non latebras: nec quenquam Religionis reuerentia proprio iure fraudari conuenit.

9 *Personalis immunitas est*, quæ personis ecclesiasticis indulgetur, vt non solum à sæcularibus Iudicibus sint exemptæ, sed ab omnibus prorsus muneribus, quæ vel corporis labore, vel animi sollicitudine, ac vigilantia sustinentur. Generaliter igitur Episcopi, Presbyteri, Diaconi, Subdiaconi, Monachi, immunitate omnis tutelæ, & curæ, ipso iura gaudebunt.

10 Viduarum autem, & Orphanorum curam suscipere, non solum non prohibentur Clerici, sed etiam iubentur, cum ipsis cupiditatis negotia, non pietatis interdicanter. Ad murorum quoque, aut vallorum custodiam, si magna immineat necessitas, Clerici tenentur, vt cunctis vigilantibus, melius valeat ab hoste Ciuitas custodiri.

11 *Realis immunitas est*, per quam res Ecclesiasticæ à censu, gabellis, portorijs, & collectis potestatum sæcularium liberæ redduntur. Siquidem tam profanis legibus, quam sacris Canonibus, sub excommunicationis, & interdicti poena constitutum est, ne quis eorum qui iurisdictionem temporalem obtinent, possit tributa, collectas, seu quasunque exactiones, sub quouis titulo, & colore imponere Ecclesijs, vel personis ecclesiasticis, pro domibus,  
præ-

prædijs, vel quibuscumque possessionibus legitimè acq-  
 uisit; etiam si ipsæ Ecclesiæ, vel personæ, vel res sint intra  
 illorum territorium constitutæ.

12 Ob magnam tamen necessitatem Reipub. vel uti-  
 litatem, laicorum non suppetentibus facultatibus, possunt  
 Clerici cum Episcopo suo subuenire facultatibus suis, con-  
 sulto prius Romano Pontifice. Quod si Clerici absque  
 auctoritate Sedis Apostolicæ, cuiusvis nominis vel gene-  
 ris tributum laicis soluerint aut promiserint, sententiam  
 excommunicationis incurrant.

13 Et hinc patet differentia inter Immunitatem & li-  
 bertatem Ecclesiasticam, quia *Libertas est* exemptio perso-  
 næ Ecclesiasticæ ab omni potestate sæculari, & oneribus  
 Reipub. ut secundum liberum arbitrium suum, utatur ijs  
 quæ possidet bonis Ecclesiasticis. *Immunitas* verò versatur  
 circa exemptionem locorum sacrorum. Vnde si quis iniu-  
 riam loco sacro facit, non est reus violatæ libertatis, sed  
 tantum immunitatis; nec incidit in censuras, contra vio-  
 lantes Ecclesiasticam libertatem promulgatas. Sicut è con-  
 tra, cum quis iniuriatur personam Ecclesiasticam euntem  
 Romam, vel à Pontifice missam in legatione ad aliquem  
 Principem, iam non immunitatem, sed libertatem Eccle-  
 siasticam violat.

14 Quemadmodum igitur sacrosanctis Ecclesijs sæcu-  
 larium potestatum intuitu, omnimoda debetur immuni-  
 tas, tam locorum ratione, quàm personarum & rerum;  
 sic eisdem rationibus ab illis, & vniuerso Diocesis Clero,  
 proprio Episcopo omnimoda subiectio debetur, tam re-  
 spectu munerum Ordinis illius, quàm respectu iurisdictio-  
 nis, & dignitatis Episcopalis, seu legis Diocesanae. Qua  
 de re diuersis titulis, quantum necessarium esse duximus,  
 tractatum est à nobis.



## TITVLVS XXI.

*De Capellis Monachorum.*

1 **C**um omnes Ecclesiæ positæ in Diœcesi de iure subsint Episcopo ( nisi aliquæ ex speciali priuilegio sint exemptæ ) necesse est, vt & Monachorum Capellæ, in quibus populi curam habent, eidem subiiciantur. Cumque per Monachum plebs regi non debeat, Capellanus ad consilium Monachorum (quod tenetur quidem requirere, sed non sequi) ab Episcopo sit instituendus, ita vt consuetudine, aut quouis statuto contrario non obstante, ex solius Episcopi arbitrio, tam ordinatio eius, quàm depositio, & vitæ pendeat conuersatio.

2 Vnde, per Bullam Innocentij X. anno 1648. editam, etiam Societatis Iesu Regulares, in vna Diœcesi ab Episcopo approbati, ad confessiones personarum sæcularium audiendas, nequaquam possunt in alia Diœcesi administrare Sacramentum Poenitentiae secularibus, absque licentia Episcopi Diœcesani. Qui verò eiusmodi confessiones sæcularium præsumerent excipere, aut prædicare, etiam in Ecclesijs sui Ordinis, non petita illius benedictione, possunt in vim Constitutionis felicis recordationis Gregorij XV. per Episcopum coerceri, & puniri. Maximè si aliquis prædictorum Religiosorum insurgat contra Episcopum maledictis cum scripto, vel dicto populum scandalizando.

3 Quamuis enim punitionem seu cognitionem delictorum Regularium exemptorum, non ad Episcopum, sed ad eorum superiorem spectare sciamus; dicimus tamen cum Concilio Tridentino, Episcopum posse declarare excommunicatos à iure, vel Apostolicis Constitutionibus Regulares exemptos, qui habent priuilegium, vt excommunicari, suspendi, & interdicti non possint. Præsertim si Regulares à suo superiori infra tempus ab Episcopo præfixum, non fuerit seuerè punitus, & de punitione illius

193

illius ipse Episcopus certificatus. Tum ad præscriptum  
Concil. Trid. cap. 14. sess. 25. procedendum erit. Et si de-  
linguens ad aliam Diocesim migrauerit, seruandus erit  
modus, in Constitut. sanctæ memoriæ Clementis VIII.  
incipien. *Suscepti muneris ratio*, præfinitus.

4. Nec id mirum videri debet, cum Monasteria ipsa,  
& Collegia omnia Religiosorum, ad eum iure comuni  
pertineant Episcopum, in cuius sunt territorio constituta.  
Hinc factum est, vt cum lib. Indijs, Occidentalibus Clerici  
Regulæ Societatis Iesu, vi priuilegiorum Societati suæ  
Apostolica auctoritate concessorum, proprio iure licere  
sibi laicorum confessiones excipere, & Verbum Dei præ-  
dicare, absque vllâ licentia Episcopi Diocesani, & exani-  
ne prætenderent, (propter quod diuersis in prouincijs ad  
plures actus iudiciales deueniebat) Innocentius X. felici-  
ter præsidens Cathedræ Petri, negotio hoc particulari  
Congregationi Eminentiss. Cardinalium, & Prælatorum  
Curia commisso, & accurate discussio, per Bullam Anno  
1648. die 14. Maij. editam, declarauit, & determi-  
nauit. *Regulares Societatis Iesu nequaquam posse in ciuitate, & Dio-  
cesi Angelopolitana, cuius Episcopum contumuebant, personarum  
secularium confessiones audire, sine approbatione prædicti Episcopi  
Diocesani; nec Verbum Dei prædicare in Ecclesijs sui Ordinis,  
non petita ipsius benedictione. Nec in alijs Ecclesijs sine eius li-  
centia; nec in Ecclesijs etiam sui Ordinis, ipso contradicente. Et  
contrauenientes ab Episcopo tanquam Sedis Apostolicæ Delegata  
coerceri, & puniri posse, etiam censuris ecclesiasticis in vim  
Constitutionis sancti mem. Gregi XV. quæ incipit. Insuperabilis  
Dei prouidentia. Nec ob eam causam licere dictis Religiosis So-  
cietatis Iesu, quasi à manifestis iniurijs, & violentijs, eligere  
sibi Conseruatores, eosque vt præfertur electos in Episcopum, eius-  
que Vicarium Generalem indebitè ac nulliter excommunicationis  
fulminare.*

5. Constitutio autem felic. recor. Greg. XV. circa Con-  
seruatores Regularium publicata Anno 1621 cum decla-  
rationibus Eminentissimorum Sacræ Congregationis Cō-



cilij Trid. Interpretum editis, eque afficere Religiosos Societatis Iesu debet, atque aliorum Ordinum Monachos, ex vi eiusdem Bullæ Innocentij X. & Urbani VIII. antecessoris sui publicatę 1634.

6 Si vero exemptus Regularis commoretur extra claustrum de licentia sui Superioris, & delinquat, debet puniri ab Ordinario, quamuis maneat in domo destinata ad erectionem Monasterij, si in dicta domo non est obseruantia regularis, & Superior. Alias debet remitti suo Superiori, cum præfixione termini ad puniendum. Priuilegia verò quę sunt contra iurisdictionem Ordinarij, & quibus gaudent, & gaudere prætendunt Regulares, tam Societatis Iesu, quàm alij, iuxta eandem Bullam Innocentij X. debent Episcopis exhibere, si eis vti voluerint.

7 Regulares exercentes curam animarum personarum secularium extra eorum septa, quę sunt de eorum familia, subduntur Ordinarijs, & ab illis compelli possunt censuris vigore Concil. Trid. vt eant ad processiones publicas, non obstantibus priuilegijs. Pro quo facit etiam Bulla Pij Quarti, per quam abrogantur omnia priuilegia contraria Concilio Tridentino.

8 Regulares Societatis Iesu, grauati arte alieno, vel ad ratiocinia, vel testamentorum executores, coram Ordinario loci possunt conueniri, si ad præscriptum Constitutionis sanctę mem. Greg. XV. Conseruatores non elegerint, ipsumque electionis documentum intra præfixitum tempus, in Actis Curię ipsius Ordinarij non exhibuerint, ac dimiserint. Omnesque alij exempti degentes extra claustra, ciuilibus causis mercedum, & miserabilium personarum conueniuntur coram Ordinario, etiam si in partibus habeant iudicem deputatum à Sede Apostolica. In alijs verò si ipsum iudicem non habuerint, coram Ordinario conueniri possunt, & compelli ad soluendum.

9 Episcopus de ordinatione Sacros. Concilij Trid. debet punire Regulares discedentes à suis. Conuentibus sine licentia suorum Superiorum, etiam prætextu ad Superiores.

res actedendi . Item qui inueniuntur in domibus meretricum ; vel alias notoriè delinquant cum populi scandalo , carcerandi sunt per cursores Curiae , & non remittendi ad suos superiores , antequam capiatur informatio delicti : & postea remitti debent ad suos superiores cum copia Actorum , præfixo termino superioribus ad docendum de punitione , infra viginti dies , sub poena priuationis dignitatum , & officiorum eo ipso incurrenda ( iuxta Bullam Clementis VIII. ) & inhabilitatis ad illa , & priuationis vocis actiue , & passiuæ , à qua nemo possit absoluerè , nisi Papa . Debet autem Episcopus talem religiosum in crimine notorio captum , quamcitus potest remittere suo superiori cum informatione : & nisi velit remittere petentem , & vexaret cum carceribus , non euitaret excommunicationem ipse .

10 Monachi , qui ab exempto Monasterio ad Prioratus Ordinarijs subiectos transferuntur , quamdiu ibi morantur Ordinarijs subiacent , vt ab eis etiam interdici , suspendi , vel excommunicari possint , quamuis priuilegium hoc Monachi prioris Monasterij haberent , ne à quocunque interdici , suspendi , vel excommunicari possint , idq; priuilegium in eo monasterio exempto seruandum esset in his , quæ in ipso priuilegij diplomate expressa sunt , vt hæc omnia Innocent. IV. in Generali Concil. Lugdunen. definiuit . Et Paulus III. in Synodo Trident. innouauit .

## TITVLVS XXII.

### *De Religiosis Domibus .*

1 **P**ost descriptionem Ecclesiarum , sequitur agendū de Religiosis domibus : & quia omnes Ecclesiæ , & Oratoria seu Capellæ , quæ in Diocesi reperiuntur , & omnis earum Clerus , subiacent Episcopo , ita domus religiosæ , quæ vniuntur Ecclesijs , eidem subiacere tenentur , vt sunt Xenochia , ubi peregrini excipiuntur , Or-



phanotrophia; ubi parentibus priuati instruuntur. Bethotrophia, ubi pauperum hominum filij legitimis aluntur. Nosocomia, ubi agroti curantur. Gerontocomia, ubi senes, fouentur, aliaq; similia loca.

2. Quinimodò, si talium locorum Rectores exempti sint, si tamen illorum cura postposita, bona, & iura ipsorum, ab usurpatorum manibus vindicare negligant, aut quoquomodo res illorum collabi sinant, poterunt Ordinarij auctoritate Apostolica sibi ex Viennensi Concilio prestita, loca ipsa salubriter reformare; & occupata, alienata, deperdita; vt in statum pristinum redigantur procurare. Contradictoresque quoscumque per censuram ecclesiasticam, & alijs iuris remedijs compescere, licet multum per hoc exemptionibus seu priuilegijs, quoad alia præiudicium generari debeat.

3. Cum igitur Hospitale dicatur, venerabilis & pius locus sicut Ecclesia, & sub sit Episcopo, ad eiusque sollicitudinem pertineat, consequens est, vt gaudeat priuilegio sicut & Ecclesia, maxime quoad prescriptionem, exemptionem à tributis, & iurisdictione seculari, (dummodo sit fundatum auctoritate Episcopi,) & alienationem bonorum: quia eadem solemnitas requiritur in alienatione rerum Hospitalis sic fundati, quæ requiritur in alienatione rerum Ecclesia.

4. Hospitalia verò à Regibus fundata, & in eorum immediata protectione constituta, non subiacent visitationi Ordinarij, sed subiacent illius iudicio; & inspectioni: licitumque ei exigere rationem administrationis, donec coram eodem Ordinario doctum fuerit de institutione, in qua secus expresse cautum sit. Alia verò laicorum, & priuatorum nobilium loca pia, vel Hospitalia ab illis fundata, sine ulla distinctione subiacent iurisdictioni, & visitationi Episcopi; præsertim cum fundator fuerit mortuus, (secus illo viuente) quia tunc temporis Episcopus est executor omnium piarum dispositionum. Præterea cum sint ordinata in honorem Dei, ob charitatem quæ in

eis exercetur, prout non poterant constitui sine auctoritate Episcopi, ita non possunt ad alium finem applicari sine scitu illius; sic etiam non possunt à Rectoribus laicis gubernari, vt non subiaceant iurisdictioni ipsius, vt vult Sacrosancta Synodus Tridentina.

5 Res deputatæ ad certum vsum pium, sacrum, aut religiosum, non possunt transferri ad alium vsum eiusdem qualitatis, & naturæ, sine licentia Sedis Apostolicæ, & multo magis ad vsum profanum; Episcopi verò in hac materia sunt tanquam Sedis Apostolicæ delegati.

6 Xenodochia, & loca similia, quamuis habeant Ecclesiam, & campanile, ibique perpetuò Missæ celebrentur non possunt in beneficium conferri, etiamsi consuetudine id fuerit alias obseruatum, quia appellatione beneficij Hospitale non comprehenditur. Nisi in illorum fundatione aliter constitutum fuerit; siue per electionem sit de Rectore huiusmodi locis prouidendum. Sed quod eorum gubernatio viris prouidis, ac boni testimonij committatur, quos bona prædicta in alios vsus conuertere, præsumptio verisimilis non existat.

7 Vt autem hi demandatæ sibi curæ diligentius insistant, instar tutorum, & curatorum, debent iuramentum præstare, ac de bonis inuentaria conficere, & Ordinarijs, seu alijs, quibus loca huiusmodi subsunt, vel deputandis ab eis, singulis annis de administratione sua rationem reddere: qui enim bona aliena administrat tenetur semper reddere rationem, maximè sæculares, si suspecti essent propter uxorem, & filios. Quod si secus à quoquam fuerit attentatum, prouisio seu ordinatio minimè valebit.

8 Prædicta verò, ad Hospitalia militarium Ordinum, vel aliorum Religiosorum minimè extenduntur. Hi enim suorum Ordinum institutiones, & consuetudines obseruare cogendi erunt.

9 Sed et si qua sint Hospitalia, altaria, & cœmeterium ab antiquo habentia, & presbyteros celebrantes, & Sacramenta Ecclesiastica pauperibus ministrantes, quoad



exercenda, & ministranda spiritualia prædicta, antiquam consuetudinem Viennense Concilium obseruari voluit.

10 Prædia verò rustica, à Regularibus Societatis Iesu, vel alijs possessa, & aliæ domus sæculares, in quibus videlicet vnus, vel duo Regulares tantum commorantur, iuxta Bullam Innocentij X. non gaudent priuilegio Collegiorum, vel Conuentuum, nec in illis possunt (intra limites Parochialium ad se non spectantium) administrare Sacramenta baptismatis, solemnibus matrimonij, extremæ vñctionis, & Eucharistiæ in festo Paschatis, famulis, mercenarijs, rusticis, siue alijs id genus hominibus secularibus, absque Ordinarij, vel Parochi licentia.

## T I T V L V S X X I I I.

### *De Sepulturis Christianorum.*

1 **Q**uia sepulturæ Christianorum fiunt in locis religiosis, & faciunt etiam locum religiosum, ideo ius Ciuile mandauit, vt homines pietatē retinerent erga morientes, & veluti res sacræ custodirentur sepulchra, vocans loca prædicta religiosa. Vnde Prætoris Edicto datur actio in factum aduersus violentes sepulchra dolo malo: & puniuntur honestiores quidem centum aureis, si ea aperuerint; si verò corpora inde extraxerint, deportatione in insulam; humiliores verò summo supplicio.

2 Constituuntur autem sepulturæ fidelium in Ecclesijs, & locis religiosis, ne à spiritibus ibi vexentur immundis, & Sanctorum illorum commendentur patrocinio, quorum nomini Ecclesia illa, in qua corpora conuiescunt, est consecrata. Accedit, quod defunctorum proximi, ad sacra loca venientes, sepulturamque conspicientes, suorum recordantur, & pro eis pias preces fundunt: seque aliquando morituros, & ibidem sepeliendos recordantur, & à vitij comprimunt. Vnde mortuorum sepulturæ, & cœmete-

nia apud illas Ecclesias, & Monasteria, ex antiquo disposita esse comperiuntur, in quibus Religiosorum conuentus sunt constituti, vbi orationes, & Missarum solemnias, tam pro viuis, quàm pro defunctis frequentius celebrantur.

3 Ius itaque sepeliendi, & funerandi est annexum spiritualitati, & per consequens per Iudicem ecclesiasticum cognosci debet quoad consecrationem, & apparatus Ecclesie. Secus verò quoad expensas vestium lugubrium, quæ non respiciunt animam defuncti, sed consolationem viuientium, nam ista possunt à laicis regulari.

4 Vnusquisque habet liberam facultatem sepulturam eligendi. Et si quis non eligat, in parochiali ecclesia, aut maiorum sepulchris est sepeliendus. Et vxor non tenetur sequi sepulturam viri, si velit aliam eligere; si verò non eligat, tenetur sequi sepulturam vltimi viri; si plures habuerit. Sic & filius familias, licet non possit aliquid relinquere pro anima sua, si careat castrensi, vel quasi castrensi peculio, tamen potest sibi eligere sepulturam. Nisi sit impubes, poterit pater sepelire illum vbi voluerit: si non est consuetudo in contrarium.

5 Qui semel sibi sepulturam elegit, potest etiam reuocare vsque ad mortem: hæc enim electio sapit naturam vltimæ voluntatis, vt sit ambulatoria vsque ad mortem. Sed Episcopus si non eligit sibi sepulturam, debet sepeliri in Ecclesia sua Cathedrali, expensis eiusdem Ecclesie, vel Episcopatus. Sic etiam Confratres alicuius Congregationis, non eligentes sibi sepulturam secundum illorum deuotionem, sepeliendi sunt in propria Parochia.

6 Ita etiam peregrini, seu aduenæ, si commodè non possint transportari ad sepulturam maiorum suorum, sepeliendi sunt in Parochia, in qua moriuntur. Regularis verò peregrinus sepeliatur in Monasterio viciniore Ordinis sui, quatenus fieri potest.

7 In proprio Monasterio Religiosi morientes, cum propriæ voluntatis libertatem non habeant, eligere sibi sepulturam nequeunt, sed apud propria Monasteria tumulan-



mulandi sunt. Nisi adeò fortè sint remoti, quod ad eam moriuntur, commodè exportari nequeant.

8 Si quem contingat ruri inopinatè mori, talis si sine periculo possit exportari, vel in parochiali ecclesia (non in ecclesia ruri posita) vel in maiorum sepultura debet sepeliri. Si verò eligit sibi locum sepulturæ, satis est, vt probetur quoquo modo Iudici ecclesiastico, vel per testamētum, vel per dictum Confessoris, cui in hoc credendum est, vel per testes singulares. Vniuersitas tamen non potest eligere pro suis ciuibus sepulturam in odium parochialis ecclesiæ, in qua de iure ciues sepeliri debent.

9 Cautum autem est Bonifaciana Constitutione, ne qui Religiosi, aut seculares Clerici, aliquos inducant ad vouendum, iurandum, vel aliàs promittendum, vt apud eorum Ecclesias sepulturam sibi eligant; vel iam electam vterius non immutent. Nam eiusmodi pactis, & promissionibus reiectis, eius Ecclesiæ sepultura accipienda erit omninò, cui sepeliendi ius competeat, si aliàs non electa sepultura ille decessisset. Et Clerici, aut Religiosi, qui huiusmodi pactorum, vel promissionum vi, quem ad sepulturam acceperint, non solum cadauer sepultum petentibus, sed omnia eius occasione accepta intra decendium restitueretenebuntur. Qua restitutione non facta, Ecclesiæ in quibus sepelierint, eorumque cœmiteria ex tunc manebunt tamdiu ecclesiastico supposita interdicto, quamdiu ab eis facta fuerit omnium plena restitutio.

10 At si quis antiqua dimissa, nouam etiam in loco minus religioso elegerit sepulturam, electio huiusmodi non est impugnanda.

11 Decreuit autem Sacrosancta Synodus Tridentina, vt quibuscumque in locis iam ante annos quadraginta, quarta quæ funeralium dicitur, Cathedrali, aut Parochiali Ecclesiæ solita esset persolui, ac postea fuerit, ex quocumque priuilegio, alijs Monasterijs, Hospitalibus, aut quibuscumque locis pijs concessa, eadem post hac integro iure, & eadem portione, quæ antea solebat, Cathedrali, seu

ſeu parochiali eccleſiæ perſoluatur , non obſtantibus conceſſionibus, gratijs , priuilegijs, etiam *Mari magno* nuncupatis , aut alijs quibuſcumque .

12 Sed vbi quis , cuius maiores ſunt ſoliti ab antiquo in aliqua Eccleſia ſepeliri, ea diſmiſſa eligit alibi ſepulturā; canonica portio diſmiſſæ, non debetur Eccleſiæ, ſed ei duntaxat, in qua is officia conſueuit audire diuina, & eccleſiaſtica recipere Sacramenta . Si quis tamen duo habens domicilia, & æqualiter ſe collocans in vtroque, in loco tertio delegerit ſepulturam, domiciliorum amborum Eccleſiæ inter ſe diuident canonicam portionem.

13 Non omittendum eſt , quod etiam Religioſi Ordinis Minorum, & Prædicatorum, poſſunt libere ſepulturā in locis ſuis dare his, qui eam elegerint, dummodò funeralium omnium, & quarumcunque obuentionum ſibi relictarum, iuxta Concilij Tridentini ſanctionem, quartam partem, ac omnium præterea, de quibus alioqui portio canonica detrahenda non erat, eccleſiæ parochæ ſoluant .

14 Ad hæc quoque ſciendum eſt, eos qui propriæ temeritatis audacia defunctorum corpora in cœmeterijs Interdicti tempore, in caſibus non conceſſis à iure; vel excommunicatos publicè; aut nonminatim interdictos; vel uſurarios manifeſtos ſcienter ſepelire præſumunt, ipſo facto excommunicationis ſententiæ ſubiacere, à qua nullatenus abſoluendi ſunt, niſi prius ad arbitrium Dioceſani Epifcopi, eis quibus fuerit ex præmiſſis iniuria irrogata, competenter ſatiſfecerint: nullo priuilegio exemptionis, vel quouis alio ſub quacumque forma verborum conceſſo ſuffragante.

15 Et quamuis ſepultura aliquem dare, humanum, piūque ſit, non concedere impium; exiſtunt tamen aliquæ perſonæ, quibus piū videtur ſepulchrum defunctis denegare, & concedere impium; quas pro parte hic enumerabimus, ſi tamen præmiſſimus, nulli ſepulchrum defuncto eſſe denegandum, cui Eccleſia viuenti communicare aſpernata non ſit: At Chriſtianos omnes ex regula in



202  
vniuersum ad sepulchrū esse admittendos; quibus verò nō communicamus viuis, nec defunctis cōmunicare debemus.

16 *Deneganda est igitur sepultura Ecclesiastica*, Iudæis, Paganis, Hæreticis. Itemque excommunicatis, interdīctis, vsuras exercentibus, & ijs qui sibi met ipsi mortem conscīuerunt, aut qui personis ecclesiasticis violentas manus iniecerunt. Insuper nec homicidæ, nec incendiarij, aut Ecclesiarum violatores, nec incestuosi, nec blasphemī, nec vllus qui pro manifestis condemnatus est excessibus, ecclesiasticæ sepulturæ tradi poterit.

17 Et si contigerit aliquando horum corpora in cœmeterio ecclesiastico tumulari, si ab aliorum corporibus discerni poterunt, exhumari debent, & ab ecclesiastica sepultura procul iactari. Quod si discerni non poterunt, cum excommunicatorū ossibus corpora fidelū extumulāda non erunt. Cum, licet non obsit iustis sepultura nulla, vel vilis; celebris tamen, vel speciosa non profit improbis.

18 Mulier prægnans si moriatur antequam puer in aliquo membro baptizari possit, non potest mater in Ecclesia sepeliri, nisi partus mortuus extrahatur ab eius utero, & extra locum sacrum sepeliatur. Et si aliter fiat, non debet corpus exhumari, sed Ecclesia rebenedicetur. In cœmeterio verò talem mulierem simul cum puero in eius ventre existente potest sepeliri.

19 Mortui in duellis, carent etiam ecclesiastica sepultura: quod intellige, si moriantur in ipso conflictu; nam possunt deinde poenitere. Inuentus verò suspensus, vel in puteo mortuus, non priuatur ecclesiastica sepultura, quia non constat qualiter id acciderit.

20 Qui decimas Ecclesiæ debitas à se iniuste possessas non restitunt; & qui noua vectigalia sine Principis consensu imponunt; & qui propter sua manifesta scelera, & facinora interfecti sunt, sepulturam ecclesiasticam habere non possunt. Nec qui Poenitentiae Sacramentum quotannis, & sacram Eucharistiam in quolibet festo Paschatis, cum possent non susceperint.

21 Manifestus vsurarius sepultus in loco sacro debet exhumari; nisi de eo dederit cautionem successor, ad quæ bona deuenerunt, de restituendo vsuras. Sed nec furibus, aut latronibus, raptoribusue cõceditur ecclesiastica sepultura: nisi ante mortem signa poenitentiae ostenderint. Is autem, quem casus improuisus opprimit, si nihil aliud obsistat, ecclesiastica sepultura non arcebitur: nisi tamen per annum confessionem contempsisset.

22 Illud demum scire, & obseruare debent Clerici omnes, quod *sacris Canonibus sub anathemate interdictum, est, tam secularibus, quàm religiosis, ne terram pro sepulchro vendere, aut pro hominibus sepeliendis quoquo modo munera exigere audeant*. Nihilque penitus de iure communi recipi potest pro exequijs, & sepultura. Cum enim sepultura sit res sacra, vtique recipere pretium ex re sacra simoniacum est. Nisi fortè sepelliendus Ecclesiæ, in qua sepeliri voluit, aliquid viuens tradi iusserit: aut post mortem ipsius parentes, proximi, vel hæres pro luminaribus, vel elemosyna, aliquid vltro dare voluerint: quo casu sponte oblatum licitè recipi poterit. Peti verò, vel aliquid exigi, est omninò vetitum; ne aut venalis dicatur Ecclesia, aut Clerici hominum interitu gaudere videantur, si ex illorũ cadaueribus studeant habere compendium. Nec obtentu cuiusquam consuetudinis, nisi pia, & laudabilis fuerit, reatum suum quis excusare poterit.

23 Similiter omnia Sacramenta purè administrari debent, absque omni spe lucri temporalis, quia si pactum aliquod præcederet mercedis, iam tale pactum esset simoniacum, & consequenter Sacerdotes cogendò fideles ad soluendum, ad restitutionem tenerentur. Itaque debent Prælati circa prædicta satis esse vigilantes, vt etiam euitetur scandala, quia communiter Clerici curam animarum habentes, segnes sunt in administrandis Sacramentis, peruiigiles verò, & auari, imò & morosi, ac importuni, in exigendis oblationibus fidelium; sed maximè impij, & simoniaci, circa exactionem expensarum funeris.



## LIBER QVARTVS

De Rebus Ecclesiasticis Temporalibus,  
& earum administratione.

## TITVLVS I.

*De Præbendis, & alijs Beneficijs.*

**H**Actenus de rebus Ecclesiasticis Spiritualibus, sacris, sanctis, religiosis, & Sacramentis ipsis, eorumque administratione differuimus; nunc ad secundam partem propositæ diuisionis transeamus, id est, ad res Ecclesiasticas temporales, & earum administrationem, initium sumentes à Titulo de Præbendis; quod nomen apud Doctores multipliciter sumitur. *Primo, præbenda sumitur* pro patrimonio, & redditibus ipsius beneficii; & tunc dicitur accessio titulo Canonice, & quædam annexio rei spirituali, titulum, & Canoniam sequens. Et sic in præbenda duo considerantur; videlicet ius ipsam præbendam, & fructus ex illa proueniens. Nam eo ipso, quod quis recipitur in Canonicum, debetur illi præbenda, tanquam prædium, & redditus canonicatus. *Secundo sumitur præbenda*, pro ipso titulo beneficii, qui titulus non potest renunciari sine auctoritate superioris. Et in impetratione beneficii debet fieri mentio de tali præbenda, tanquam de vero titulo, & beneficio: prout etiam non potest permutari, nisi cum alia re spirituali. *Tertio accipitur*, pro certa portione de per se distincta, nihil spiritualitatis habente, veluti quodam prædio, & commoditate temporali, pro soluendis salarijs Aduocatorum, Procuratorum, Musicorum, & similium.

2 Dicitur autem Præbenda, à præbeo præbes, quia præbet redditus ad sustentationem beneficiato; qui licet  
senul

simul plures habeat eiusmodi præbendas (nihil sibi spirituale adnexum habentes) cum aliqua dignitate, non dicitur incurrisse incompatibilitatem, quia possidet eas tanquam res temporales, beneficio superioris sibi collatas absque ulla obligatione. Et vocantur propriè eiusmodi prædia seu præbendæ alicui Canonico ab Episcopo collatæ, *Gratiae*, quia gratis dantur propter illius sustentationem, nullo onere imposito, nullumque titulum sibi annexum habentes.

3 *Præbenda itaque nihil est aliud, quam Ecclesiasticum beneficium, vel certorum prouentuum in Ecclesia percipiendorum ius, ratione diuini officij, cui quis insistit. Cū enim secundum legem diuinam, qui altari seruit, de altari debeat & viuere, dignum est, vt qui diuinis adscribuntur obsequijs, Ecclesiæ sustententur stipendijs: ne si eos presserit inopia, necessitate cogente à diuino famulatu recedant ad alia officia, vel negocia, vnde victum sperare possint; vel mundo simul ac Deo operam suam equè locare teneantur. Quod quam difficile, aut verius impossibile sit, nemo tam obtusam habet ingenij aciem, cui sit incognitum.*

4 Idcirco ex Ecclesiæ patrimonio singulis Clericis, pro eorum meritis, & dignitatibus, opes congruæ subministrantur; non vt tanquam proprias sibi eas vendicent, sed quibus se honestè alere, Ecclesiarum vsui, vbi id opus esse viderint succurrere, & pauperum, egentiumque hominum necessitatibus, si copiae suppetant, subuenire possint. Hæc autem bona Præbendæ appellantur. Sicut ergo miles seculi habet stipendium à Domino temporali: sic miles Dei habere debet ab Ecclesia, vnde honestè viuat, & officio suo inuigilet.

5 Et altera quidem Præbendæ est annexa Canonicali, altera sine Canonicali confertur. Tantæq; hæc res Romanis Pontificibus, sacrisque Canonibus semper curæ fuit, vt qui ministerijs Ecclesiæ se deuouerunt, in eisq; adfuerint, ne inopia, & egestate pressi iacerent, vel maximus



idiota cognoscere pòtest , ex tot Constitutionibus diuersis temporibus , à diuersis Pontificibus , & Concilijs editis. Qui hoc quoque in alia statuerunt , ne possit aliquem Episcopus ad sacros Ordines promouere , nisi cui de alimentis etiam prouiderit , vel Præbenda ei assignata , vel ex proprijs sui ipsius facultatibus alimenta suggerēdo , quoad certum ei titulum contulerit . Nisi promotus in patrimonio locuplete esset , ex quo alimenta congrua habere posset . Quod onus etiam ipsius Episcopi conferentis successorem sequetur , nam & successor ei prouidere tenetur , qui à suo antecessore fuerit sine titulo promotus : quia sine substantia rerum non potest Ecclesiæ deserui .

6 Hinc etiam , qui ex potestate sibi generaliter tradita , Clericos ad sacros Ordines sine titulo euexerit , eis etiam tenebitur prouidere : ac , qui certas personas mandauerit ad Ordines euehi , vel ipsis personis ius fecerit , vt ab alijs promoueri possint , eis pariter prouidere tenebitur , si ad sacros nullo titulo fuerint euecti .

7 Et Sacrosancta Synodus Tridentina constituit , ne quis deinceps Clericus sæcularis , quamuis alias sit idoneus , moribus , scientia , & ætate , ad sacros Ordines promoueat , nisi prius legitimè constet , eum beneficium ecclesiasticum , quod sibi ad victum honestè sufficiat , pacifice possidere . Statuitque , vt id beneficium resignare nō possit , nisi facta mentione , quod ad illius beneficij titulū sit promotus . Nec ea resignatio admittatur , nisi constituto , quod aliunde viuere commodè possit : & aliter facta resignatio nulla sit . Patrimonium verò , vel pensionem obtinentes ordinari post hac non possint , nisi illi , quos Episcopus iudicauerit assumendos , pro necessitate , vel commoditate ecclesiarum suarum ; eo quoque prius perspecto , patrimonium illud , vel pensionem verè ab eis obtineri , taliaque esse , quæ eis ad vitam sustentandam satis sint . Atque illa deinceps sine licentia Episcopi alienari , aut extingui , vel remitti nullatenus possint ; donec beneficium ecclesiasticum sufficiens sint adepti ; vel aliunde habe-

habeant, vnde viuere possint.

8 Prohibetur etiam eadem ratione in Ecclesijs collegiatis plures Clericos institui, quàm quot se alere absque penuria de bonis ecclesiæ possint, solutis iuribus Episcopalibus, nec tamen modesta quadã hospitalitate neglecta.

9 Eadem ratione fit, vt congruum non iudicetur, credere præbenda eum, qui ad Canonicatum est receptus, quã primum se facultas obtulerit, & interim distributiones quotidianas percipiat: multaque alia ad hoc necessario instituta sunt, quæ aliunde sunt assumenda.

10 Conceduntur autem præbendæ, vel beneficia duobus modis, per collationem, & per institutionem. *Collatio est*, libera quædam præbendæ concessio. *Institutio est*, præbendalis iuris ad præsentationem Patroni facta translatio, quæ licet & ipsa collatio possit appellari, commodius tamen est in præsentis singulas causas, singulis appellationibus distinguere.

## TITVLVS II.

### *De Collationibus Beneficiorum.*

1 **C**ollatio, vt iam supra annotauimus, est concessio, seu donatio quædam præbendæ: vel prouisio beneficii ecclesiastici alicui Clerico, à Prælato libere facta, vt in ministerijs Ecclesiæ alicuius, vel dignitate constitutus, possit se honestè, & digne sustentare. Estque dicta Collatio, à conferendo, seu ferendo in alium; cum is qui habet potestatem, confert præbendam & beneficium in alium.

2 Horum autem beneficiorum, *Quedam sunt curata*, quæ nimirum habent populum, cui Sacramenta administrare tenentur. *Quedam verò simplicia*, quæ populo quidem carent, aliquod tamen onus habent adnexum; videlicet iurisdictionis supra Clerum, visitationis Ecclesiasticæ, celebrationis Missarum, cantandi in choro, & similia. Secum-



eundem itaque diuersitatem qualitatum huiusmodi beneficiorum, diuersi quoque modi in eorum collationibus sunt tenendi.

3 In collatione curatorum, seruandum est omnino decretum Sacrosanctæ Synodi Trident. vt videlicet occurrente vacatione Parochialis, deputetur Vicarius, cui commendetur administratio Ecclesiæ, donec prouideatur de Rectore. Episcopus verò infra decem dies eligat aliquot personas, vel concursu proposito inuitet, qui se velint subdere examini Deputatorum in Synodo Diocesana. Demum verò vnum ex approbatis ab Examinatoribus, quem ipse iudicauerit magis idoneum, prouideat de vacante Ecclesia. Et quidem neminem prouidere debet de Parochiali sine præuio huiusmodi examine, vel concursu, alioquin prouisio esset omnino nulla ex Constitutione Pij Papæ V. Et ne quidem Doctores, vel Licentiati in aliqua professione, institui debent ad Parochiales, sine præuio concursu, vel examine prædicto, vt declarauit Sacra Congreg. Concil. Trid. Idem quoque faciet, & in reseruatīs beneficijs Sedi Apostolicæ, & cuiusque alteri, si curata erunt, & vacabunt.

4 In curato verò Iurispatronatus Laicorum, concursus huiusmodi non requiritur, sed tantum debet examinari præsentatus super sufficientia. Nisi plures fuerint præsentati. In Parochialibus item Regularibus conferri solitis, concursus non requiritur, sed solum examen, vt sacra Congregatio censuit.

5 Neque fit concursus, quando cura animarum spectat ad Collegium; vel annexa est alicui præbendæ. Tunc enim cura huiusmodi, non facit beneficium curatum illud cui annectitur, sed sequitur naturam ipsius. Nec inducit aliquam incompatibilitatem, nisi eam habeat ex sui natura principale.

6 In collatione verò simplicium, tam ad dignitates ecclesiasticas, quam ad inferiores Canonicatus, aut Præbendas simplices, requiritur primo ætas, quæ in dispositione iuris

iuris communis remanet, & dicitur sufficere sanorum quindecim. Deinde vt sit Clericus, ad minus primæ tonsuræ; laicus enim non est capax beneficij ecclesiastici. Denique, vt conferatur perpetuò, & non ad tempus; & sine conditione recompensæ, vel precij: sine pacto, & diminutione beneficij: & sine præiudicio tertij, vt nimirum sæcularia sæcularibus, & regularia regularibus conferantur.

7 Conferuntur autem Præbendæ, seu beneficia: Aut ab Ordinario: aut ex mandato Legati Sedis Apostolicæ: aut Pontificio rescripto.

8 Ordinarius collator is est, quem aut consuetudo approbavit; aut iuris designauit autoritas, vt Episcopus, & Capitulum.

9 Si Episcopus, & Capitulum habeant potestatem conferendi coniunctim, tunc non potest vnus sine altero conferre; nisi in vno subsit impedimentum, vel mortis, vel suspensionis, vel maioris excommunicationis. Si verò ad Episcopum collatio spectet præbendarum, cum consilio sui Capituli, vel assensu; eo defuncto, vel suspenso, Capitulum se non potest intromittere; nisi Episcopus in petenda relaxatione suspensionis sit in mora.

10 Vbi verò collatio ad aliquem cum consilio Episcopi pertinet, si quid illi humanitus contigerit, non erit ob hoc vacantis beneficij collatio differenda. Idem iuris est Episcopo, ad eò in remotis agente, vt breui non possit illius haberi præsentia: quia in petendi, vel expectandi mora, vacanti beneficio posset imminere periculum.

11 Eadem ratione, vbi ad solum Episcopum spectat collatio, si per sex menses conferre distulerit, ad Capitulum deuoluitur. Ex contrario, si ad solum Capitulum pertinuerit, & infra præscriptum terminum hoc non fecerit, Episcopus cum Religiosorum virorū consilio exequetur. Quod si omnes fortè neglexerint, Metropolitanus absque contradictione disponet.

12 Idē statuitur in Regularibus Prælati: si enim quæuis beneficia ad illorum dispositionem spectantia, intra



constitutum tempus conferre negligent, locorum Dioecese-  
fani in non exemptis propria, in exemptis verò Apostoli-  
ca auctoritate eorundem negligentiam, iuxta præscriptū  
in Viennensi Concilio modum supplebunt.

13 Tempus verò deuolutionis (sex mensium) currit,  
solū non impeditis: & à die notitiæ, non à tempore va-  
cationis erit computandum. Idque si in Ecclesia erat di-  
stinctio præbendarum, & certus Canonicoꝝ numerus.  
Ceterū, si neq; distinctæ Præbendæ, nec certus sit Canoni-  
coꝝ numerus, Lateranen. Concilio, de beneficijs vltra sex  
menses vacantibus locus non erit. Idem etiam obtinet, si  
per Capitulum vacans dignitas legitimè fuerit sublata.

14 Licet autem ob negligentiam Episcopi conferendi  
potestas ad Capitulum deuoluatur, Sede tamen vacante,  
in collationibus præbendarum Episcopi vice non fungitur:  
cum eo casu nullius superioris possit argui negligentia.

15 Is quoque, qui nimium cessando, conferendi ius  
amiserit, si post ius collationis deuolutum, nihilominus  
viris idoneis de beneficio prouidere voluerit, quanquam  
ob temporis lapsum, collatio mero iure non teneat, ex di-  
spositione tamen, & benignitate tolerari poterit.

16 Legatus quoque de Latere Summi Pontificis mis-  
sus beneficiorum conferendorum ius, potestatemque ha-  
bet, vt etiam supra nos docuisse meminimus. Alius verò  
Legatus, qui à latere Apostolico non sit profectus, nisi hoc  
ei specialiter sit indultum, beneficia non confert. Sed ta-  
men nec Cathedrales, nec Regulares, aut Collegiatas Ec-  
clesias: nec Ecclesiarum Cathedralium dignitates, ad quas  
per electionem promoti, primum post Episcopum obtinent  
locum, veluti Archidiaconatum, suæ dispensationi, aut  
prouisioni, reseruare possunt. Nec plures beneficiorum  
reseruaciones eodem tempore, in eadem Cathedrali, vel  
Collegiata Ecclesia, vel ad eiusdem collationem pertinen-  
tium facient.

17 Reseruaciones Legatorum expirant, finita lega-  
tione, nec executores dati amplius ea conferre poterunt.

Immo taciturnitas ipsa habiti beneficij inualidat promissionem Legati non ordinati; licèt id in aliorum Ordinariorum collationibus minimè requiratur. Et quamuis ante acceprionem beneficij quis nullum habeat in eo ius, tamen collator de eo, alteri, primo non consentiente, providere non potest.

18 Planè notificata collatione, ad consentiendum termino competenti præstito, si primus non consenserit, eo lapsò, beneficium libere, cui viderint expedire, conferre poterunt, tam Ordinarius, quàm Legatus. Antequam tamen ipsum alij contulerint, non obstante lapsu termini, suum primus collationi poterit accomodare consensum.

19 In nonnullis tamen Ecclesijs consuetudo viget huiusmodi, vt antiquiores Canonici gradatim possint meliores, vbi vacant, præbendas optare. Quæ consuetudo vbi vigeat, vsque adeò seruanda est, vt quamuis summus Pontifex mandet alicui de præbenda proximo vacatura, nulli alij de iure debita provideri, possint nihilominus ipsi antiquiores Canonici, cum præbendam vacare contigerit, eam pro more optare. Quo casu ea, quæ optata non fuerit præbenda, si nulli sit debita, erit illi qui Pontificium mandatum habet, conferenda. Sed ne eiusmodi consuetudinis prætextu, prouisiones autoritate Apostolica faciendæ, vltèrius quam par sit differantur, debent executores super ipsis prouisionibus à Pontifice Maximo deputati, per viginti solùm dies expectare, visuri, an hi, quibus hoc ius comperit, optare velint; quibus lapsis poterunt liberè in non optatis mandata Pontificia exequi. In præbendis verò apud Sedem Apostolicam vacantibus (cū de ipsis per Romanum Pontificem ordinatur) prædictæ constitutioni locus non fiet.

20 Quapropter per rescriptum Apostolicum mandatur fieri collatio, aut purè, aut adiecto die, aut sub conditione. *Purè*, vt cum mandatur simpliciter, vt alicui de beneficio, aut præbenda prouideatur. *In diem facta*, vt cum præbenda confertur, quam quis intra mensem, aut



alio tempore à vacationis notitia duxerit acceptandant. Quo casu cum temporis appositio fauorem afferat impetranti, si decretum irritans fuerit appositum, collatio per Ordinarium alteri facta, intra præfixum tempus nullius obtinebit roboris firmitatem. Decreti enim appositio, reseruatio, executoris inhibitio, & lis mota, beneficium affectum reddunt. *Sub conditione* mandatur fieri collatio, vt cum alicui, si per executoris inquisitione repertus fuerit vitæ laudabilis: vel si consensus accesserit Capituli; vel alia adiecta conditione, de beneficio prouideri committitur. Et eo casu etiam, appposito irritante decreto, non impletis adhuc conditionibus, vacans beneficium per Ordinarium, aut per executores, ad prouidendum de tali beneficio datum, liberè conferri poterit.

21 Sed multum interest, motu proprio; an ad alterius petitionem de beneficio prouideri mandetur. Si enim proprio motu, longe pinguius erit mandatum: nam etiam de beneficijs, quæ impetrans obtinet, nulla habita mentione, erit huiusmodi prouisio valida, qualiacumque fuerint beneficia, & in numero quocumque, quæ habebat impetrans, cum sibi prouisio facta fuerit. Quod si ad petitionem huiusmodi gratia facta sit, quantumcunque modicum beneficium scienter taceatur, veluti surreptitia, non valebit.

22 Collatio facta motu proprio, pluribus beneficijs in eadem Ecclesia, simul vacantibus, intelligitur facta de pinguiori. Si beneficia sint æqualia, ad eum spectet electio, cui gratia est concessa. Collatio verò facta ad petitionem alterius, ad minus beneficium restringitur: si sint æqualia, eligit collator. Motu autem proprio, tunc solum gratia fieri censetur, cum hoc expresse cautum fuerit.

23 Sed sine motu proprio, siue ad alterius petitionem, per rescriptum Apostolicum fiat prouisio, ceteris longè præstat. Nam cum ex Lateranensi Concilio, ministeria, & beneficia Ecclesiæ tribui, aut promitti non debeant, antequam vacent, Romanus Pontifex etiam in ipsius ius potest

test tribuere vacaturis . Est ergo inter Ordinarium , Legatum , ac Summum Pontificem , circa collationis potestatem , quasi per gradus ascensus quidam . Nam ad Episcopum omnium quidem basilicarum , quæ in eius territorio positæ sunt , collatio regulariter pertinet , vacaturâ tamen præbendam suæ dispositioni reservare non potest : & longè minus in eadem alicui ius tribuere . Legatus autem non modo vacantes intra suæ legationis terminos Ecclesias conferre , verùm etiam vacaturas , iuxta ea quæ supra diximus reservare poterit ; licet eidem in vacaturis alicui ius tribuendi nulla sit facultas . At Apostolicus , & ubique vacantes donare , & vacantes suæ prouisioni reservare , & in vacaturis ius tribuere potest , cum in ipso plenitudo resideat potestatis .

24 Quo tamen casu Summus Pontifex de vacatura præbenda , alicui prouideri mandat , si is , in cuius gratiam mandatum obtentum est , præbendam quando vacat negligenter omittit , non poterit postmodum prætextu dicti mandati , nisi antea in Canonicatum fuerit receptus , aliam in ipsa Ecclesia petere . Poterit tamen , habens expectatiuam acceptare beneficium vacaturum primum ; & si rationalis causa subsit , secundum , & ulterius : certum tamen & expressum priusquam vacet , acceptare non poterit , ne ex benignitate gratiarum Sedis Apostolicæ captandæ alienæ mortis occasio tribuatur . Quod si de certo acceptatio secuta fuerit , nullam obtinebit roboris firmitatem , vt Bonifacianæ Constitutionis tenore latius continetur .

25 Inde etiam licet beneficiaræ personæ de alio beneficio , nisi primo illud quod obtinet omninò dimittat , prouideri non possit , ( nisi aut Cardinales sint , aut Regū filij ) per tale tamen rescriptum , maximè circa literatas personas , super hac pluralitate dispensari poterit .

26 Item si à Sede Apostolica , aut à Legato , & ab Ordinario , eodem die , idem beneficium conferatur ; & quæ fuerit primo facta collatio non appareat , nemine possidente , is erit ceteris præferendus , cuius conferens amplio-



pliore gaudet prærogatiua.

27 Hac ratione & ij, qui in aliqua Ecclesia in Canonicos sunt recepti, debent in præbendarum affecutione ceteris, siue Legatorum, siue aliorum quorumcunque auctoritate antea fuerint admissi, anteferri.

28 Auctoritate autem Apostolica receptus, & is intelligitur, qui Legati, vel alterius mandato, cui specialiter in ea re auctoritas Apostolica concessa fuerit, recipitur. Sed etsi mandatum Legati ratum habeat Romanus Pontifex, atque id auctoritate sua muniat, ex eo receptus non Legati, sed Apostolica intelligitur auctoritate receptus: atque ideo est in receptione præbendæ omnibus post eum receptis in Ecclesia dicta præferendus.

29 Aliud iuris est, si ijs, ad quos alias pertinet Canonicorum receptio, facultas concedatur ab Apostolico, ut aliquem recipiant in Canonicum eiusdem Ecclesiæ, ordinationibus fortè certum numerum Canonicorum præfigentibus non obstantibus: hoc enim casu non Apostolica, sed recipientium censetur auctoritate receptus: nisi quod eum auctoritate Apostolica recipiant, in literis caueatur expresse. Quod si ad eos alias talis receptio non pertinebat, Apostolica dicetur auctoritate receptus, Alias verò, si literæ impetratæ certi numeri Canonicorum, nullam fecerint mentionem, quod illarum occasione factum fuerit, nullam obtinebit firmitatem.

30 Illud etiam omittendum non est, non solere Apostolicum eundem collatorem pluribus onerare prouisionibus, nisi id velle se suis litteris expresse fuerit complexus. Et propterea Apostolici mandati fines diligenter sunt custodiendi: nec extendantur nisi ad casus expressos, etiam de consensu, & in præiudicium prouisi. Vnde cum iniungitur, ut alicui de præbenda certi valoris prouideatur, in præbenda minoris valoris, etiam impetrante volente, mandatum impleri non poterit.

31 Idem obseruari oportet, si cui de beneficio, quod ad alicuius collationem spectat, prouideri mandatur; hoc enim

enim casu de eo quod ad eiusdem præsentationem, vel institutionem pertinet, prouideri minime poterit; nec etiam è conuerso.

32 Eodem spectat, si quis ab Apostolica Sede mandatum suscipiat, vt ab aliqua beneficij resignatione recepta, idem beneficium alteri conferat. Si enim is qui resignaturus erat, rebus eximatur humanis, mandato locus non erit, cum non per resignationem vacauerit, sed per mortē.

33 Idem obtinet, si literæ Apostolicæ super conferendo beneficio proximè vacaturo fuerint impetratæ. Nam ad aliud quod post illarum impetrationem fuerit creatū, non extenditur mandatum.

34 Et si quis literas super obtinendis beneficijs vsque ad certam summam impetrauerit, eidem non in pensione, sed in beneficijs Ecclesiasticis erit prouidendum: nisi de pensione in litteris mentio habeatur.

35 Eodem etiam spectat, quod si de conferendo alicui beneficio ad Episcopi collationem spectante rescibatur, illud ei conferri non poterit, cuius collatio ex negligentia ipsius Episcopi ad eiusdem Capitulum deuoluta fuit: quāquam ex contrario de eo, cuius ad Episcopum ex Capituli, vel alterius cuiuscumq. siue ad Sedē Apostolicam ex ipsius Episcopi, vel aliorum in hoc eidem succedentium negligentia, collatio fuerit deuoluta, hoc casu prouideri poterit.

36 Interdum tamen, licet mandatum generale sit, ex persona impetrantis recipit restrictionē. Vt si cui præbenda proximè vacatura simpliciter prouideri mādatur: nā si talis nōdum in ea ætate existit, vt ad sacerdotiū promoueri possit, sacerdotalis sibi præbenda conferri non poterit.

37 Ex loci quoque expressione rescripti sumitur declaratio: & ideo quanquam sub nomine Ecclesiarum ciuitatis, etiam Ecclesia Cathedralis comprehendatur; cum tamen alicui de beneficio mandatur in aliqua Ecclesiarum ciuitatis, vel Diocesis prouideri, ad Cathedralem Ecclesiam mandatum huiusmodi non extenditur. Secus est, si in aliqua Ecclesiarum prouinciæ prouideri mandatur; tūc enim,



enim, & Metropolitana, & cæteræ Cathedrales Ecclesiæ, tali mandato includuntur.

38 Ex ordine quoque scripturæ rescripti interpretatio sumitur: veluti, cum Ioanni de beneficio ad collationem suam, vel Petro pertinet, ut alicui **prouideat** mandatur. Nam si plura simul beneficia vacare contigerit, ad vtriusque collationem separatim spectantia, tunc ordo scripturæ seruandus est; & de illo beneficio **prouidendum** erit, quod ad Ioannem noscitur pertinere.

39 Si verò de beneficio ad aliquorum collationem, vel præsentationem spectante, non adiecto communiter, vel diuisi, prouisio iniungitur faciēda in beneficio, quod ad collationem, vel præsentationem alterius tantum pertinet, adimpleri non poterit.

40 Item insertio causæ declarat rescriptum, sicut accidit, cum Clerico nullum beneficium obtinenti, ob paupertatem, per Episcopum de beneficio prouideri mandatur. Nam si ante quam ei prouisum sit, beneficium fuerit affectus, cessante causa mandati, prouidere sibi Episcopus in posterum non tenetur.

51 Nam & is, cui conceditur, ut idoneo possit in sua, vel aliena Ecclesia prouidere beneficium, aliud obtinenti prouidere non potest: nisi vel primo ille beneficium quod obtinet omninò dimittat, vel in concessione huiusmodi sit expressum, quod etiam beneficiatæ valeat prouidere personæ: quo casu vnicum dumtaxat beneficium, atque illud non curatum obtinenti prouideri poterit. Sed si concessum fuerit, ut prouidere illi valeat, qui & alia beneficia noscitur obtinere, huiusmodi pluralitas debet solum ad duo beneficia non curata restringi.

42 Ex natura quoque, & beneficii qualitate Apostolicum rescriptum restrictionem recipit: nam si de quibuscumque beneficiis prouideri mandatum fuerit, de animarum cura mentione non habita, de iis prouidendum non erit, quibus huiusmodi cura noscitur imminere.

43 Illi quoque, pro quibus scribitur, ut de personatibus,

tibus, & dignitatibus ad collationem, prouisionem, præsentationem, vel dispositionem pertinentibus quo rum-  
cunque prouideatur, de ijs prouideri non poterit, ad quos  
per electionem præficiendi assumuntur.

44 Illud quoque omittendum non est, quod sicut  
nulla facta personarum expressione sit gratiosè concessa  
facultas, vt auctoritate Apostolica, aliquibus personis ido-  
neis, in certa Ecclesia prouidere possit, vel beneficia, quo-  
rum collatio est ad Sedem Apostolicam legitimè deuolu-  
ta, conferre: huiusmodi concessio, etiam re integra, per  
obitum concedentis non expirat. Secus si super prouisio-  
ne certæ personæ facienda, eidem sit data potestas non ob  
suam, sed eius cui prouidetur gratiam, vel fauorem. Illa  
enim expirat omninò, si concedens re integra moriatur.

45 Sed & illud interest, vtrum cui ab Apostolica Sede  
prouisio beneficii in certa Ecclesia, Diocesi, vel Prouin-  
cia, certæ personæ facienda committatur, an de certa  
Ecclesia, incertæ tamen personæ. Primo enim casu licitè  
quis vices suas alteri committere poterit. Secundo verò  
cum in eligenda persona mandatarij electa videatur indu-  
stria, prouisionem sibi commissam alteri demandare non  
poterit; nisi forma commissionis id habeat, vt per se, vel  
per alium hoc expedire valeat.

46 Postremo illud notandum est, tam Turonensi Cō-  
cilio cautum esse, ne præbendæ aliquam sectionem patian-  
tur, quàm ex Lateranensi, ne quis conferens beneficium  
ecclesiasticum partem prouentuum suis vsibus retinere  
audeat, cùm sine vlla debeat diminutione conferri.

47 Sciendum autem est, quod sancta Synodus Tri-  
dentina sub Pio IV. decreuit, ne mandata de prouidendo  
& gratiæ, quæ expectatiuæ dicuntur, vlli amplius, etiam  
Collegijs, Vniuersitatibus, Senatibus, & alijs singularibus  
personis, etiam sub nomine indulti, aut ad certam sum-  
mam, vel alio quouis colore, concedantur. Itemque de-  
creuit, vt nec reservationes mentales, nec aliæ quæcum-  
que gratiæ ad vacatura; nec indulta ad alienas Ecclesias,



vel Monasteria alicui, etiam S. R. E. Cardinalibus concedantur, & concessa abrogata censeantur.

48 Si verò ipsum Pontificem Romanum mortuum, esse contingat, atque ita Sedem Apostolicam vacare, tunc cum beneficia Curie Romanæ ociosa fiunt, aut si mortuus Pontifex sit, antequam beneficia eiusmodi conferret, quæ se vivente in curia vacabant, & quæ beneficia ex his sint, quibus animarum cura est annexa, Ordinarius ad cuius donationem alioqui pertinuissent, illa cōferre poterit.

49 Item, si Summus Pontifex in mensem distulerit beneficiorum in curia vacantium ad se pertinentem collationem, eas partes Ordinarius excipiet, conferendo per seipsū. Vel eo in remotis agente, per suum Vicarium generalem in Dioecesi existentem, cui id canonicè sit mandatum, ut ex Gregorij X. Constitutione in Concilio Generali Lugdunensi edita apparet. Quæ tamen Gregorij Constitutio, ex Constitutione Bonifacij Octavi, tunc creditur abrogata, cum ille sanxit, ut dignitates, personatus, præbendæ, aliæque beneficia Ecclesiastica cum cura, vel sine cura, quæ apud Sedem Apostolicam vacatura sint, Sedi Apoliæ referrentur.

50 In omnibus siquidem beneficijs maxima, & in omnibus regulis, ac præceptis soluta est semper Romani Pontificis potestas, quæ nullo pacto minui unquam potest, qui omni casu quavis beneficia elargiri possit, & ius in ipsis tribuere vacaturis; manumque apponere, & sibi eorum conferendorum potestatem servare.

51 Sed præcipuè illa beneficia proprio quodam iure ad ipsum ex prisca consuetudine magis spectare videntur, quæ apud Sedem Apostolicam vacauerint. Ea siquidem præter ipsum Summum Pontificem nemo cōferre potest, quacumque is sit autoritate munitus, seu iure ordinariæ potestatis, ad ipsum electio eorum, collatio, seu provvisio pertineat: seu literas super aliquorum provisione generales, vel etiam speciales sub quacumque forma verborum acceperit. Nisi eis sit super eisdem conferendis in

Curia Romana vacātibz specialis, & expressa, ab ipso Pō-  
 tifice Maximo authoritas attributa. Idque etiam in bene-  
 ficijs procedit, quæ Legati, aut Nuntij Sedis Apostolicæ  
 obtinent. Et in beneficijs quorumcunque ad Romanam  
 Curiam accedentium, vel ab ea recedentium, si in locis à  
 curia non remotioribus, duorum dierum itinere eos mori  
 contigerit, non minus, quàm si in loco ubi eadem curia  
 residet, morerentur. Item in omnibus curialibus, qui curiam  
 sequentes, dum ea se transfert, in itinere moriuntur,  
 vel in loco, vnde curia discedit, quantumcunque locus,  
 ubi decedunt, ab ipsa curia sit remotus.

52 Si verò aliquis curialis, etiam Romana Ecclesia  
 vacante, peregrinationis, infirmitatis, aut recreationis,  
 seu alia quavis causa, ad locum curiæ vicinum secedens,  
 ibi decedat, modo ibi (etiam si erat ad curiam reuersus)  
 domicilium, vel domum propriam non haberet, benefici-  
 cium in curia vacare nihilominus dicetur.

53 Sed si quis permutationis causa, beneficium suum  
 in manibus Summi Pontificis abdicarit, quæ permutatio  
 effectum sortita non sit, non ideo dicetur tale beneficium  
 in curia vacasse, ubi is qui renunciat extra curiam defun-  
 ctus sit.

54 At Ioannes XXII. & Benedictus XII. plura perso-  
 narum genera enumerarunt, quorum beneficia vacanti a-  
 decreuerunt esse ipsis Summis Pontificibus, vel Sedi Apo-  
 stolicæ reservata. Ex quibus quidem personis sunt, Offi-  
 ciales omnes Summi Pontificis, puta: Vicecancellarius,  
 Notarij, Camerarius, Auditor contradictarum, Corre-  
 ctor, Scriptor litterarum, Poenitentiarij, Abbreviator,  
 Capellani, Commensales, ac quicumque alij, qui ratio-  
 ne officij, vel ex causa legitima in curia morantur; ubi à  
 Summo Pontifice negocia ipsius, vel Sedis Apostolicæ cu-  
 raturi, de curia emissi sunt, vel Nuntij, aut Legati aliquò  
 sunt destinati, ubiuis locorum, ante suum ad Curiam re-  
 ditum, legatione, aut negotiorum sibi creditorum cura-  
 tione durante eos decedere contigerit.



55 Ea quoque beneficia seruata sunt, quæ aliquis eo tempore obtinebat, quo ad Patriarchalem, Archiepiscopalem, seu Episcopalem Ecclesiam, necnon, & ad Monasterij regimen assumptus est; & quæ propter aliorum beneficiorum affectuionem cum pacifica possessione vacarint. Quas reservationes ipsas in hunc vsque diem etiam facere consueuerunt, qui per tempora succedunt Summi Pontifices, idque suis Cancellariæ Regulis nominatim cauere, vt iam frustra hodie disceptetur, an memoratæ prædictorum Summorum Pontificum reservationes hodie sibi locum vendicent.

56 Multa quoque alia beneficia soliti sunt Summi Pontifices, eisdem Regulis Cancellariæ sibi reservare, veluti ea, quæ per eiusdem Ioannis XXII. Constitutionem, incipientem *Exetrabilis*, vacant. Et omnes Cathedrales Ecclesias, & superiores, ac certi generis personarum, cæterorumque titulorum, ac certis quibusdam casibus, & modis vacantia beneficia, vbiuis locorum illæ personæ existant, & vbicumque eorum possessores decedant: aliasque, etiam reservationes, vel generaliter, vel specialiter, prout eis visum fuerit (Poloniæ Regno excepto) quotidie faciunt. Qui tamen beneficia reservandi mos priscis Pontificibus Romanis, vt Gregorio IX qui Decretalium Epistolarum quinque antiquiores libros compilauit, aliisque ipso Gregorio superioribus Pontificibus non fuit.

57 Has verò vbicumque faciunt reservationes, cum alijs eorundem beneficiorum, quæ sunt reservata, conferendorum potestatem adimant, & in contrarium acta irrita omnia decernant; illa, quæ sibi sic reseruarint beneficia, adeò sunt affecta, vt eorum collatio per alium exinde quemcunque facta, nullius prorsus momenti habeatur. Quinimmò, etsi ad electionem Cathedralis Ecclesiæ iam processum esset, prius quam per Summum Pontificem esset reservata, omnia post reservationem sequuta effectum carerent; licet reservatio, inhibitio, & decretum, electionem, aliaque præcedentia non afficiant.

58 Sed, etsi non referuarit quidem Summus Pontifex beneficium, sed illi manum tamen apposuerit, puta, dum iubet his, qui eligendi ius habent, ne ad electionem alicuius procedant: vel dum beneficium vacans alicui commendat; vel certæ personæ præcipit, vt vacanti Ecclesiæ prouideat, vel cui beneficium adimit; his quidem, ac similibus modis, id beneficium, cum Summus Pontifex sic manum apposuerit, solius Summi Pontificis prouisionem expectabit, nec vllus præter ipsum eius conferendi potestatem habebit.

59 Frequenter autem Summus Pontifex potestatem suam in alienis Dioecesibus exercet, earum Ordinarijs ita manus deuinciendo, vt non possint in conferendis beneficijs i s suum liberè exercere; dum vel ipse beneficia in eorum ditione posita elargitur; vel ipsis iniungit, vt soli, vel cum alio, qui executoris partibus fungatur, beneficia aliquibus personis conferant: vel etiam soli executori mandat, vt in aliena Dioecesi aliquibus prouideat. In quo sciendum, quod vbi est Ordinarius adiunctus executor, ex sola rescripti Apostolici Ordinatio, vel Capitulo facta redditione, absque alia etiam executoris insinuatione, inhibitione, vel reservatione, beneficium id, de quo scriptum fuerit, adeò censetur affectum, vt nullius roboris habeatur ab Ordinario alij de eo facta largitio.

60 Sciendum autem est, cum ipsemet Summus Pontifex beneficia confert, longè maioris esse huiusmodi collationem, quam collationem ab alijs factam. Hinc si à Sede Apostolica, vel Legato ipsius, vni, & ab Ordinario alteri, eodem die beneficium conferatur, is cui ipsa Sedes Apostolica, vel eius Legatus contulerit, propter conferentis ampliorem prærogatiuam, erit alteri præferendus: nisi appareat, ab Ordinario prius factam esse collationem; vel nisi aliter possideat. Quandoque enim contingit, vt in beneficiorum erectione, seu fundatione, aut alijs constitutionibus, qualitates aliquæ requirantur, seu vt certa illis onera iniungantur, quibus conferendis, vel quacumque alia



alia dispositione derogari non debet, vt eadem sacrosancta Synodus Trid. sub Pio IV. constituit. Idemque in præbendis Theologalibus, Magistralibus, Doctoralibus, aut Presbyteralibus, Diaconalibus, & Subdiaconalibus, quancunque ita constitutæ fuerint, obseruandum decreuit, vt earum scilicet qualitatibus, vel ordinibus, nihil in illa prouisione detrahatur, & aliter facta prouisio, subreptitia censeatur.

61 Hoc quoque postremo non lateat, in causis quoruncunque beneficiorum procedi simpliciter, & de plano, sine strepitu, & figura iudicii, dum conferuntur à Summo Pontifice, vel eius Legato.

## T I T V L V S I I I.

### *De Vacatione Beneficiorum.*

1 **Q**uemadmodum Leges Pontificiæ curant, ne quis Clericus in egestate iaceat, ita etiam contra prospiciunt, ne quis beneficiorum ambitione, alterius morti inhiat: quapropter, vœtat Concil. Lateranense Ecclesiastica beneficia, vel ministeria alicui conferri, vel promitti, priusquam vacent; adeò quidem, vt omninò vacare ea oporteat, sic, vt ne quidem de facto sint ab aliquo occupata.

2 Et ne vllò vafro commento Lateranensis Cœcilij decretum deludi possit, quamuis olim Prælatus rectè promitteret se prouisurum cum primùm potuisset, Bonifacio tamen Octauo irritas, inanesque decreuit quascunque promissiones, sub quauis verborum forma factas, quibus directè, vel obliquè aperiri possit via ad beneficia vacatura.

3 Qui verò in viui Sacerdotis præbendam suam non abiurantis locum sciens substitui se patitur, præbenda spoliatur, & ab ecclesiastica communione pellitur eo ipso, quod se passus est viuo Sacerdoti successorem dari.

4 Vacare autem beneficium potest, morte primò possiden-

sidentis; deinde renunciatione eius, qui illud erat affecturus: siue simplex sit renunciatio, siue permutationis causa facta. Sic autem differt vacatio contingens per mortem, ab ea, quæ ex resignationis causa fit, ut mandatum alicui factum de conferendo beneficio vacante per resignationem cesset, si ille, qui beneficium habebat, antequam resignet rebus eximatur humanis, nisi de mandatis intentione aliud expresse appareat. Ac, si duo super eodem beneficio litteras impetrent, priore eorum per obitum, altero per cessionem vacare beneficium asserentibus, posterior, si beneficium cessione vacauerit, erit priori præferendus.

5 Item vacat beneficium, si poenæ causa ob delictum quis fuerit priuatus beneficio. Similiter, si quis ad Episcopatum electus fuerit, & confirmationem electionis acceperit, ecclesiasticorumque bonorum administrationem habuerit, decurso tempore consecrandis Episcopis à Canonibus sacris præfinito: Is ad quem spectat beneficia, quæ ille habebat disponere liberè poterit. Quia & generaliter, ubicumque secundum beneficium quis asequitur, quod vel curam habeat, vel dignitatem annexam, prius beneficium ipso iure vacat, cui vel dignitas, vel cura animarum inhærebat, ut etiam alio loco infra opportunius dicitur.

6 Episcopo quoque ad aliam Sedem propria auctoritate se transferente, eiusque possessionem adepto, prior eius sedes, ac etiam posterior, quam per superbiam concupiuit, vacua fiet.

7 Vacuum quoque fiet beneficium Parochum, differente eo, cui fuerat concessum, ultra annum Sacerdotalis Ordinis consociationem assequi.

8 Item vacat beneficium Clerici, qui matrimonium contraxit. Nec deerunt fortasse, & alii casus vacua beneficia facientes, qui studiosis lectoribus sacros Canones diligenter reuoluentibus faciliè occurrent.

9 Illud demum sciendum, debere Episcopum, aut alium, qui beneficia conferat, modum exprimere, per quæ

bene-



beneficium à se collatum vacet; nec satis fore, si dixerit vacantem se Ecclesiam conferre.

## T I T V L V S I V.

### *De prohibita Beneficiorum multiplicitate.*

1 **Q**uia contra naturalem rationem est, ut quis curam specialem habeat gregis, quem oculis suis videre nequit, & quem pascere non potest; ideo curatorum beneficiorum pluralitas, cum alias semper, tum maximè Sacrosancto Concilio Tridentino prohibita est. Sed et simplicium beneficiorum possessio execrabilis est, quia habens plura beneficia, non facit plura sacra, nec plura recitat officia, sed vnum: & tamen præcipuè ob cultum diuinum sunt instituta beneficia, qui ne minuatur, prohibita est pluralitas.

2 Deinde, ne destitueretur Ecclesia suis operarijs, cum vnus non possit pluribus in locis residere, nec plurimum ministerium obire. Nec enim rationabile est per seipsum suscipere redditus, & fructus beneficij, & postea velle seruire per substitutum, cum beneficiarij persona ad seruendum altari electa sit, non autem substituti.

3 Item prohibita est pluralitas beneficiorum, ad vitandum varia incòmoda, præcipuè autem auaritiam, & ambitionem, qua Sacerdotes infecti, vel nimium efferuntur, amplis luxuriantes diuitijs, dum ipsis redundat, quod alijs deest: vel postpositis diuinis, soli lucro, & accumulandæ pecuniæ inhiant. Vndè facilè nascitur inæqualitas iustitiæ distributiue, dum vnus varijs abundat beneficijs, & alij longè digniores esuriunt; cum tamen singulis debeant Prælati prouidere, secundum merita cuiusque. Maximè autem ne fideles, præcipuè autem fundatores, sua frustrentur intentione, dum non fiunt illa ministeria, quorum intuitu plura fundata sunt beneficia.

4 Proinde, dupliciter beneficia sunt incompatibilia, nam-

nempè simpliciter, & sub conditione. *Simpliciter incompatibilia sunt*, quæ inuicem se non compatiuntur, vt duæ dignitates, vel vna dignitas cum beneficio curato; vel alio etiam simplici, quod requirit residentiam. Et sic duo Episcopatus sunt ad inuicem incompatibiles; & Episcopatus cum beneficio alio curato, vel residentiam requirente. Duæque Parochiæ curam habentes, sunt adinuicem incompatibiles simpliciter, quia quælibet earum exposcit residentiam, & animarum curam. Item beneficium curatum est incompatible cum dignitate, vel personatu, vel beneficio perpetuo, vel administratione perpetua; vel duæ dignitates, tam seculares, quàm regulares, vt Idue Abbatia, duæ Præposituræ, Decanatus, Archidiaconatus, & alia officia, ac administrationes perpetuæ. *Ex conditione beneficia incompatibilia sunt*, quæ sunt in eadem Ecclesia, & sub eodem tecto, vt duo canonicatus, duæ dignitates, duæ capellanæ institutæ ad eundem effectum, & ad eadem munera. Secus si ad diuersa munera, & effectus.

5 Item, *Alia beneficia dicuntur Uniformia*, & sunt per se incompatibilia, vacantque ipso iure dum aliud assequitur, vt duo curata, duæ dignitates, duo officia. *Alia verò difformia*. quæ sunt diuersarum specierum, vt curatum, & simplex beneficium. Quæ singula dispensat Summus Pontifex ad libitum, Episcopus verò dispensat solum in duo beneficia, si primum non esset sufficiens; vel si sub eodem tecto quis possidet duo difformia, vt Canonicatum, & Capellaniam, quæ non requirit residentiam.

6 Episcopo igitur hæc cura incumbit, ne patiatur suos Clericos plures Ecclesias eodem tempore habere: sed subditos suos, qui plures dignitates habent, vel Ecclesias quibus animarum cura imminet, compellet, vt infra tempus eius arbitrio moderandum, dispensationes suas, quibus id consecuti sunt demonstrent. Quibus non exhibitis, ea beneficia poterunt per ipsosmet Ordinarios alijs conferri, vt Gregorius X. in generali Concilio Lugdunensi sanxit. Quam Gregorij constitutionem Sancta Synodus Triden-



tina innouando constituit, vt Ordinarij locorum, quoscumque plura curata, aut alias incompatibilia beneficia obtinentes, dispensationes suas exhibere districtè compellant. Addiditque præterea, vt ipsi Ordinarij etiam per idoneorum Vicariorum deputationem, & congruæ portionis fructuū assignationem omninò prouideant, vt animarum cura nullatenus negligatur, & beneficia ipsa debitis obsequijs minimè defraudentur: appellationibus, priuilegijs, & exemptionibus quibuscumque etiam cum Iudicum specialium deputatione, & illorum inhibitionibus in præmissis nemini suffragantibus.

7 At si quis contra legem præcepta, eodem tempore plura beneficia tenere non dubitarit, hodie aliam quam olim vindictā sentiet. Vt enim Alexandri III. Ioan. XXII. Innocentij III. & Concilij Lateranen. constitutiones omitram, Synodus Tridentina, sub Paulo III. constituit, vt nemo quacumque etiam dignitate, gradu aut præminetia præfulgens, plures Metropolitanas, seu Cathedrales Ecclesias in titulum, seu commendam, aut alio quouis nomine contra sacrorum Canonum instituta recipere, & simul retinere præsumat.

8 Item sanxit, vt quicumque de cætero plura curata, aut alias incompatibilia beneficia ecclesiastica, siue per viam vnionis ad vitam, seu commendæ propriæ, aut alio quocumque nomine, & titulo contra formam sacrorum Canonum, & præsertim contra formam prædictæ constitutionis Innocentianæ recipere, ac simul retinere præsumperit, beneficijs ipsis iuxta ipsius Constitutionis dispositionem ipso iure, etiam ipsiusmet Constitutionis Tridentinæ vigore priuatus existat.

9 Eadem quoque Synodus sub Pio IV. constituit, vt quibuscumque personis, quocumque titulo, etiam si Cardinalatus honore fulgeant, in postèrum vnum tantum beneficium ecclesiasticum singulis conferatur. Quod quidem, si ad vitam eius, cui confertur, honestè sustentandam non sufficiat, liceat nihilominus aliud simplex sufficiens,

227

ciens, dummodò vtrumque personalem residentiam non requirat, eidem conferri: hæcque non modò ad Cathedralis Ecclesias, sed etiam ad alia omnia beneficia, tam secularia, quàm regularia, quæcumque etiam commendata pertineant, cuiuscumque tituli, ac qualitatis existant.

10 In Religiosis verò Clericis, iam tū à Bonifacio VIII. statutum fuerat, vt si habens Prioratum, vel Ecclesiam cum cura animarum, aliud quoque simile beneficium accepisset, potestate sibi à Summo Pontifice non facta, primo ipso iure vacare censeretur: quod si confestim à se non abdicarit, tanquam ambitiosus ab vtroque arceretur, & amplius deinceps eligi non posset.

11 Est tamen ad supradicta sciendum, quod nisi posterioris beneficii fructus percipere quis possit, primum, quod habebat beneficium, non censebitur vacare. Puta, si illius posterioris beneficii fructus, sicut etiam aliorum beneficiorum vacantium, ad certum tempus alicui sint concessi.

12 Monialis quoque eadem duobus simul Monasterijs præfici non debet, quod & egredi extra septa Monasterij non debeat, nisi cum licentia Episcopi, idque ad breue tempus, & in graui necessitate; & quod minus apta sit regimini quouis masculo, licet insigni prudentia prædita.

13 Verùm quæ hætenus disseruimus de beneficiorum exaggeratione à iure interdicta, secundum regulas communes procedunt; sed earum regularum obseruationem relaxat interdum (vbi Ecclesiæ vtilitatem hoc postulare videt) Summus Pontifex, & nonnunquam etiam Episcopus: vel ex personæ meritis, veluti dignitate, integritate, scientia, plurimo rerum vñ; vel etiam nobilitate, indulgendo vt plura beneficia alicui liceat eodem tempore habere. Et si quidem vtrumque beneficium animarum curam gerat, vniuserit hæc authoritas indulgendi Summi Pontificis: sin vel vtrumque, vel eorum alterum simplex sit, Episcopus quoque gratiam facere poterit, nisi vtrumque in eadem Ecclesia existat. Immodò, etsi plura



220  
sint, quam duo, sed vni tantum ex eis cura animarum adnexa sit, poterit nihilominus Episcopus indulgere, si Ecclesiae utilitas id suadeat, & causa iusta subsit; quod nonnulli extendere volebant: Et si duo curata essent, si publicae utilitatis magis, quam personae meritis Episcopus duceretur.

14 Ceterum, sicut quibus supra dictum est modis, sacri Canones inuigilant, ne vni & eidem personae plura beneficia accumulentur, ita è conuerso prohibent, ad unum beneficium plures personas admitti; ne vel beneficium hoc modo scindatur, vel eorum vnus aut alter expectet, dum à socio vacet, itaque eius mortem expectet. Sicut neque duo eiusdem Canoniciatus, vel prae bendae socij esse possunt.

15 Si tamen praebenda ita opulenta sit, vt duobus victum commode praebere possit, in duas scindi eam licebit; nec Turonense Concilium obsistet, quae si partes sectae non sufficerent, ambae essent perfectiores in ex praebendis alijs vacantibus augendae, earum fructus praebendas sectas habentibus pro parte tribuendis, dum tot fructus ex eis super sint, quot Canonico sufficiant. Alia enim praebenda attenuari non debet, vt alia locupletetur, nisi necessitate aliqua impellente. Si verò aliqua praebenda Cathedralis Ecclesiae ita inops sit, vt Clerico ad victum opportunum non sufficiat, Capella ei annexi poterit, dum ne illius presbyter et ipse congrua portione defraudetur, si Capella vtrique satis esse potest.

16 Animaduertere autem in primis debet is, qui conferendi potestatem habet, ne ex affectu carnali, sed sano & recto iudicio Ecclesiasticum officium, vel beneficium, & in personam, quae magis visa fuerit idonea, locet. Item, vt neque ex passione, vel ex conuentione quacumque conferat; nec sibi retineat vllam reddituum portionem, aliove modo beneficium diminuat. Consultius etiam fuit, si palam, non clam beneficium contulerit.

*De Pensionibus.*

**Q**uamuis beneficia integra conferri debeant, vt supra monuimus, non diminuta, potest tamen ex his interdum aliqua decessio fieri, vt fructuum portio ab eis detracta alicui suppeditetur, quæ portio *Pensio* appellatur, quod alteri à beneficio pendatur.

2 *Est igitur Pensio*, ius percipiendi fructus ex aliquo beneficio, durante vita pensionarij, ex iusta causa conoessa: aliàs peccaret concedens, si beneficiato hoc onus vexationis causa imponeret.

3 *Triplex autem Pensio esse solet*, scilicet Temporalis, Spiritualis, & Mixta, seu Media. *Temporalis* conceditur alicui remunerationis causa pro aliquo ministerio temporali exhibito extra Ecclesiam, vt Duci exercitus, vel militi pro Ecclesia pugnanti. *Spiritualis* conceditur personæ alicui spirituali, propter aliquod officium spirituale erga Ecclesiam, vt est illa, quæ datur Coadiutori Episcopi, vel Parrochi, vel Sacristæ, vt Ecclesiam præparet, eique seruiat: & sic de alijs. Et tales pensiones vendi nequeunt absque labe simoniæ, sine consensu Summi Pontificis. *Media Verò Pensio est*, quæ nempe Clericis, & Laicis dari potest; illis in titulum beneficij cū ad ecclesiasticos Ordines recipiuntur; his mercedis pro labore, vel vexationis redimendæ causa. Nam si daretur Clerico, vt inde congruè viuat, quamuis olim dicebatur pensio mere prophana, ac temporalis, hodie tamen est spiritualis, quia Pius V. mandauit, quod huiusmodi pensionarij teneantur Officium Beatæ Virginis Mariæ recitare. Et consequenter licet illa annua pecunia natura sua vendi posset, ex quo est respectu fructuum, & spiritualis non est, nihilominus quia post Bullam Pij V. assignatur Officiū spirituale, proinde absque labe Simoniæ vendi nequit, nisi Summus Pontifex auferret ab huiusmodi pensionibus officium. Nam quatenus habet



227  
bet annexum officium, nec ipse Summus Pontifex posset pensiones vendere, quia venderet spirituale. Et idem est, si huiusmodi pensiones darentur laicis, quia tenerentur recitare officium paruum Beatæ Virginis.

4 Sciendum itaque est, quod *tribus modis potest imponi pensio super beneficio. Primo.* Si quis renunciauit beneficium in alterius utilitatem, vel illud cum alio permutauit, & sibi certam pensionem seruauit. *Secundo.* Quando per transactionem, & arbitrio iudicis beneficium litigiosum consignat alteri, relinquens sibi certam pensionem ex illo. *Tertio.* Quando quis per plures annos seruit beneficio, & amplius illi seruire nequit, & illud resignat alteri, assignata super eo pensione ad suam congruam sustentationem, ne interea dum superstes est, vitam inopem in senio, egenamque trahat.

5 Semper tamen moderatam, & iustam pensionem esse oportet, ne usque adeò beneficium extenuet, ut eius Rectori non supersit, unde sustentari valeat. Hinc ferè obseruari solet, ut non maiorem tertia parte beneficii deducant: id est, ut quantitas fructuum, quæ ex beneficio in pensionem detrahitur, tertiæ partis annui redditus beneficii onerati summam ne transiliat. Quod eò sic dictum, & declaratum volumus, ne cui persuasum sit, posse pensionem per quotas assignari, id enim prohibitum est, quia Simonix vitio non careret. Ac in summa id animaduertendum est in pensione imponenda, ut post solutam pensionem tantum beneficio remaneat, unde possit commodè viuere, iura Episcopalia soluere, & beneficii omnia onera ferre.

6 Potest autem quis ordinari pensionem in titulum donationis habens, si ita Episcopus iudicauerit assumendum pro necessitate, vel utilitate Ecclesiæ, & si donatio esse vera, & non ficta, quæ deinceps alienari non possit absque Episcopi licentia, donec beneficium sufficiens adeptus fuerit, vel aliunde habeat unde viuere possit. Potestq. Episcopus ordinare subditos ad Ordines Diaconatus ad

titu-

titulum, & pensionem Ecclesiarum matricium, non obstante, quod non participant de fructibus illarum, nisi post susceptum Presbyteratus Ordinem.

7 Illa quoque pensio improbat, quæ per collusionem constituitur, ut cum Rector Ecclesiæ ultro patitur, vel etiam procurat sibi litem fieri, ut sub hac litis redimendæ specie, commentitio aduersario aliquam pensionem fictæ, simulatæq. transactionis causa promittat super litigioso beneficio. Nec is tutus erit qui pactione prius inita pensionem obtinuerit, nisi Summi Pontificis sese autoritate munierit.

8 Ante omnia verò pensionis imponi onus vllum non debet, nisi Antistitis accedente autoritate. Sed non Pontifex Romanus solum pensioni excipiendæ author esse potest, verum etiã Legatus a latere eius profectus. Alius autẽ Legatus non potest, nisi hoc ei specialiter sit concessum.

9 Item Episcopus pensionem deducere potest, si qua eum iusta causa moueat, quæ euidẽtem Ecclesiæ utilitatem importet, ut paulò superius diximus, dummodo neque pensionis transferendæ potestatem eum facere posse, neque post eius mortem, cui concedenda est, posse eam perpetuare intelligamus. Hoc enim ins soli Romano Pontifici comperit; contra successores quidem eius, qui ad eã soluendam tenebantur, hoc onus transit.

10 Item, qui aliquam Ecclesiam erigit, ut patronatum eius nanciscatur, potest in eius fundatione pensionem de beneficio excipere, alij Ecclesiæ, aut sibi, Episcopi accedente consensu, quotannis soluendam.

11 In primis verò eius Rectoris consensus exigitur in pensionem constituenda, qui id oneris subiturus est, quisquis sit is, qui pensionis onus est impositurus, seu Summus Pontifex, seu Legatus, seu Episcopus; quod etiam Regulis Cancellariæ sanciri solet.

12 Sed neque infante minor, neque illegitimus, neque excommunicatus, pensionis illius capaces sunt, quæ vel beneficij loco, vel in titulum datur.

13 Extingui autem pensio potest, etiam sola partium con-



conspiratione, licet nulla Antistitis authoritas accedat; nisi in alimenta sit constituta, vel pecunia data redimatur, quemadmodum frequenter vsurpari videmus, quinque fortè aut sex, aut septem ad summum anticipatis pensionibus annuis. Quibus casibus receptum est Summi Pontificis authoritatem desiderari.

## T I T V L V S V I.

### *De Permutatione Beneficiorum.*

**P**ermutatio beneficiorum fit, quando aliquis cedit interdum beneficium suum, vt ei conferatur, à quo ipse inuicem aliud beneficium per eum resignandum consequatur. Permutatio enim beneficiorum quaelibet, non sine resignatione in manibus Antistitis facta celebratur, cum non sit in potestate mea, vt meum tibi propria authoritate beneficium conferam, nec tu, vt mihi tuum, sed vterque nostrum in manibus Antistitis prius reponere debeat, qui deinde vtrique nostrum alteri alterius beneficium conferet, hocque modo permutatio fiet.

2 Nec est, vt vereantur hi, qui beneficia sua permutationis causa resignarunt, ne propositum eorum eludatur, ac alijs ea beneficia conferantur. Nam, etsi olim hoc liceret, hodie tamen secus est. Quia collatio alteri facta, quam ei, cuius contemplatione permutationis causa facta est resignatio, nullius est momenti. Nec etiam Simoniae metus aliquem deterreat, vt non ausit de permutando beneficio pactum inire: nam, si ad Apostolicæ Sedis, alteriusve Antistitis authoritatem habentis consensum, & authoritatem hoc suum pactum retulerit, hoc metu liber esse poterit.

3 Author autem permutationi is Episcopus esse potest, cuius iurisdictioni beneficium permutandum subest. Hinc, si in diuersis Dioecesibus beneficia permutanda sita sint,

sint, vtriusque Episcopi autoritas adhibenda erit: vterque enim beneficiatus in manibus proprii Episcopi suum beneficium resignabit, & alter Episcopus alterius Episcopi subdito Clerico illud conferet. Vel alter Episcopus ex his, alteri Episcopo vices suas committere poterit, vt nomine etiam suo conferat.

4. Alius verò Prælatus Episcopo inferior, quamuis aliqui ius conferendi haberet, permutationi tamen author esse non potest, sed eius duntaxat consensus Episcopo auctoritatem præstanti in permutatione erit adhibendus. At Cathedralis Ecclesiæ Capitulum eorum duntaxat beneficiorum permutationes admittendi ius habet, quæ beneficia ipsum pariter Capitulum, vel solum, vel vna cum Episcopo conferre poterat.

5. Vicarius autem Episcopi permutationi faciendæ nullam auctoritatem præstare potest, nisi hoc ei specialiter ab Episcopo mandatum sit; est enim hoc proprium Episcoporum priuilegium. Nullum verò tempus per Canones definitum est, intra quod debeat huiusmodi auctoritas permutationi celebrandæ post resignationem factam, adhiberi; sed siquidem Episcopus sine causa detrectaret beneficium ei conferre, qui suum beneficium permutationis causa resignarit, esset à suo Antistite ad hoc compellendus.

6. Eorum quoque consensus permutationi adhibendus erit, ad quos ius eligendi ad beneficia permutanda, vel ius præsentandi spectat.

7. Potestque vnum beneficium cum pluribus permutari, & plura cum vno: & beneficium simplex cum curato: & e conuerso. Et simplex cum simplici, & curatum cum curato, nisi aliud impedimento sit. Non debent tamen spiritualia cum profanis permutari. Nec ius, quod quis in re habet, cum iure, quod alius habeat ad rem: quanto minus permutatio illius valebit, qui nullum ius omnino in beneficio habuerit.

8. Causa autem in primis in permutatione faciendæ le-



gitima requiretur: nam, cum præbendarum commutationes de iure prohibeantur, pactione præsertim præcedente, quæ circa spiritualia, & his annexa labem continet Simoniam, idcirco non sine causa necessaria fieri debeat.

9 Postremo sciendum est, quod, si quis permutationis pactum ex parte sua impleverit, altera parte permutationem exequi in latere suo detrectante, ad suum beneficium is, qui adimplevit, restituendus est.

## T I T V L V S V I I.

### *De Institutionibus, & Iure Patronatus.*

1 **L** Atè patet hoc verbum Institutio apud Grammaticos: & adaptatur à Iureconsultis interdum ad contractus, ad obligationes, ad actiones, & ad ultimas voluntates; quia omnis ferè ordinatio potest appellari institutio. Sed in hac materia beneficii iuris translativa; *Institutio secundum Canones est*; Ecclesiæ, seu beneficii ecclesiastici collatio, quasi ius habentem ad beneficium, per præsentationem intus, vel in beneficium Clericalis personæ statutiua. Accidit enim sæpe sæpius, ut Prælati liberam de vacantibus beneficiis disponendi facultatem non habeant, sed aliquis alius, siue spiritualis, siue laicalis personæ ius obtinet patronatus: tunc enim strictè sumpto vocabulo institutionis, non conferre beneficium, sed instituere ad illud dicentur eos, quibus præsentante patrono, providendum erit.

2 *Ius autem Patronatus est*, potestas præsentandi instituendum ad beneficium vacans. Quod sanè varijs modis constituitur, videlicet, Ecclesiæ adificatione, fundatione, dotatione, & similibus. Quia sicut in carnali matrimonio ad onera sustinenda dos assignari debet; ita etiam qui erigit Ecclesiam de consensu Dioecesani, iuris ordine servato, debet certos assignare redditus, quæ ad luminaria, & ad custodiam, ad stipendia ministrorum, & ad cætera sacræ

sacræ domui necessaria sufficiant, quæ dotis nomine appellantur. Loco autem remunerationis beneficij collati, institutum est, vt eiusmodi benefactores ipsi ad Ecclesias à se fundatas, seu dotatas, præsentent Sacerdotes loci Ordinario, & *Iure Patronatus*, seu aduocatione gaudeant; siue Laici sint, siue Clerici, (etsi in Collegiata Ecclesia longè infirmius habeat ius laicus.) Quod si verò quis, det & assignet certa bona Ecclesiæ, sed non nomine dotis, non habebit huiusmodi ius patronatus, nec dicetur Patronus, sed Benefactor tantum.

3 Et quia *Ius Patronatus adipiscitur*, partim fundi largitione pro ædificanda Ecclesia, partim ædificatione Ecclesiæ sumptibus proprijs, & partim dotatione non sordida Ecclesiæ iam ædificatæ; ideò sciendum est, quod si quispiam solus hæc tria præstiterit, vel vnum ex his, soli etiam totum hoc iuris integrè quærat: sin tria hæc munia, à duobus, vel tribus, pluribusue diuisim obita sint, ambo, vel omnes illius Ecclesiæ acquirant patrociniū.

4 At decreuit sacrosancta Synodus Tridentina, vt titulus iurispatronatus sit ex fundatione, vel dotatione, qui ex authentico documento, & alijs requisitis à iure ostendatur. Siue etiam ex multiplicatis præsentationibus per antiquissimum temporis cursum, qui hominum memoriam excedat, aliàsue secundum iuris dispositionem. In his verò personis, seu communitatibus, vel vniuersitatibus, in quibus id ius plerumque ex vsurpatione porius quæsitū præsumi solet, plenior, & exactior probatio ad docendum verum titulum requiratur.

5 Nec immemorabilis temporis probatio aliter eis suffragetur, quàm si præter reliqua ad eam necessaria, præsentationes etiam continuæ non minori saltem, quam quinquaginta annorum spatio, quæ omnes effectum sortitæ sunt, authenticis scripturis probentur. Reliqui patronatus omnes à beneficijs tam secularibus, quàm regularibus, seu parochialibus, vel dignitatibus, aut quibuscunque alijs beneficijs, in Cathedrali, vel Collegiata Ecclesia;



seu facultates, & priuilegia concessa, tam in vim patronatus, quàm alio quocumque iure nominandi, præsentandi, eligendi ad ea, cum vacant; exceptis patronatibus super Cathedralibus Ecclesijs competentibus, & exceptis alijs, quæ ad Imperatorem, & Reges, seu Regna possidentes, aliosque sublimes, & supremos Principes, iura imperij in dominijs suis habentes, pertinent: & quæ in fauorẽ Studiorum generalium concessa sunt, in totum prorsus abrogata & irrita, cum quasi possessione inde secuta intelligantur. Beneficiaque huiusmodi tanquam libera à suis collatoribus conferantur: ac prouisiones huiusmodi plenum effectum consequantur.

6 Item statuit, vt Patronatus quicumque in ecclesijs, & quibuscumque alijs beneficijs, etiam dignitatibus antea liberis acquisiti, à quadraginta annis citrà, & in futurum acquirendi, seu ex augmento dotis, seu ex noua constructione, vel alia simili causa, etiam auctoritate Sedis Apostolicæ, ab iisdem Ordinarijs vti delegatis, vt supra, qui nullis in his facultatibus, aut priuilegijs impediuntur, diligenter cognoscantur. Et quos non reppererint ob maximè euidentem Ecclesiæ, vel beneficij, seu dignitatis necessitatem legitimè constitutos esse, in totum reuocent, atque beneficia huiusmodi sine damno illa possidentium, & restituto patronis eo, quod ab eis idcirco datum est, in pristinum libertatis statum reducant, non obstantibus priuilegijs, constitutionibus, & consuetudinibus etiam immemorabilibus.

7 Ex isto autem Iure patronatus, patroni hæc consequuntur, quòd cum Dioecesani consensu Ecclesiam construxerint, fundauerint, vel locupletauerint, non solum ipsi idoneos Rectores in illis Ecclesijs Episcopo offerre possint instituendos, vt supra monuimus, quibus spretis, si Episcopus ibi alios instituerit, nihil egerit, isque instituendus erit, quem ipse Patronus præsentarit: sed etiam honorem præcipuum in sua Ecclesia habebit, vt ei v. g. prius detur, quàm alijs quibusuis palma in die Palmarum, &

candela in die Purificationis, & primus locus in supplicationibus, atque processionibus. Et si deuenierit ad egestatem, aut eius filij eo inopiæ reducti fuerint, vt suppetijs alienis egeant, ab eadem Ecclesiâ præsidium vitæ pro temporis vsu percipient.

8 Ipse autem Patronus Ecclesiæ tutelam sic suscipere debet, vt quod possit, eam ab omni iniuria tueatur, reparet, & si collapsa sit, illam reedificet. Et cum presbyterum in ea institutum Ecclesiæ non esse vtilem cognoscit, quia fortè frugi non sit, sed dilapidator, bonorumque inhonestus concoctor, Episcopo denunciare debet.

9 Non tamen credat Clericus, qui Ecclesiæ Patronus est, sibi licere ad eam ecclesiam seipsum offerre institutum, quamuis alioqui valdè idoneus sit, pluribusque meritis adiunctus. Nemo enim se ingerere debet ecclesiasticæ Præfecturæ officijs: neque habet Patronus vendendi per se, vel donandi, vel tanquam proprijs vtendi rebus Iuris patronatus. Nec vllum omninò grauamen ecclesiæ imponere potest: nihilque ex ea præter antiquos, & moderatos redditus à locorum Episcopis institutos exigere.

10 Iuris patronatus non tantum mares, sed feminae etiam sunt capaces, ac illud possidere possunt, etiam si esset Monasterium. Et transit ad feminas etiam nuptas extra familiam, & descendentes ex eisdem feminis Nisi aliud cautum sit in fundatione. Similiter si succedat ad ius patronatus, & ipsa nubat, quamuis ad eam propriè, & consequenter ius præsentandi pertineat, tamen honoris causa simul cum marito præsentabit, vt volunt D. D. Successione quoque ius patronatus acquiritur, siue ex testamento, siue ab intestato sint hæredes. Plures tamen ab vtro ex patronis ecclesiæ relictæ hæredes, vocem dumtaxat vnius habebunt in præsentatione Rectoris, nec iam institutos mutare poterunt. Et si forte in plures partes Patronorum se vota in præsentando diuiserint, ille præficiendus est ecclesiæ, qui maioribus iuuatur meritis, & plurimum approbatur consensu. Et quemadmodum à multis, præsentatio  
debet



debet fieri concorditer, ita & variatio; nec enim sufficeret illam fieri a maiori parte.

11 Et quamuis non sit habenda differentia inter laicos & personas ecclesiasticas quo ad ius patronatus obtinendum, sunt tamen istæ circumstantiæ in re Patronatus obseruandæ, quæ videntur non nihil differentiæ habere, quod ecclesiastico ad præsentandum sex mensium conceditur spacium, laico verò quadrimestre spacium datur. Quo sanè tempore elapso Episcopus potest prouidere, & illud cõferre. Sed tamen videtur optima ratione inductum, vt longius præfigatur tempus ecclesiasticis, quippe, quibus semel facta præsentatione, amplius variare minimè licet, quod in laicis diuersum statuitur.

12 Constituit quoque idem sacrosanctum Concilium Tridentinum sub Pio IV. ne Patroni beneficiorum, cuiuscunque ordinis, & dignitatis, etiam si Communitates, Vniuersitates, Collegia quæcunque Clericorum (etiam Societatis Iesu) vel laicorum existant, in perceptione fructuum, prouentuum, obuentuum quorumcunque beneficiorum, etiam si verè de iure patronatus ipsorum ex foundatione, & dotatione essent, nullatenus, nullaue causa, & occasione se ingerant, sed illos liberè Rectori, seu beneficiato, non obstante etiam quacunque consuetudine, distribuendos dimittant.

13 Item constituit, ne patroni ius patronatus venditione, aut alio quocunque titulo in alios, contra canonicas sanctiones transferre præsumant: sin secus fecerint, excommunicationis, & interdicti poenis subiiciuntur, & dicto iure patronatus, ipso iure priuati existant. Nisi tale ius cum vniuersitate rerum temporalium transferretur.

14 Non licet etiam Clericis Ecclesias à parentibus suis fundatas, propria auctoritate retinere, aut laicis, laicorumue filiis concedere. Sed sicut patroni iura per Episcopum minui non possunt; sic è contra non potest patronus sine Episcopi auctoritate ius suum exercere. Nam præsentatio Patroni vt institutio subsequatur Episcopi auctorita-

ritatem desiderat, cui quidem Episcopo, nullum certum tempus ad institutionem faciendam legibus definitum est, sed Iudicis arbitrio relinquitur. Episcopo autem ex eadem Synodo licebit, presentatos à patronis, si idonei non fuerint, repellere.

15 Quod si ad inferiores institutio pertineat, ab Episcopo tamen iuxta alias statuta ab eadem Synodo, examinandi sunt. Alioquin institutio ab inferioribus facta, irrita erit & inanis; nihil operante prætextu cuiusvis privilegi, seu consuetudinis, etiam ab immemorabili tempore præscriptæ; nisi fuerint prius à locorum Ordinarijs examinati, & idonei reperti. Et nullus appellationis remedio seu tueri potest, quominus examen subire teneatur: presentatis tamen electis, seu nominatis ab Vniuersitatibus, seu Collegijs generalium Studiorum exceptis.

16<sup>a</sup> Laicus Patronus, qui Episcopi neglecta auctoritate Clericos in ecclesia instituerit, possessione sue, aut alia ecclesiastica bona ex sententia sua liberè distribuerit, anathemate est feriendus. Et Clericus, qui ecclesiam per laicos sine proprii Episcopi auctoritate acceperit, communione priuatur: si verò in ea etiam persistere non dubitauerit, à ministerio ecclesiastico, & ordine deponetur.

17 Si tamen laicus ius patronatus sibi competens eidem, vel alteri ecclesiæ, vel alij loco Religioso contulerit, quamuis sine Episcopi assensu, concessio valebit; sed nihil tamē per hoc iuri Episcopi derogari censetur. Et tunc, quamuis Patronus laicus, qui ius suum transtulit, quadrimestre duntaxat ad præsentandum tempus habeat, locus tamen prius, in quem tale ius, translatus fuerit, semestri potietur. Nam, quod ad præsentandi ius attinet, non laici cui successit, sed ecclesiasticorum iuribus locus hic prius vti conceditur.

18 Episcopia autem ius in faciendis institutionibus adeo firmum, & stabile est, vt quamuis ius patronatus ad exēptos perueniret, nihilo tamen magis Episcopi ius tollatur, vel debilitetur: quinimmodò, si Episcopus aliquis sit patronus



mus ecclesiæ in aliena Diocesi positæ, ipsius sola authoritas non sufficiet, sed ab illius Diocesis Episcopo instituendus erit ille, quem Episcopus patronus idoneum præsentarit.

19 Cum autem Patronus quempiam virum idoneum coram Episcopo instituendum constituerit, si eo non repudiato, alterum postea æquè idoneum stiterit, vter eorum præferendus sit, iudicio Episcopi relinquetur; si laicus sit Patronus. Si verò Collegium, aut persona ecclesiastica ius patronatus habeat, prior tempore oblatus potior habebitur. At si Episcopus idoneum Clericum sibi à Patrono oblatum admittere noluerit, alterque ab eodem adductus pariter idoneus, & ab Episcopo admissus, corporalem possessionem acceperit, melior possidentis erit conditio, quoniam, aurequam præsentatio per Episcopum admittatur, & approbetur, ratum non est, quod à Patrono fuerat inchoatum. Episcopus tamen, qui hominem idoneum ad se à Patrono adductum dolosè recusarit instituere, de beneficio competenti providere illi cōpelletur.

20 Episcopus verò solus etiam, ac eo negligente Metropolitani, alijque superiores immediati successivè, illis ecclesijs providebunt intra novum sex mensium spatium, de quarum patronatu contentio cum esset inter ecclesiasticas personas, nec constaret, quis Patronus esset, ultra sex menses à vacationis tempore, electio Rectoris sit dilata, vel ultra quatuor, cum laici essent, qui disceptabant. Ut tamen nullum illi in posterum præiudicium fiat, qui superior in lite fuerit, quin ipse cum sistere debeat, quem Episcopus instituendum decreverit, ac ceteros omnes deinceps, qui in ecclesia erunt instituendi.

21 Interdum etiam contingit, ut ius præsentandi vñ cum Patrono competat etiam ei, qui omninò Patronus non sit: finge enim, gratia exempli, patronale beneficium in alterius ecclesia, vel parochia esse, hoc casu p rofectò illius ecclesiæ, vel parochiæ Prælati vñ cum Patrono instituendum præsentabunt.

22 Aliud deinde est ius patronatus in multis simile, se ab eo tamen etiam in multis absimile; id est, cum Religiosi ecclesiam aliquam sibi subiectam habent, tam quoad spiritualia, quàm quoad temporalia, in qua tamen plene iure instituere non possunt, nec curam populi committere, sed autoritas Episcopi desideratur: nam hoc ius ita à Patronatu differt, quod, qui illud habent, ipsi redditus ecclesiæ illius percipiunt, & congruam portionem Rectori assignant. At, qui patronatum habent, nihil reddituum percipere possunt, sed integri prouentus Rectori instituto permittuntur.

23 Et ex his potest facillè cognosci, quæ differentia sit inter præsentationem, & institutionem. Nam præsentatio fit à Patrono, ratione iuris quod habet in Iure patronatus: institutio verò fit ab Ordinario, quando Patroni inter se non concordant. Inter quos, si ita simultates ortæ fuerint, ut Sacerdos ibi suo officio canonicè fungi nō possit, si aliter prouideri non poterit, præcipere debet Episcopus, ut ibi Missarum solennia non celebrentur, donec Patroni ad concordiam redeant. Quibus tamen potest prorogare tempus iusta ex causa, quemadmodum & abbreviare, si prorogatio respicit præiudicium ipsiusmet Episcopi prorogantis.

24 Quod si necessarium aut expediens esse duxerit, poterit etiam interim ecclesiam alicui commendare, ita tamen, ut si Parochialis sit ecclesia, nemini commendetur, qui non sit in Sacerdotio constitutus. Nec huiusmodi cōmenda, vel intra semestris temporis spatium vires suas porriget, nec in vnius persona, nisi vnica fieri poterit.

25 Erit etiam Episcopo facultas in ecclesijs, in quibus ecclesiastica persona præsentationem non habet, si vel minus idonei præsententur, vel alia de causa, aliquos in eis instituere non valeat, Oeconomos ponere, qui colligant fructus erogandos in ecclesiarum utilitatem; aut his, qui quandoque instituentur fideliter seruandos.

26 Sunt autē Institutiones collationibus in quibusdam



similes, in quibusdā verò dissimiles. Similes sunt, quia quēadmodū is, qui seipsum præsentat, instituendus non est; ita etiā is, ad quem pertinet collatio, seipsum nō potest instituere, cum inter danteur, & accipientem distinctio debeat esse personalis. Item, quemadmodum vacaturæ præbendæ non tenet regulariter collatio, ita etiam promissiones de non vacantibus beneficijs ecclesiarum, in quibus quis ius obtinet patronatus, nullo iure subsistunt.

27 Dissimiles verò sunt, quia etsi Capitulum sede vacante, beneficia, quæ ad collationem Episcopi pertinet, conferre non possit, præsentatos tamen à Patronis potest, si idonei sunt, admittere, & instituere. Idem obrinet in Vicario, quia licet sine speciali concessione conferre non possit, præsentatos tamen instituere minimè prohibetur.

28 Sunt etiam in eo dissimiles, quod in Rectorem Parochialis ecclesiæ, & non in sacris constitutus præsentari potest, dummodò aliàs sit idoneus, & infra tempus à iure constitutum ad Ordines, quos ipsius ecclesiæ cura requirit, promoueri valeat. Collatio autem fieri non potest in persona eius, qui saltem sit in subdiaconatu constitutus.

29 Cum his tamen, qui in minoribus sunt Ordinibus constituti, si tales sint, qui infra breue tempus possint in presbyteros ordinari, dispensari poterit per Episcopum.

30 Tollitur autem ius patronatus cessione; vt puta, cum quis id ecclesiæ, in qua ius habet huiusmodi, conferendum duxerit. Item si quis ecclesiam sine sui reservatione iuris Collegiatam fieri patiatur. Eo amplius constat, si ædes sacræ incendio consumptæ fuerint, vel etiam terræ motu, vel vitio suo corruerint, extinguī ius patronatus necesse est. Sed etsi Patronus ausu nefando Rectorem, vel Clericum ipsius ecclesiæ per se, vel per alios occidere, vel mutilare ausus fuerit, tam alias pœnas, quàm iuris patronatus amissionem sustinere debet. Idem iuris est, si Patronus efficiatur hæreticus: cum enim bona hæreticorum vniuersa sint confiscanda, merito cum ipsa vniuersitate, etiam ius patronatus interibit.

*De Clericis non residentibus .*

**O**Mnes obtinentes beneficia ecclesiastica, tenentur residere, & curam demandati sibi officij per seipsoſ diligenter exercere . Quod si aliter actū fuerit , & receptus fuerit ad ministerium ecclesiasticum , quod contra sacros Canones illud acceperit , amittet : & qui dederit , largiendi potestate priuabitur .

2 Quod si ab initio idonei ad residendum reputati , postea ecclesias , vel præbendas sibi concessas , sine iusta , & necessaria causa deferant , & moniti congruo tempore expectati non redierint , eis priuari poterunt . Maximè autem ex non residentia Episcopi , Clerici efficiuntur irreligiosi , sæculares irreuerentes , pauperes oppressi , aut neglecti , & munera pastoralia omiſsa , seu deserta : vnde hæreses , schismata , & omnis impietas Atheistica . De iure igitur Diuino ad residentiam tenentur Episcopi , & omnes curata beneficia habentes , ne eorum à quibus probati sunt , fidem fallant , vt monet sacrosancta Synodus Tridentina , & Urbanus VIII. in Bulla sua , de residentia Episcoporum , vt sciant oues suas cognoscere , proque ijs sacrificium offerre . & verbi Diuini prædicatione , Sacramentorum administratione , ac bonorum operum omnium exemplo pascere , pauperum , aliarumque miserabilium personarum curam paternam gerere , & in cætera munia pastoralia incumbere .

3 Quod autem Parochus ante Concil. Trid. poterat studiorum causa per septennium de Ordinarij licentia abesse , hoc sacri Concilij Congregatio sustulit modo , dicens Obtinentibus Parochiales ecclesias , post Concilium Tridentinum studendi licentia , ac in absentia studiorum , causa fructus percipiendi , non datur : ne sub hoc prætextu studiorum , seruitium ecclesiæ defraudetur . Et hinc per concursum idoneus Rector Parochiali ecclesiæ quæritur ,



qui iam antea studuerit, nec sit illi necesse studiorum causa absentiam facere.

4 Et quia multi pro obtinenda licentia studiorum causa, ut fructus percipere possint ad Sedem Apostolicam recurrere consueuerunt: Pius IV. fecit quandam Constitutionem, sub data 24. Nouembris. 1564. quæ est in Bullario 113. per quam sancit, quod tales licentiæ concessæ, nullatenus suffragentur, nisi Ordinarij consensus accedat.

5 Nec potest Episcopus Rectorem ecclesiæ Parrochialis occupare in seruitio suo, aut ecclesiæ suæ Cathedralis; ut exerceat officium Vicarij, Visitatoris, Secretarij, Lectoris in Schola, seu Seminario, aut Monasterio: ut similiter sacra Congregatio Concil. Trident. censuit, nisi pro tempore duorum mensium, donec idoneus aliquis alius ad illud officium deputetur. Imò non excusatur à residentia, exercens officium Inquisitoris, aut officium Subcollectoris Apostolici. Sed nec lis mota super eadem parochiali, in solo petitorio, non autem in possessorio, eum à residentia excusare valet; prout eadem Congregatio Eminentissimorum Interpreterum determinauit. Propter necessitatem igitur abeunti dabit licentiam Episcopus ex causa, si relinquat Vicarium idoneum.

6 Iustæ autem non residendi causæ sunt, veluti si quis relicto idoneo Vicario, aut Romano Pontifici, aut proprio Episcopo obsequium exhibeat. Item si iura & negotia ecclesiæ suæ fideliter prosequatur; euidentem Reipublicæ utilitatem curet; aut speciale indultum habeat absentandi se studiorum causa; aut grauem infirmitatem, & diuturnam, ut lecto affixus venire non potuerit, quamuis monitus à Prælato; vel ob capitales inimicitias latitare debeat; terreaturque metu Tyranni existentis in loco; & alia iusta impedimenta habeat. Sed voluptatibus vacantes peccant mortaliter, & nihil iuris habent in fructibus rerum ecclesiasticarum. Et si dictos fructus recipiunt, restituere tenentur secundum omnes Doctores, quia redditus ecclesiarum sunt stipendia seruientium, non lenocinantiũ.

7 Canonici verò , quorum seruitio vtitur Episcopus , etiam subtrahendo eos ab officio diuino quotidiano , habentur pro residentibus , & ad quotidianas distributiones pertinent , quia videntur seruire toti Diocesi: prout seruientes Papæ , videntur seruire vniuersali ecclesiæ. Sed non debent esse plures p[er]nes Episcopum, quàm duo: nisi id grauis necessitas exigit .

8 Quod si fortè quis abiens studiorum causa , non attenderet studio , nec intraret scholas, talis non debet gaudere hoc beneficio , vt fructus ecclesiæ percipere possit . Si verò inhonestè viueret , vel reuerteretur ignarus , talis omninò poterit beneficio priuari .

9 Quamuis enim beneficium simplex sit , non minus tamen Clericum, cui id assignatum est, vt resideat, de iuris obligatione, etsi aliud mala consuetudine inductum videatur . Quocirca si quis Clericus à suo beneficio diutius abfuerit, quàm ecclesiæ utilitas exposceret , monendus erit , terminusque ei statuendus , intra quem commodè reuerti possit: quo lapso , si omninò sine causa probabili sui copiam non fecerit , beneficio priuari poterit , illudque in alium transferri .

10 Ceterum , si incertum sit, vbi nam gentium agat Clericus , vel Prælatus , qui à sua ecclesia desideratur : vel si ita absit , vt non facile ad eum citatio deferri possit , tribus edictis euocari eum oportebit , publicè propositis in eius ecclesia ; quibus si minimè audiens fuerit, & sex menses expectatus non redierit , ecclesia illa spoliari legitime poterit .

11 At si in rem ecclesiæ fortè non sit, vt Clericus hic , vel Prælatus, propter ipsius præstantiam ab ea exturbetur, puta , quia eius opera multis de causis ecclesiæ utilis noscatur, dum adsit, eamque impigre velit , vt decet , ac sedulo præstare , ideòque melius videatur, eum ad ecclesiæ ministeria iuris remedijs reuocare . Ita poterit procedi, vt per suspensionis , vel excommunicationis remedia redire compellatur ; quæ, si nihili se facere ostenderit, tunc verò  
etiam



etiam spiritualium administratio interdicetur. Quod si is, qui desideratur Prælati, in Pontificia dignitate constitutus sit, ad Legati, vel alterius officium hoc pertinebit, ut ex speciali mandato Summi Pontificis, hunc Episcopum ita meritum ab episcopatu remoueat. Episcopus enim quivis ab alio, quam à summo Pontifice episcopatu priuari nequit. Quare nec prior procedendi modus, à nobis supra in hoc titulo traditus, poterit aduersus Episcopum exerceri, sed posteriorem hunc in eum experiri est necesse, nempe, ut suspendatur ab Archiepiscopo, & excommunicetur, & demum Summi Pontificis mandato Episcopatu priuetur.

12 At iura, quibus Clerici ad residendum coguntur, ita procedunt, ut nullum faciant discrimen intra beneficia opulenta, & tenuia: aut inter ordinem, seu dignitatem supremam, & infimum ordinem, & dignitatem. Nam & Clericum habentem beneficium non excedens prouentum viginti aureorum annuorum, residere nihilominus oportere aiunt. Et Cardinales quoque ipsi, huic sanctioni subiacent Urbano VIII. sic iubente. Cum & Leo III. Anastasium presbyterum Cardinalem tituli B. Marcelli deposuerit, eo quod Parochiam suam annos quinque deseruauit iacere passus fuisset.

13 In hanc etiam rem vehementer, eadem sacrosancta Synodus Tridentina incubuit. Nam primum sub Paulo III. constituit, ut si quis à Parochiali, Primatiali, Metropolitana, seu Cathedrali ecclesia quocumque titulo, causa, nomine, seu iure commissa, quacumque ille dignitate, gradu, & præminencia præfulgeat, legitimo impedimento, seu iustis, & rationabilibus causis cessantibus, sex mensibus continuis, extra suam Dioecesim morando abfuerit, quartæ partis fructuum vnius anni fabricæ ecclesiæ, & pauperibus loci, per Superiorem ecclesiasticum applicandorum poenâ ipso iure incurrat. Quod si per alios sex menses in huiusmodi absentia perseuerarit, aliam quartam partem fructuum similiter applicandorum, eo ipso amittat. Cre-

feca-

sciente verò contumacia, vt seueriori sacrorum Canonum censuræ subijciatur.

14 Metropolitānus, Suffraganeos Episcopos absentes, Metropolitānum verò Episcopum absentem, Suffraganeus Episcopus antiquior residens, sub pœna interdicti ingressus ecclesiæ eo ipso incurrenda, infra tres menses per litteras, seu Nuntium Romano Pontifici denunciare teneantur, qui ipsos absentes, prout cuiusque maior, aut minor contumacia exegerit, sua supremæ Sedis auctoritate animaduerrere, & ecclesijs ipsis de Pastoribus vtilioribus prouidere poterit, sicut in Domino salubrius nouerit expedire.

15 Circa alios, Episcopis inferiores, qui beneficia quæuis ecclesiastica, personalem residentiam de iure, siue consuetudine exigentia, in titulum, siue commendam obtinent, eadem Synodus statuit, vt ab eorum Ordinarijs, quemadmodum eis pro bono ecclesiarum regimine, & Diuini cultus augmento, locorum, & personarum qualitate pensata, expediens videbitur, opportunis iuris remedijs, vt iam diximus, residere cogantur. Nullique priuilegia, seu indulta perpetua de non residendo, aut de fructibus in absentia percipiendis suffragentur; quod eadem sacrosancta Synodus Tridentina sub Pio IV. renouauit, & adiecit, ne Dominici Aduentus, Quadragesimæ, Natiuitatis, Resurrectionis Domini, Pentecostes, item & Corporis Christi diebus, Episcopi ab ecclesia sua Cathedrali vlllo pacto absint; nisi Episcopalia munia in sua Diocesi eos aliò vocent.

## T I T V L V S IX.

### *De Canonica Portione.*

1 **D** Istum est libro superiore, titulo 23. de Sepulchris Christianorum, quæ in locis religiosis fiunt, faciuntque etiam locum religiosum: ac proin-



proinde Canonibus sacris sub anthemate interdictum est, tum secularibus, quam religiosis, ne terram pro sepulchro vendere, aut pro hominibus sepeliendis quoquo modo munera exigere audeant. Sed quia pii homines moriendo solent pro animæ suæ salute Ecclesijs, earumque ministris certas de bonis suis portiones relinquere, ut decenter, & Christiano more sepeliantur: itaque de his relictis dicturi Titulo præsentī, pro intelligentia terminorum, primo videbimus, quid sit canonica portio: deinde, quotuplex sit, & cur ita vocetur: ac tandem qualiter taxetur, & in quibus casibus non solvatur.

2. Quemadmodum igitur de legatis secularibus, detrahitur Falcidia, ne hæres nudam successionem accipiat; ita de legatis pijs detrahitur portio canonica, ne mystæ sacrorum, quibus salus fidelium commissa est, absque utili aliquo ecclesijs inserviant. Cum autem de iure communi sepulturæ debeant fieri in Parochialibus ecclesijs, & sæpè contingat laicos posthabita Parochiali ecclesia, in alia sibi sepulturam eligere, idcirco in hoc casu Parochialis detrahit quartam partem de relictis ecclesiæ, in qua quis eligit sepeliri, & distribuit ministris, qui ex altarisuo viuunt, ut orent pro anima defuncti.

3. Canonica itaque portio est, quarta pars obuentuum, quæ debetur ecclesiæ Parochiali, de omnibus relictis pro funere & sepultura ab illis, qui extra Parochiam sepeliuntur. Nempe ad exemplum legitimæ, quæ debetur parentibus in bonis liberorum: quia ecclesia æquiparatur matri, & successiue, dum filij alibi eligunt sepulturam, hæc quarta debetur ecclesiæ Parochiali, ratione onerum, quæ sustinet in administratione Sacramentorum filiis, seu Parochianis suis.

4. Dicitur Verò Portio Canonica, quia per regulam sacrorum Canonum est introducta, ad compensationem iniuriæ, & oneris, quod sustinent Rectores ecclesiarum. Videntur enim, iniuriam facere matri suæ Parochiali ecclesiæ illi Parochiani, qui baptizati, & Sacramentis muniti

tota vita, alibi eligunt sibi tempore mortis sepulturam, quasi spernentes matrem suam. Iam autem, quod secundum præscripta Sacrorum Canonum fit, id communiter Canonicum dicitur.

5 *Est autem duplex ista Canonica Portio, Parochialis, & Episcopalis. Parochialis est, quæ Parochiali ecclesiæ, vel ipsius Curato, & Rectori debetur. Episcopalis est, quæ de relictis alicui ecclesiæ pro anima, ab Episcopo detrahitur. Nam veluti Parochialis ecclesiæ, pro labore, & cura quam gessit animarum, certam portionem detrahit de relictis alteri ecclesiæ, in qua quis sepulturam elegerit: sic etiam licebit ipsi Episcopo (nisi sibi quadragenaria obstat præscriptio) curæ pastoralis intuitu, quam Dioecesi superintendens suscipit, de relictis, & pro anima cuiuslibet ecclesiæ oblati, canonicam sumere portionem; etiamsi testator expresse, quod non Episcopo velit esse relictum, sed tantum ecclesiæ: cum priuata testatoris dispositio generalem Canonis constitutionem immutare nequeat.*

6 *Item ex contrario, quemadmodum Episcopo sua portio competit, si quid ecclesiæ relinquatur: ita si quid Episcopo relictum fuerit, ecclesiæ de illo canonicam petere portionem poterit. Sed hoc casu, si testator exprimat, quod velit illud Episcopi tantum esse, non ecclesiæ, testatoris erit seruanda dispositio.*

7 *Sed in hac specie multum intererit, qua legandi formula testator usus fuerit. Nam si simpliciter dixerit: Rem talem relinquo, distinguendum est, Episcopi propinquus leget, an extraneus. Primo enim casu, cum non ecclesiæ relictum præsumatur intuitu (nisi fortè id probetur) sed personæ; de relictis in vita Episcopi ecclesiæ petere nihil poterit. Contraria obtinet præsumptio, & dispositio, si ab extraneo quid Episcopo relictum fuerit:*

8 *Quod si coniunctim dictum fuerit. Relinquo rem Episcopo & ecclesiæ, de ea inter ipsos canonica diuisio facienda erit. Si verò illud Episcopo, & illud ecclesiæ relinquatur, relictis inter Episcopum, & Cathedralē ecclesiā*



ad canonicam diuisionem sunt reducenda, nisi ambo testatoris velint esse dispositione contenti, quam propter ultimæ voluntatis fauorem, obseruare est satis condecens, vbi neque fraus interuenit, nec alteruter nimium debita portione fraudatur.

9 Secus autem est, si quid legetur Episcopo, & capellis, vel monasterijs, aut alijs pijs locis: nam hoc casu, quod Episcopo legatur, eius præcipuum est, cum ecclesia Cathedrali, & de illis, quæ alijs locis legantur, portionem canonicam nihilominus obtinebit. Et hæc idè tam variè, quia non tanta inter Monasteria, aut Capellas est cõmunio, quanta inter ecclesiam Cathedralẽ, & Episcopũ, qui Cathedrali spiritali copulatus est coniugio: vnde & quæ acquirit Episcopus, non illis, sed isti tantum acquirit.

10 Hoc autem tunc obtinere oportet, si simpliciter Episcopo legatum factum fuerit. Ceterum, si eam adiecerit conditionem testator, vt Episcopus suo sit legato contentus, & ipse legatum agnouit, quia per hoc alijs renũciasse videtur, de ceteris portionem exigere non poterit.

11 Sed si constiterit, quod eadem adiecta conditione, in fraudem modicum constituit mortuarium, vt Episcopus portione debita fraudetur in ceteris; quia dolus cuiquam patrocinari non debet, poterit is etiam ex alijs relictis exigere portionem à Canone constitutam; saluis tamẽ indulgentijs, quæ à Romano Pontifice quibusdam Regularibus sunt concessæ.

12 Illud etiam generaliter obseruandum est, circa eum, qui proprium possidere potest, prælationem, vel administrationem ecclesiæ non habentem, quod si ei aliquid relinquatur specialiter, non solum à ptopinquo, verum etiam ab extraneo, non intuitu ecclesiæ, sed personæ esse relictum intelligatur. Nisi probatio in contrarium appareret: & idcirco de illo nec Episcopus, nec ecclesia potest in vita eius sibi aliquid vindicare.

13 Taxatur autem huiusmodi quarta iuxta Canones, nam alicubi est dimidia, alicubi tertia, alibi verò est quinta  
talium

calium relictorum, vel funeralium, iuxta consuetudinem loci. Vbi verò eiusmodi consuetudo non adesset, tunc attenditur consuetudo ecclesiæ Metropolitanæ. Et si hæc nō appareat, seruanda est consuetudo vicinarum ecclesiarum: quæ si varia fuerit, attenditur ius commune, vt quarta pars relictæ soluatur.

14 Notandum, quod per Rotam Romanam contra Episcopum Syracusanum resolutum est in Anno 1586. die 5. Martij. Non deberi quartam Parochialem, quoties ex priuilegio essent exemptæ aliquæ ecclesiæ, vt sunt Monasteria Clericorum Regularium, Minorum de Obseruantia, & Minimorum Sancti Francisci de Paula. Tum Ordinis Prædicatorum, vt declarauit Pius Papa V. in sua Constitutione 1570. Et postea resoluit Congregatio Eminentiſſimorum Interpretum. In quibuscunque autem locis soluebatur ista quarta, quæ funeralium dicitur, ante annos quadraginta, Cathedrali, vel Parochiali ecclesiæ, in ijs locis decreuit sancta Synodus Tridentina, vt & deinceps soluatur; non obstantibus concessionibus, gratijs, priuilegijs Mari Magno nuncupatis, aut alijs quibuscunque.

15 Sed etsi nihil quidem testamento quis reliquerit, sed in ægritudine constitutus, cum bonis suis ad loca religiosa se transtulerit, ecclesiæ Parochiali canonica portio debetur; modo ille de eadem ægritudine decesserit. Quod si sanus ad ea loca se transtulerit, de his quæ locis ipsis contulit, cogi non poterit aliquid ecclesiæ, à quo discessit, impertiri, quia liberum est eis, tunc bona sua non solum Religiosis, sed etiam quibilibet priuatis conferre.

16 Quod si quis, cuius maiores antiquitus in aliqua ecclesia sepeliri consueuerant, ea dimissa, alibi sepulturam elegerit, num dimissæ Canonica Portio debeatur, an Parochialis? Et statutum est, illi persoluendam, in qua quis audire Diuina, vel Sacramenta recipere debet. Habentis verò duplex domicilium, canonica portio diuidenda erit æqualiter ecclesijs, si in loco tertio sepulchrum eligat.



17 Notandum autem, quod virtute huius privilegi, non soluitur quarta de candelis, nec de donatis in vita, etiamsi postea testator in illo loco pio, cui fecit donationem, sepeliatur. Hic idem procedit, si re vera esset legatum, vel donatio causa mortis, sed testator adhuc viuens adimpleuit promissum: hæc enim transiret in donationem inter viuos. Tum si quid pro fabrica, pro anniuersario, pro luminarijs perpetuo habendis, pro equis, vel armis contra infideles exercendis, pro subleuandis infirmis, aut redimendis captiuis, dorandis virginibus, vel alijs ad perpetuum cultum Diuinum, vel particulari personæ legatur: de quibus omnibus, nisi ea machinatione facta fuerint, vt Parochialis ecclesia fraudetur, huiusmodi portio detrahenda non erit.

18 Item notandum, quod de quibus relictis Parochialis portio non detrahitur, nec Episcopalis detrahenda erit. Quæ etiamsi debeatur, non est soluenda, nisi petatur: cū autem non petitur, & Parochus, & Episcopus tacitè remittere subintelligitur. Et satis est, vt volentes eam soluere, nulla vtantur fraude, quin illam petenti soluant: etiam quia præscriptione, seu consuetudine præscripta potest introduci, vt huiusmodi quartæ non debeantur.

## T I T V L V S X.

### *De Censibus, Exactionibus, & Procuracionibus.*

1 **C**ensus appellatio generalis est, habetque varias significationes apud Artistas. Et primo quidem census significat, quicquid fortunarum quis habet. Secundo significat æstimationem patrimonij, vt sciat, quantum quis possideat, & tributum nomine Principi solvere debeat. Et talis æstimatio, seu census vulgo apud Legistas dicitur *Denumeramentum*. Tertio, significat ipsum tributum ratione fortunarum, per capita, vel focularia impositum. Hinc *Censui* in Iure dicuntur, qui censibus ad-

adscripti sunt, seu à quibus census exigitur. *Quarta census significat*, pecuniam, seu pensionem, quæ annuatim soluitur, ratione personæ, vel rei: & talis pensio vocatur *Redditus*, quia redditur alteri, & redit à tempore in tempus, vt soluatur. Et ita hic sumitur pro omni pensione, quæ Prælati de ecclesiasticis prouentibus singulis annis in signum subiectionis, vel alterius iuris penditur.

2. Speciali tamen nomine Censui hic intelligitur, qui Episcopo ab ecclesijs in argumentū subiectionis tribuitur, & *Cathedraticum* appellatur, eò quod ad honorem Cathedralis persoluatur. Quod tamen non debet temere imponi, nisi canonica causa suadente, & ab habente legitimam potestatem.

3. Constituitur autem Censui, aut foundationis tempore, aut consecrationis, aut donationis, aut tempore immunitatis indultæ: quia vel uti præter Ordinarij consensu nec fundari, nec dedicari potest ecclesia; ita eodem tempore certum censum Episcopus subiectionis signum constituere poterit. Quod & Sedes Apostolica facere consuevit, cum libertatis priuilegiū, vel etiam quibusdam ecclesijs protectionis indulget præsidium: censumque gratis oblatum suscipit, & in literis Apostolicis ad futurorum Pontificum memoriā quantitas illius exprimitur.

4. Præter Cathedraticum verò, nullum alium censum ecclesijs imponere, aut veterem augere, aut partem prouentuum suis vsibus vendicare poterit Episcopus. Nec eo etiam casu exigi aliquid poterit, cum de manibus laicorū prouentus ecclesiasticos eripuerit. Simples verò Sacerdotes, nullo modo possunt proprias ecclesias facere censuales; & qui de facto id fecerit, ab ecclesia ipsa remouebitur.

5. Cæterū, si non in suum, sed in alterius sibi subiectæ ecclesiæ commodum, & vtilitatem sumptus aliquis requiritur, poterit Episcopus ex iusta causa, vel nouum constituere, vel etiam augere, Capituli accedente consensu; præsertim, si quæ de nouo conuersa prouincia ad ali-



alicuius ecclesiæ iurisdictionem accesserit.

6. Cum verò Apostolico testimonio suffragante, congruum sit, vt à quibus spiritualia recipimus, eisdem temporalia nostra communicemus; rectissime constitutum est, vt cum Prælati Dioecesim peragrando diuina nobis exhibent, illi etiam à nobis exhibeantur. Et hoc vocatur *Procuratio*, id est visitatibus Episcopis necessariorum sumptuum exhibitio. Quam si visitati exhibere negauerint, si quam in contumaces ritè tulerit sententiam, erit inuiolabiter obseruanda.

7. Visitandi autem sollicitudo, non modo incumbit Episcopis, verum etiam Archiepiscopis, Patriarchis, Sedis Apostolicæ Legatis, Nuntijs, Archidiaconis, & Decanis: qui quidem ne non tam diuina, quam propria quasi se videri possint, cautè prospicient, vt ea quæ Canonibus sacris salubriter constituta comperiuntur, inuiolabiliter obseruent, sine grauamine Cleri. Vnde visitando Oratoria, nullam ab eis exigent procurationem, nec alijs quibusuis exactio- nibus subditos suos grauare debent, sed cum charitate, vbique moderatum ab eis, si manifesta extiterit necessitas, postulabunt subsidium.

8. Procuraciones verò prædictas nemo nisi præstito visitationis officio iure percipiet, idq; in victualibus, non in pecunia, aut muneribus, sub poena suspensionis, & interdicti; nisi ea quæ acceperant, infra mensem reddere procurauerint. De qua re plura emanauerunt Pontificum decreta, statuentia, quid vnusquisque Prælati habitæ personæ, & dignitatis, omniumq; cautionum ratione accipere possit, alicuius officij, vel consuetudinis occasione; puta, etsi amanuens, vel à sigillo sit.

9. Tridentinæ etiam Synodi Constitutionibus prouisum est, ne visitatores inutilibus sumptibus cuiquam graues, onerosiue sint. Neue ipsi, aut quisquam suorum quicquid procurationis causa, pro visitatione, etiam testamentorum ad pios vsus, præter id quod ex relictis pijs iure debetur, aut alio quouis nomine, nec pecuniam, nec munus quod-

cum-

cumque sit, etiam qualitercumque offeratur, accipiant: non obstante quacumque consuetudine etiam immemorabili. Excep̃tis tamen victualibus, quæ sibi, ac suis frugaliter, moderateque pro temporis tantum necessitate, & non ultra, erunt administranda.

10 Sit tamen in optione eorum, qui visitantur, si malint soluere id, quod erat ab ipsis antea solui certa pecunia taxata consuetum, an vero prædicta victualia subministrare. Saluo item iure conventionum antiquarum cum Monasterijs, alijsue pijs locis, aut ecclesijs non Parochialibus inito, quod illæsum permanear. Quod si quisquam aliquid amplius in supradictis omnibus casibus accipere præsumperit, is præter dupli restitutionem intra mensem faciendam; alijs etiam poenis iuxta prædictam Constitutionem Concilij Generalis Lugdunensis, nec non, & alijs poenis in Synodo Prouinciali arbitrio Synodi, absque vlla spe veniæ multentur.

## TITVLVS XI.

### *De Decimis.*

1 **D**ecimas à populo Sacerdotibus, ac Leuitis esse reddendas, diuina sanxit authoritas. Exodi 22, Quas si quis dederit, non solum vbertatem fructuum recipiet, sed etiam corporis, & animæ salutem consequetur. Primitiæ verò in Veteri lege imperatæ, nunc voluntariè offeruntur Deo, de primogenitis gregis, & de primis fructibus agrorum, & arborum, in gratiarum actionem pro acceptis ab eo fructibus, & cedunt in vsum ministrorum Dei; sicut & oblationes reliquæ sponte à fidelibus præbitæ.

2 Sed Oblatio est magis generalis quam Decima: nam decima solum respicit oblationem externam, vt ex eius definitione patebit; sed oblatio tam internam, quam externam oblationem complectitur. *Interna est*, dum quis offert seipsum Deo per interiorem affectum, vel etiam per actum exteriorio-



teriolem, vt Martyres obrulerunt seipfos Domino in sacrificium laudis, & Religiosi per actum exteriorem professionis, & interiorem voluntatis eidem Deo se offerunt. *Exterior verò oblatio est*, quando ex nostris bonis exterioribus, siue sensibilibus, mediare, vel immediate offerimus Deo aliquid in recognitionem dominij, & excellentiæ ipsius, & seruitutis nostræ ad ipsum.

3 *Decima autem est*, bonorum mobilium iustè quæditorum pars Deo, eiusque Ecclesijs in signum vniuersalis dominij debita, (Et per hoc in Iure Canonico sapius Decima, & Oblatio pro eodem sumitur) cuius perceptio iure communi ministris Dei debetur, tanquam in stipendium, pro sustentatione ipsorum ob ministerium spirituale.

4 Et est triplex decima ecclesijs solui solita: nempe, *Realis*, quæ debetur ratione rei, vt est frumentum, oleum, vinum, saccharum, linum, canabes, & omnes alij fructus agrorum. *Personalis*, quæ debetur ratione personæ, nempe ex licita negotiatione, artificio, & hominis industria solerti. *Et Mixta*, quæ debetur ex animalibus diuersis, in quibus fouendis, custodiendis, & augendis, & res, & industria personæ consideratur. Cæterum, ex usuris, furis, rapinis, latrocinio, pyratia, lenocinio, & quouis alio modo illicito acquisitis rebus, nec soluitur decima, nec soluta recipi debet: ne aliàs peccatum approbari videatur per ministros Dei.

5 Inter personales autem, & prædiales, seu reales decimas, hoc interest, quod personales illi solum Parochiæ debentur, in qua quis ecclesiastica Sacramenta recipit, tãtò si lucrum alibi contigerit; reales verò, seu prædiales, si ex prædijs in aliena Parochia cõstitutis fructus collecti fuerint, ei debentur ecclesiæ regulariter, in cuius territorio prædia sunt constituta. Quamquam si consuetudo aliud introduxerit, vt in partibus Septentrionalibus per sepe videre est, consuetudo seruanda erit.

6 Item si personales decimæ, quæ de rebus acquisitis, vel factis ex pecunia decimata, vendantur, vt puta domus,

ageri, vinea, molendinum, grex, aut merces quælibet, expensæ prius, quas quis in rebus parandis fecerit, deduci debent, & de residuo quasi de lucro decimæ præstabitur. De prædialibus verò decimis impensæ non deducuntur, & fructus non nisi cum onere decimarum alienantur.

7 Illud commune tamen est, tam personalibus, quàm prædialibus decimis, quod expensæ, quæ factæ fuerint præ restaurando detrimento rerum, ex quibus decimæ persolventur, vt si pars aliqua moriatur armenti, vinea fiat deterior, mercis depereat, portio de prouentibus decimandis minimè deduci debet. Cuius rei illa est ratio, quod penes Dominum res instauratæ remanent.

8 Sed nec Census, nec tributa fructibus de quibus decimæ soluendæ fuerint, primitus deduci poterunt. Cum enim in signum vniuersalis dominij quasi quodam speciali titulo, decimas sibi Dominus reseruauerit, consequens est, vt in prærogatiuam dicti generalis dominij decimarum solutio censuum, & tributorum præcedat exactionem. Vel saltem hi, ad quos census vel tributa peruenerint, quoniam res cum suo transit onere, decimas soluere per censuram Ecclesiasticam compellantur.

9 Hinc statutum per Pontifices, vt de bonis quæ acquirunt Religiosi a Laicis, onus extradendarum Parochis, & alijs beneficiatis, decimarum ipsi subeant, ac omnino eas ita exsoluant sub poenis, prout eas soluere, & extradere, inenipulariter laici tenebantur, priusquam illa bona seu possessiones, in manus & hereditatem Regularium decernerent; ne vel laici eorum exemplo deinceps scandalizentur, & decimas Ecclesijs denegent; vel ministri Ecclesiarum debita sustentatione priuati, deferant curam animarum, & administrationem Sacramentorum. Nullo igitur priuilegio, consuetudine, aut præscriptione potest induci, vt aliqui liberentur à solutione decimarum, quando ex alijs redditibus ecclesiasticis non suppetit congrua sustentatio ministris spiritualium.

10 Hinc secutum in Regno Poloniae (vbi præcipui reddi-

K. K. di-



ditus Ecclesiasticorum, maximè autem Curatorum in Decimis frugum sunt) quòd cum Regulares plurimas possessiones nuperrimis temporibus à laicis acquisiuisent, & nullo modo Decimas, suis priuilegijs innixi, Parochis exsoluere voluissent, ad instantiam totius Cleri, S. D. N. Innocentius Papa X. causam Congregationi Eminentiss. Card. Interpretum Concilij Trid. examinandam commisit. Qui iuribus, & rationibus vtrunque examinatis, ne Ecclesiæ absque pastoribus desolata remanerent, Decretum de soluendis decimis per Regulares, etiam Societatis Iesu, Anno Domini 1645. die 17. Iunij ediderunt; quod in Consistorio die 31. Iulij relatum, Pontifex approbavit: & anno sequenti 1646. die 21. Feb. ea de re Breue Apostolicum solemniter publicari mandauit. Contradictores quoslibet, & rebelles, ac præmissis in eo non parentes, per censuras, & poenas ecclesiasticas, aliaq; opportuna iuris, & facti remedia, appellatione postposita compescendo: legitimisq; super his habendis, seruatis processibus, sententias, censuras, & poenas ipsis, etiam iteratis vicibus aggrauando. Inuocato etiam si opus fuerit, auxilio iurisdictionis secularis. Cumq; nihilominus Regulares in soluendo debitas Parochis decimas obstinate se gererent, citati Conuentus Cracouiensis SS. Trinitatis, Fratres Prædicatores, per Rotam Romanam Anno 1651. iussi sunt Præposito S. Nicolai, in Suburbio Cracouiensi esistenti, de bonis Promnicensibus decimas in manipulis extradere, & pro præteritis summam pecuniæ certam exolugre. Similiter Collegium Clericorum Societatis Iesu ad S. Petrum Cracouiense, cum itidem contra Breue Apostolicum proterue ageret, exq; agris hæreditatis Osmodlicensis (quam paucos ante annos acquisiuerat) infra limites Duzazgouiensis ecclesiæ, eiusdem Rectori debitas decimas in manipulis extradere denegaret, Rota Romana, vigore huius Breuis, & aliarum constitutionum antiquarum Regni Poloniæ, per Pontifices approbatarum, tribus conformibus Decisionibus, eidem extradendas adiudicauit.

II Sed quia decima, quoad eius substantiam est de iure diui-

Diuino, per quod debet ab omnibus prædia, & villas possidentibus solui: quo verò ad quotam, est de iure humano, per quod potest etiam super ea fieri compositio, vt non tantum in manipulis, aut grano soluatur, sed etiam in pecunijs, aut alijs rebus valorem eius representantibus; id tamen fieri debet cum superioris authoritate, & cautione, vt non excedat vitam componentium; eo quod laici perfractis omnium diuinarum atque humanarum legum, quæ decimas statuunt, repagulis, persolvere eas recusant; vel cum euidenti Rectorum, & Ecclesiæ damno transactiones de eis statuum, quas etiam perpetuare student, non attendentes ad carestiam & mutationes temporum. Ideo Pauli Papæ V. sanctione, Pastoralem Macieioiij Cardinalis epistolam approbante, prohibitum in Regno Poloniæ est, decimas manipulares pensione pecuniaria pro perpetuis temporibus commutare. Præsentes tamen atque separatas à solo, liberum est Clericis pro suo arbitrio, cui, & quomodo voluerint vendere; dummodo æstimationem illarum consulto, aut enormiter in damnum Ecclesiæ consequenter futurum, deteriore non faciant. Quod Urbanus, quoque Papa VIII. cum Sinodo Prouinciali, sub Ioanne Venzik Primæ Poloniæ celebrata, seruandum in praxi assidue approbavit, & præcepit.

12 Eadem ratione constitutum est, vt non solum de vino, saccaro, grano, fructibus arborum, & horum, decimæ persolui debeant, sed etiam de pecoribus, de venationibus, de negotiationibus, de ipsa etiam militia, & denique de omnibus bonis, & prouentibus omnibus bonis, itaut qui de his eas cum integritate soluere neglexerint, Ecclesiastica districtione percelli debeant. Soluere autem debent non tantum Christiani, sed etiam Iudæi, & omnes infideles, licet sint extra gremium Ecclesiæ, modo agros, & bona predialia possideant: idque sub renūciatione possessionis; quod Ecclesia fuisse perceptura ab alio Christiano, qui inhabitasset in eius Parochia.



13 Vbi notandum est, quod Iudæi, & infideles omnes, prædiales tantum decimas solvere debent, Christiani verò & prædiales, & personales. Prædiales verò non tantum de agris antiquitus conseminari solitis, sed, etiam de noualibus, & pratis, vbi consuetudo & vsus à quadraginta annis est. Extatque in Regno Poloniæ Constitutio Synodales, à Ioanne XXIII. Martino V. & Gregorio XIII. approbata præcipiens Religiosis omnibus, vt decimas Ecclesijs antiquitus debitas extradant & de prædijs nouiter acquisitis, aut proprijs manibus, sumptibusue exculcis, præcipue vero de noualibus & pratis soluant: nisi quis specialiter priuilegio ab ipsarum præstatione doceatur exemptus. Et si in decimatione defraudauerint, omnes ipsis ad hoc opem, vel operam in præmissis dantes, & ipsorum seruitijs intendentes, decernunt unipso facto excommunicationis sententiam incurrisse.

14 Sed nec semper eis priuilegium suffragabitur. Nam si res iudicata obfistat, vel priuilegio muniti, decimas per quadraginta annorum spatium soluerint, cum liberum sit unicuique iuri proprio renunciare, præstatione tanti temporis proprio priuilegio, detrahere voluisse præsumitur, & capropter ad decimarum præstationem, tam de antiquis, quàm de noualibus agris compelli poterunt. Est autem nouale, ager nupè ad culturam redactus, pratis videlicet coaratis, aut lacubus exsiccatis, vel sylvarum dumetis, vepribusque extirpatis, de quo, quod aliquando cultus fuerit, memoria non extat.

15 Item, si post initam inter aliquos super decimis conuentionem, certi temporis priuilegia obtenta fuerint, nisi conuentioni per ea derogetur expresse, illis non obstantibus erit inuiolabiliter obseruanda. Ita enim huiusmodi priuilegia sunt accipienda, vt nemini læsionem, præcipue enormem inferre debeant. Proinde Ordinarius de eiusmodi exemptorum priuilegijs cognoscere debet, & prouidere, vt Rectores de redditibus ecclesiarum congruè sustentari, & onera persolvere possint: puta, procuraciones

Legatorum, & Nuntiorum Sedis Apostolicæ, Cathedraliticum, collectorum pro defensione Patriæ, & similium. Tali enim casu priuilegium, non solum redigitur ad modificationem, sed tollitur etiam in totum.

16 Super decimis quoque non soluendis priuilegiati, si aliena prædia conduxerint, priuilegio minimè obstante, de conductis prædijs solitas decimas Parochis suis integras persoluent. Idemque erit de locatis prædijs, si priuilegiatus super laboribus, quos proprijs vel manibus, vel sumptibus excoleret, terras suas alijs locauerit.

17 Cum autem nulla sit laicis de spiritualibus disponendi facultas, ideò Imperator, Rex, aut Princeps absolutus, nullam habent facultatem concedendi priuilegia, super decimis non soluendi. Immo sacrilegij crimen incurrit qui de manu laicorum rem ecclesiasticam recipiet: nisi huiusmodi immunitatum priuilegia ab Apostolica potestate obtenta fuerint. Quapropter præcipit sancta Synodus Tridentina omnibus cuiuscumque gradus, & conditionis sint, ad quos decimarum solutio spectat, ut eas, ad quas de iure tenentur, in posterum ecclesijs, vel personis, quibus legitime debentur, integrè persoluant. Qui verò eas aut subtrahunt, aut impediunt, excommunicentur; nec ab hoc crimine, nisi plena restitutione secuta, absoluantur.

18 Ex contrario quoque, laicus etiam à clericali potestate decimas recipere, & in alium velut hæreditario iure transmittere non poterit: & si secus actum fuerit, & qui concesserit à statu suo deiciatur: & qui receperit, & ecclesiæ non reddiderit, & viuens quidem excommunicationis vinculo innodabitur, & mortuus ecclesiastica sepultura carebit. Siquis tamen, cum ecclesiæ suæ conditionem meliorem facere possit, decimarum suarum prouentus allicui locare velit; dummodò huiusmodi locatio ad feudum, vel alienationem non videatur extendi; id facere minimè impiedietur.

19 Postremo sciendum, quòd veluti Parochialibus ecclesijs



clesijs (secundum ea quæ proximè apposimus) decimæ debentur, ita etiam decimarum ipsarum quarta Episcopo à Rectoribus ecclesiarum, nisi legitima obftet præscriptio, persoluenda erit, (vna autem ecclesia contra aliam, decimas quadraginta annorum spatio præscribere potest) Romano quoque Pontifici interdum ecclesiæ decimas solvere compelluntur, si pro vniuersalis Ecclesiæ vsibus sit necessarium, vt Bonifacius VIII. sua constitutione hoc fusiùs declarauit, & postea addidit nonnulla Clemens V. vt ex ipsius constitutione patere potest.

## T I T V L V S X I I .

### *De Rebus Ecclesiæ abalienandis, Vel non.*

**Q**uamuis Leges Pontificiæ curent, ne Clericis facultates idoneæ ab ecclesia desint, & propterea illis præbendas suggerant; ea tamen bona Clericorū ipsorum in dominio censi nemo existimet, vel quòd illis possint suo arbitrio vti, & ad quoscumque vsus transferre: nam præterquam, quod supra docuimus, quibusnam vsibus sint illæ facultates destinatæ, præterea etiam cauendum est, ne alienentur, ne patrimonium Petri prodiga Prælatorum, & aliorum Clericorum libidine exhauriatur; quo facto inestimabile damnum ecclesiæ inueheretur, si opes deinde non suppeterent, quibus subleuari possent, qui ministerijs diuinis omnem operam suam dicarunt.

2 Quapropter à Concilijs, & Summis Pontificibus diuersis statutum est, ne cui liceat alienare rem immobilem ecclesiæ, nec mancipium, neque specialis hypothecæ titulo cuiquam addicere. Alienationis autem titulo diffinitū est contineri *conductionem, donationem, venditionem, permutationem, & emphiteuticum contractum perpetuum*. Qui verò hanc Constitutionem fuerint transgressi (nisi duobus principaliter interuenientibus, videlicet solemnitate, & iusta causa

causa alienandi) Leoninæ constitutionis vigore, officio priuentur, & omne damnum illatum ecclesiæ restituant ipsi, qui contractum inierint, aut eorum successores. Tabelliones autem de alienatione instrumenta conficientes relegentur; & Iudices auctoritatem alienationi præstantes, bonis, & dignitatibus priuentur.

3 In primis igitur sciendum est, nihil Episcopum regulariter, sine consensu sui Capituli, vel consilio, posse super alienatione statuere. Cum velut caput ad membra, ita sese Prælati habeat ad Capitulum. In eo autem totius videtur esse consensus Capituli, cui & maior, & sanior fratrum accesserit sententia. Aliàs, absque clericorum subscriptione, ecclesiæ utilitate, & Romani Pontificis consensu, ab Episcopo facta alienatio, vel donatio, non tenet: quia procurator tantummodo rerum ecclesiasticarum est, non dominus, & conditionem ecclesiæ meliorem quidem facere potest, deteriore non potest. Quod si secus factum fuerit; nec quod gestum est, vires ullas sortietur, & Canonum temeratores, tam secularium, quàm ecclesiasticarum legum poenis subiacebunt.

4 Sed nec commissam sibi ecclesiam pro alienis grauari debitis; aut literas alicui, vel sigilla concedere, quibus ecclesia possit obligari, aliquis audere debet: alioqui nec ecclesia ad talium debitorum solutionem tenebitur; & qui id ausus fuerit, à spiritualium, & temporalium administratione suspensus erit.

5 Nec licet etiam Episcopo, vel Abbati, terram vnius ecclesiæ ad aliam vertere, quamuis ambæ ecclesiæ in eius sint potestate. Si tamen eam commutare voluerit, cum ambarum consensu hoc faciat. Et permutationes rerum ecclesiasticarum ab antecessore inconsultè factæ, à successore emendari poterunt.

6 Synodus etiam Tridentina constituit, vt omnes locationes bonorum ecclesiasticorum, quæ repræsentata pecunia in successorum præiudicium fiunt, nullatenus valide intelligantur in ipsorum successorum præiudiciū, quocumque



cumque indulto, aut priuilegio non obſtante. Nec, vt huiusmodi locationes in Romana Curia, aut extra eam confirmantur, concedit. Ac locationes rerum eccleſiaſtica-  
rum etiam au horitate Apoſtolica confirmatas, eadem Synodus irritas decreuit, quas à triginta annis citra ad longum tempus, ſeu, vt in nonnullis partibus ad viginti nouem, ſeu bis viginti nouem annos factas, Synodus Pro-  
uincialis, vel deputandi ab ea in damnum eccleſiæ, & cōtra canonicas ſanctiones contractas fuiſſe iudicare debent.

7 Debita tamen à prædeceſſore ſuo pro eccleſiæ neceſſitate contracta, ſoluere ſucceſſor proculdubio tenebitur, eſt enim quaſi hæres ipſius, & in vniuerſum ius eccleſiæ ſuccedit. Debet tamen in hoc caſu probare creditor, pecuniam in vtilitatem eccleſiæ verſam. Idem ſi clericus de mandato fideiuſſerit; aut ſi non de mandato, in rem tamen eccleſiæ mutuum verterit. Alias eccleſia tenetur ſolum illud refundere, in quo eſt meliorata, non autem quantum eſſet expenſum. Quod intellige, quando particularis, qui contraxit, nullam habebat adminiſtrationem, vel peculium.

8 Excipiuntur tamen nonnulli caſus, in quibus donandi, permittendi, locandi libertatem, feudum, & emphiteuſum dandi, aut aliter alienandi iure licentia conceditur. Nā ſi quid Prælatuſ non magni valoris alicui fortè ob bene-  
merita donauerit, præſertim ſuadente conſuetudine, iure ſuſtinetur donatio. Multo magis idem erit ſtatuendum, ſi quid forte ſoli ad Eccleſiæ fabricam erigendam con-  
ceſſum fuerit; quo caſu tantum donare licet, quantum Eccleſiæ parietes concludere poſſunt.

9 Idem iuris erit, & de reddituum, fruſtuumque venditionibus, ad tempus modicum faciendis. Et de precarijs, quæ quandoque de Eccleſiarum poſſeſſionibus fieri ſolent, quæ ne temporis longinquitate iuris Eccleſiaſtici pereat memoria, de quinquennio in quinquenniū renouandę erūt.

10 Diſtat autem precarium à precaria, quia precariū  
tamdiu

tamdiu concéditur, quoad is qui concessit patitur. Precariæ vero non sunt pro voluntate concedentium reuocandæ, sed elapso tempore assignato ad vtendum, nisi sint irrationabiles; quo casu poterit successor à prædecessore concessam precariam rescindere & reuocare. Differtque precaria concessio à donatione, quia donans sic dat ne recipiat, concedens verò precario, dat recepturus retro cum sibi libuerit, (iusta tamen ex causa) etiamsi precariam concessionem habens finito vtendi termino assignato, continuauerit possessionem per longissimum tempus.

11 Ruinæ quoque, quas Ecclesia reficere non valeat, & inculta prædia, aut extirpatæ syluæ in emphyteusim sub anno censu his concedi poterunt, à quibus vel suo, vel parentum suorum sumptu confiterit extirpatas. Nisi forte possint alijs ad maiorem Ecclesiæ vtilitatem, cum eodem onere conferri. Qui tamen si per biennium in solutione canonis cessauerint, nisi celeri satisfactione postmodum sibi consulere studuerint, iure expelli poterunt.

12 Terrulas etiam ac vineolas exiguas, & Ecclesiæ minus vtilēs aut longe positas, vel domos quæ Ecclesiæ plus incommodi, quam vtilitatis afferunt, si necessitas fuerit, distrahendi potestatem Episcopus habet. Simili ratione fugitivos seruos, & qui de fuga reuocati teneri non possunt, si voluerint, aut illi ex alio meruerint, Episcopis distrahendi potestas erit.

13 Item feudum à vassallo alienatum, & difficilis recuperationis potest Episcopus alteri sub conditione recuperandi concedere; sed vt in feudum ab Ecclesia recognoscat. Quinimmo etiamsi talis necessitas non immineat, nihilominus alienantis filium, vel consanguineum, vel eiusdem feudi consortem potest Episcopus inuestire: nam licet delictum patris priuet filium feudo, tamen illum non inhabilitat ad feudum, vt veniat iure successionis. Idem erit si per obitum vassalli feudum ad Ecclesiam remeauerit: nam & eo casu inuestire Prælatus alium libere poterit; si Ecclesiæ viderit expedire. Si verò Ecclesia tempore



primæ concessionis feudi erat diues, & nunc sit depauperata, tunc Prælati res solitas concedi in feudum, in feudare amplius non poterit.

14 Illud etiam Toletano Concilio definitum reperitur, quod si sacerdotes aliquid Ecclesiæ suæ relinquunt, vel nihil habentes, aliqua prædia, vel familias Ecclesijs suis acquirunt, liceat eisdem aliquos iuxta collatæ modum, rei de familia eiusdem Ecclesiæ manumittere illa conditione, ut manumissi cum peculio, & posteritate sua sub Ecclesiæ remaneant patrocinio. Quod si qui nihil de proprio Ecclesiæ contulerunt, libertati seruos Ecclesiæ donare ausi fuerint, ex eodem Concilio, Episcopus successor ad Ecclesiæ ius reuocare poterit. Impium est enim, ut qui lucrum de rebus suis Ecclesiæ non contulit, damnum inferre valeat.

15 Princeps autem supremus potest rem suam æqualem, vel maiorem, (si causa probabilis id poposcerit) cum Ecclesiastica re permutare, pragmatica super hoc præcedente forma, Ecclesiastica tamen non pia quæ frui fuerint, præterquam ad libertatem commutari non poterunt.

16 Episcopus quoque duarum suæ Diocesis Ecclesiarum, terras inuicem, ambarum partium accedente consensu, iusta ex causa, permutare poterit; & si alterius partis prædium valore præponderet ad æqualitatem inducendam ab altera parte pecuniam refundi iubebit. E contra res suas Ecclesiæ ad inuicem permutare sine superioris licentia non possunt. De temporalibus autem ad spiritualia permutatio consistere non potest; quia spiritualia gratis conferri debent, ac ob id abhorrent omne genus conuentionis.

17 Præterea, & si quis per tempora sacris Canonibus definita, rem ecclesiasticam iusto titulo & bona fide ita possederit, ut nullo tempore rei consensum habeat alienæ, completa præscriptione, res possessa à iuribus Ecclesiæ, dubio procul intelligitur esse auocata. Prouentus tamen Primitiarum & Decimationum præscriptione tolli  
non

non poterunt, quamuis eas possidendi ius ab Episcopo laici haberent, quia alieno nomine eas possident. Et etiam si à Romano Pontifice laicus aliquis super his rescriptum impetrauerit, si possessionem interuerrere voluerit, incipiet statim malæ fidei possessor esse, & ita non posset eas præscribere.

18 Cum igitur ex supra dictis appareat, ne ecclesiasticis quidem personis licere ecclesiasticas res alienare, quo detestabilior est iudicanda Principum secularium temeritas; qui falcem in messem alienam iniicere, resque ecclesiasticas prophanis, sacrilegisque manibus contrectare, easque iure suo, quasi earum domini sint, alijs donare non dubitarint; atque ita agentium Clericorum aut Monachorum substantiam rapere: vel, qui ab eis hæc petere ausi fuerint; quippe hoc modo tentata irrita esse omnia ex Concilio Lugdunensi iubentur. Hocque impium, & temerarium hominum genus à communione Ecclesiæ excludi.

19 Sed & Sacrosancta Trident. Synodus, in hanc rem sub Pio IV. vigilantissimè animaduertit, ut si quis Clericorum, aut Laicorum, quacunque is dignitate, etiam Imperiali, aut Regali præfulgeat, alicuius Ecclesiæ, seu alicuius secularis aut regularis beneficii, Montium Pietatis, aliorumque piorum locorum iurisdictiones, bona, census, ac iura etiam feudalicia, & emphyteutica, fructus, emolumenta, seu quascunque obventiones, quæ in ministrorum & pauperum necessitates conuerti debent; per se, vel per alios, vi, vel timore incusso, seu etiam per suppositas personas, Clericorum aut Laicorum; seu quacunque arte, aut quocunque quæsito colore, in proprios vsus conuertere, illosque vsurpare præsumpserit: seu impedire, ne ab his, ad quos iure pertinent, percipiatur; is anathemati tamdiu subiaceat, quamdiu iurisdictiones, bona, res, iura, fructus & redditus, quos occupauerit, vel qui ad eum quomodo-cunque etiam ex donatione suppositæ personæ peruenerint, Ecclesiæ, eiusque administratori, seu beneficiato integre restituerit; ac deinde à Romano Pontifice absolutio-



nem obtinuerit. Quod si eiusdem Ecclesiæ Patronus fuerit, etiam iure patronatus ultra prædictas poenas eo ipso priuatus existat.

20 Clericus verò, qui nefandæ fraudis, & vsurpationis huiusmodi fabricator exstiterit, seu consentiens, eisdem poenis subiaceat; nec non quibuscumque beneficijs priuatus sit: & ad quæcumque alia beneficia inhabilis efficiatur: & à suorum ordinum executione, etiam post integram satisfactionem, & absolutionem, sui Ordinarij arbitrio suspendatur.

## T I T V L V S XIII.

### *De Peculio Clericorum, Relictis, & Successoribus eorum.*

1 **T**Ractatum de rebus ecclesiasticis temporalibus, & earum administratione, concludere volentes, necessario debuimus tractare, etiam de rebus quas Clerici acquirunt; vel per contractum, vel per ultimam voluntatem: & quomodo eas ab obitu suo disponere poterunt, cum bona reperta penes Clericum præsumantur esse Ecclesiæ: nec omnibus permissum est facere testamentum, & peculium suum successoribus legare. Ecclesiasticas autem res intelligimus non modò quas Ecclesiæ rationibus Sacerdos comperit adscriptas, sed etiam eas, quas ipse emrit, cum tempore suæ promotionis nihil haberet.

2 Cum igitur Clericus pauper ad Ordines promotus, de bonis Ecclesiæ acquisiuisse præsumatur, quicquid habuerit, ne quando ius ecclesiasticum imminuatur, curabit ut de his, quæ superemerit, & ad ipsius Ecclesiæ nomen scripturam conficiat, & moriens Ecclesiæ relinquat: alioqui ab eius ordinatione discedat. Qui verò prætextu proprii, vel alieni nominis fraudem facere voluerit, sacrilegij nomen incurret, ut Iudas, qui sacras oblationes asportabat & furaba-

207

rabatur . Quo exemplo & Episcopus res, quas Ecclesiæ occasione post consecrationem acquisierit , propriæ Ecclesiæ relinquere tenetur . Quod si verò acquisierit nomine proprio, ex re proprij matrimonij, tunc iam non Ecclesiæ acquisiuit , sed sibi, vel cui voluerit legare . Similiter, si Prælatus acquisiuit ex industria, aut gratia Principis: Sacerdos verò ex aliquo licito artificio ( puta, pingendo imagines, scribendo libros , construendo organa , horologia , citharas ) tunc iam eo casu non acquiritur Ecclesiæ, sed hæredi .

3 Sed si quispiam pro anima , intuitu Ecclesiæ , Sacerdoti reliquerit, censetur relictum esse Ecclesiæ . Congruit enim , vt quemadmodum Sacerdos habet , quod Ecclesiæ dimissum est, ita & Ecclesia id habeat , quod relinquitur Sacerdoti . Siquid tamen per fideicommissum, aut Sacerdoti, aut Ecclesiæ, relictum fuerit, alteri postmodum profuturum , id inter ecclesiasticas facultates computandum non erit . Generaliter autem bona quælibet ob Ecclesiam acquisita Sacerdotibus , siue mobilia, siue immobilia, post illorum obitum debent apud eandem remanere , nec super his vllum testamentum fieri poterit .

4 Nomine autem Ecclesiæ , vbi Clericorum est Collegium , non Episcopus , vel morientis Clerici successor, sed congregatio communis intelligitur, quæ rerum illarum curam , & canonicam debet habere distributionem . Vbi autem in locum defuncti vnus tantum substituendus erit , in ea bona , velut & alia dispensabit .

5 Licet autem Clerici, nec de mobilibus ipsi testamentum conficere possint, cōsuetudinis tamen est non improbatæ , vt de his pauperibus , & religiosis locis, atque his qui viuenti seruiert, siue sint consanguinei , siue extranei, aliqua iuxta seruitij meritum conferantur ; non testamenti ratione, sed eleemosynæ duntaxat intuitu . Item, si tantundem de proprij iuris facultate contulerit Ecclesiæ, quantum de ecclesiasticis bonis legauerit ad pia opera & eleemosynas, legatum sustinebitur .

6 De his verò , quæ vel paternæ successionis , vel co-  
gna-



275  
gnationis intuitu, seu consanguineorum, vel amicorum munere, respectu non habito ad Ecclesiam, ad Clericos peruenerint, liberè testari poterunt Idem si ex aliquo condecienti artificio Clericus lucraretur, vt superius attigimus; puta, si lecturam assumeret; vel prædicationem; si libros ederet & à Patronis muneraretur; si alicuius Magnatis filium institueret, & præmio cōdigno honoraretur: si donatione, legato, pensione, aut successione aliquid assequeretur, vel artificio aliquo, personalique industria acquireret. Quod si verò Clerici decesserint intestati, nec aliqui fuerint inuenti, qui iure cognationis ipsis succedere valeant, si ingenuis gaudeant natalibus, in integrum tunc Ecclesia succedet, nec cuiquam ex rebus eorum aliquid præsumere licebit. Aliud si egentes essent, & paupertate pressi.

7 Si verò seruus ad sacros Ordines promotus libertatem nactus fuerit, idemque postea decesserit intestatus, nihil olim dominus de bonis eius vendicare poterit; sed eius peculium in quatuor partes diuidetur: quarum vna Episcopo, altera Ecclesiæ, tertia pauperibus assignabitur, quarta parentibus. Et si non sint capaces parentes, Episcopus eam recipiet, & in vsum Ecclesiæ diligenter distribuet.

8 Et quia hic de Testamentis & vltimis voluntatibus Clericorum tractamus, sciendum est, Testamentum esse, iustam sententiam voluntatis de eo, quod quis post mortem suam facere voluerit. In quo condendo, quamuis leges ciuiles maiorem testium numerum, nempe septem requirant; Ius tamen Canonicum ea quoque testamenta recipit, quæ coram proprio presbytero, & duabus vel tribus alijs personis idoneis facta sint, & executionem eis concedit, omni consuetudine reiecta, quæ maiorem testium numerum desideraret.

9 Item hoc iure, qui extremam voluntatem suam in alterius dispositionem confert, non videtur intestatus decedere: quamuis ius ciuile absurdum existimat eiusmodi dispositionem in alienum arbitrium conferre. In iure attamen Pontificio non minus executionem ad pias causas, quam-

quāuis per verba enunciatiue ad aliud prolata scriptū sit.

10 Et quia *in Testamentis hæc tria communiter fieri solent*. Hæredis videlicet institutio, Legata, & Fideicommissa: sciendum est, quòd sine institutione hæredis testamentum nullum esset, quia hic debet legata & fideicōmissa exequi. Legatum itaque est, donatio quædam à defuncto relicta, ab hærede præstanda: præstarique debet etiam nudis verbis relicta. Fideicommissum verò est duplex, aliud singulare, & aliud vniuersale. *Vniuersale est*, cum hæres de restituenda hæreditate, vel eius parte rogatur. *Singulare autem est*, cum singulas res quis alij restituere grauatur, vt fundum, hominem, vestem, argentum, pecuniam numeratam. Si igitur hæres nimium legatis grauatus fuerit, vel fideicōmissis particularibus, legis Falcidiæ beneficio, vel de fideicommissis vniuersalibus, Senatus consulti Trebelliani ope detrahere vel supplere: in his tamen quæ ad pias causas relicta sunt, Falcidia cessat.

11 Et quamuis leges sæculi hoc habeant, vt hæres ad soluendum cogatur, si author eius rem legauerit alienam, lege tamen Dei, qua secundum ius nostrum in primis vinetur, iniustum videtur, vt res, quæ alienæ sunt, à legatario teneantur. Idcirco in omnibus pijs voluntatibus per locorum Episcopos prouidendum est, vt secundum defuncti voluntatem vniuersi procedant, executoresque testamentorum huiusmodi, absque vllius iniuria, bona ipsa fideliter & plenè in vsus pios erogent. Quod si verò executor monitus intra annum piam Testatoris voluntatem exequi neglexerit, Episcopus ipse has partes supplebit.

12 Non omnibus autem permissum est facere testamentum. Nam religiosus quilibet, & Prælatus monasterij, qui tria substantialia professus sit vota, scilicet paupertatem, obedientiam, & castitatem, testari non potest: quia sicut seruus simpliciter acquirendo acquirit domino, ita Prælatus incapax, etiamsi nomine suo proprio acquirat, acquirit Ecclesiæ.

13 Item hæreticus (cum nihil habeat, bonaque omnia sua



sua fisco debeantur, etiamsi post mortem tantum eius la-  
 bes detecta, sit) merito factionem testamenti non habet.  
 Nec etiam publicus vsurarius; nisi præscriptam à lege  
 cautionem præstiterit. Nec seruus. Nec furiosus; nisi cū  
 habet lucida interualla. Nec mentecaptus. Nec mutus:  
 Nec surdus à natura: secus si ex accidenti, & scribere sciāt  
 Nec qui articulatè hæredis nomen exprimere nescit. Nec  
 impubes, videlicet masculus minor anno quartodecimo,  
 fæmina duodecimo. Nec filius familias, nisi de peculio  
 castrensi, vel quasi castrensi. Nec prodigus, postquam  
 ei bonis à iudice interdictum est. Nec qui damnatus ad  
 mortem naturalem, vel ciuilem, fuit. Nec qui ad perpe-  
 tuum carcerem, siue Clericus siue Laicus, damnatus est.  
 Nec de statu suo dubius & incertus. Nec apud Paganos  
 captiuus. Nec criminis læsæ Maiestatis reus. Nec damna-  
 tus ob crimen famosum. Nec qui vtroque lumine orbatus  
 est; nisi formam quandam à iure traditam obseruet. Nec  
 is denique, quem publicè notum est excommunicatū esse.

14 Sed non omnes tamen supradicti, ad pias causas  
 testari prohibentur, sed hi tantum, quibus ideo testamen-  
 ti factio adimitur, quia iudicium non habent; vel quia  
 nihil proprii habere possunt, vel in aliena potestate sunt.  
 Ad prius exemplum pertinet furiosus, mentecaptus, pro-  
 digus, impubes. Ad posterius, seruus, religiosus, hæreti-  
 cus, reus læsæ maiestatis, captiuus, & similes.

15 Ab intestatis verò Clericis, illud quod venit appli-  
 candum fisco, non applicatur fisco Papæ, sed Episcopo lo-  
 ci, vt diligenter distribuatur ad vsum Ecclesiæ: quia Epi-  
 scopus & Clericus tenentur arctissimo vinculo charitatis  
 & misericordiæ, erogare superfluum Ecclesiasticorum in  
 vsus pios, & egenorum subleuationem. Sed iam restat,  
 vt videamus de Iudicijs.

## LIBER QVINTVS.

*De Iudicijs Civilibus, ad forum Ecclesiasticum Spectantibus.*

## TITVLVS I.

*De Diuisione Iudiciorum.*

**E**xplicito tractatu personarum altioris gradus in Ecclesia Dei libro primo; & inferioris gradus libro secundo: itemque rerum Ecclesiasticarum spiritualium libro tertio, & rerum secularium libro quarto: restat iuxta partitionem initio factam, tractare de Iudicijs Civilibus prius, quorum materia est ampla, & admodum diffusa, postmodum de Criminalibus, deque Censuris deinceps Ecclesiasticis, illa perstringentibus. Sed hoc sequentibus libris. Modo videndum est, quid sit Iudicium, vnde sic dicitur, & quomodo inter se diuidatur.

*Iudicium itaque, prout hic sumitur pro instantia causæ discutiendæ, est actus legitimus trium personarum in iudicio contententium, videlicet, Actoris, Rei, & Iudicis. Diciturque iudicium, quasi ius dictum; quod veteres inquisitionem appellabant; iudiciorumque auctores, prepositos quasi tores. Quod quidem nomen inquisitionis adhuc retinemus in ea specie iudicij criminalis, in quo iudex procedit ex officio.*

3 Diuisio autem iudicij est trifaria in iure Canonico. Prima desumpta à materia & potestate. Secunda à qualitate iudicis. Tertia denique ab ordine procedendi. Humanum etenim genus, non tantum legibus, sed etiam potestate regitur: hinc ius Civile originaliter dependet à potestate Cæsarea: & ius Canonicum à potestate Pontificia, in tantumque Clerici sunt ab ecclesiastico iudice indicandi, vt nec Papa subijcere possit Clericos potestati seculari.



4 Atque hinc, *prima diuisio iudiciorum hæc est*, quod aut sunt secularia, aut ecclesiastica. *Iudicia secularia sunt*, quæ coram iudice laico inter personas seculares exercentur. *Ecclesiastica vero sunt*, quæ coram iudice ecclesiastico inter personas ecclesiasticas agitantur. Et sicut ciuiliū non nisi ciuilis esse debet executor dependens à potestate Imperiali seu Regia: ita etiam ecclesiasticarū iudex est administrator dependens à potestate Pontificia.

5 Sunt tamen casus plurimi, in quibus iudex Clericus cognoscit inter laicos, & è contra laicus inter Clericos: & tale iudicium vocatur mixtum; vbi agitur de re quæ participat de vtroque: videlicet, in causa matrimonij, ysurarum, perurij, sodomix, decimarum, pupillorum, viduarū miserabilium, sortilegiorum, *hereseos*, blasphemix, & omnes alix controuersix, quæ aliquando oriuntur inter Laicos & Clericos, considerando quis gerat personam rei cōuenti, & rem ipsam quæ in iudicio est proponenda: quia, semper actor sequitur forum rei, & qualitatem obseruet negocij.

6 Semper autem est competens ecclesiasticus iudex inter laicos vbicumque agitur de materia peccati: & vbicumque delinquitur contra miserabiles personas, quæ semper sunt sub protectione Papæ & Episcoporum. Similiter vbi delinquitur cōtra libertatem & immunitatem ecclesiasticam, & vbi iudex secularis non potest prouidere, aut non auditur in iudicio, spectat ad iudicem ecclesiasticum declarare peccatum, & res determinare, inhibere, atque, etiam punire, si delictum est punibile de iure Canonico; vel de iure Ciuili & Canonico simul. Et tunc erit mixti fori, & præfertur ille qui præuenit.

7 Habent igitur Clerici priuilegium, ne coram iudice laico conueniri valeant, cui non potest villo pacto renunciari, aut priuatorum consensu iuramentoque illicito derogari. In iudicem tamen non suum; si is persona sit ecclesiastica, & Episcopi Diocesani consensus accesserit, Clerici consentire poterunt, Sed in laicū arbitrum nequaquam  
com-

compromittere poterunt, etiam si renunciaissent foro cum consensu & licentia proprii Episcopi. Episcopus enim non potest delegare laico criminales causas Clericorū, etiam si essent simul delegati Clericus & Laicus; quia ille laicus adhuc nō posset cognoscere: nec posset verberare seu torquere Clericum, etiam accedente mandato Episcopi, quia adhuc incideret in excommunicationem.

8 Potest tamen Episcopus delegare laico causam civilem Clericorum, sed circa potestatem imponendi censuras. Et Pontifex potest in priuilegium concedere Principi laico (quod tamen sine maxima causa facere non debet) cognitionem certarum causarum inter Clericos: non verò certorum Clericorum: quia per illud verbum Domini, *Nolite tangere Christos meos*, sunt exempti à potestate seculari.

9 Regulariter tamen receptio Clericatus, beneficii, vel seruitij in Ecclesia post delictum commissum, nihil proficit assumentis, ad effectum exemptionis à iudice seculari; & sic ab ipso poterit puniri absque eo, quod delinquens fori priuilegio gaudet. Dummodo constet ipsum ordinem ecclesiasticum suscepisse in fraudem, ut se eximeret à iurisdictione seculari. Secus tamen si constaret absque vlla fraude post commissum delictum aliquem assumpsisse Clericatus ordinem, quia huiusmodi ordo eum liberat à iurisdictione iudicis secularis. Nam laicus iudex quoquomodo Clericum condemnaret, ab Ecclesia, cui iniuriam irrogasse noscitur, tamdiu sequestrandus erit, quousque reatum suum cognoscere emendet.

10 Dubitari tamen cōtingit, si iudex laicus delinquentem captum detineat, & is se Clericum asserens ad Curiam ecclesiasticam remitti postulet; vel illum Curia ipsa ecclesiastica tanquam Clericū repetat; si iudex laicus illum esse Clericum inficiatur, & propterea minimè remittendum contendat, quis sit huius dubitationis legitimus futurus iudex? Et cum de re ecclesiastica & spiritali sit controversia ad iudicem ecclesiasticum huiusmodi cognitio pertinebit. Iudex tamen secularis, vel alius, cuius interfit,



dum res huiusmodi cognoscitur vocandus erit. Sed si notorium fuerit, vel fama publica extiterit reum caprum talem esse Clericum, qui huiusmodi privilegio gaudere debeat, aut ipse pro Clerico communiter habeatur; statim ante ullam de Clericatu cognitionem ecclesiasticæ Curia restitutus erit. Idem dicendum est, si ante deprehensionem pro Clerico publicè se gerens tōsuram & clericales vestes deferens deprehensus fuerit: donec enim contrarius constiterit, talis, qualem eum demonstrat habitus, præsumendus erit.

12. Aliud observandum: si antequam deprehenderetur, publicè se pro laico gerebat, & quasi laicus communiter habebatur: nam quanquam deprehensionis tempore in habitu Clericali repertus fuerit, ob præsumptionem, quæ aduersus captum ex præcedenti laicalis habitus delatione orta est, non antea restituendus erit, quam de Clericali titulo fidem fecerit. Interim tamen quivis processus iudicis penitus conquiret.

13. *Secunda iudiciorum divisio est.* Quod quædam sunt ordinaria, & quædam extraordinaria siue delegata. *Iudicium ordinarium est*, quod corā iudicibus ordinarijs exercetur. Ordinarius verò iudex est, qui suo iure, vel superioris beneficio vniuersalem iurisdictionem exercere potest, ut Episcopus, Archiepiscopus, Legatus, & similes. Constituitur autem à Lege, à Principe, Consuetudine, vel Vniuersitate. *Extraordinarium siue delegatum iudicium est*, quod coram iudice delegato exercetur. Iudex verò delegatus est is, cui ab eo, qui demandare potest, causa committitur.

14. *Tertia iudiciorū divisio est*, quod quædam sunt Summaria, quædam ordinaria & solemnia. *Summaria sunt*, in quibus subtili & solemnī ordinis iudiciarij obseruatione prætermissa proceditur. Ut sunt causæ electionū, postulationū, promissionum, matrimonij, vsurarum, decimarum, beneficiorum: item in causis hæresis, & similibus; in quibus nec solemnīs libelli portio, nec litis contestatio est necessaria: sed simpliciter de plano, sine strepitu ac figura iudiciali

ciali proceditur. Itaque de his iudex etiam tempore feri-  
 arum, ob hominum necessitates indultarum cognoscet, &  
 litem, dilationes amputando, exceptiones dilatorias & fru-  
 stratorias repellendo, quanto poterit faciet breuiorem,  
 prout hæc duabus Clementis luculentissimis Constitutio-  
 nibus latius continentur. *Iudicium vero Ordinarium & so-  
 lemne est*, in quo exquisito & solemni iuris ordine seruato  
 proceditur: vt puta, libellum porrigendo, litem contestan-  
 do, & alia faciendo, de quibus infra latius visuri sumus.

15 Sciendum autem est, quòd tam in seculari, quàm  
 in Canonico iudicio, siue ordinariè siue extraordinariè  
 procedatur, & siue summariè siue solemniter in terminis  
 ordinarijs causa discutiatur, aliud est iudicium Ciuile, &  
 aliud Criminale. *Ciuile est*, cuius finis respicit priuatum  
 cōmodum: & de hoc libro præsentì tractabimus. *Crimina-  
 li est*, quod publicum interesse, vindictamque publicam re-  
 spicit; & de hoc infra libro sexto tractabimus, cum aliqua  
 adhuc ad iudicium delegatum pertinentia titulo sequenti  
 tradiderimus.

## TITVLVS II.

### *De Iudicijs Delegatis.*

1 **C**VM Episcopus in tota sua Diocesi iurisdictionem ordinariam à Summo Pontifice sibi tradi-  
 tam noscatur habere, poterit in quolibet loco  
 suæ Diocesis non exempto, per se, vel per alium pro tri-  
 bunalì sedere, & ea quæ ad ipsius spectant officium libere  
 exercere; & cum opus fuerit, auxilium publicum, si non  
 habet iurisdictionem temporalem, implorare. Hinc statim  
 collige, quod non solum Princeps Supremus, aut Papa,  
 sed etiam alij Ordinarij possunt ad bonum publicum iu-  
 risdictionem mandare. Is tamen, cui ab Imperatore, aut Pa-  
 pa mandatur, cæteris longè præstat. Nam & alteri ex cau-  
 sa subdelegare ( nisi illius electa fuerit industria ) reniten-  
 temque compellere, & propriam sententiam exequi, &



contra ipsum Ordinarium procedere potest : quæ in cæteris delegatis non obtinent .

2 Non tamen in ciuili iudicio ( secus autem in causa criminali ) alterutri parti, vñ coram se personaliter compareat, iudex à Principe delegatus, iubere poterit, nisi vel mandatum ad hoc speciale receperit : vel nisi pro veritate dicenda, vel pro iuramento calumniæ exhibendo; vel alia iuris necessitas partes coram exigat specialiter præsentari.

3 Sed nec omnibus promiscuè vices suas demandare poterit, delegatus Papæ, sed illis duntaxat, quibus auctoritate literarum Sedis Apostolicæ, vel Legatorum eiusdem causæ committuntur : hoc est, non nisi dignitate præditis, aut personatum obtinentibus, vel Ecclesiarum cathedralium Canonicis. Licet alias extra iudicium simplex religiosus possit esse Commissarius Papæ.

4 Potest autem vnà cum pluribus delegari : sed si in rescripto non fuerit adiecta clausula. *Quod si omnes interesse nequiuert, vel voluerint, reliqui exequantur* : Nisi simul omnes coniunctim processerint, quidquid aliqui fecerint, nullam iuris habebit efficaciam, non solum quoad sententiam definitiuam, sed etiam quoad interlocutorias. Quod si verò is, qui interesse non potest, coniudici, vel alij vices suas commiserit, perinde res accipienda est, atque si omnes simul procedant.

5 Aliud iuris est, si illud adiectum sit, Nam nec impeditorum Collegarū subdelegatos admittere cogendi erunt; & quod pars illorum fecerit, ratum habendum erit. Hoc tamen ita demum obtinebit, si reliquis procedere volentibus, quosdam interesse non posse, vel omnino nolle legitimè constiterit : alioqui procedentes nihil agent.

6 Porro, vno illorum commissum negotium inchoante, alij vltèrius se intromittere non poterunt, nisi aut infirmitate, aut alia iusta causa, illi qui causam tractare inceperit, contigerit impediri : aut idem nollet, vel dolo malo in eo procedere recusaret; tunc poterit alius, vel alij procedere. Non sic in procuratoribus datis in solidum,  
quia

quia vno occupante & postea impedito; alij non possunt procedere; nisi dictum fuisset in Constitutione, quod non fieret melior conditio occupantis. Iurisdictio verò per vñ, viuo mandatore, perpetuata, quod omnes condelegatos iudices perpetuata intelligitur.

7 Sed siue vni, siue pluribus: siue à Principe, siue ab alio mandata fuerit iurisdictio; mandati forma diligenter custodienda erit, nec aliquid contra quam sibi mandatum fuerit, delegatus sibi tentare audebit. Quia potestas delegati à voluntate delegantis in mandato contenta regulari debet: quæ voluntas delegantis, vel alterius constituentis cognosci non potest, nisi vel ab ipsamet scriptura, vel à natura rei in mandato contentæ, quia declarare aliquid contingit aliquando expresse, & aliquando virtualiter.

8 Planè iurisdictionem impedientes, vel in iudicium venire detrectantes, delegatus à Papa ecclesiastica distributione, etiamsi literæ commissionis id non contineant, coercere potest. Vel pro delicti, & causæ qualitate secundum arbitrium suum, si certa poena Canonibus non exprimitur, mulctare: quia ex eo, quod alicui causa committitur, super omnibus, quæ ad causam ipsam spectare noscuntur, plenam recipiet potestatem.

9 Rationabiles quoque & honestas excusationes, à iuris æquitate non abhorrentes, licet id expresse mandato non contineatur, admittet. Nisi quod nullæ debeant exceptiones admitti, litteris expressum fuerit.

10 Sed etsi literas aduersus Albertum ab Apostolico impetraueris, & is, vt mandatum eludat, antequam literæ ad iudicem datum perueniant: vel etiam postea antequam citetur, de possessione, de qua controuersia vertitur, communicationem fecerit, eum qui in possessionem sese ingressus delegatus cogere, vt coram se iuris pareat æquitati, nec quod rescriptum contra Albertum impetratum fuerit, opponi poterit: generaliter enim omnis venditio, cessio, alienatio iudicij mutandi ausu facta, vtroque iure prohibetur. Alias delegata iurisdictio ad personas rescripto non



non comprehensas, etiam ipsis volentibus prorogari non potest.

Simili ratione statutum est, vt is, per quem ab Apostolica Sede, certo loco inquisitio, vel quid aliud expediri mandatur, ob illius potentiam, vel malitiam, contra quem inquiri vel procedi mandatur, vel fautor eius, eo loco secure mandatum executioni mandari nequeat, ad id exequendum locum securuar, & idoneum eligere valeat, ne quis scilicet ex proprio dolo vel fraude cōmodum reportet. Quinimò idem faciat, si alia probabilis causa subsit, propter quam in loco decreto perfici commodè nequeat, quod mandatur, ne tali prætectu impediri cōtingat mandatum Apostolicum, vel differri. Si autem delegatus Ordinarij in loco exequi non potest, insinuet Ordinario, qui super hoc provideat, vel expressè committendo eidem, quod extra locum statutum id profit, vel alio modo. Iam autem quia nō sic de facili à delegato Papæ per vniuersum Orbem recurritur ad Papam, sicut ad Ordinarium de provincia, vel diocesi; ideo delegatus Papæ excusatur, cum statim loco commodo mandata Papæ exequitur.

12 *Soluitur autem delegatio multis modis; puta, reuocatione, morte, impotentia delegati, executione sententiæ, propria renunciatione, temporis fluxu, excusatione delegati, & aliquando eiusdem suspensione, & similibus modis, qui vel à natura mandati oriuntur, vel à qualitate causæ delegantis & delegati.*

13 Reuocatione soluitur delegatio, cum is, qui mandauit iurisdictionem, antequam is cui mandata fuerit, ea vti coeperit, mandatum reuocat. Cum eo casu iurisdicctio in eum efficaciter transisse non censeatur: siue illa reuocatio fuerit facta expressè, siue tacitè. Quod si iam iudex delegatus vti sua delegatione coepisset, necesse est vt ei reuocatio intimeretur, vt processus coram eo factus non teneat.

14 Morte autem extinguitur delegatio, tam eius qui mandauit, si re integra decesserit, quam etiam eorum, qui delegationem susceperunt. Quod quidem adeo obtinet,

28  
vt si pluribus iudicibus datis, vnus rebus eximatur humanis, delegatio etiam quo ad superstites expiret: nisi aliud in delegatione comprehensum fuerit; aut sub dignitatis nomine non proprio, facta fuerit. Quia tunc mortuo eo, qui est in dignitate constitutus, iurisdictio transit in successorem etiam re integra.

15 Et quia mors & absentia æquiparantur re integra, idcirco si ab Apostolica Sede datus iudex quoties eum abesse contigerit, vices tibi suas commiserit, & interim rebus humanis eximatur ipse, tu commissum tibi negotiū libere poteris definire, si illo viuente iurisditione vti coeperis, non secus ac si is viueret & abesset. Idem iuris est, si tibi vices sub ea forma committat, donēc eas reuocandas duxerit.

16 Sed etsi delegatus mortuus quidem non fuerit, ita tamen impediatur, vt omnino delegationis negotio interesse non possit, extinguatur delegatio. Impedimentum autem intelligitur, tam iuris, quàm facti. *Iuris*, vt si infamis factus, excommunicatus, vel suspensus, aut alio legitimo impedimento detentus fuerit. *Facti*, vt si ineuitabili necessitatis articulo, puta infirmitate, præpediatur; aut captus à barbaris in seruitutem deducatur.

17 Idem iuris est, si delegatus à Principe, per se, vel per alium, sententiam executioni mandauit, vel mandari præcepit. Tunc enim eius iurisdictio cessat: quia semel est officio suo functus, Quod si mandauit per alium, & non est paritum, ipsemet postea exequetur. Et ideo per sententiam solam non videtur iudex officio suo functus, nisi & exequatur. Vnde iudex delegatus habet iurisditionem post definitiuam intra annum integrum: post annum verò secus; nec potest iam exequi sententiam suam. Et propterea non potest iudex delegatus absoluere excommunicatum à se, nisi intra annum. Nisi esset appellatum à sententia, vel ab excommunicatione: quia tunc annus non currit, & potest absoluere post annum.

18 Quod si verò iudex delegatus interloquendo, pro-



18  
nunciauerit se super aliqua causa procedere non debere, esseque se iudicem ad hoc incompetentem, usque adeo iurisdictionem amittit, ut etiam ex litigatorum consensu illam reassumere non possit. Si verò pronunciat se competentem, & non appellatur, sententia transit in iudicatum, & acquirit iurisdictionem, & valet iudiciū coram eo, quamuis in veritate non esset iudex competens.

19 Sed & cum causa intra certum terminum deducenda committitur, termino transacto mandatum expirat: nisi tempus communi partium consensu prorogatum fuerit. Terminus autem tunc incipit currere, cum iudicis literas recepisse contigerit.

20 Non absimili ratione constitutum est, ut si quis Apostolicas literas impetrans intra annum, postquam iudicum copiam habuerit, dolo, vel negligentia eis uti distulerit, auctoritate posteriorum literarum, quas postea forsitan eius aduersarius impetrauerit, conueniri valeat: licet in posterioribus nulla mentio de prioribus habeatur. Alias non data impetratione secundi, valet primum rescriptum perpetuò.

21 Recusatione quoque extinguitur delegatio, quod eo casu accidit, quo iudex datus, altero litigatorum petente, ob probabilem aliquam suspicionis causam, à iudicio remouendus pronunciat: ut puta, si iudex datus dicatur dominus litigatorum aut consanguineus, aut aduocatus, aut cum altero immodicam contraxisse familiaritatem: aut ab eodem in alia causa partem appellasse: aut nondum iudicem ad legitimam etatem peruenisse: aut aliquo alio modo excusasse, quia materia recusationis iudicum latissimè pater. Semperque extinguitur delegatio, cum iudex datus suspectus postulatur & pronunciat. Unde sciendum est, quod iudex allegatus suspectus & recusatus nulliter procedit, quando recusatio facta est legitimè, videlicet dato libello recusatorio coram ipso recusato, cum specificatione causarum recusationis, & petitis arbitris confidentibus, coram quibus obtulerit se probaturum

turum dictas causas . Alias recusatio non releuat .

22 Dominus quoque , vt diximus, habens iurisdictionem in subditum , si fiat ei inimicus , & vassallus protestetur , & appellet , etiam extra iudicium coram honestis personis , eximitur à iurisdictione , & non potest Dominus contra eum procedere , siue sit laicus, siue ecclesiasticus .

23 Recusationis autem causa variè cognoscitur , ne contra vnum ex duobus ab Apostolica sede delegatis suspicionis causa proponatur , si quidē illa clausula appositā sit . *Quod si ambo interesse non possunt , alter in causa procedat , coram non recusato coniudice expedienda erit .* Vbi verò non est dicta clausula in rescripto , debet super hoc ad arbitros recursus haberi , prout Gregoriana Constitutione latius continetur . Cum autem delegatus Episcopi recusatur , recusationis causa coram Episcopo probanda erit , licet coram ipso , qui recusatur , sit alleganda .

## T I T V L V S III.

### *De Procuratoribus .*

1 **E**Xpositis generibus iudiciorum , consequens nunc est , vt videamus , per quas personas illa exerceri possint . Et quia non solum per nosmetipsos solemus in iudicijs litigare , verum etiā per procuratores nostros aut Syndicos ; ideo titulo praesenti adnotabimus , quid , & quotuplex sit procurator , qualis eius auctoritas , & quomodo finiatur . Itemque an vnus , vel plures esse possint ; vel qui procuratores esse non possint .

2 Cum autem secundum Canones omnes , administrator communiter vocetur Procutator , propterea hic propriè Procurator intelligi debet , qui aliena negocia mandato Domini , vel quasi Domini , administrat . Syndicus verò , est vniuersitatis seu communitatis alicuius defensor & procurator .

3 Porro procuratorum duæ sunt species . Alij enim



dantur ad iudicia . Alij ad negotia extra iudicium expli-  
canda . *Primus* non potest alium substituere, nisi post con-  
testationem litis . Non potest esse minor viginti quinque  
annis , nec furiosus ; nec surdus , nec mutus , nec accusatus  
de crimine , servus , excommunicatus : vel constitutus ab  
excommunicato . Nec Clericus in quolibet gradu consti-  
tutus quoad civiles causas, nisi promissibilibus personis.  
Nec Regularis, nisi in casu sui Monasterij iubente Prælato .  
*Alter*, vocatur etiam Oeconomus & Actor, & potest ad cer-  
ta negotia alium substituere , quandocumque ei opus vi-  
sum ferit ; quamvis ipse nondum sit in ætate matura , vt  
latius infra patebit .

4 Potest autem ad iudicia, non solum Paterfamilias ,  
verumetiam filiusfamilias, nullo intercedente Patris con-  
sensu, fieri procurator , si legitimam ætatem compleue-  
rit . Licet enim quis post decimum seipsum annum pro-  
curator ad negotia licitè constituitur : ad iudicia tamen ,  
vt supra diximus , n̄ si maior viginti quinque annis fuerit ,  
constitui non poterit .

5 Aliud tamen iuris est in principali nam si is ad quar-  
tum decimum ætatis annum peruenerit , in causis bene-  
ficialibus, & alijs spiritualibus, nec non ab eisdem depen-  
dentibus, ad agendum , defendendumq; per se , vel procu-  
ratorem , perinde admittendus erit , atque si vigesimum  
quintum ætatis annum natus esset . Nec vlla patriæ pote-  
statis, vel voluntatis erit habenda ratio : quamquam alias  
regulariter filiusfamilias , sine Patris assensu in iudicio  
esse non possit .

6 Nominatim verò filiusfamilias absq; Patris assensu ;  
in ijs rebus, & causis in iudicio versari non potest , in qui-  
bus Pater habet vsumfructum . In quibus verò non habet  
vsumfructum, & prouisionem suam ad vitam, potest filius-  
familias agere , & procuratorem constituere absque Patris  
consensu : prout in castrensi , & quasi castrensi . In causa  
verò criminali , nedum sine consensu Patris constituere  
procuratores , & agere potest filiusfamilias accusando, sed  
etiam

etiam Patre contradicente; licet contrarium nonnullis videatur.

7. Quod si quartum decimum annum natus non fuerit, in huiusmodi causis, nec agere, nec defendere per se poterit: sed vel per Episcopum, vel eiusdem Officialem, ad has lites, curator sibi dandus erit. Vel si maior infans fuerit, cum auctoritate alterius eorundem procuratorem constituere poterit.

8. Quin etiam Sedis Apostolicæ delegatus, vel ab eodem Subdelegatus, ad eas duntaxat causas, quæ coram ipso ventilandæ fuerint, vel procuratorem dare, vel procuratoris instituendi auctoritatem præstare poterunt. Constitui autem poterit non solum Clericus, verum etiam laicus qui nullum poenitus habeat ordinem, nec sit ecclesiastica persona. Regulariter enim omnis qui non prohibetur ad procuratoris officium idoneus habetur.

9. Possunt autem & plures in vna causa constitui procuratores, & vnus. Si tamen duo simul, non adiecto quod in solidum sint procuratores, constituentur, vnus sine altero non admittetur. Sicut si sint in solidum constituti, tunc enim illius melior erit conditio, qui per lites contestationem negotium primus occupauerit. Et dominus litis factus alterum excludet, nisi constituens dixerit, quod occupantis conditio melior esse non deberet. Tunc enim si eum qui occupauit, aut legitimè impediri contingat, aut prosequi fortè nolit, poterit alter negotium ab alio inchoatum suscipere, ac perficere, dum tamen ab alio alius non fuerit substitutus.

10. Sed siue vnus sit procurator, siue plures, fines mandati diligenter custodiendi erunt, vsque adeo, vt si generaliter quis ad omnia, etiam speciale mandatum exigentia constitutus procurator fuerit, ex vi generalitatis huiusmodi ad aliquem articulum, in quo mandatum speciale exigitur admitti non debeat; nisi clausulam generalem, quorundam articulorum, speciale mandatum exigentiam, subsequatur expressio, puta transactionis, & iusiurandum



dum deferendi . Tunc enim & non expressos casus mandatum complectetur .

11 Crimina tamen, vel defectus in persona electi, vel eligendi, siue eius cuius fauore, vel facienda, vel iam facta est prouisio, nec huiusmodi generalitatis, vel expressionis obtentu, opponendi facultas competit; nisi super hoc aliud mandatum habeat . Nam huiusmodi generale mandatum grauiora, vel maiora quam in ipso procuratorio sint expressa, non complectitur .

12 Sed & illud non est omittendum, quòd licet procuratori ad negotia liberum sit alium quandocumque constitutare, vt paulò supra attigimus : Iudiciario tamen procuratori minimè id concedi ; nisi aut lis fuerit intestata, vel in rem suam datus sit, vel à Domino substituendi fuerit concessa facultas: quo casu etiam non expressam personam poterit in procuratorem eligere . Aliud enim videtur esse, si post litem à Domino contestatam fuisset quis datus procurator, quia tunc non posset substituere .

13 Non tamen in omni iudicio procurator interuenire potest. In criminalibus enim causis, neque accusator, nec accusatus, nisi per seipsos impetere vel defendere permittuntur : nisi vel ab illustri propulsanda sit iniuria : aut rei contumacia sit excusanda : vel contra accusatorem sit excipiendum : aut de leui crimine tractetur : aut si de graui agendum sit, ciuilitè agatur .

14 Sciendum autem, quòd licet procurator regulariter constirui soleat aliquis idoneus amicus, non omnes tamen ad procurationis officium temere admitti debent. Ideo Episcopus & vniuersi Sacerdotes, cum ad solam Dei laudem, piorumque operum actiones sint constituti, ab huiusmodi ministerio excludendi erunt . Imò, nec tanquàm principales possunt, vel debent interuenire, nisi fortè per procuratores . Seruos enim Dei pacificos, & ab omni discordia auersos esse oportet .

15 Idem quoque obtinet in Monachis : nam illos, cum mundo mortui solitariam vitam degere profiteantur, à fo-

rensi

rensi strepitu ac litigijs summoueri conuenit. Planè Monasterij exigente vtilitate vel necessitate, & Abbatis accedente imperio, ad procurationis officium accedere minime prohibentur. Præsertim si monasterium ob paupertatem non habet vnde salarium commodè soluere procuratori possit. Nomine vero lites exercentes, videntur quodammodo esse infames.

16 Postulandi quoque officium Clericis, qui stipendijs sustentantur ecclesiasticis, coram seculari iudice, in secularibus negotijs interdicitur (nisi propriam causam, vel Ecclesiæ suæ prosecuti fuerint: vel nisi vrgente necessitate proconiunctis, aut miserabilibus personis postulare velint: quod tamen gratis & ex pietate facere debent.) Quia dedecus & opprobrium Clericalis dignitatis esset, si Clerici se ingererent disceptationibus forensibus: & aliter faciens debet deponi, vel excommunicari, post trinam admonitionem Episcopi; vel vnicam Synodi Prouincialis.

17 Hi verò, qui excommunicationis vinculo innodati sunt, non solum procuratorio nomine iudicio interesse non possunt, verum etiam nec proprio. Actore ramen impugnante, excommunicato reo legitimè defensionis copia non est adimenda. Et quamuis cogatur procuratorē dare ad defendendum, non tamen potest eum dare ad agendū. Similiter non esse repellendum procuratorem vniuersitatis alicuius ex eo, quod maiores illius & iurati, qui regunt prædictam vniuersitatem, tempore quo iniunctum fuit procurationis officium, erant excommunicationis sententia innodati. Nisi vel illi ipsi excommunicati in literis proeurationis essent expressi, vel alias eorum auctoritate procurationis institutio facta fuisset: aut ipsa vniuersitas excommunicationis cōscientia simul cum eisdem procuratorem constituisset.

18 Tandiu autem durat quis procurator, quamdiu is qui eum constituit, reuocat: siue expressè, siue etiam tacitè. Vnde si tu Petrum simpliciter procuratorem constitueris, isque in iudicio procuratorio nomine esse cœperit, dein-



deinde si tu, siue ante litem contestatam, siue post, ad causam ipsam venias, non vt ipsi assistas, sed vt causam eandem tractes; tractando causam Petrum procuratorem reuocare censeris. Nisi quod non animo reuocandi facias, vel expressè professus fueris; vel ex aliquibus appareat cōiecturis.

19 Sed si eundem Petrum, sub eā forma: *Quoties te abesse contigerit, procuratorem constitueris: & postmodum per te ipsum causam tractes*, non propterea tamen procuratorem reuocare videris. Quinimmo Petrus quodcumque abesse te contigerit, procuratoris assumet officium. Hæc autem de reuocatione domini intelligenda sunt. Nam si à procuratore tuo, alius procurator legitimè substituatur post mandatum susceptum, etiam si eo substitutus vsus non fuerit, ab illo reuocari (nisi etiam potestas reuocandi fuerit eidem concessa) non potest.

20 Sed si cum ad plures, vel ad omnes causas Petrum generaliter procuratorem constituisset, is in vna, vel altera substituerit, in reliquis procuratoris officium exercere minimè prohibetur. Quod si ignorante iudice, vel aduersario, post contestatam litem mandatum reuocatum fuerit, ratum esse debet iudicium, in quo quis post ignoratam reuocationem quasi procurator versatus fuerit.

21 Non sic tamen in matrimonio statuitur: nam si procurator ad contrahendum specialiter constitutus, antequam contrahat, à domino reuocatus fuerit, contractum postmodum matrimonium, licet tam procurator, quàm ea cum qua contraxit, reuocationem huiusmodi penitus ignorauerint, nullius momenti penitus existet; cum illius consensus defecerit, sine quo firmitatem habere nō potuit. Idem censendum licet Dominus iurauerit non reuocare, vel poenitere; quamuis periurus sit, & de eo debeat sibi poenitentia imponi.

22 Quod si scientibus iudice & parte mandatum reuocatū fuit, & nihilominus est in iudicio processum per procuratorem reuocatum, tam alia acta, quàm ipsa sententia nullum

nullum afferet domino præiudicium . Cum falsi procuratoris exceptio non solum ante sententiam, verum etiam posteam possit obijci, qua probata iudiciū prorsus nullum redditur .

23 Non idem iuris statuetur in eo, qui absens procurator constitutus, præsentatum sibi mandatum suscipere nolle dixerit . Is enim refutatione huiusmodi nequaquam obstante, quamdiu constituens in eadem voluntate perstiterit, ad libitum mandatum accipere poterit .

24 A literis, vel instrumento, quibus te aliquis in causis suis procuratorem constituens pro te debito modo cauit, simpliciter nulla facta protestatione, à te scienter, receptis, non potes postea recusare illius defensionem : imò cogi poteris illum defendere in omnibus causis & negotijs, ad quæ prædicta instrumenta seu literæ se extendunt : cum per hoc ad omnia tuum præstitisse videaris assensum . Secus si ignorares quid cōtineretur in instrumento vel literis, nec enim ignorans vel errans consentire videris .

25 Denique morte constituentis desinit quis esse procurator, quod interdum obtinet, etiam re non integra . Nam si Prælati, vel Rector, te pro beneficio suo, vel Ecclesia procuratorem constituat, & tu viuente illo litem cōtestatus fueris, aut negotium aliter attigeris, post mortem tamen illius, etiam quo ad coepta procurator esse desinis . In causa tamen pia, quia in illa mandatum morte mandantis non finitur etiam re integra, potest mandatarius adimplere mandatum mandante mortuo . Similiter procurator vulnerati ad pacem faciendam constitutus, pacem facere potest post mortem vulnerati . Prout etiam non soluitur morte mandatum, vbi principalis satisfecisset pro procuratore . Nec procuratorium mandatum expirare morte domini, quando procurator effectus est dominus litis .



## TITVLVS IV.

*De Pactis, & Transactionibus.*

1 **Q**uia litis euentus perſepe ſolet eſſe incertus, ideo partes meru iudiciorum concordiam ſpectant, & interdum veniunt ad pacta & transactiones, aut ad arbitros & cōpromiſſa. De pactis & transactione titulo præſenti diſpiciamus; de arbitris verò, & conuentione per compromiſſum, videbimus titulo ſequenti.

2 *Pactum igitur eſt*, nomen générale, comprehendens in ſe omnem conuentionem ſeu contractum. Specialiter verò pactum vel pactio à paciſcor dicitur, & eſt, duorum pluriumue in idem placitum ſeu conſenſus ad aliquid faciendum, vel dandum. Et eiufmodi conſenſus ſeu pactum inter quoscuque quacumque de initum, regulariter debet ſuam habere firmitatem: neque enim quiſquam (vt diuinum monet oraculum) ea, quæ de labijs ſuis procedunt, irrita facere debet.

3 Diciturque pactū quandoque nudum, & quandoque veſtitum. *Veſtitum dicitur ſex modis*: primo re: ſecundo verbis ſtipulando: tertio ſcripto: quarto conſenſu; vel in ſocietate, mandato, emptione, venditione, vel locatione, in quibus non requiritur ſcriptura vel præſentia, ſed ſufficit conſentire per ſe, vel per nuncium, aut ſcripturam. Quinto, cohærentia contractus: puta, quod vendidit tibi domum cum pacto, quod morer in ea per annum. Quod quidem valet, quia veſtitur cohærentia contractus venditionis, alas eſſet nudum. Sexto, interuentu rei, puta, ſi promiſi tibi facere aliquid, vt faceres mihi vel dares aliud: vnde ſtatim cum dederò tibi ſponſum, veſtitur pactum ex parte mea, ideoque interuentu eius obligatus es mihi ad promiſſum. *Nudum verò pactum dicitur*, quando non veſtitur aliquo prædictorum, ſed meris & puris finibus conuentionis. v. g. Promiſi tibi dare centum ſine aliqua interrogatione

tione præcedente, vel chirographo & huiusmodi, & consentis; alias si non consentires, non esset pactum, sed pollicitatio.

4. Tantæ igitur firmitatis pacta esse debent, ut Apostolicis etiam indultis derogare possint. Inde cum monasterio ab Apostolica Sede libera sepultura cōcessa esset, pactumq, esset cum Rectore Parochialis Ecclesiæ, ne parochiani ipsius ad sepulturam reciperentur. Responsum est, in dicto monasterio sepeliri eligentes, obstante conuentione, voti sui fieri non posse compotes. Sed quia pactum inter Ecclesias non debet nocere alijs non paciscentibus, ideo eiusmodi pacta nō seruantur hodie post designationem quartæ funeralis per Concilium Tridentinum.

5. Eodem etiā spectat, quod pactum à filia, dum nuptui traditur, cum patre factum, ut dote contenta, ad bona paterna nullum habeat regressum, si iuramento firmatum sit (licet lege ciuili improbetur) seruari debet, cum tale pactum non vergat in æternæ salutis dispendium. Quod si seruatum in animæ tendat detrimentum, quia fortè sit pactum de re turpi, veluti quod post mortem Titij Clerici, Seius in beneficio succedat, vel aliter de iure, vel de facto sit impossibile; nullam inducet obligationem.

6. Transactiones quoque similem iuris firmitatem obtinent, vsque adeo, ut iuribus omnibus, quæ partibus, aut obtentu præscriptionis, aut priuilegij, seu quocumque modo suffragari poterant, vires adimant. Est autem sciendum, quod transactio est de re dubia, & lite incerta, & nec dum finita, non gratuita pactio; sed aliquo dato, vel retento, vel promisso. Vnde dicitur transactio, quasi transitio actionis, eo quod transiens ab actione transit & discedit. Et differt à pacto & compositione, quia illa fieri possunt amicabiliter, nullo dato vel retento; hæc autem dato aliquo, vel retento, vel promisso.

7. Intelligendum tamen transactiones tenere, quæ non sunt iuri contrariæ. Alioqui, si aut super re sacra, litigiosa, aut in causa matrimonij interpositæ sint, nullum robur



obtinent. Scut & ob metum trasitio facta non valet: quod dicendum est & de omnibus contractibus meru. reuerentiali mariti, patris, domini, vel Prælati factis, minis interpositis. Similiter transactio facta super re iudicata, non valet: sicut & per nouam repertionem instrumenti rescinditur, maximè quando instrumenta essent de solutione.

## T I T V L V S V,

### *De Arbitris.*

1 **A**Rbitri dicuntur propriè, qui nullam potestatem à lege habentes, consensu litigantium in iudices eliguntur, in quos compromittitur, vt eorum sententie stetur. Possunt autem in arbitros eligi & illi, qui legitimam potestatem habent in partes, siue ordinariam iurisdictionem exercentes, siue delegatam; modo in eos concorditer compromittatur.

2 Sed serui, monachi, & religiosi cuiusvis ordinis seu societatis, arbitrium in se recipere non possunt. Ad hos enim quies, oratio, lectio, & manuum labor, non autem causarum spectat cognitio. Similiter hæretici, apostatae, schismatici, infideles, & excommunicationis vinculo ob delictum proprium innodati, arbitrorum in se officium assumere non poterunt.

3 Sed nec in laicum de re spirituali compromissum fieri potest. Si tamen is, aut Clerico sit adiunctus, aut Apostolica authoritate comptomissum suscepit, arbitri partes exequi minimè prohibetur.

4 Fœminæ quoque licet illæ summæ opinionis existant, ab omni iudiciali examine vsque adeo sunt separandæ, vt ex illarum sententijs nulla pœna aduersus illius contemptores, nullaque pacti exceptio oriatur. Nisi regionis probata consuetudo talium munerum, participes illas redderet: quod tamen intelligendum est de mulieribus præcellentibus, habentibus dignitatem, vt sunt Abbatissæ habentes

iurisdictionem; & Reginae, quarum principatus pertinet ad virum; vel quæ proprium principatum habent, & sunt iure communi munitæ. Cæteri verò, quos neque sacrorum Canonum, nec secularium legum statuta specialiter arcent, omnes ad tractanda arbitria admittendi erunt.

5 Sicut autem ij, quos supra recensuimus arbitria exercere prohibentur, ita etiam reperiuntur quidam, qui non possunt compromittere: & causæ quædam natura sua sunt eiusmodi, vt super illas non possit compromitti. Quia illa quæ sub compromisso continentur, debent esse in nostra potestate, quod nonnullis causis & præsertim criminalibus non contingit. Et qui compromittunt, necesse est vt sui iuris sint, quod non omni conditioni hominum conuenit. Nam & causæ nonnullæ, quæ in iudicio examinantur, licet pertineant ad nos, non tamen sunt in nostra potestate: & personæ quæ litigant, non semper sui iuris esse possunt: proinde videtur necessarium in iudicio examinare, quæ causa sit compromittibilis, & qui compromittere possint. Pleræque enim causæ arbitratorum notionem effugiunt, nam liberales, matrimoniorum, filiationum, monachorum, conuersionum, in integrum restitutionum; item criminales, & quæ maiores iudices exigunt, per arbitros cognosci non possunt.

6 Quod autem dictum est de matrimonijs, compromitti non posse, de carnalibus intelligendum est: nam quod de spirituali matrimonio compromitti possit (secundum ea quæ supra dicta sunt) nulla est dubitatio.

7 Finiuntur autem arbitria, vel sententiæ prolatione (cum ista sit compromittentium intentio) vel temporis lapsu, vel denique morte. *Sententiæ prolatione finiuntur arbitria*, cum de omnibus, de quibus cōpromissum fuerit arbiter pronunciauit. Nam si de quibusdam tantum sententiam tulerit, nisi talem pronūciandi potestatem à partibus habuerit, compromissum non expirat. *Lapsu temporis expirat arbitrium*, cum terminus compromisso comprehensus re infecta labitur. *Mortis denique interuentu compromissa*  
irri-



*irritantur*, tam arbitrorum, quàm etiam litigatorũ. Compromissum enim in compromittentis hæredes non extenditur: nisi de his quoque specialiter caueatur.

8. Lapsò autem termino, possunt eum partes prorogare; licet arbiter non cogatur in se compromissum assumere, quando per eum non stetit, quominus pronunciaret in primo termino.

9. Ita si in plures arbitros compromissum fuerit, morte vnius tantùm expirat compromissum: nisi expressè cautũ fuisset, quod non deberet expirare. Similiter diu absente arbitro, vel expirat compromissum, vel ab alijs coarbitris, si ita cautum, sententia expectatur.

10. Sed an, quod dicitur hic de ipso compromisso, obtineat etiam in actis gestis coram arbitro, scilicet vt eorum virtus expiret vna cum compromisso? Et dicendum videtur, quod quædam sunt acta litis, vt citatio, litis contestatio, satisfactio, & similia: & ista pereunt vna cum compromisso, sicut quando perit instantia iudicij. Quædam verè sunt acta causæ, puta attestations, partium confessiones, & similia concernentia merita causæ: & ista non expirant, etiam quod expiret compromissum non solùm morte, verùm etiam alio quocunque modo. Idem intelligas de effectibus compromissi productis de præterito, nam non extinguuntur. Vnde si fuerit coram arbitris interrupta præscriptio per contestationem litis, vel alio modo legitimo, non expirat ille effectus expirante compromisso. Sed iam ad cœptum iudiciarij ordinis propositum festinemus.

## TITVLVS VI.

### *De in Ius Vocando.*

**C**VM itaque partes neque pactionibus, neque transactionibus, neque compromissis ad aliquam concordiam venire queunt, recurrendum erit ad Iudicem, qui imprimis habere debet Notariũ, per-

personam publicam & iuratam, qui vniuersa acta iudicii conscribere debet, ne falsitas præiudicet veritati, cum vel iudex ipse in euidentis partis damnum aliquid inique proloquitur, vel pas aliqua calumniosè in causa procedit, & litigator veram negatiuam contra huiusmodi assertionem probare ostendereque non posset. Quare iudex non habens notarium iuratum, aut duos viros idoneos & probatos qui conscriberent acta, tam in ordinario, quam in extraordinario iudicio, per Superiorem debita poena puniri debet.

2. Omnium autem iudiciorum instituendorum principium & fundamentum sunt citationes, sine quibus omnia, quæ aduersus absentes in omni negotio aut loco aguntur, viribus carent. Nam neque naturalis, neque civilis ratio quemquam indefensum iudicari permittit. Quicumque igitur cum altero, iudicio contendere voluerit, ante omnia curare debet aduersarium ita moneri, vt sese coram iudice exhibere teneatur.

3. Et cum contumacia sit punibilis, sciendum est quod interdum ex quatuor capitibus redditur citatio elusoria, & is qui in ius vocatus fuerat, vocationi de se factæ parere, non compellatur: scilicet ex personarum qualitate, loci conditione, temporis ratione, & forma citationis.

4. *Personarum qualitas inefficacem reddit citationem*, tam ius dicentis, quam etiam in ius vocati. Nam si te is in ius vocet, quem tibi iudicem non esse competentem manifestum sit, dubio procul ad comparandum vocatio talis te minimè coarctabit. Si tamen contigerit eum, qui legitime citatus fuerit, alterius postmodum fieri iurisdictionis, quasi præuentus ius reuocandi forum non habebit; sed cogitur vsque ad finem persistere, etiamsi mutauerit forum. Idem iuris est, si iudex quidem tuus sit, ex eo tamen te mandet vocari, vt in iudicio cum spoliatore tuo stare compellaris: nec enim antea comparere cogeris, quam ad omnia canonice restitutus fueris.

5. Licet igitur in omni negotio & causa citationem esse necessariam sciamus, reperiuntur attamen nonnulli casus  
in



in quibus aliqua citatio non exigitur. Et primus est, vt iam attigimus, cum tractatur de eijciendo à possessione iniuratum notorie possessorem, quia ipso minimè vocato eijci potest. Secundus, quando citandus est præsens in iudicio, quo casu citatio aliqua non requiritur. Tertius casus erit in debitore suspecto de fuga: in quo sunt duo singularia, vnum quod proceditur ad capturam personæ, & est realis citatio. Alterum verò, quod recipere testes, vt possit capturam cōmittere, absente & non citata parte, fieri possunt. Quartus casus est in sententia supremi Principis, in quo nulla requiritur citatio, vt volunt DD. Quintus casus est, quando est commissæ causæ, vt procedat secundum suam conscientiam, quia eo casu partem citare non tenetur. Sextus casus in executore Apostolico, qui citare partem aduersam non tenetur; quia cum sit merus executor non procedit per via disceptationis. Septimus casus est, cum notoriè constat iudici, citando aliquam defensionem non spectare, ac nullum ius ei competere. Octauus casus est in casibus in quibus non requiritur causæ cognitio, quia in eis nulla citatio est necessaria.

6 *Ex qualitate verò loci citatio non arctat ad comparandum,* cum aut incertus est, aut citantis non subest iurisdictioni. Idem etiam dici poterit, si citandus extra iudicis territorium moram trahere comperiat. Tunc enim ius dicenti impunè non paretur. Quemadmodum & si locus citationi designatus pestilens sit, aut alias pro citato male tutus.

7 *Temporis etiam ratio vitiat citationem,* si vel inter angusta nimis tempora iudex iusserit adesse, vel diebus feriatis in honorem Dei. Quamuis enim non prorogare, sed expedire deceat quæstiones; vsque adeo tamen his diebus iudiciorum strepius debet conquiescere; vt nisi vel necessitas cogat, vel pietas suadeat, consentientibus etiam partibus processus habitus non teneat. Secus si fuisset dictum, compareat vsque ad talem diem, quia licet illa dies esset feriata, tamen potest comparere ante diem feriatam: vel si res tempore sit peritura, tunc ob hominū necessitates acta cuncta

cuncta tenent etiamsi feriæ indultæ fuerint, si de partium processerint voluntate, vel si causa miserabilium sit personarum: nec enim in operibus misericordiæ est habenda dierum distinctio. Hinc illi versus.

*Nec faciunt causas festis tractare diebus.*

*Pax, scelus admissum, manumissio, res peritura.*

*Terminus expirans, mora testis abesse Volentis.*

*Cumque potestati patriæ ius filius exit.*

Ita quoque proceditur in causis fiscalibus & publicis, & in omnibus actibus voluntariæ iurisdictionis.

8 Iam verò multum interest, delegatus ne citet, an ordinarius. Ille enim cum aliena utatur iurisdictione, longè remotus, non nisi literis commissionis suæ tenore, continentibus, & intra certa spatia, quem vocare poterit. Et cum propriū non habeat auditorium certum huiusmodi literis locum, ubi se citatus exhibere valeat, designare illum oportebit, cum in ordinario nulla subsit huiusmodi necessitas.

9 Item in delegato quæri potest, si peremptoriè partes is citauerit, & earum altera (die data) sese absentat contumaciter, an saltem circa ultimā diei partem sit in negotio procedendum: & utrum, si duxerit expectandum, sit iterum citandus contumax. Et in hac specie multum interest, duret iurisdictione post peremptorium terminum, an expiret. Primo enim casu, in diem alteram æquitatē suadente iudex expectare poterit: nec propterea peremptorio elapso pars contumax citanda erit: nisi gratiam eidem facerit benignitas iudicantis. Posteriore verò, ne frustra iudicialis instantia evanescat, si pars cum id nouerit, sese iudici non presentauerit, hora, qua congrue procedi possit ad exequendū, propter quod eis legitimè terminū peremptorium assignauerit, ad executionē libere procedere poterit.

10 Aduerte, quod licet iudex possit parcere contumaci in præiudicium alterius, in ferendo sententiam tempore constituto, nō tamen potest ei parcere in expensis & sumptibus, alioqui ipse de suo restituet expensas. Quapropter



citatus pro certa die , hora tamen non determinata, debet comparere hora, qua congruè possit iudex incipere & finire actum incumbentem : nam secundum qualitatem actus tacitè videtur hora diei præfixa mane , qua iudex non solum potest , sed solet iudicare .

II Iudex quoque in citatione peremptoria det congruum tempus & dilationem ad comparandum : nam de iure communi fiunt tria edicta , quorum quodlibet durat decem diebus ; ita quod currunt triginta dies ad cõparendum . Si tamen citatus tardè arripiat iter, non excusabitur ob impedimentum post tarditatem contingens . Alias poterit ex legitimo impedimento non comparere, sed nihilominus debet mittere ad iudicem ad faciendam fidem de impedimento legitimo , vt puta , si facto aduersarij impeditus, aut ad maius tribunal vocatus, vel vinculis, bello, aut infirmitate detentus , aut alijs similibus causis implicatus non accesserit, & tunc excusabitur . Qui tum cessante impedimento, quanto potuerit citiùs iudici sui copiam facere debet .

## T I T V L V S VII.

### *De Dolo & Contumacia , & in Possessionem , missione .*

I **C**VM iuridice vocatus, nulla legitima causa impeditus, sæpèsepius non intendat, nec velit comparere in iudicio, sed dolo & fraude subtrahit se à iudicis sententia & proximo interim infert damnum , & molestiam propterea aduersario accusante contumacię: crimen committit, & multiplici poena per iudicem puniri solet .

2 Est autem dolus in homine duplex ; scilicet bonus & malus . *Bonus dolus*, est licitus , & sumitur pro solertia seu indole bona, qua quis ingeniose iuuat proximum suum, & seruat eum indemnem ab iniuria seu violentia aduersarij .

*Dolus malus* autē est, omnis calliditas, fallacia, & machinatio ad circumueniendum & decipiendum alterum. Et calliditas quidem cōmittitur in animo tantum, tacendo quæ in præcustodiam alterius dicenda erant; v.g. cum venditor domus aut fundi, tacet coram emptore onera, seruitutes aut obligationes domus vel fundi illius quem vendit. Fallacia verò fit mentiendo in verbis, cū rem aliquam vendit dicendo esse suam propriam, quam tamen alij furto nuperime abstulerat. Machinatio demum fit & arte verborum & occulta insidiatione operis, cum intentione nocendi, quando videlicet rem sibi prohibitam & alienam vsurpat falsificando scripturas, inuadendo fraudulenter vt vinum occultet, & protrahendo litem, vt illa saltem fruatur diutissime, si iudicis sententia eam restituere cogatur, & non se sistit foro, & propterea incidit in contumaciam.

3 *Contumacia itaque est, delictum fictum, commissum*, ex inobedientia erga iudicem, seu Prælatum, & æquiparatur dolo, quia occultè intendit per id damnificare seu deludere aduersarium. Quapropter varie iuribus coercetur & punitur, nunc litis damno, nunc mulcta, nunc expensarum refusione, nunc rei sequestratione, atque demum Ecclesiasticæ sententiæ innodatione. Quia de iure naturæ & diuino tenemur obedire Superioribus legitimè constitutis, dicente Apostolo. Obedite superioribus vestris, &c.

4 Nota, quod licet contumacia delusorium sit crimen interdum capitale, (præter quod semper est peccatum mortale) nihilominus non est deueniendum in ea ad poenā excommunicationis, iuxta doctrinam Concil. Trid. nisi cum non potest aduersus reos, realis, vel personalis executio fieri.

5 Sed illud videtur ordinarium esse, vt contumace aduersario tuo existente, in possessionem earum rerum, de quibus quæstio vertitur, vel quæ alias sunt in patrimonio tui, pro modo debiti, si personalis instituitur actio, custodiæ causa inducaris, vt ræditi affectus reus, veniat aliquando responsurus. Quod si adhuc per annum in sua contu-



macia perseverauerit, iudice decernente verus possessor efficietur, super proprietate dumtaxat aduersæ parti defensione reservata.

6 Sed si missus in possessionem fructus dilapides, sequestrandi erunt, & quod distractum est, in pristinum statum reuocandum. Vbi sciendum est, quod ille qui mittitur in possessionem causa custodiæ, siue reali actione agatur, siue personali, infra annum non facit fructus suos; sed custodire eos debet, vt si intra annum reus recuperare velit possessionem, ei fructus restituantur; expensæ tamen necessariae pro fructibus percipiendis seu colligendis factæ, primo debent deduci. Anno autem elapso lucratur omnes fructus.

7 Si tamen propter rei potentiam, siue dolum contigerit, vt intra annū rem custodiendam nancisci non possis, vel etiam acquisitam amittas, ne contumax melioris quam obediens conditionis existat, de canonica æquitate sancitum est, vt hoc etiā casu elapso anno verus possessor actor constituatur. Hoc tamen tunc obtinet, cum reus nullam cautionem præstitit: nam si de stando iuri cauerit, nec mulcendus, quod in possessione actorem esse passus non fuerit: missionem passus illicò restituendus erit. Nisi missus in possessionem sit necessario & causa Reip. absens, quia tunc non est restituenda possessio, præsertim si contumacia fuerit manifesta.

8 Quod si annus lapsus esse proponatur, & per reum non steterit, quominus ante terminum, & possessionem receperit, & cautionem dederit, actor nihilominus possessor esse non reputatur, cum ille voluerit cauere & offerre cautionem, sed defuit qui reciperet. Idem etiam esset, vbi plures conueniri possunt, & vnus tamen esset contumax: quia non est facienda missio, nisi omnes vocentur.

9 Excommunicatus propter cōtumaciam manifestam à delegato Pontificis; qui petito rem causa rei seruandæ in possessionem induxit, etiam delegato mortuo non potest ab Ordinario, aut aliquo alio absolui, & possessionem recuperare, præterquam in mortis articulo, siue manda-

to Summi Pontificis; vbi & absolutionis gratiam obtineret & possessionem recuperaret. Nisi alius ei in onere delegationis succederet, & honore; qui quoad causam sibi commissam haberet ea quæ sunt meri & mixti imperij.

10 Sed ne missus in possessionem verus efficiatur post annum possessor, missionem passus coram ordinario, vel (si eius copiam habere nequiverit) coram publicis & honestis viris, ut quasi cōscriptionem interrumpat annalem, offerre ac præstare poterit de parendo iuri cautionem: ut sic etiam post annum per Apostolicam Sedem possessionem recuperare mereatur.

11 Sed ista tunc quidem procedent, cum de profanis rebus erit disceptatio: nam qui super dignitate, personatu, vel beneficio Ecclesiastico obtinendis cum aliquo litigat possessore, ob partis aduersæ contumaciam in possessionem mittendus non erit: ne per hoc ad ea ingressus vitiosus pateat. Verum hæc missio habet locum & in ecclesiasticis rebus, si agatur de Ecclesia, vel rebus Ecclesiæ, non tanquam de beneficio, sed tanquam de proprietate.

12 Licebit tamen iudici hoc casu (etiam lite non contestata) diligenter examinato negotio, ipsum sine debito terminare, contumaciā absentis diuina replente præsentia. Et hoc videtur tradi pro regula, quod vbi de remedio in possessionem missionis non est prouisum contra contumacem absentem, posset procedi ad sententiam definitiuam, lite non contestata. In beneficialibus autem, vbi vertitur periculum animæ, iudex semper ex officio supplere debet pro absente adducendo probationes.

13 Quod interdum etiam in profanis obtinebit, ut puta si cōtestata lite reus cōtumax fuerit, & de causa liqueat, & vel actor ipse contumaciæ crimen incurrat, quo casu etiam lite non contestata, instante reo, iudex, & testes recipere, & sententiam ferre debet; quia maior est contumacia actoris quam rei, vnde seuerius etiam cū eo agitur. Et licet de iure ciuili actori contumaci dentur quædam dilationes, tamen id non videtur necessario seruandum de iure Canonico.



14 Quod si vero actor non venerit termino, ad quem reum citari fecerit, venienti reo in expensis propter hoc factis legitimè cōdemnabitur, & ad aliam citationem admitti non debet, nisi de fideliter in posterū comparendo idoneam cautionē dederit: præsumitur enim malitiosè abesse; nisi probetur legitimum impedimentum.

15 Deber autem iudex vna contentus esse poena ex pluribus, quæ aduersum contumacem competunt, ea præsertim quæ magis timeri debeat, ad aliā nihilominus processurus, si hoc meruerit proteruitas contumacis.

## T I T V L V S VIII.

### *De Vſucapionibus & Præscriptionibus.*

1 **Q**uia communissimè solet in iudicijs, siue in personam agatur, siue in rem, vſucapionis, vel præscriptionis exceptio opponi, quapropter de eis quoque aliquid hoc loco tractandum est, præsertim quia litis finitæ est exceptio, ac non secus, quàm exceptio transactionis, aut rei iudicatæ ad impediendam litis constitutionem opponi solet.

2 Et vſucapionis quidem vocabulo etiam præscriptio contineri potest, licet frequentius vſucapio in rebus mobilibus, præscriptio in immobilibus proferatur. Sed generaliter intellecta vſucapio sic definiti, aut describi potest. *Vſucapio est*, adiectio, seu acquisitio domini, vel iuris per continuationem iustæ possessionis temporis à lege definiti. Mobiles autem res vſucapiuntur triennio, immobiles decem annis contra præsentés, viginti contra absentes.

3 Atque vt procedat vſucapio, necesse est hæc infraſcripta adesse, nempe, *titulum, bonam fidem, possessionem continuatam*, & quod res eiusmodi sit, quæ præscribi non prohibetur. Ac titulus quidem est iusta causa possidendi, quod nostrū non est; isque iustus titulus dicitur, qui, si à domino habitus fuisset, dominium potuisset transferre; eiusmodi

est, titulus solutionis, emptionis, transactionis, hæreditatis, occupationis, & apprehensionis rei pro derelicta habitæ, titulus legati, dotis, pro suo.

4 *Pro soluto & fucapit*, qui rem debiti causa accipit, & non tantum quod debetur, sed & quodlibet pro debito solutū hoc titulo vſucapi potest. *Pro emptore possidet*, qui reuera emit, nec sufficit tantum in ea opinione esse eum, vt putet se pro emptore possidere, sed etiam debet subesse causa emptionis. *Pro transacto vſucapit quis rem sibi traditam, vel dimissam, vt à lite discederet.* *Pro hærede titulus in eo locum habet*, qui existimans se hæredem, cum non esset, rem quam defunctus tenebat, longo tempore possedit. Item si hæres sim, & putem rem aliquam ex hæreditate esse, quæ non sit, possum eam vſucapere; suis autem hæredibus existentibus, id est filiis seu liberis in potestate, quos nemo gradu antecedit, nihil pro hærede vſucapi licet. *Pro donato vſucapit is*, cui donationis causa res tradita est, nec sufficit opinari; sed & donatum esse oportet. *Pro derelicto titulus ei cõpetit*, qui rem per derelicta à non domino habitæ occupat vel ab alio occupatam, sibi que traditam possidet. Nam si is, qui eam dereliquit, verè dominus esset, non de vſucapione, sed de dominio ex ipsa apprehensione acquisito ageretur.

5 *Legatorum nomine is videtur possidere*, cui legatum est, pro legato enim possessio, & vſucapio nulli alij, quàm ei, cui legatum est, competit: sed et si non iure legatum relinquatur, vt legatum ademptum est, pro legato vſucapi post magnas varietates obtinuit. *Item qui in dotem rem accipit*, vſucapere potest spatio solēni, quo solent, qui pro emptore vſucapiunt: & nihil refert, an singulæ res, an pariter vniuersæ in dotem dentur,

6 *Pro suo possessio talis est*, vt cum dominium nobis acquiri putamus, & ex ea causa possidemus, ex qua acquiritur, hoc modo possidemus omnia, quæ mari, terra, coeloque capimus; aut quæ alluione fluminum nostra sunt. Item, quæ ex rebus alieno nomine possessis possidemus, veluti par-



partum hæreditariæ, aut emptæ ancillæ: item fructus rei emptæ, aut donatæ, aut quæ in hæreditate inuenta est. Item locus erit pro suo vsucapioni, vt puta, si hominem, quem ex stipulatione mihi deberi falso existimabas, tradidisti mihi, idque ego nescirem, nihil videlicet mihi deberi, eum vsucapiam, quia ipsa traditio ex causa, quam veram esse existimo, sufficit ad efficiendum, vt id, quod mihi traditum est, pro meo possideam.

7 Bona fides adeò in vsucapionibus seu præscriptionibus iure nostro necessaria est, vt etiam in actionibus personalibus, quæ nonnisi annorum triginta spatio præscribuntur, bonam fidem exigi frequentioribus sententijs traditum sit, quamuis alia Bartholo fuerit sententia.

8 Sine possessione quoque aut quasi possessione præscriptio, seu vsucapio non procedit. De quasi possessione autem idcirco mentionem fecimus, quòd incorporalia proprie nō possideantur, sed quasi possideri potius dicantur. Et tamen ea quoque præscribi certum sic: vt est *seruitutes, iura eligendi, instituendi*, aliaque eiusmodi.

9 Et seruitutes quidem, si continuam causam habent, decennio præscribuntur, sin minus, tantum tempus eis præscribendis requiretur, quod supra hominum memoriã sit. In his tamen titulus non desideratur, quia, cum de rei dominio non agatur, haud ita magnū præiudicium versatur, quemadmodū cum de rebus temporalibus præscribendis agitur. Nonnunquam tamen longissimi temporis possessio ad præscriptiones requiritur, vnde merito solent perpetuæ appellari: vt ecce actiones personales non minori tempore triginta annorum amittuntur: hypothecaria contra debitorem competens quadraginta annis demum præscribitur: quamuis extraneus possessor hypothecæ decem annis inter præsentis, viginti inter absentes cum titulo, triginta sine titulo præscribat.

10 Religiosis quoque domibus, neque decennalis, neque vicennalis, vel triginta annorum præscriptio, sed sola quadraginta annorum curricula opponi possunt, non so-

lūm in cæteris rebus, sed etiam in legatis & hæreditatibus.

11 Ac de quarta decimæ, & oblationis defunctorum Clericus ab impetitione Episcopi sola quadragenaria temporis præscriptione se rueri posse videtur. Et nō potest vna Ecclesia decimas in aliena Parochia præscribere, nisi hac quadragenaria possessione cum titulo se munierit; vel titulo deficiente, non nisi tanto tempore, cuius initij nulla extet memoria. Cum enim huic præscriptioni, iuris communis obtet dispositio, eo fit, vt vel titulus, vel tempus immemorabile præter bonam fidem ei sint necessaria. Quamuis olim creditum sit, minimè titulum fuisse necessarium.

12 Contingit etiam interdum, vt quæ temporalis erat præscriptio, deinde perpetua fiat, id est, vt ad trigessimum, vel quadragesimum annum extendatur; quod fiet; si interrupta fuerit; nam, si quidem per naturalem detentionem, vt per occupationem æquè, similesque modos possessio interrupta fuerit, à die recuperatæ possessionis noui triginta anni in omnibus præscriptionibus numerabuntur, si per litis contestationem, ex die, quo nouissima processit cognitio, postquam vtraque pars cessauit, computebuntur.

13 Romana autem Ecclesia hoc priuilegio fulta est, quòd non nisi centum annorum spatio contra eam præscribi potest.

14 Plures etiam res sunt, quæ nullo tempore præscribi possunt: vt ecce, priuatus primitias, & decimas, neque etiam cum titulo præscribit: item liber homo, quamuis etiam vltra quadraginta annorum curricula pro seruo detentus sit, sola temporis longinquitate libertatis iura non amittit.

15 Item publicæ functiones non præscribuntur, quo exemplo etiam Ecclesiam, Rempubicam, primitias, decimationes non præscribi traditum est, quòd ciuiliū functionum instar obrineant.

16 Item Prouinciæ, Parochiæ, Diœceses, quæ certis limitibus distinctæ sunt, nullo modo præscribi possunt: aliæ



vero, quæ non sunt certis limitibus distinctæ, & de quibus certa diffinitio olim nō processit, præscriptione tolluntur. Nec etiam à visitatione, subiectione, aut procuratione soluenda quis immunitatem præscribere potest.

17 Item nec colonus fundum, nec emphiteota, nec vassallus feudum præscribit. Prout nec res sacra, nec religiosa à laico, nec seruus fugitiuus, nec res fisci, postquam fisco nunciata fuit, nec res furtiua aut vi possessa, aut aliter vitiosa vsucapiuntur.

18 Qui vero à fisco, aut à Cæsare, vel Augusta emit, statim securus est; sed, qui ad eas res actionem habet, non potest, nisi vsque ad quadrigennium cōtra fiscum, aut Cæsarem, vel Augustam agere. Sed postquam vidimus in procedentibus titulis, qualiter reus legitimè citatus debeat coram Iudice comparere, sequitur nunc videre ad quid teneatur actor in principio iudicij, quod libelli conceptione & oblationes aspiciatur.

## TITVLVS IX.

### *De Libelli conceptione & oblatione.*

1 **Q**uia iudicis officium est iura partium litigantium audire, & postea inter eos iudicare, quapropter vt iudex intelligat de qua re partes inter se litigant, in primis necesse est vt auctor libellum iudici offerat, reo in assignato termino cōparente, ita clare & plane conscriptum. vt ex eius inspectione deliberare reus valeat, vtrum cedere velit, an contendere, atque vt si contendendum sit, dispicere valeat iudex quemadmodum à se concipienda sit sententia. Nihil enim aliud est libellus; quam brevis scriptura clarā actoris intentionem continens, & contra aduersarium necessario concludens. In causis vero vilioribus nulla scriptura requiritur.

2 Vt autem libellus sit clarus & planus, cauendum primo

mo erit à nimia generalitate; & vt non sit alternatiuus; non conditionalis; nec habens verbum prægnans aut duplex; aut simile aliquid vnde obſcuritas oriatur, vt facile iudex eſſentiam percipiat, & ſententiam libello cõformem facere queat, ſiue controuerſia ſit ciuilis, ſiue criminalis.

3 Porro libellorũ duæ ſunt ſpecies: alij enim ſunt accuſatorij, aut cõuentionales. *Accuſatorij ſunt*, quibus quis aliquos ad iudicem alicuius criminis reos deſert. ( de quibus quidem in præſenti nobis non eſt inſtitutus ſermo, ſed infra ſuo loco & ordine dicitur. ) *Conuentionales ſunt*, quibus in ciuilibus diſceptationibus vtimur, dum rem noſtram, aut quam nobis deberi putamus, in iudicio petimus.

4 Exprimet igitur oblatuſ libelluſ non ſolum agentis, & conuenti nomina, ſed & iuſdicentis, & petite rei, & actionis qualitatem. Et ſi personali experiendum ſit actione, petendi quoque cauſa exprimenda erit; alioqui nec conuentuſ reſpondere tenebitur. Et iudex libellum non legitimæ conuentionis formam continentem conſcribere ac deſtruere poterit.

5 Dicitur vero libelluſ ineptuſ, quem iudex ex officio reiſcere debet, varijs modis vt volunt DD. Primò quando cõtinet defectũ apparentem requiſitarũ ſolemnitatũ; item quando petitur debitũ conditionale: quãdo cauſa eſt ordinaria, & pars petit procedi ſummariè: ſi contra iuſ, vel vtilitatem publicam: quando non apte, ſed male concludit: quando continet malam & ineptam cauſam, non qui continet malam actionem intentatam. Ex libello enim inepto omnia aſta corruunt & nulla ſiunt, ac propterea poterit iudex aſtori iniungere vt aliuſ libellum clarum & concludentem exhibeat, vt poſſit inde naſci pronuntiatio petitioni conformis, ex quo ſola narratio non ſufficit, niſi etiam debita conclusio in illa ſit.

6 Sunt tamen caſuſ, in quibus ſolẽnis hæc libelli oblatio minime eſt neceſſaria, veluti in quibus de plano, ac ſiue ſtrepitu, & figura iudiciij procedendum erit, & in quibus etiam non conteſtata lite teſtes recipi poſſunt, & alij plu-



res; vt in causa alimentorum, in causa executiua, vigore rei iudicatæ, in causa depositi, in causa reuocationis attentatorum, &c.

7 In his quoque casibus, in quibus libelli est necessaria porrectio, probè iudex fecerit, si principales personas, vel in subsidium etiam aduocatos, factum ipsum proponere iusserit, & sine tela iudiciaria controuersiam terminare tentauerit.

8 Oblato tamen secundū iuris ordinem libello, certæ reo conuento indulgendæ sunt induciæ, quibus deliberet cedendum sibi sit, an contendendum: acceptandus, an recusandus iudex: denique vt proponat, si quas habet exceptiones. Quæ propterea cōparatæ sunt, vt ij, aduersus quos instituuntur actiones, defendantur. Harum vero quædam ante litis contestationem opponendæ erunt: quædam vero etiam post contestatam litem. Sed ne diuersarum rerum commixtio pariat aliquam obscuritatem, videamus nunc generaliter de exceptionibus.

## T I T V L V S X.

### *De Exceptionibus & Replicationibus.*

1 **Q**uia reus conuentus debet libello sibi oblato, vel consentire, vel aliqua exceptione ipsum reiicere, vel simpliciter, vel ad tempus: Exceptio igitur nihil aliud est quam actionis vel intentionis exclusio. Et est duplex: quædam quæ dicitur *dilatoria*, eo quod causam differre solet, non principale negotium perimere: & opponitur regulariter ante litem. Sed aduerte, quia non satis est eam opponere, sed debet probari, aliàs non impediret. Quædam vero dicitur *exceptio peremptoria*, & opponitur post litis contestationem.

2 *Dilatoriæ exceptiones sunt in triplici differentia.* Quædam enim respiciunt personam Iudicis, & dicitur *declinatoriæ* fori, seu exceptiones *incompetentiæ*, seu *recusationis*.

Quæ-

Quædam respiciunt personam litigantium, vt puta si opponatur, quod comparens caret mandato, pupillus tutore, & quid simile, & istæ dicuntur exceptiones legitimæ personæ. Quædam vero respiciunt libellum, seu causam ipsam, vt puta, quia libellus arguatur de ineptitudine: vel de litis pendentia: vel quod actio intetata fuerit ante diem obligationis.

3 Declinatoriæ itaque exceptiones regulariter omnes ante litis contestationem proponi debent, & ante omnem aliam dilatoriâ exceptionem. Alioqui si aliam primò proposuerit, cū per hoc in iurisdictionem eius, coram quo proponitur consensisse videatur, eiusdem iurisdictionem serio declinare conabitur. Igitur recusatio iudicis, vti diximus omnibus alijs exceptionibus proponenda. Cæteræ vero post oblatum libellum, ante litem contestatam intra terminum à iudice assignatum, quandoque opponi, & probari poterunt.

4 Sed lite contestata quandoque eas opponere licebit: veluti, si qua nuper reo competens exorta fuerit, vel is qui eam opponere voluerit, se postmodum ad eius notitiam, deruenisse iureiurando fidem faciat: vel esset huiusmodi, quæ retroactum processum nullum redderet, vt est ea, quæ vel mandati, vel iurisdictionis defectum arguit.

5 Ducuntur autem huiusmodi exceptiones non solum ex suprapositis causis, sed etiam ex loco, ex tempore, & ex alijs pluribus, vt tam Pontificij, quam Cæsarei Iuris libris facile est legentibus cognoscere.

6 His annumeranda est etiam excommunicationis exceptio, quæ licet & ipsa dilatoria sit, à cæteris tamen dissimilem naturam sortita esse deprehenditur: nec enim post oblatum tunc libellum, ante contestatam litem velut cæteræ, sed in qualibet partē litis opponi poterit, peremptorio termino ad proponendum exceptiones declinatorias, præfixo minimè obstante. Quod est in hac exceptione specialiter obseruandum; ne quisquam in periculum animæ suæ excommunicato communicare compellatur; quod si  
eam



eam reus omiserit , vt actor sumptibus & laboribus fatigetur , in expensis legitimis condemnandus erit .

7 Hoc autem quod dixi , exceptionem excommunicationis in qualibet parte iudicij opponi posse , solum habet locum , quando opponeretur in vim dilatoria , non autem in vim peremptoria . Quia peremptoria exceptio litem non differt , sed tollit . Dicitur igitur dilatoria exceptio opponi ad effectum protractionis intentionis agentis , vel ex causa excommunicationis ipsius agentis , vel ex causa excommunicationis iudicis , aut procuratoris . Peremptoria vero opponi dicitur , quando opponitur ad perimendam electionem , vel alium similem actum , propter excommunicationem eligentium , vel electi , vel alterius excommunicati qui talem actum celebrasset . Quæ quidem exceptio coram quocumque iudice opponi potest , ordinario vel delegato , ecclesiastico vel seculari .

8 Sed cum per malitiam hæc exceptio excommunicationis in iudicio opponeretur , seruanda est certa forma ex constitutione Innocentiana . Hoc est , quando eiusmodi exceptio opponitur in vim peremptoria , sufficit opponere simpliciter de excommunicatione , licet non exprimantur species excommunicationis , aut nomen excommunicatoris , causa hoc nullibi cautum reperiatur . Quando autem talis executio maior opponitur in vim dilatoria , debent opposcentes ipsius excommunicationis speciem , & nomen excommunicatoris exprimere , vt per expressionem causæ appareat , an pro illa , vel pro alia causa excommunicatus sit . Et an ab homine , vel à Canone : vtrum maiori vel minori sententia sit ligatus , quod quælibet illarum diuersos producat effectus . Minor enim non repellit à communione hominum , sed solum à receptione Sacramentorum . Maior autem & à Sacramentorum perceptione & administratione illorum , nec non consortio hominum priuat .

9 Hæc tamen exceptio excommunicationis in prima tantum instantia sibi locum vendicat , non in secunda . Quod si succumbens actor appellauerit prætextu excommunicationis

tionis oppositæ, à prosecutione appellationis minimè excludendus erit, quod & in cæteris dilatorijs, multo magis locum obtinet.

10 Reus autem nullo obstante excōmunicationis vinculo, velut recte conuenitur, ita ad legitimas defensiones semper admittitur. Satis enim absurdum esset, si actorem impugnante defensionis copia reo denegaretur. Quia sit multoties condemnaretur absolendus. Reconuentionis tamen potestas eidem minimè permittitur.

11 Cæterùm, quæ supra de excōmunicatione diximus, non de quacumque excommunicatione sunt intelligenda; sed de ea tantum, quæ à perceptione Sacramentorum, & à fidelium communione separar; id est de excommunicatione maiori, vt etiam ipsa Innocentianæ constitutionis verba demonstrant.

12 *Peremptoria, seu elusoria exceptiones sunt*, quæ in totum ius agentis perimunt, & semper agentibus obsunt: qualis, est doli mali, metus, pacti conuenti, solutionis, iurisiurandi, præscriptionis, transactionis, & rei iudicatæ, & si quid contra leges factum esse dicatur.

13 Harum quædam dicuntur peremptoriæ litis finitæ, quædã simpliciter peremptoriæ. Peremptoria litis finitæ sunt, quæ litis impediunt ingressum, & aduersus agentem omni tempore opponi possunt: qualis est exceptio transactionis, iurisiurandi, & rei iudicatæ, quæ vel in ipso limine iudicij proponi poterunt. Cum enim super negotijs, transactione, iureiurando, & sententia decisis, aliàs lis inchoata terminata fuerit, valde absonum visum fuit, super eisdem nouum assumi debere iudicium, & quasi in infinitum forensia iurgia pertrahere. Inde quoque litis finitæ exceptiones appellantur, quòd vt aliquis esset finis litium, institutæ fuerint. Idem iuris est, in alijs etiam peremptorijs exceptionibus, quæ vulgo manifestæ sint, & notoriæ habeantur.

14 Debet tamen esse cautus is, qui opponit exceptionem litis finitæ, tanquam declinatoriam, vt offerat se paratum



ratum in continenti probare: alias si aduersarius negaret dictas exceptiones esse veras, tunc non impediretur litis contestatio, sed deberet referuari post litis cōtestationem.

15 Cæteræ verò exceptiones peremptoriæ, litis contestationem minimè impediunt, neque ante sententiam erunt regulariter proponendæ: quas quidem si dolo malo, suo tempore in prima instantia reus proponere distulerit, etiam in causa appellationis opponendi sibi facultas denegabitur.

16 Sunt etiam quædam *exceptiones*, quæ *præiudiciales* appellari possunt, ex eo, quod alteri cognitioni præiudicium afferunt: utpote, si qua mulier Titium in virum petat, qui ad mulieris intentionem elidendam, consanguinitatis obijciat exceptionē: qua probata, cum quæstio principalis perimatur, de ipsa est cognoscendum, antequam ad definitionis articulum procedatur. Idem si petenti hæreditatem, natalium obiecta sit exceptio. Cum enim successionis causa, à causa natalium dependeat, posteriore quoque loco cognoscenda erit.

17 Sed etsi quæstio spolij in modum exceptionis petentibus obiecta fuerit, probationes super spolio primitus erunt audiendæ. Eoque legitimè probato, reus non cogetur respondere positionibus, donec integrè restitutus fuerit. Quia nec nudi contendere, nec inermes inimicis nos opponere debemus.

18 Sed quia huiusmodi exceptionem nonnunquam in iudicijs calumniosè propositam, causas Ecclesiasticas contingebat impedire, & per interpositas appellationes principalis causæ cognitionem perimere, consultissime Innocentiana constitutione decretum fuit, ut in ciuilibus negotijs spoliationis obiectu ab alio quam ab actore factæ, iudex in causa principali procedere non postponat. Iniquum enim esset, quod reus exciperet contra actorem spolio factò à tertio; cum in hoc non deliquerit actor, & ideo factū alterius non debet sibi obesse.

19 In criminalibus verò, etiā si à tertio spoliatus fuerit:  
dum

dum tamen vel tota sua substantia, vel maiori parte ipsius, se per violentiam priuatū affirmet, obiecta exceptio processum differet pœnis statutis, si eundē intra certa tempora (scilicet quindecim dierū) non probauerit obijcens. Eo quoque salubriter obiecto, vt rerum priuatarū spoliatio, agenti super Ecclesiasticis, vel ex contrario, non opponatur.

20 Accusato verò excipienti de spolio à tertio factō, debet indulgeri tempus, intra quod restitutionem petat, & causam si potest finiat, quo elapso non obstante tali exceptione, accusari poterit.

21 *Sunt & aliæ exceptiones*, quas propriè neque dilatorias, neque peremptorias appellaueris, cuiusmodi est, quæ aduersus productos testes opponatur: vt puta si quis Mæuium examinatum, infamem, excommunicatum, vel alias criminofum esse dicat. Quæ tamen cum ad peremptoriarum naturam accedere videantur, ipsæ quoque ante sententiam proponendæ erunt.

22 Multum tamen interest, an per exceptionem tantum testibus opponantur crimina, de quibus nunquam accusati fuerunt; an verò ea de quibus alias conuicti, vel confessi fuerint. Primo enim casu obiectorum criminum probatio ante exhibenda erit, quā causa per sententiā terminetur; & si conuicti, vel confessi fuerint, ordinariā cessante pœna, sufficiet, quod à perhibendo testimonio repellantur; præsertim cum obiectū crimen minimè causam contingat. Posteriore verò, cum non sit cuiquam contra alios credendum, nisi se prius probauerit innocentem, à ferendo testimonio penitus repelli poterunt.

23 Cauebit autem reus, ne quam contra aduersarium suum exceptionē porrigat, cuius ipse nexibus implicetur. Cum scire debeat nullum hunc esse iuris effectū habiturū; veluti, si plura beneficia possidens de eadem pluralitate, aduersus alium excipiat, vel si periurium, aut excommunicationem is obijciat, qui peierauit, vel Ecclesiastica sententia innodatus fuerit. Quia delicta mutua compensatione tolluntur: & contra exceptionem criminis, non datur replicatio criminis.



24 Hoc tamen ita accipiendum est, cum proprio nomine conuentus excipit: cæterum, si suam defendens Ecclesiam, tales exceptiones opposuerit, audiendus erit, nec quod opponens eisdem sit obnoxius replicari poterit.

25 Postremo sciendum est, quod qui excipit non constitatur agentis intentionem, cum eidem possit plures etiam, quanquam contrarias exceptiones opponere: Non quidem pure, sed sub conditione & disiunctiue: ut si vna non processerit, proponat aliam. Quæ si legitimæ fuerunt, & iudex non admiserit, reo quidem per appellationis remedium succurratur, & iudex ipse meritis poenis coercendus erit.

26 Aduersus autem exceptiones dantur replicationes, & duplicationes, suntque eiusdem naturæ cum exceptionibus, quia aduersus actiones opponuntur. De quibus si quis plenius velit intelligere, ex his quæ superius diffusè de exceptionibus posita sunt, mutuari poterit.

---

## TITVLVS XI.

### *De mutuis petitionibus.*

1 **C**V M mutua petitio seu reconuentio sapiat etiam naturam exceptionis, ideo post descriptionem exceptionum, ponitur titulus de mutua petitione, quæ ex parte rei fit, prout conuentio ex parte actoris. Post oblationem igitur libelli ab actore, si reus conuentus nulla sit exceptione munitus, quæ vel iudicium differat, vel litis ingressum impediat, mutuis petitionibus aduersarium suum fatigare poterit, & agentem coram eodem iudice, antequam litem contestetur, reum constituere. Cuius enim quis in agendo obseruat arbitrium, eundem habere contra se iudicem in eodem negotio designari non debet.

2 Proposita ergo actoris intentione, responsione facta super quæstionibus, rei monitione præmissa, incontinenti actor respondere compellendus erit, ut vicissim postea rationes

tiones partiū iudex audiens, cōcordia vel iudicio vtriusque negotium terminet. Atque ita in vno eodemque termino aliud erit iudicium conuentionale, & aliud reconuentionale. *Iudicium conuentionale est*, in quo prima conuentio deducitur. *Iudicium autem reconuentionale est*, in quo deducitur secunda conuentio, quæ fit ex aduerso per reum contra actorem. Et proponitur in principio litis, ante lris contestationem in causa conuentionis. Vbi si actor non vellet respondere super reconuentione, denegatur ei audientia; quia non proceditur in causa conuentionis, donec respondeat super reconuentione.

3 Nec solum coram ordinario iudice reconuentio talis sibi locum vendicat, verum etiam coram delegato: vnde nisi reus literas impetrare maluerit, actorem sibi obnoxium, eodem durante iudicio, coram datis iudicibus reconuenire poterit. Vtriusque autem, tam actoris, quam rei reconuenientis æqua debet esse conditio: vnde cum causa appellatione remota committitur, si reus actorem reconuenerit, vno eodemque iure circa appellationis remedium, vterque censendus erit.

4 Coram iudice appellationis reconuentio locum non habet, sicut & coram arbitris, qui non nisi de his iudicare possunt, super quibus in eos compromissum fuit, ex communi voluntate partium. Secus in arbitro iuris electo ex necessitate statuti ad totam causam, quia tunc coram eo haberet locum reconuentio.

5 Interdum etiam accidit, vt nec coram ordinario, nec coram delegato iudice reo actorem reconuenire sit potestas: vt puta, si coram iudice laico conuentus actorem super causa iuris patronatus, decimarum, matrimonij, aut alia spiritali reconuenire velit: quia laicus de spiritalibus cognoscere non potest.

6 Idem iuris est, si conuentus excommunicationis maioris vinculo innodatus existat: huic enim, licet alioqui excipiendi facultas minime sit interdicta, actorem tamen reconuenire non conceditur: ne quod (vt supra dictum est)



in defensionis remedium sustinetur, ad impugnationis materiam extendatur. Nisi quod excommunicatio debeat ex eodem contractu ex quo conuenitur, puta, si ab eo petatur res vendita, poterit ipse pretium petere.

7 Sed an possit excommunicatus saltem compensare? Respondent DD. aut conueniens debitum confitetur, & compensationi acquiescit, & tunc admittitur compensatio: aut aduersarius negat, & compensationi non acquiescit, & tunc non audiretur reus super compensatione. Licet quidam dicant æquum sibi videri, vt etiam hoc casu audiatur excommunicatus.

8 Illi quoque, qui coram iudice criminaliter conuenti fuerint, vel super deposito, nisi se prius innocentes probauerint, & depositum restituerint, alios criminandi vel conueniendi licentia non conceditur.

## T I T V L V S XII.

### *De restitutione spoliatorum.*

1 **D**ictum est superiore titulo, quod reconuentio in quibusdam causis locum non habet, inter quas cum etiam spolium reperiatur, sciendum est duplex iudicium communiter in causis ciuilibus esse, aliud possessorium & aliud petitorium. Petitorio quidem iudicio agitur de re, dominio, & proprietate. Possessorio verò agitur de possessione propter ius, quod quis in ipsa possessione habet, idque tribus ferè modis, id est: Vel vt retineatur; vel vt quæratur; vel vt recuperetur possessio. Consultiusque est ei, qui rem petere destinauit, vt, si possit, aliquo possessorio remedio agat: quia longè commodius est, ipsum possidere, & aduersarium ad onera petitoris compellere; quàm alio possidentem petere.

2 Commodum autem possidendi in eo est, quod etiam si eius res non sit, qui possidet, si modo actor non poterit suam esse probare, remanet in suo loco possessio: propter quam

quam causam, cum obscura sunt vtriusque iura, contra peritorem iudicari solet. Hinc est, quod plerumque, & fere semper ingens existit contentio de ipsa possessione, ac maxime iura fauent ei, qui ad recuperandam possessionem, agit. Præsertim, si traditum à Ioanne Pontifice Romano remedium exerceat, quo cautum est, reintegranda esse omnia expoliatis, vel eiectis, & in eo loco, vnde abscefferant, funditus reuocanda, quacumque conditione temporis, aut captiuitate, aut dolo, aut violentia malorum, & per quascunque iniustas causas res Ecclesiæ, vel proprias, id est, suas substantias perdidisse noscuntur. Qui Canon laicis non minus, quàm ecclesiasticis hominibus prodesse cõmuni Iuris consultorum sententia existimatur.

3 Is itaque, qui se quibusdam rebus, aut iuribus spoliatum conqueritur, ab aduersario suo conueniri non poterit: nam super spoliatione conuentus, aduersus restitutionem petentem, non est, nisi super quæstione spoliij audiendus. Restitutionis enim petitio in hoc priuilegiatum esse noscitur, vt ipsam intentans, non cogatur ante restitutionem spoliatoribus respondere.

4 Vnde cum quis, se de beneficij possessione violenter eiectum apud iudicem conqueritur, si aduersarius eundem non canonicè dicat institutum, de violenta prius eiectione, quàm de canonica institutione cognoscendum erit. Et expulsus contra expulsorem tam ciuiler quam criminaliter agere potest.

5 Sed etsi spoliatus non primus coram iudice super spolio sibi illato consistat, sed criminali iudicio ab aduersario laceffitus spoliationis causam proponat, ita demum super petitione iudex procedere poterit, si prius restitui spoliatum sua sententia iusserit. Omnes enim leges, tam ecclesiasticæ, quàm sæculares ante omnia, cõcta spoliatis vel eiectis reintegranda, & damna sarcienda esse præcipiunt. Fructus quoque non tantum à violento possessore perceptos, sed etiam qui à veteri possessore percipi verisimiliter potuissent, restituendi erunt,



6 Nec restitutionis solum sententia sufficiet, nisi re ipsa omnia iudicis officio restituatur, ita vt eiectus vel spoliatus, etiam naturalem possessionem recipiat, cunctaque quæ sibi ablata fuerint, eodem vnde surrepta fuerunt, reuocentur.

7 Quod si ciuilitè conuentus aduersario spoliij quæstionem per modum reconuentionis regerat, cum mutue tunc intelligantur petitiones, in idem iudicium deductæ, vicissimque tractatæ, vnica simul erunt sententia terminandæ.

8 Sed hæc quidem obtinent cum in modum actionis spoliij quæstio proponitur: sed si circa litis contestationem de spolio quis excipiendum duxerit, super ipsa quidem exceptione probationes primitus recipiendæ erunt: ea tamen legitimè probata, nulla restitutionis erit ferenda sententia. Sed tamen diu spoliatori super petitionibus suis respondere cogendus non erit, donec ab ipso restitutus fuerit. Quemadmodum enim si in modum exceptionis aliquod crimen testi obijcitur, vt à testimonio repellatur, et si crimen contra eum ciuilitè probatum fuerit, sibi pœna non infligetur ordinaria, sed eius duntaxat testimonio non creditur: sic spoliatio in modum exceptionis tantum probata, restitutionis sententia, minime ferenda erit.

9 Spoliatus autem non solum is intelligitur, qui à priuato quocunque homine rerum quarundam possessione indebite priuatus fuit, sed etiam ille, quem iudex ipse sententia sua spoliavit, si non seruauit iuris ordinem in iudicando, vel si nulliter pronunciauit, aut iudex erat incompetens. Secus si processit iudicialiter, & sententia allegatur iniusta, ex iniustitia causæ: quia tunc proculdubio contra iudicem possessorium non competit, sed necesse est venire per viam appellationis; alias sententia transiret in rem iudicatam, etiam si esset iniusta, nec vltèrius reus audiretur.

10 Aduertendum tamen est, quod aut processit merè extraiudicialiter, & sibi incumbit onus probandi legitimitatem causæ: aut processit iudicialiter, sed allegatur processus

cessus nullus, & sit, quod iniuste & violenter spoliavit. Et tunc dicens debet probare, nisi appellauerit; quia pro iudice præsumitur, ex quo processit in figura iudicij, & non fuit appellatum.

11 Potestque condemnatus de facto resistere aduersus executionem sententiæ nullæ, immo ingrediens possessio- nem virtute sententiæ latæ parte nō audita sine causæ cognitione, priuatur iure suo. Est enim in lata culpa, qui vti- tur sententia nulla, nimirum si tenetur de violentia. Hinc est, quod statutum puniens ingredientem possessionem alterius, de facto, locum habet contra ingredientem posses- sionem alterius virtute decreti iudicis inualidi.

12 Is quoque spoliasse intelligitur, qui licet ipse non spoliauerit, per alium tamen spoliari mandauerit, aut spo- lium suo patratum nomine ratum habuerit. Vnde & is re- stitutioni obligabitur, quemadmodum & ille, qui rem indebitè occupatam scienter recipiendo spoliatori succe- dit in id vitium. Licet enim non is spoliauerit; cū tamen quoad periculum animæ non multū intersit, vtrum quis iniuste detineat, an alienum inuaserit, contra huiusmodi possessorem spoliato per restitutionis beneficium, non ob- stante iuris ciuilis rigore succurritur.

13 Hinc prouenit vt reperiens rem alterius, & non re- stituens, tenetur furti, veluti si ab alio subtraxisset, cum- sciat rei illius dominum proprium, cui debeatur. Nisi ri- meatur de salute animæ, aut scandalo aliquo notabili.

14 Illud quæsitum est, si post spolium Ecclesiæ renun- ciasse quis dicatur, an ob huiusmodi renunciationem spo- liato sit deneganda restitutio: & cum non sit verisimile, quod spontè proprio iuri renunciauerit, qui renunciat spo- liatus, huiusmodi non obstante renunciatione, restituen- dus erit. Nisi renunciatio fiat spontanea in manibus Su- perioris. Quando autem renunciatio fit in manibus non Superioris, non perditur ius, quod renunciatus habet in beneficio, nec tenet talis renunciatio quamuis spontanea fuerit. Nec Superior ipse in odium renunciantis posset ta- lem renunciationem ratam habere.



15 Testes etiam partis alterius de iuramento, & renun-  
ciatione sponte facta, non ante admittendi erunt, quam  
spoliatus plenariè fuerit restitutus. Quod si ante spoliū  
Ecclesiam sponte abiurasse reperiatur, perpetuum ei super  
negotio silentium imponendum erit.

16 Sunt & alij casus, quibus iure denegabitur spoliatis restitutio: vt puta, cū agenti per modum exceptionis de alia spoliatione opponitur: aut tam super proprietate, quā super spolio eodē tempore disceptari spoliatus ipse consenserit; aut ante restitutionis postulationem petitoria actione iudicium expertus succubuerit. Vnde cautela est, vt spoliatus protestetur, quod non consentit vt spoliatus probet de suo dominio.

17 Quod si quæras, an iudex possit impedire consensum? Et videtur quod non debet, nisi ob periculum animæ, & timorem peccati. Quod si vero spoliatus non consenserit, expresse tamen non replicaverit contra exceptionem proprietatis, tunc censetur tacite consentire, & talis consensus valet. Quia ita se habet replicatio ad exceptionem, sicut se habet exceptio ad actionem: sicut ergo actio non excluditur, nisi exceptio proponatur, ita non debet excludi exceptio, nisi proponatur replicatio.

18 Item, si spoliatore non per contumaciam, vel per dolum absente, ab Apostolica Sede ad iudices spoliatus litteras obtinuerit: vt si eum spoliatorum iudicibus constiterit, intra certum temporis spatiũ restituatur, si reus intra præfixum terminum sese iudici exhibere non possit, quamquam temporis lapsus immineat, & actor sit suam possessionem & deiectionem probare paratus, nihilominus restituendus non erit.

19 Sed etsi talis opponatur exceptio, quæ agentem minimè possedisse concludat, tam diu sustinenda erit restitutio, donec super tali exceptione cognitum fuerit. Ut ecce, nec laici spiritualia possidere, nec Sacerdotes vxores habere possunt. Vnde si vel illi se beneficijs spoliatos, vel hi ab vxoribus se destitutos coram iudice conquerantur, &

ab aduersarijs de sæcularitate, vel de Sacerdòtio agentibus opponatur, proculdubio differenda erit restitutio.

20 Quinimmo & cum sola iuris præsumptio pro spoliatione contra spoliatum militat, impedienda erit restitutio. Ex quò apparet cum, qui (exempli gratia) restitui postulat, ad decimas, quas intra alienæ parochiæ limites possedisse asserit, nequaquam restituendum esse, nisi euidenter docuerit, quod earum possessionem legitimè assequutus fuerit, quia eas occupasse iniuste verisimiliter præsumitur; cū ex prædijs perueniāt intra alienam parochiam constitutis; manifestumque sit eas iure communi ad eandem Ecclesiam pertinere, nisi aliud ostensum fuerit.

21 Exceptio ergo notoria ex defectu proprietatis obstat agenti possessorio recuperandæ, licet regulariter exceptio dominij non obstat; cum etiam prædo sit restituendus ad suam possessionem.

22 Plures præterea sunt casus, quibus spoliatus illico non restituitur: veluti cum hæresis labe pollutus deprehenditur, vel facta restitutione animæ periculum immineret, vel scandalum timeri possit. Et alij, qui non minus sæcularibus, quam Pontificijs legibus continentur.

23 Postremo sciendum est, in spoliantis odium constitutum esse, si spoliatus proprietatis litem ingressus fuerit, nullam de illata sibi violentia mentionem faciens, antequam renunciatum sit, aut conclusum in proprietatis iudicio, vt idem debeat super possessorio (etiam petitorio suspenso) audiri. Quod si renunciatum fuerit, vel conclusum, vt iam possit causa proprietatis sententiâ terminari, ne lites litibus inculcentur, & via possit fraudibus aperiri, causa non decisa possessorio non erit vtendum; nisi iudex, qui de causâ cognoscit, hoc ipsum ex iusta causâ viderit expedire: puta cum ex perspicuis indicijs iniquitas inuasoris facile arguitur, & spoliato, casu siue dolo spoliatoris, dominium probandi facultas subtracta fuerit.



*De litis contestatione.*

1 **H**Actenus præparatoria iudiciorum complexi sumus, quæ plerunque ante causarum discussionem vertuntur; nunc autem peruenimus ad ea quibus ipsum iudicium constituitur, videlicet ad ipsam litis contestationem, quæ quasi fundamentum quoddam iudiciorum est. Quia non semper ante discussionem, causæ contingit locum esse pœnis statutis contra contumaces: nec semper proponuntur exceptiones & replicationes: aut semper inuicem petitiones fiunt ante litem contestatam. Nec spoliati denique ante litem contestatam semper restituuntur, vt titulo superiore monstrauimus. Ideo actor debet procedere ad vltiora in iudicio proposito, causam nimirum ipsam, quæ semper incipi debet à litis contestatione. Quæ, si à partibus prætermissa fuerit, proculdubio omnia, quæ sequuta fuerint, corruent: seque ipsos litigatores inanibus laboribus, & sumptibus vexabunt. Vnde nec testes recipi, nec ad sententiam per iudicem procedi poterit.

2 *Est igitur litis contestatio, principalis negotij apud competentem iudicem facta narratio, & ad eadem subsequuta responsio. Vel litis contestatio est, negotij hinc inde narratio apud iudicem. Quia fit per petitionem in iudicio positam, & congruam responsionem sequutã, animo contestandi litem factam, cum iudex per narrationem negotij causam audire cœperit. Vnde si quis positionibus simpliciter respondeat, aut peremptoriam exceptionem proponat, nequaquam per hoc esse facta contestatio litis intelligitur.*

3 Fit vero litis contestatio non solum per principales, sed etiam per procuratorem, tutorem, & personas similes, (puta actores & syndicos) in iudicio præsentem. Absente enim actore litis contestatio fieri non potest: quia litis contesta-

testatio dicitur, quasi simul testatio: & ideo ambæ partes debent esse præsentés coram iudice pro tribunali sedente.

4 Hinc etiam aduocati responsio, nisi statim reuocata fuerit, facit litis contestationem, & sic præcludit viam dilatorijs proponendis. Et tunc oportet, quod pars illam reuocet antequam aduersarius faciat aliquid, quod soleat fieri post litem contestatam, infra triduum. Alioquin oritur contra nos præsumptio vt per nos sit tacite responsio aduocati approbata. Ad reuocandam verò aduocati responsionem, necesse est docere de errore aduocati, qui non habet mandatum ad confitendum, vel ad procedendum in causa, sed solum patrocinandum; nec est dominus litis.

5 Nec solum, cum per actionem iudicium instituitur, erit litis contestatio necessaria, sed etiam vbicumque iudicis actio pro ipsa proponetur actione: veluti cum restitutio in integrum non incidenter, sed principaliter postulatur.

6 In nonnullis tamen casibus hæc litis contestatio non requiritur, v.g. quando petitur declarari incidisse in Canonem excommunicationis latæ sententiæ ob violentam manuum iniectionem in Clericum. Item non requiritur in causa, vbi proponitur nullitas constans ex actis: similiter in liquidatione publici instrumenti; in causa hæresis; in causa depositi; in causa exequutionis sententiæ; in causa matrimoniali, & in omnibus denique causis illis, in quibus poena ipso iure infligitur.

7 Contestatione autem litis sequuta, sequuntur etiam huiusmodi effectus, quod reus & iudici subijcitur, & actori ob ligabitur, dilatorijs exceptionibus via præcluditur, actiones perpetuantur, præscriptio interrumpitur: & denique alij effectus emanant diuersi, vt tam ciuilibus quam ecclesiasticis constitutionibus suis locis traditur.

8 Admonendi tamen sumus, quod traditum est, lite non contestata non posse testes recipi, aut ad sententiam perueniri, non esse perpetuum. Nam si forte de morte testium timeatur, vel absentia diuturna, vel ingressu ma-



ris, cum ciuilitè est agendum, ne veritas occultetur, & probationis copia fortuitis casibus subtrahatur, (curare enim debet iudex, vt salua sit rerum probatio) senes, & valetudinarij, & alij testes, de quibus ex probabili causa timetur, etiam lite non contestata, sunt admittendi: Seu pars conuenta sit contumax, seu sine dolo sit absens, vt conueniri non possit. In criminalibus vero nunquam recipiuntur testes lite contestata; cum enim tunc agatur de maximo præiudicio, non est aliquid faciendum inordinatè.

9 Debet tamen actor intra annum, ex quo facultas sibi data fuerit, aduersarium conuenire, aut saltem huiusmodi testium receptionem eidem denunciare. Alioquin attestations sic receptæ non valebunt, ne fortè hoc procuretur in fraudem, vt scilicet progressu temporis exceptiones legitimæ ad repellendum testes, vel aliæ, locum habere non possint.

10 Sunt & alij casus, in quibus absque litis contestatione legitimè possent testes produci, & lis sententia terminari; quos tam ex his, quæ supra de contumacia diximus, quam etiam ex aliis locis cognoscere licebit. Et generaliter vbicunque libellus non exigitur, aut ius agendi contra certam personam non dirigitur, litis contestatio non est necessaria.

11 Sed si reus respondet libello cū protestatione quod non animo litem contestandi, an talis protestatio aliquid operetur, vt lis non habeatur pro contestata, communis conclusio est, quod lis non sit contestata, & quod talis protestatio releuet: nisi iudex prius iusserit litem contestari: nam tunc cum simus in casu necessario, protestatio nihil releuat.

## TITVLVS XIV.

*De iuramento calumniæ.*

1 **F**Acta litis contestatione, necessario deueniendum est ad probationem: verum quia in iudicio sæpissimè à litigantibus fraus committi soleat circa probationes, propterea post titulum præcedentem de litis cōtestatione, proponitur iste de iuramento calumniæ. Vbi primo quæritur, quid iuris sit, si quis noluerit iurare; deinde, quis, quando, & quomodo hoc iuramentum sit præstandum: ac tandem, quid iuris si non sit præstitum.

2 Cum itaque in iudicio quælibet pars intendat victoriam consequi, vt veritate præuia iudicia expendantur, institutum est, quod litigatores statim in exordio litis, de calumnia vitanda iuramentum præbeant. Quod si quis præstare recusauerit, actor quidem ab instituta cadet actione, & pro confesso reus habendus erit. Quod si vero præstitum sit iuramentum ante litis contestationem super tota causa, non est opus quod denuò præstetur. Item si iureretur longè post litem contestatam, non per hoc vitiatur iudicium.

3 Continet autem hoc iuramentum quinque capitula. Scilicet, quod credit se iurans bonam causam habere: quod interrogatus non negabit: quod verum credit: quod non vtetur scienter falsa probatione: & quod dilationem non petet in fraudem: nec dabit, nec dedit, nec promisit, nec promittet aliquid pro causa, nisi quibus leges dari petunt. Vnde versus.

*Illud iuretur, quod lis sibi iusta videtur.*

*Et si quæretur, verum non inficietur.*

*Nil promittetur, nec falsa probatio detur.*

*Vt lis tardetur, dilatio nulla petatur.*

4 In hac tamen parte quibusdam casibus Clericis iura pepercunt. Vetuerunt enim ne dum propriæ Ecclesie causa peragitur, inconsultis illorum Prælati (quod ta-

men



men si non faciant non propterea vitiatur iuramentum, ) huiusmodi subire iurandum cogantur, licet in proprijs causis huiusmodi priuilegio minimè gaudere noscantur.

5 Sed & quo casu hoc iuramentum subire, vel permittuntur Prælati, vel iubentur, non tactis, sed tamen propositis scripturis id implebitur (id est Euangelijs.) De consuetudine tamen est, vt testis tangat Euangelia.

6 In causis spiritualibus olim de calumnia minime iurabatur: sed quia & in illis litigatores frequenter calumniari compertū est, nouissime sancitum est, vt in eis id, quod in cæteris constitutum est, obseruari debeat. Sed maxime in causis criminalibus necessarium est iuramentum, & in causis appellationis, vt suo loco dicemus.

7 Et non tamen principales, verum etiam procuratores & syndici huiusmodi iuramentū suscipere compellendi erunt (& idem erit in tutore & curatore) etiam si quid ponere, aut respondere debeant à dominis instructi fuerint; nec enim illud intra certa iudicij tempora coarctatum reperitur: sed poterit iudex exigere, quoties expedire viderit. Sed hoc in patronis causarum de consuetudine non seruatur: cum tamen optimum esset si etiam aduocatis deferretur hoc iuramentum calumniæ, temperarent enim à patrocínio causarum iniustarum, quas vel propter munera, vel propter amicitias suscipiunt.

8 Procurator tamen, licet habeat specialissimum mandatum ad iurandum nomine Domini, vel respondendum, vel agendum, temetur nihilominus iurare etiam in animam suam de calumnia, non tamen in animam domini: quoadocunque iudici videbitur, quia non debet causam iniustam suscipere.

9 Præterea, quanquam in prima instantia partes iurauerint, non tamen propterea in causa appellationis huiusmodi iuramentum declinare poterunt, cum rursus & de calumnia vitanda, & dicenda veritate iurare partes sint compellendæ.

10 Illud postremo admonendi sumus, quod propter  
omissum

omissum tacite in tota causa calumniæ iuramentum, iudicialis processus alias factus legitimè, nec est nullus, nec ob eam causam venit annullandus; cum huiusmodi iuramenta præstati de substantia ordinis iudiciarij non existat. Et ideo poterit huiusmodi iuramentum remitti per rescriptum supremi Principis, dum tamen in eo dicatur non obstante tali lege. Verum si hoc iuramentum fuerit petendum ab aliqua parte, & omitteretur, processus esset nullus: nisi tacite remitteretur, ut volunt. DD.

## T I T V L V S . XV.

### *De litis pendentia.*

1 **I**Nstituta ergo lite, & solemnibus præstitis satisfactionibus, atque calumniæ iuramento exhibito, ad probationes, & merita causæ descendendum erit: & interim pendente lite nihil innouari poterit. Quod intellige de his, quæ pertinent ad iudicem, & causæ processum: quia ius nouum impetrare, non est attentare.

2 **L**is autem pendere hoc respectu tunc dicitur, non modo cum lis contestata fuerit, verum etiam postquam à iudice competenti citatio emanarit, & ad partem citatam peruenerit: vel per eam factum est quo minus ad eius notitiam perueniret, dum tamen in citatione ea sint expressa, per quæ possit quis instrui, super quibus in iudicio conuenitur.

3 **Competentem** hoc loco iudicem appellamus, qui causa iurisdictionem habet cum exercitio, dato quod illa possit per exceptionem elidi; siue exceptio contingat ut quia suspectus: siue iurisdictionem, ut quia rescriptum surreptitium: valet in hoc casu processus in principali, si non excipiatur. Sicut autem requiritur competentia in iudice, sic & in citatione.

4 **Et quia ad probationem & merita causæ acceditur coram iudice competenti, competentibus præstitis satisfac-**



risfactionibus, sciendum est, quod harum aliqua præstantur ex parte rei conuenti, partim ab actore. *Areo satisfatur* de iudicio sisti, quæ satisfactio fuit inuenta suspitione fugæ. Et propterea possidens immobilia releuatur ab hac satisfactioe, cum tunc non sit probabilis suspicio fugæ. Item ex parte rei est illa fideiussio de iudicato soluendo, quam licet non præstet reus conuentus, præstant tamen defendentes rem alienam: nisi dominus releuet procuratorem in mandato ab hoc onere, vt inoleuit communiter practica. *Ex parte actoris præstatur satisfactio*, de expensis rescindiendis in casum succumbentiæ: & hanc præstat etiam si immobilia possideat. Item satisfactio de rato, quæ præstatur ab eo, qui comparer pro actore, cum dubium est de mandato.

5 Planc ab eo, qui postquam à sententia prouocauit, possessionis fructus dissipat, etiam lite pendente, sequestrari poterunt, ne partes deueniant ad arma. Intellige hoc tunc fieri, quando summam constat iudici, quod potest oriri scandalum vtraque parte contendente possidere: secus quando constat quod vnus solus possidet, & alter turbat, tunc enim non debet apponi sequestrum, sed dari manutentio, & prohiberi habens sub poena.

6 Sic etiam, si dum super matrimonio lis pendet, secundum quis matrimonium ritè contraxerit, si primum non tenuisse declaratum fuerit, pendens litis obtentu secundum irritari non poterit. Et tamen, qui in contemptum contraxerit, competens poenitentia imponenda erit, & intra tempus poenitentiae sibi carnali commercio interdicitur. Filij tamen primi matrimonij concepti lite pendente ante sententiam diuortij sunt legitimi.

7 Ita quoque electio facta lite pendente non retractatur, sed differrur eius executio.

*De Probationibus .*

**1** **E**xplicatis omnibus ijs , quæ causæ cognitionem præcedunt , consequens est , vt transitum faciamus ad ipsam cognitionem causæ , quæ per probationem fieri solet . Probatio verò vel à persona rei conuenti desumitur communissimè , vel à causa ipsa , vel demum ab extrinseco , vt est confessio , inspectio , notorium , & testes .

**2** Probatio itaque est rei dubiæ per idonea argumenta , ( puta , indicia , præsumptiones , & alia adminicula ) & legitima media ( puta , testes , & instrumenta ) facta demonstratio . Quæ regulariter incumbit asserenti , & fit varijs modis , scilicet confessione partium , depositione testium , instrumentorum exhibitione , iurisiurandi religione , inspectione iudicis , notorietate rei , suspitione vehementi , fama publica , atque alijs adminiculis .

**3** In genere autem probatio dicitur esse triplex . *Alia euidentissima* , quæ fit per priuilegia , per scripturam antiquorum librorum , & per instrumenta indubitata . *Alia clara* , quæ fit per testes plures , vel facti euidentiam & loci aspectum , & admittitur huiusmodi probatio etiam post conclusum in causa . *Et alia minus euidentis* , quæ fit per coniecturas & vehementem præsumptionem .

**4** Sed in specie loquendo de probationibus , primaria probatio est per partium confessionem , quæ tunc constat , cum reus positionibus respondendo , vel alias in iudicio de intentione confitetur actoris . Sunt autem positiones , breues quædam narrationes , facti seriem continentes , ad eliciendam veritatem conceptæ , super quibus quis petit ab aduersario responderi : quas ad faciliorem expeditionem litium propter partium confessiones , probationum defectum , vsus longæuus in causis admisit , & iuris probauit auctoritas .



5 Et quia in iure nulla est maior probatio, quam oris proprii confessio, hinc est quod à propria confessione quis recedere non potest; & paria sunt quod quis conuincatur & confiteatur, cū producant eundem effectum condemnationis. Sed cum possit esse confessio erronea, ideo permittitur eam posse reuocari, dummodo statim id fiat, & tunc reuocata non præiudicabit.

6 Depositionibus quoque sciendum est, quod differunt magnopere ab articulis & libellis. Quia positiones sunt breues narrationes facti: articulus vero est pars intentionis actoris, continens id quod probare intendit vel per testes, vel per scripturas. Præterea, positiones fiunt per verbum, ponit, ad eliciendam confessionem ab aduersario: articulus autem fit per verbum, probare intendit, & respicit probationes faciendas per testes vel scripturas, casu quo positiones negentur. Item positio fieri potest merè negatiuè, & tenetur illi pars respondere: articulus vero non potest concipi negatiuè, quia esset improbabilis, nisi cohæret loco & tempori. Item ponens, positum confitetur, si positio fuit in iudicio præsentata; nec potest reuocari, nisi doceatur de errore: siue positio fiat in scriptis, siue non. Sed articulans non censeturateri quod dicit in articulis. A libello autem differunt positiones, quia libellus habet conclusionem, & respondens libello litem censetur contestari. (nisi forte essemus in summarijs) positiones vero tantummodo ad eliciendam veritatem sunt conceptæ. Capitulorum demum generalior est appellatio (licet interdum promiscuè his nominibus vtamur) & comprehendit tam articulos, quàm positiones. Vnde terminus datus ad capitulandum, censetur datus tam ad ponendum, quàm ad articulandum.

7 Si quis igitur positionibus factis respondere requisitus per iudicem, recusauerit, vel ne responderet se per contumaciam subtraxerit, pro confesso habendus erit. Valeret tamen spontanea confessio, si fieret ad instantiam aduersarii iudice non præcipiente; non tamen ipso iure, sed per sententiam declaratoriam.

8 Et quia dictum est recusantem respondere positionibus haberi pro confesso, hoc ita intelligendum est, dum requisita omnia, ad verificandum hanc conclusionem concurrent. Et primū, qualitas causæ, alioquin ex sola contumacia in non respondendo positionibus non poterit condemnari; nec habetur tunc pro cōfesso vel negante, quando libellus est ineptus, vel non concludens, vel manifestam continens rei defensionem. Quia & monitus à iudice vt respondeat positionibus, poterit moram purgare, maxime re integra. Deinde requiritur vt positio sit pertinens, & cum termino; alias, etiamsi quis non responderit, non habetur pro confesso, neque contumace. Ad hæc confessio facta à pupillo non tenet, necesse est vt sit à pubere vel maiore; idque sponte facta, non coactè, & coram suo iudice pro tribunali sedente, & præsente aduersario, tum demum legitima erit. Alias contra contumacem absolute procedendum erit prout iuris ratio dictauerit.

9 Redditis autem circa exhibitas positiones responsionibus, diligenter ab actore dispiciendum erit, an à reo super controuersia legitimam confessionem extorserit; quo quidem casu, & ipse probationum oneribus releuabitur, & iudicis in cognoscendo partibus cessantibus statim super tali confessione pronunciandum erit.

10 Et quia confessus & probationibus conuictus æquiparatur, & consequenter sequuta confessione debet sequi condemnatio, hoc ita intellige; vt debeat ei concedi breuius terminus aduersus confessionem, vt eam excuset emanatam esse vel per errorem, vel per iracundiam, vel per nimiam festinationem, aut extortam formidine tormentorū; quod vbi docuerit, nullum præiudicium confitenti generabitur, præsertim si talis confessio per procuratorem facta fuerat. Similiter ficta confessio alicuius non nocet suo hæredi, si non habuerit effectum contra defunctum. Nec itidem confessio filij ficta nocet patri. In confessione verò deliberata, quod sua quisque voce dilucide contestatus est, proprio non valebit amplius testimonio infirmare.



11 Non tamen, quia positionibus reus respondere cōpellitur, si documenta quoque, quæ ad causam pertinentia penes se detinet, nisi sibi cum actore sint communia, exhibere compellendus erit. Nam graue nimis esset illum ad eorum exhibitionem vrgeri, per quæ sibi postea præiudicium fieret. Sed actor ipse inficiante reo sumptis congruis dilationū temporibus intentionis suæ proprias probationes afferet, vel testes inducendo, vel instrumenta, & alias scripturas producendo. Nos autem non tenemur aliquid facere pro beneficio alterius cum damno nostro.

## T I T V L V S XVII.

### *De inductione testium.*

1 **Q**uia communissima per testes, causarum probatio, in iudicijs fieri consuevit; idcirco ex dictis eorum veritatem eruere volentes in primis considerare debent qualiter eos recipere habeant; deinde quot, & qualiter examinandi sunt: tunc qui possunt esset testes; & quid concedendum, ne pereant probationes: an liceat probare post renunciationem: quando, & quomodo opponendum contra testes: qualiter testis possit scriptum corrigere, & his similia, de quibus toto hoc titulo agemus.

2 Debet autem in primis, si ex dictis testium reisit eruenda veritas, admoneri iaduersarius, quòd auditurus iuramentum veniat, ne si prætermisum id fuerit, quod contra leges actum deprehenditur, nullam habeat firmitatem. Probatio enim testis regulatur à iuramento: & ideo Rota Romana canonizauit hanc conclusionem, reum esse citandum ad videndum iuramentum.

3 Sed & testium depositiones non aliter recipiet iudex, quàm prius iurisiurandi religione firmauerint, quòd tantū quæ vera nouerint professione suæ testificationis aperient: nullius enim testimonio, quantūcunque religiosus existat,  
(etiam si

(etiam si esset Episcopus, vel Cardinalis) nisi curatus deposuerit, in præiudicium credi debet alterius: nisi forte iuramentum ab aduersa parte remittatur. Formalia enim concernentia principaliter fauorem partis possunt remitti. Et dictum magni viri iurati faciet præsumptionem.

4 Quod si pars citata ad videndum iurare, & deponere testes venire noluisse, valebunt tamen depositiones ac si venisset: cum venire, vel non, sit in potestate partis. Quod si verò non posset venire? valent nihilominus depositiones mero iure: licet legitimè impeditus sit restituendus ad deponendum contra testes.

5 Quod si testes à iudice moniti, sese, vel odio, vel timore à feredo testimonio subtraxerint; per censuras ecclesiasticas testificari compellendi erunt: nec audientur, quòd sese quominus deponant, proprii iuramenti vinculo innodatos asserant, quia istud iuramentum illorum tanquam illicitum non potest obseruari sine peccato, cum testimonium ferè sit munus publicum, vnde celare veritatem erit peccatum grauissimum.

6 Interrogabit ergo iudex testes in qualibet causa ad minus duos (nulla enim causa est regulariter quæ vnus testimonio quantumuis legitimo terminetur) eosque diligenter examinabit de singulis circumstantijs, & qualitatibus totius causæ, super interrogatorijs partis, videlicet de personis, loco, tempore, visu, auditu, scientia, credulitate, fama, & certitudine; cæterisque, quæ ad rem facere, & negotio conuenire existimabit. Vbicunque autem agitur ad peccatum impediendum, nec ius alterius læditur, sufficit dictum vnus.

7 Testes verò examinati, & non interrogati de causa scientiæ, & super omnibus interrogatorijs (præcipuè in criminalibus, & in causa summaria) non dicuntur ritè examinati: ideo possunt repèti, etiam publicatis eorum dictis, tanquam non ritè acceptis. Quod enim de auditu, fama & credulitate interrogantur testes, ad præsumptionem potius quàm ad plenam probationem pertinet. Super quibus vero



examinari debent testes, clauduntur his versibus :

*Auditus, visus, persona, scientia, causa.*

*Fama, locus, tempus ac certum, credulitasque.*

*Dum testes recipit iudex hæc iuncta notabit.*

8 Si qui tamen eorum, qui interrogandi sunt, valetudinarii, vel senes, vel debilitate confecti habeantur, vel etiam ita paupertate depressi, ut ad præsentiam iudicis venire non possint, idoneum deliget iudex, quem ad suscipiendas illorum attestations dirigat. Idem si sint egregiæ personæ, debet enim ad eas iudex mittere : nisi illæ suo privilegio renunciare velint, vel causa sit criminalis, aut ita ardua, ut testis debeat deponere in præsentia iudicis; quia tunc potius debet egregia persona ire ad eum, quàm contra.

9 Testes verò non omnes recipiendi sunt, sed fideles duntaxat (non hæretici neque Machometani aut Iudæi) & idonei. Censentur autem testes idonei conditione, natura, & vita. *Conditione*, si liber testis, non servus. Servus enim sæpe metu dominantis, veritatis testimonium suppressit. *Natura*, si vir sit non foemina. Nam varium & mutabile semper foemina. *Vita censetur testis*, si innocens sit, & integer. Nam si vita bona defuerit, fide carebit. In summa, quicumque iure minimè prohibentur, ad testimonium perhibendum sunt admittendi.

10 Si tamen quando alicuius mulieris testimonium necessarium fuerit, cum mulieres honestas ipsa, ac naturalis pudor virorū coetibus immisceri prohibeat, quacumque auctoritate testimonij ferendi causa, vel alia, quæ iure non exprimat, in iudicium personaliter evocari, vel trahi non poterit : sed ad eam mittendus tabellio (vel alia honesta persona, puta presbyter) & iuxta Bonifacianæ constitutionis tenorem procedendum erit.

11 Ut autem testis possit dici integer; quatuor communiter concurrere debent. *Primo*, ut sit immunis à crimine, nam enormiter peccans non facit fidem etiam cum iuramento. *Secundo*, ut procul sit ab infamia. *Tertio* procul à fraude; quia dicens fraudulentè se inimicum, ut se à testificando

ficando subtrahat, licet mortaliter peccet, quia dicit mendacium in causa proximi, nihilominus fraude comperta reciperetur, & ei crederetur. Et *quarto* carens suspitione criminis, de quo causa vertitur in iudicio.

12 Clerici ergo à ferendo testimonio super negotio propriæ Ecclesiæ: vel aliæ singulares personæ, in causa suæ vniuersitatis repellendi nō erunt: nisi ad agendum, respondendumue fuerint instituti (quia nemo debet habere duplex officium in vna causa) vel ipsos alia causa probabilis impediēt. puta, excommunicatio, crimen graue, periurium, infamia, vel simile quidpiam.

13 Monachi quoque, & quicunque sub alterius obedientia constituti sunt (vt sunt Canonici regulares, Iesuitæ, conuersi & alij religiosi huiusmodi) de sui Prælati licentia rectè testimonium dicent.

14 Christianorū quoque testimonia aduersos Iudæos, in omnibus causis recipienda erunt, nullis sibi contra hoc Principum priuilegijs suffragantibus. Sed contra Christianum, nec Iudæus, nec Paganus, nec hæreticus, aut aliter infidelis; nec excommunicatus, aut suspensus, aut aliter criminofus rectè testimonium dicent.

15 Plane quod de criminoso diximus, distinctionem recipit. Nam si is, qui ab aduersa parte opponitur, adhuc in ipso crimine perseverat, tam in ciuili, quam in criminali causa ab omni prorsus testificandi officio excludendus erit: si vero sit de crimine emendatus, nec eum comitetur infamia, non est causa ciuili, vel etiam cum de crimine ciuilitè agitur, præterquam pro reatu periurij, repellendus. Quod procedit tunc quoties quis violauit iuramentum licitum, vel de quo dubitatur an sit licitum. Si vero iuramentum sit illicitum & temerarium, secundum communem opinionem non repellit à testamento, nec infamat: sicut nec à dignitate repellit.

16 In criminali autem quæstione. si in alio iudicio contra ipsum accusatione de crimine instituta, confessus vel conuictus fuit, vel si tunc per exceptionem conuincatur;  
aut



aut eius grauata sit opinio, ex eo quod quandoque fuit tali modo repulsus, quamuis hoc casu non excluderetur, in causa ciuili, potest à testimonio licet egerit poenitentiam remoueri. Nam ex quo semel commisit quis periurium in testificando in illo officio, suspectus est semper in illo licet sit emendatus. In teste enim pura & simplex requiritur veritas, & iuramentum est veritatis confirmatio: iam autem nihil est æque veritati contrarium ac falsitas, quæ est veritatis immutatio: ideo quilibet periurus est infamis, & talis non admittitur ad purgationem alterius, præsertim cum fuerit pro falsitate semel condemnatus, & licet quantumcunque sit emendatus, semper tamen remanet suspiciosus, quod velit iterum deierare. Testis vero debet omni infamia & suspicione carere.

17 Illud in dubium non venit, eius testimonium, qui integer deposuit, infringi debilitariue minime posse, quamquam illum post depositionem factam esse contigerit criminofum. Nec enim quod recte semel factum est, ex huiusmodi euentu postea debet infirmari, cum culpandus non sit, qui idoneum nunc in testes producit, si aliquando eundem futurum malum non diuinauerit.

18 Domestici quoque (puta qui subsunt vel ratione patriæ, vel ratione paternæ & dominicæ potestatis, & familiares mercenarij, & qui viuunt ad vnum panem) & qui similem habentes causam, consimili quoque morbo seu delicto verisimiliter laborare existimandi sunt, si certum id sit, aut super eo legitimè conuinci possint, si ab alteutra partium testes adducti fuerint, ad testimonium admittendi non erunt. Quod si alij testes inueniri non poterunt, nisi de familia, & similem habentes causam; poterunt quidem admitti, sed non quo ad effectum plenæ probationis; & quanta sit illis adhibenda fides, iudex ex varijs circumstantijs arbitrabitur.

19 Is quoque, qui in prima instantia, alicuius causæ aduocationem & patrociniū suscepit, licet aduocatus & procuratore esse desierit; quia tamen adhuc affectus causæ

præsumitur, in iudicio appellationis in testem recipiendus non erit. Sed si quis fuerit quidem procurator constitutus, mandatum tamen non receperit, testificari poterit. Notarius verò, qui scripsit acta, non prohibetur esse testis; sicut & iudex, coram alijs iudicibus, de gestis coram se, rectè deponere potest.

20 Dabunt autem iudices, tam in ecclesiasticis, quàm in ciuilibus causis ad exhibendos testes, non solum vnâ, sed ex causa secundam etiam, & tertiam dilationem: quartam verò disceptantibus non largientur, nisi præstito ab eo qui postulat iuramento, quod non per calliditatem aliquam quartam productionem postulet, nec moræ faciendæ causa. Sed quia illorum, quos instat nunc de nouo producere, prius notitiam habere nequiuert: quodque neque per se, neque per alium testificata subtraxerit vel didicerit; quo casu quartam quoque dilationem accommodabit iudex; maxime si productioni testiũ non fuerit à partibus renunciatum. Tunc enim pars quæ probationibus renunciauit, non est ad hoc vltèrius admittenda.

21 Siquidem, ne probationes depereant, multa permittuntur, quæ alioqui non concederentur: vt ecce, si is in causa iudex datus fuerit, quem in testem produci sit necessarium, remouendus (nisi vellet iurare quod nihil scit in illa causa) & alius in locum substituendus erit. Sic & alias citato aduersario (semper enim præmitti debet citatio, vbi agitur de præiudicio absentis) recipiuntur, & publicantur testes, quos reus inducendos duxerit. Sic & Ecclesia necessariæ probationis omissione læsa, etiam aduersus Ecclesiam restituenda erit.

22 Elapsis igitur tribus dilationibus, postquam renunciatum est probationibus, & publicata dicta testium, regulariter producendi testes rursus non erit danda copia. Et sicut non licet super eisdem, vel directo contrarijs articulis alios, vel eosdem testes in principali causa producere: sic non debet in causa appellationis licere, cum non minus in ea, quam in principali, testium sit timenda subornatio.



23 Limitatur tamen, quando culpa, vel malitia examinitoris, vel iudicis, testes non fuerunt recepti. Similiter quando testes fuissent nulliter recepti, tunc poterunt denuo legitimè recipi, etiam post publicationem, dummodo non misceantur alij testes de nouo. Item in causis criminalibus admittuntur testes ad defensam rei, etiam post publicationem in causa factam. Vel vbi in prima instantia fuit articulatum de maiori vel minori. Itidem si examinador omisit examinare super aliquo articulo secundam tabulam, tunc post factam publicationem in causa, recipiuntur iterum testes & examinantur. Idem censendum quando notarius deponit viua voce pro suo instrumento: Et quando prima sententia fuit declarata nulla, in secunda instantia articulatur idem, vel contrariū. Similiter quando esset perempta instantia. Etiam quando in petitorio possum ponere idem, vel de directo contrarium in possessorio. Item quādo in prima causa probaui intentionē meam per duos testes, & pars aduersa probauit contrarium, possum facere eundem articulū, & examinare alios testes. Vel demū quādo probari posset testes corruptos falsum dixisse.

24 Quod si noua contingat emergere capitula, super quibus partes testes novos velint inducere, recepto solēni iuramento testium, non obstante publicatione, super veteribus facta, nec in primo, nec in secundo iudicio reijcendi erunt.

25 Sed interdum accidit, vt eos, qui iure in testes recipi non debuerant, admissos tamen esse ab aliqua partium prætendatur: in qua specie statutum est, vt si quid in eos habent (quod sint periuri, infames, serui, inimici, conspiratores) ante publicationem debeant obijcere, postea verò tunc demum id licebit, cū iuramento partes firmauerint, quod non dolo velint ad opponendum descendere.

26 Sed etsi ostendere (puta per iuramentum) quis paratus fuerit, post publicationē didicisse, quod in personas vult obijcere, tunc quoque opponendi patere debet aditus. Idemque iuris est, si forte quis ante publicationem id fuerit

rit protestatus. Ceterum, cum quis protestatus fuerit, velle se post publicationem depositionum, personas testium repellere, si quid in fauorem potestantis dixerit, non de facili fides adhibebitur: Nisi iudicis & aduersarij accedente consensu.

27 Illud etiam admonendi sumus, quod non solum testes super principali negotio deponentes alijs testibus licebit repellere; sed etiam contra secundos primorum reprobatorios probationes proferre licebit. Et non admittente iudice, appellationis remedium licitum erit interponere.

28 Licet ergo reus sibi debet imputare, quod non produxit testes in principali; quia si produxisset, fuisset æqualis cum actore. Nam aut reus probat in principali, & tunc indubitanter seruatur æqualitas respectu eius; aut solus actor produxit testes in principali, & tunc etiam seruatur æqualitas respectu facultatis reprobandi. Quia quælibet pars habet viam duntaxat reprobatoriam; & in potestate rei fuit producere testes in principali, & in hoc potuit sibi præiudicare. Nam & idem videmus in reo, quando ipse solus produxit testes super exceptione sua; actor enim habebit solum vnam productionem reprobatoriorum, & reus duas productiones, scilicet probatoriorum & reprobatoriorum: & sic quocunque te veritas inuenies æqualitatem.

29 Vtlerius autem partibus ad reprobationem testium aspirare minimè licebit, ne si producendi quartos contra ternos, & sic deinceps partibus licentia tribuatur, negotium contingat in infinitum probari, quod omnino vitandum est.

30 Publicatis igitur attestationibus non solum ad multitudinem testium respicere iudicem oportet, sed etiam ad qualitatem illorum. Item depositiones rimari, & diligenter inspicere debet, & ex his, quibus potius veritatis lucem assistere iudicabit, animi sui motum informabit. Primoque obseruabit qualitatem testium, quia sunt honestiores, ditiores, doctiores & melioris famæ. Deinde qualitatem



depositorum, quia sunt iuri communi cōsona, aptiora negotio de quo agitur, & personæ producenti non contraria.

31 Quodd si circa alicuius testis dictum, iudicis hæsitet intellectus, eundem rursus ad examen reuocare poterit. Et generaliter iudex ad prolationem sententiæ interrogare super facto poterit, vbicumque aliquid dubitationis inciderit. Eum quoque, qui non studiosè, sed linguæ lubrico errauerit, & sese confestim correxerit, reprobare iudex non debet: secus autem si correctioni suæ tempus interposuerit.

32 Repetere autem, non solùm obscurè deponentem poterit, sed etiam si à principio super certis capitulis eundem interrogare, postulante aduersario, vel negligentia, vel calliditate prætermiserit.

## TITVLVS XVIII.

### *De Instrumentis & Scriptura.*

1 **Q**uia litigantes intentionem suam, non solùm viuæ vocis adminiculo probare consueverunt, sed etiam per scripturas publicas & priuatas; ideo post probationes testium ad probationem instrumentorum descendendum esse putauimus, quæ quidem in litibus exercendis eandem cum depositione testium vim obtinere solent.

2 Exhiberi autem in iurè poterunt instrumenta, non solùm ante attestationum publicationem, sed & postea, vsque ad definitiuæ sententiæ calculum; antea tamen quam in causa conclusum fuerit. In causa autem conclusum esse tunc dicimus, cum à partibus omnibus probationibus renunciatū fuerit. Quod tamen non procedit aduersus miserabiles personas, & Ecclesiam, quarum fauore possunt instrumenta nouiter reperta produci etiam post cōclusionem in causa. Idem fit quando instrumenta essent solu-

solutionis, nam tunc etiam si esset lata sententia, adhuc produci possunt, & sententia retractatur.

3 Non tamen omnis scriptura in iudicio producta fidem faciet, sed ita demum, si per manum publicam (Notarij videlicet qui est seruus publicus) scripta fuerit, ita vt appareat publica, & authentico sigillo (puta Episcopi, au- Principis) muniatur, vt fiat adminiculo viuæ vocis videlicet eius qui scripsit ex testium probet: alioqui nullius roboris firmitatem obtinebit. Illa etiam scriptura dicitur publica, & probat, quæ per statutum approbatur tanquam publica.

4 Solet autem publica scriptura tribus modis esse suspecta. *Primo*, quando esset rasa, abolita, vel cancellata in loco substantiali. *Secundo*, quando producitur à persona vili, suspecta, & solita falsificare. *Tertio*, quando Notarius qui eam scripturam confecit, esset persona suspecta, eo quod solitus sit falsa instrumenta conficere.

5 Idem & de exemplis dicendū erit: quæ tamen si solemniter sumpta fuerint, eandem cū originalibus habitura sunt authoritatem. Solemniter autem tunc dicentur sumpta, cum coram ordinario iudice, (aut administrationem habente) vel ad hoc ab ipso specialiter delegato præsentata fuerint, atque is diligenter inspecta, dum nulla parte sua vitiata comperit, per publicam personam, exempla sumi præcepit. Quod tamen non permittitur nisi ex iusta causa, vt puta, quotiescunque verisimiliter timetur ne pereat probandi facultas propter vetustatem originalium.

6 Eandem etiam authoritatem & ea obtinebunt, quæ ad petitionem eorum ad quos pertinent, permissu iudicis ordinarij in publicam formam redacta fuerint, si tabellio morte præuentus ea non perfecit, sed in notis tamen redacta moriens reliquerit. Vnde infertur, quod post exemplationem solemniter factam, aut redactionem in publicam formam, non est opus producere ipsa originalia, quia iam authentica habentur.

7 Exhibebuntur ergo instrumenta publica, non cancellata,



cellata, neque abolita, nec vlla parte sui vitiata, aut aliquo pacto de falsitate suspecta: quanquam si exceptor literam imprudens omiserit, aut documentum in loco non suspecto (scilicet in nominibus iudicum, in data, in remotione, appellationis, in nominibus partium, aut rerum de quibus agitur, & in multis alijs, super quibus discretus iudex arbitratur) interleuerit, non propterea veri fides, & instrumenti auctoritas vacillabit.

## TITVLVS XIX.

### *De Iureiurando.*

**I** **Q**Uòd si actor nec testibus, nec instrumentis intentionem suam legitimè deducere poterit, permittente iudice, non plenæ probationes iurisiurandi religione suppleri, & causa terminari poterit. Et quia quotidiana hæc materia est, nec Iuris præsertim Pontificij peritis negligenda, ideo fusius hoc loco de iuramento, cum propriè ad hoc ius spectet tractabimus: quo nomine iudex ecclesiasticus etiam in iudicem laicum iurisdictionem habet, vt ille ecclesiastica censura (vbi opus sit) percussus, iuramentum, quod salutem animæ respicit, seruari à suis subditis faciat.

**2** *Est autem iuramentum veritatis confirmatio, cū aliquid Deo teste asseritur. Soletque interponi, cum vel facturos nos aliquid promittimus, vel non facturos sub religionis vinculo; vel cum super veritate rei alicuius, vel facti respondemus, aut testimonium exhibemus, vt quæstio aliqua, vel lis dirimatur. Debetque iuramentum quodlibet tres comites habere, veritatem conscientiae, iudicium, seu rerum discrimen, & iustitiam. Quocirca iuramentum generaliter editum, si fieri poterit, sic exaudiri debebit, vt iuri non aduersetur, quò seruari possit: Alioquin, si contra canonicas sanctiones esset, non iuramentum, sed periurium potius appellari deberet, nec aliqua ratione seruandum esset.*

3 Et cum causa distinctionis ipsius iuramenti sit voluntas nostra, quæ aliquando liberè, & aliquando coacte ad id mouetur; ideo multiplices quamuis diuisiones iuramenti numerentur, in proposito tamen nostro dupliciter tantum considerari poterit, vel vt necessarium sit, vel voluntarium. *Necessarium iuramentum est*, quod ad supplendas probationes à iudice deferitur, quod propterea necessarium nuncupatur, quod à iudice illud omnino deferri partibus oportet, & quod rite delatum ab eisdem recusari non poterit, nisi ex iustis causis. *Voluntarium vero iuramentum est*, quod à parte parti in iudicio deferitur: quod quia litem terminat, decisorium quoque nuncupari poterit. Et appellatur voluntarium, quia pars non nisi volens deferret, & ab eo cui deferitur, licite recusari, ac referri poterit.

4 Sunt autem iustæ recusandi causæ, vt puta, si actor plenè probauerit, aut si sibi non planè cognitam rem ipsam asserat, & si quæ sunt huiusmodi. Sed etsi pro reo præsumptiones fuerint, eidem hoc Sacramentum iudex deferret, ad suam tuendam innocentiam. Nisi inspectis personarum & causæ qualitatibus, illud actori deferendum censeat. Non enim cuilibet deferitur hoc iuramentum, sed requiritur, quod is cui deferitur, sit persona honesta & bonæ vitæ: quia vili & suspectæ de periurio non deferitur. Nec etiam huiusmodi iuramentum deferitur in causa ardua vel criminali, sed in causa modica & ciuili tantum.

5 Planè, si reus famosis actionibus conuentus fuerit, huiusmodi iusiurandum agenti referre minime permittebatur, cum non actor, sed ipse qui conuenitur, facti proprii conscius esse debeat. Iuramentum enim in litem locum habet in actionibus bonæ fidei, & in actionibus in rem arbitrijs, sed ob dolum tantum, vt supra attigimus. Ac potest iudex hoc iuramentum, si nimium excedat, moderari. In actionibus quoque stricti iuris huic iuramento in litem locus esse potest, si alia veræ æstimationis probatio non suppetat.

6 Multa porrò, ac magna sunt iuramenti priuilegia:  
nam



nam & efficit, vt etiam laicus, qui iuramentum super contractu prestitit, ab ecclesiastico iudice ad illud obseruandū compelli possit. Idem hanc vim habet, quod actus, super quo fuerit interpositus, omni, quo melius poterit modo sustinebitur; non patitur iuramentum moræ culpam semel commissam expiari; operatur, vt qui facere aliquid cum iuramento promisit, omnino id facere compellatur, nec liberetur, quamuis id quod creditoris interest, præstare paratus sit. Prohibetque, ne promissi aliquem etiam in contractibus innominatis poenitere possit: quamuis nec dum altera pars suum ei promissum impleuerit.

7 Item per creditores debitorem interpellat, pluresque contractus, qui alioqui fortè aliquo vitio, vel impedimento obstante non valerent, corroborat ac confirmat; Priuat fideiussorem beneficio, quod ei contra creditorem competeat, ne prius ipse conueniri posset, quàm debitor principalis excussus fuisset. Præterea iuramentum in causa est, vt emphiteota, vel conductor non soluentes pensionem etiam ante biennium expelli à domino possint. Multaque alia priuilegia operatur, quæ aliunde exposcere vnicuique licet.

8 Qui prestitum à se iuramentum non necessitate, sed sua voluntate vltro adactus violarit, deponendus est, & ab Ecclesia sua remouendus. In Episcopos autem, qui suum iuramentū fuerint transgressi, est tanto grauius vindicandum, quanto maiore præeminent dignitate, & quanto facilius alij possunt eorum exemplo ad similia prouocari.

9 Non deierat tamen, qui iuramentum suum in melius commutat; vel cui alter ex parte sua iuramentum non impleuit, si & ipse implere illud detrectet.

10 Verum si cuius præceptis stare iurauero, & is mihi aliquid illicitum iubeat, puta, vt vxorem dimittam, vel filium exhæredem faciam, ei parere non sum adstrictus. Eadem ratione qui iurant patrem aut matrem non alioqui aut alios cognatos, vel eis humanitatis subsidium non exhibere, ab huiusmodi iuramenti obseruatione soluendi sunt,

cum

cum illicitum & rationi contrarium sit; iniuncta eis tamen ob hoc, quòd male iurauerunt, poenitentia competenti.

11 Sic etiam iuramentum in damnum Ecclesiæ redundans seruandum non est, puta, si Prælati res Ecclesiæ ablatas non repetere iurasset. Aut is qui Religionem professus fuit, iuraret postea, se in claustrò deinceps non moriturum eius Monasterij, cui se addixit. Temerarium est huiusmodi iuramentum, nec seruandum, quòd fidem professionis frangeret, ac stabilitatis propositum euacuaret.

12 Pari etiam ratione potero ego effugere, ne illi paream, cui sub iuramenti religione parere tenebar, si is mihi aliquid iniungat, ex quo iuramentum olim à me licitè præstitum violaretur. Hinc & creditores ad iuramenta relaxanda de soluendis vsuris præstita, ecclesiastica districtione coguntur: quam relaxationem si debitores non petierint, cogendi erunt omnino iuramentum reddere. Sed cum vsuræ solutæ fuerint, creditores debebunt ad eas restituendas, ecclesiastica seueritate, si necesse fuerit compelli. In iuramento etiam semper intelligi debet ius superioris exceptum.

13 Iuramentum autem, cuius obseruatio salutis æternæ interitum non afferat, seruandum est: nisi relaxatum sit. Quia & dubitatum olim fuit, an si vi, aut metu extortum sit iuramentum, absolutione vlla opus sit? nam quod petita absolutio his casibus concedenda sit, nemo, vt opinor negat. Et frequentibus sententijs receptum est, extorta hisce modis iuramenta adstringere, ac fori contentiosum ad eorum obseruationem cogere, quamdiu ea relaxata non sint.

14 Ea quoque iuramenta, quæ Canonici, aut alij, qui ad Collegia quæcumque admittuntur, iurant, videlicet statuta & consuetudines earum Ecclesiarum, Collegiorum, vel locorum, se omnino obseruaturos, sub qualicumque verborum forma emanarint, ad illicita, impossibilia, & libertati ecclesiasticæ repugnantia non extenduntur. Sed iam reliquas probationum species expediamus.



*De Præsumptionibus.*

1 **D**iximus præcipuam probationem in iudicio esse, confessionem partium, depositionem, testimonium, instrumentorum exhibitionem, & iuris iurandi religionem: reliquum est, vt prosequamur debiliores probationis partes, per quas præsumitur quoque veritas elici causæ, & adminiculum probationibus præstari, puta per inspectionem iudicis, notorietatem rei, suspicionem vehementem atque famam publicam, ex quibus singulis iudex varijs argumentis collectis debet animum suum instruere.

2 Iudicis itaque inspectione consistunt probationes, cum pro terminandis finalibus quæstionibus proprijs oculis (poterit etiã mandare petitis, vt suo nomine inspiciant) loca iudex subijcit: aut ex aspectu operis ætatem colligit: aut cum ex literis ordinarij, vel apostolicis excommunicatus, aut dignitatibus honestatus quis deprehenditur. Vel cum ad probandam virginitatem, aut conceptionem partus ab honestis, & prudentibus matronis, vice sua iudex inspici mulierem iubet.

3 Sed etsi quid notorium fuerit, testimonium depositionibus, vel instrumentorum exhibitione amplius declarari non debet, cum talia probationem, vel ordinem iudicarium non requirant. Est autem notorium, & dicitur propriè id, quod est ante oculos situm; vel est in mentibus hominum ita radicatum, quod euelli, vel occultari non possit.

4 Est autem notorium triplex. Facti, Iuris, & Præsumptionis. *Facti est*, quod ita se exhibet hominum conspectui, quod nulla potest tergiversatione cædari. Et in tali appellans non auditur: in tali creditur simplici officiali: in tali non requiritur scientia omnium, sed plurium. *Iuris est*, de quo aliquis condemnatur, vel id iure confessus est,

Et

Et in hoc notorio quandoque requiritur probatio, si negetur. *Notorium præsumptum est*, paternitas, filiatio, consanguinitas, benevolentia, amor, præstitaque beneficia & munera. Sed cum multa dicantur quæ non sunt, prospicere debet iudex, ne quod dubiū est pro notorio recipiat.

5 Ad notorium propè accedit vehemens suspicio. Nam si, exempli gratia, de carnali copula quærat, & sint qui solum cum sola, nudum cum nuda in eodem lecto iacentem locis secretis, & ad hoc commodis, & horis electis se vidisse deponant, procul dubio ex suspicionibus tam vehementibus sequutam copulam pronunciari poterit. Plane si de graui crimine actum fuerit, propter solam suspicionem, quanquam vehementem, nemo condemnabitur. Nam licet occulta per coniecturas & præsumptiones manifestentur, non tamen quælibet præsumptio probat; cum habeat latitudinem ingentem, & ideo debet esse vehemens.

6 Suspicio tamen quæ sumitur ex signis exterioribus operum aut verborum, vim notorii habet, & concludit frequenter: puta, si quis propositiones hæreticas publicè afferat, vel adoret sepulchrum Machometis, etiam si ista sine errore intellectus aliquis proferat & sine pertinacia afferat, aut faciat, tamen Ecclesia quæ exteriora iudicat, præsumit vehementer huiusmodi hominem hæreticum esse, aut Machometanum.

7 Fama quoque, si de aliquo facto inuulgata fuerit, cæteris præsumptionibus nō leue (præsertim in quibusdā) præstabit adminiculum, siue infamiam inurens alicui ex dissolutione vitæ, siue bonum nomen præstans ex probitate morum. Potestque tribus modis considerari tam bona quam mala vniuscuiusque facti, vel personæ fama. *Primo* ex vulgi vago rumore, nullum certum authorem aut causas probabiles habens. *Secundo* ex malitia & arte alicuius demandata, pro commodo & vtilitate propria, ad effectum probandi intentionem suam. *Et Tertio* habens originem à personis fide dignis, grauibus, iuridicis, & de quorum comodo non agitur, habens causam & rationem.



ortus sui . Et talis fama , licet ex se non probet plenè , tamen probationem factam coadiuvat . De testibus vero fama debet esse solida , inconcussa excellens , non vaga , non leuiss , non contraria .

8 Denique circumspectus iudex , motum animi sui , non ex vna tantũ re , sed ex varijs argumētis & testimonijs , quæ rei aptiora esse compererit confirmabit . Iudicaturum enim oportet cuncta rimari , & ordinem rerũ plena inquisitione discutere ; nec sententiam prius ferre , quam peractis omnibus , nihil habeat in quæstione , quod proponat .

## T I T V L V S XXI.

### *De Sententijs , & re iudicata .*

1. **C**VM duo præcipuè videantur esse actus ipsius iudicij , cognoscere videlicet causam & iudicare ; & hætenus locuti sumus de cognitione ; restat vt videamus nunc de sententijs & re iudicata ; quia ex probationibus deuenitur ad sententias , & ex sententijs ad rem iudicatam . Primo ergo consideremus , quid , & quoruplex sit sententia ; deinde quomodo sit ferenda ; & tandem quid iuris sit , si diuersæ , vel contrariæ sententiæ fuerint latæ , & non secundum præscripta Canonum .

2 Cum itaque officiũ iudicis cōsistat in absoluendo , vel condēnando , ideo sententia ab illo prolata nihil aliud erit , quam controuersię corā illo propositæ ritè facta definitio . Differt autem sententia à decreto : quia sententia dicitur quando continet verbum , absoluo te , vel condemno : decretum verò continet possessionem , vel quid simile , vel admissionem . Et sententia ex falsa causa , quæ consistet in facto non est nulla , decretum vero est nullum . Præterea laudum arbitri dicitur sententia , & habet executionem paratam , decretum autem non item .

3 Sententiarum duæ sunt species : aut enim interlocutorię sunt , aut definitiue . *Interlocutoria est illa , quæ inter principium & finem causæ , fertur super his , quæ incidunt*

vel emergunt, qualis cum iudex dandam, vel negandam dilationem, ad examinandos testes, vel exhibenda instrumenta interloquitur. Vel super aliquibus exceptionibus pronunciauit, quam nec in scriptis ferri oportet, & ante definitiuam sententiam quādocunque iudex reuocare poterit. *Definitiuā verò sententia est*, definitio iudicialis, quæ condemnando, vel absoluendo principali controuersiae finem imponit. Definitiuā enim, quæ nec condemnationem, nec absolutionem continet, pro nulla habetur: hanc simul ac tulerit, retractandi copia iudici denegabitur.

4 Non tamen ut sententia valeat, condemnandi vel absoluendi verbum necessario continere debebit, sed satis erit, quod verbum æquiualens contineat; cum non intentio verbis, sed verba deferuiant intentioni. Vnde rescriptum est eius definitionem, quæ ita se statuere, & præcipere pronunciaisset, legitimæ sententiæ obtinere firmitatem.

5 Vocatis igitur partibus, loco & tempore congruis, iudex ipse sedens sententiam de scripti recitatione proferet: alias, si non iudex, sed alius legerit, vel scriptā litigatoribus tantum ediderit; vel stando, non sedendo tulerit, nullius penitus momenti erit, ut ab ea nec appellare sic necesse. De forma enim sententiæ istud est, ut deliberate primo scribatur, & postea legatur, nullam emendationem postquam pronunciata fuerit admittens.

6 Episcopo tamen, quem tantæ dignitatis apex attollit, ut non sit dignitas in Ecclesia Dei Episcopatu maior, instar personarum illustrium, sententiam, per alium recitare, permittitur. Sed sunt & alij, in quibus valet sententia sine his solemnitatibus.

7 Sed si plures iudices sint, vel arbitri, si cæteris præsentibus ac mandantibus per vnum tantum sententia recitetur, si plurali numero perlegendo usus fuerit, perinde habetur, ac si ab omnibus recitata fuerit: licet aliud in electione seruetur.

8 Si vero duo iudices ordinarij diuersas sententias proferant, tunc prolata sententia tenet pro reo, nō pro actore.

Nisi



Nisi agentis causa sit fauorabilis, vt puta, libertatis, dotis, matrimonij. Si vero delegati iudices fuerint, tunc sententia pendet ex arbitrio delegantis. Quod si ex compromisso, vtraque firmitatis robore destituitur.

9 Quod si pluribus iudicibus datis, vnus tantum ex eis pronunciaſſe proponatur, adeo nullas ſententia vires obtinebit, vt nec prouocationis remedium neceſſarium ſit futurum.

10 Sed ſine ordinarius ſit, ſiue delegatus iudex, in primis illud obſeruare debet, ne contra id iudicet, quod legibus aut canonibus proditum ſit: alioqui ipſo iure ſententia non ſubſiſtet. Sed & conſuetudo ita obligat ac ſi expreſſe in contrarium ſtatutum eſſet; quæ etiam facere poſteſt, quod inſtrumenta quæ aliter non probarent, probent, & ſtilus tam ad ordinem quam ad deciſionem cauſarum ſeruetur conſuetus. Vnde ſententia contra conſuetudinem lata, nulla eſt.

11 In cauſis quoque, quæ Summi Pontificis iudicio deciduntur, cum in ſimilibus cauſis cæteri teneantur iudicare, ſimiliter iuris ordo & rigor æquitatis ſubtiliter obſeruandus erit. Niſi cum ille aliquid cauſa neceſſitatis & vtilitatis, diſpenſatiuè duxerit ſtatuendum.

12 Si tamen ſententia non contra ius conſtitutionis expreſſè à iudice lata fuerit, ſed contra ius litigatoris, præſumitur eſſe iuſta: maxime cum pars videatur acquieſcere non appellando. Sed quando exprimit cauſam contra ius, tunc meritò tanquam notoriè iniuſta, legitimis remedijs retractanda erit.

13 Dicitur autem iudex contra ius conſtitutionis pronunciaſſe, veluti cum defunctus, & minor quatuordecim annis fuiſſe aſſeritur, & teſtamentum iure feciſſe pronunciat. Contra ius vero litigatoris, veluti cum minor quatuordecim annis, annum quartumdecimum impleuiſſe, ac per hoc teſtamentum iure feciſſe aſſeritur.

14 Is autem, qui in grauamen partis alterius, in iudicio aliquid iniuſtè fecerit, per gratiam, vel per ſordes (hoc eſt

est preces aut precium) siue ordinarius siue delegatus sit, ab executione officij per annum suspendendus erit, & ad æstimationem litis parti quam læserit nihilominus cõdemnabitur. Sed modo fallit hoc in Episcopis, quamuis delinquendo grauius cæteris peccent.

15 Et si suspensione durante diuinis sese ingesserit, irregularitatis quoque laqueo innodabitur, à qua non nisi per Summum Pontificem liberari poterit: alijs quoque legum animaduersionibus coercebitur. Cum dignum sit, vt qui in multis audet offendere, poenæ etiã multiplici subdatur.

16 Lata tamen sententia, nisi per appellationem intra terminum à lege constitutum suspensa fuerit, amplius reuocari non poterit (via scilicet ordinaria & iure ordinario, sed per supplicationem in integrum restitutionem bene, quandoque habere poterit.) Cum enim post decem dierũ spatium sententia in auctoritatem rei iudicatæ transeat, qui ad procurationis subsidium iuxta id temporis spatium non recurrit, ideo appellandi sibi aditum præcludit, quia per hoc videtur interpretatione iuris velle latæ sententiæ obtemperare.

17 Excipiuntur tamen multi casus, in quibus sententiæ, etiam post decem dies rei iudicatæ, firmitatem sibi vindicare non valent, veluti cum de matrimonio est quæstio, aut seruata sententia salus animæ in discrimen adducitur, & alij plures.

18 De eo quoque admonendi sumus, quod etsi sententia transierit in rem iudicatã, præter eos, inter quos dicta fuerit, regulariter neminem lædet: si quis tamen cum sibi primùm de ea re actio, vel defensio competeret, sustinuit sequentem agere, aut passus est eum, à quo causam habuir, experiri, ipse quoque sentiet ex re iudicata præiudicium.



*De Executione rei iudicatæ.*

1 **P**ostquam vidimus de sententijs & re iudicatâ, sequitur videre de illorum executione: qualiter nimirum res iudicata sit exequenda, & à quo, & an executor possit de fraude contra eam opposita cognoscere. Si igitur sententiæ latæ legitima appellatio nõ occurrerit, intra statuta tēpora executioni mandanda erit.

2 Executor vero dicitur ille, qui sententiam ritè latam ad effectū producit. Et est duplex: merus scilicet, & mixtus. *Merus dicitur is*, cui post latam sententiam, & post habitam causæ cognitionem, super exceptione, iudex commisit nudam executionem facti. *Mixtus verò executor dicitur ille*, qui citat, aliaque facit ex necessitate actus, vel quia est datus cum clausula, Vocatis vocandis.

3 Sed multum intererit, vtrum in reali, an vero super personali actione sententia lata fuerit. Primo enim casu statim: secundo non nisi post emensa quatuor mensium spatia executioni mandabitur.

4 Licet autem quadrimestre tempus in personali actione sit regulariter statutū, ex causâ tamen nonnunquâ & arbitrari & prorogari potest. Sed qui ab initio terminum recipit sponte breuiorem, sibi id imputare debebit, cum ex voluntate propria iuris beneficium contempsisse videatur. Vnde postea non audietur appellans; nisi forte aduersus eum modus executionis canonicus excedatur, siue ab ordinario, siue à iudice delegato, siue etiam ab arbitro res iudicatâ fuerit.

5 Sed & in reali actione non semper sit statim executio sententiæ (licet eam ordinarie intra prædictum tempus non valeat iudex prorogare seu diminuerè) sed limitatur in bonis executis virtute sententiæ nullæ, vel virtute hypothecæ, vbi constat de debito & obligatione. Item potest executio sententiæ ex iusta causa differri, quando  
affert

affert damnum irreparabile si exequatur, & requirit altior-  
nem indaginem: Tunc quando tertius possessor potest im-  
pedire executionem sententię ex incomperetia iurisdictioni-  
nis; pariter quoque retardatur executio sententię, si esset  
lata contra defunctum, nam non potest remitti executioni  
contra hæredem non citatum ad dicendum causam quare  
non debeat exequi. In criminalibus autem sententia non  
debet differri, sed statim executioni debet mandari, ne de-  
tur occasi supplicandi. Si tamen Princeps iratus rescribat  
aliquem puniri vltra modum regularem, tunc debet iudex  
vsque ad dies triginta differre executionem vt videat si  
Princeps poenam relaxet.

5 Aduerte tamen, quod regulariter sententia non de-  
bet mandari executioni intra decem dies, qui dantur ad  
appellandam.

6 Sed si ordinarius (ad quem regulariter pertinet exe-  
cutio sententiarum) ad mandatum iudicis à Principe dele-  
gari nolit, aut quibusdam obsistentibus sententiam ab eo  
latam suo effectui mancipare nequeat, datus ipse iudex illā  
executioni mandare poterit, & resistentes ecclesiastica sen-  
tentia coercere: & non solum vsque ad quadrimestre tem-  
pus, quod ad soluendum debitum à lege reo conceditur,  
sed vsque ad annum integrum ad exequendam sententiam  
iurisdictionem exercere poterit.

7 Notandum est, quod delegatus Papę, potest man-  
dare ordinario loci vt sententiam suam exequatur: nec  
mirum, quia quo ad causam sibi commissam maior est  
omnibus post Papam, & repręsentat personam Papę, vnde  
honorari debet. Et brachium sæculare si requisierit, con-  
currere ei debet ad peragendam executionem. Licet autem  
sententia illius non fuerit executioni demandata, anno ela-  
pso, iurdictio eius delegata expirat: nisi fuisset dies prę-  
fixus iurisdictioni: quia tunc post terminum non posset  
iurisdictione sua vti amplius.

8 Quod si Princeps propriam sententiam per aliquem  
executioni mandari iubeat, & circa negotium fraus inter-



uenisse dicatur, executori de toto negotio cognoscendi facultas non erit, sed ad superiores quaestiones, si quæ inciderint, deferri oportebit. Aliquando enim executio ob diuersas causas suspenditur, quod facit pro illis, qui cupiunt eam euitare. Sed iudex deputatus super executione non habet cognitionem causæ, nec admittet exceptiones, quia merus executor est. Mixtus verò executor qui scilicet habet iurisdictionē & cognitionem annexam, potest cognoscere & determinare omnes exceptiones cōcernentes executionem. Sed si exceptiones directo veniunt contra sententiam Superioris, à quo delegatus est, & eam impugnant, vt exceptio nullitatis, tunc in ipso casu remittet eam ad superiorem, vt super illis pronunciet.

9 Cum autem regulariter contingat, quòd executio sententiæ ordinario demandetur, quæri poterit, an si ipsam iniustam esse cognouerit, executioni eam mandare debeat, an sit ei subsistendum potius? In qua specie responsum est, quod cum ordinarius delegato teneatur obsequi, licet sententiam non esse iustam nouerit, exequi nihilominus tenebitur, cum sibi non cognitio, sed executio tantum fuerit demandata: nisi à dato iudice impetrare valeat, vt ab hoc onere ipsum liberet. Nec enim debet iudicis delegati mandato violenter resistere: sed si nouerit sententiam esse nullam, vel præceptum nullum ipso iure, apud eundem instare poterit, vt executionem tandiu differri patiat, donec Principi rei veritas innotescat, & poterit mandato ipsius iniusto non parere, præsertim in causa criminali, vbi sententia est corporis afflictiva. Hinc est quod condemnato ipso inuito potest tertius appellare.

10 Sed quid si cum à sententia lata auctoritate litterarum Apostolicarum, in quibus inhibita fuerat appellatio, prouocatum fuerit, & literæ post appellationem ad alios iudices emanauerint, an ad mandatum posteriorum iudicum executio sententiæ à prioribus delegata retardari debeat? Et quidem cum Apostolicus alijs iudicibus appellationis causam ex certa scientia cōmittit, & appellationem

vide-

videtur recipere, & simul priorum iudicum reuocare iurisdictionem. Usque eò igitur sententiæ suspendetur executio, donec appellationis merita plenius discussa fuerint.

11 Dantur & alij casus, in quibus licet sententia in rem transferit iudicatam, differenda nihilominus erit executio vt puta, si non protelandi causa in integrum restitutio petita fuerit, quæ regulariter impedit executionem, & alij plures.

## T I T V L V S XXIII.

### *De Appellationibus.*

1 **C**VM sæpius litigantes in iudicio grauamen recipere soleant, partim ob iniquitatem, & partim ob imperitiam iudicum, ea propter in remedium, & defensionem oppressis contra iniquitatem iudicantium introducta est appellatio, quæ & iniuriam repellit & errores corrigit, & imperitiam sedentium pro tribunali detegit.

2 *Est autem appellatio, iurisdictionis prioris iudicis per Superioris inuocationem legitime facta suspensio. Vel appellatio est, prouocatio ad maiorem iudicem, ratione grauaminis illati, vel inferendi. Et debetur regulariter omnibus censi permissa, ex quo est defensio plures terminos suspensiuos continens.*

3 Potest dici & prouocatio, nomine magis generali, comprehendens appellationem & iudicalem & extraiudicalem. Sed dicitur interdum & relatio, quæ fit ex natura causæ, vt quia est aliqua causa maior, puta feudalis, de qua inferior iudex non potest cognoscere; nam tunc debet eam referre ad superiorem iudicem competentem. Reclamatio verò non est appellatio, sed quidam terminus generalis qui refertur ad sententias à quibus de iure non appellatur, vt in sententijs arbitrorum: & tunc reclamatio est idem, quod & reductio ad arbitrium boni viri. Reductio verò ad



arbitrium boni viri, est nouus actus suspensiuus, qui dicitur esse species appellationis; & potest peti vsque ad triginta annos.

4 Appellationum ergo duæ sunt species: aut enim extra iudicium appellatur, aut in iudicio. *Extra iudicium appellatur*, cum quis ante litis ingressum ab aliquo grauamine appellat, vt puta ab electionibus, postulationibus, prouisionibus, & quibuscumque extraiudicialibus actibus, ex quibus se grauatum putat; licet enim sæculares leges non nisi in casibus ante sententiam appellationem admittant, sacri tamen Canones etiam extra iudicium passim appellare permittunt: nec solent huiusmodi dici proprie appellationes, sed prouocationes. *Rursus in iudicio appellatur*, aut ante definitiuam sententiam, aut postea. Antea appellatur, vt cum ab interlocutoria, vel alio grauamine prouocatur. Postea, vt cum ab ipsa definitiua sententia appellatur.

5 Multum autem interest ab interlocutoria quis prouocet, vel alio grauamine, an à definitiua: nam primo casu, & causam appellationis in scriptis assignare (non enim sufficit quod quis viua voce appellet) & à iudice infra triginta dies instanter petere debet literas dimissorias (quas vulgò Apostolos vocant) & eidem intra dictum temporis spatium debent ab eodem iudice exhiberi, continentes & appellationis causam, & cur appellatio non sit admissa. Vel si appellationi forsan ex superioris reuerentia sit delatum. Alioqui si eos intra idem tempus appellans petere prætermittat, appellationi suæ renunciassè putabitur, etiam si vadat, aut mittat ad appellationem huiusmodi prosequendam.

6 Apostoli itaque vocantur literæ, seu instrumentum, quo iudex significat iudici superiori, ad quem pars appellauit, an detulerit, vel non detulerit appellationi; Vbi exprimit causam non solum declarationis vel non declarationis, sed etiam causam ipsius appellationis propter quam grauatum se esse dixit & appellauit.

7 Et sunt Apostolorum species quinque. Prima dicuntur Apostoli *Conuentionales*, quibus vel refutante vel tacente iudice, tam in iudicio quam extra iudicium pars aduersa euocatur ad iudicem superiorem; Quæ potest etiam petere quod appellans intra terminum iuris veniat cū omnibus actis vel monumentis ad curiam, vel mittat procuratorem instructum. Secunda specie dicuntur Apostoli *Testimoniales*, quia testificant de appellatione facta coram iudice, vel coram publicis & honestis personis. Tertia specie dicuntur *Dimissorij*, seu delatorij, per quos significat iudex, quod detulit appellationi, sicque appellante à sua potestate & iurisdictione dimisit. Quarta specie dicuntur *Reuerentiales*, quādo scilicet defertur appellationi propter reuerentiam superioris iudicis, quāuis causa non erat admissibilis. Vltimo dicuntur Apostoli *Refutatorij*, per quos apparet quod iudex non defert appellationi. Et iudex non deferens appellationi, in causa ciuili punitur iuxta Canones poena arbitraria; in criminali vero poena depositionis.

8 Quod si iudex, à quo appellatur, certum terminum appellanti ad recipiendos apostolos assignauerit, & appellans in assignato sibi termino non compareat, nec eos sibi tradi petat, appellationi suæ renunciassè putabitur. Idem, etsi iudex appellanti responderet intra iuris terminum, se daturum, nec intra dictum spatium congruo loco & tempore instanter, & sæpius saltem vno contextu petierit; vel sibi oblatos appellans recipere recusauerit.

9 Quod si iudex in termino per eum præfixo ipsos petenti non dederit; aut si dum peterentur, vel intra iuris terminum, vel nullo certo termino præfixo, se daturum, asseruerit, postea per appellationem congruo loco & tempore sæpius, & instanter vnico etiam contextu requisitus eos exhibere non curauerit, perinde propriam appellationem prosequi appellans poterit, ac si ei expressè fuissent apostoli denegati. Alia quoque agenda erunt prout ex tenore, tam Innocentianæ, quam aliarum constitutionum luculenter apparet.



10 In appellationibus autem à sentētia definitiua interponedis, nec causam tenetur reddere appellans, nec etiam supradicta diligens obseruatio per omnia sibi locum vendicat. Limitatur tamen hæc conclusio in quatuor casibus. *Primo* in appellatione à correctione, quia quamuis sit appellatio à definitiua, tamen est necessaria expressio causæ. *Secundo* in appellatione ab executione. *Tertio* in appellatione à sententia lata in causa commissa appellatione remota. *Quarto* in appellatione interposita à tertio à sententia definitiua propter suum interesse, quia nisi exprimat causam rationabilem, per quam appareat quod prætendit iustum interesse, non auditur. Potest esse & in sententia definitiua lata super causâ possessionis momentanea, quia requiritur expressio causæ. Aduerte autem quod cum in appellatione à definitiua non sit necessaria expressio causæ, cauere debes ne exprimas, quia si exprimeres friuolam causam, appellatio vitaretur.

11 Hoc quoque aduerte, quia in definitiua non est necesse appellare in scriptis, sed sufficit si appelletur viua voce dicendo, appello, & hoc scribatur in actis per Notarium. Quod tamen intellige si appellatur in continenti: nam si appelletur ex intervallo, & in definitiua, appellandum erit in scriptis.

12 Cum autem ex probabili causa ab interlocutoria, quis dixerit appellandum, talem tenetur proponere, quæ si probata fuisset, deberet legitima reputari, (appellatio enim ab interlocutoria non expressa rationabili causa est nulla) de quo postea superior cognoscet: nec enim sufficit appellanti probare, quod ex causa huiusmodi appellauit, si eam non doceat esse veram, nisi hoc se offerens probaturum non fuisset admissus.

13 Quod si iudex minus probabiliter appellatum esse compererit, appellantem ad inferiorem iudicem remittet, & in expensis alteri parti condemnabit: alioqui ipse procedet, nec licebit appellanti alias causas prosequi, quam quas in appellatione sua nominatim expressit.

14. Quòd si obijciatur non ex legitima causa ante sententiam appellationem interpositam, & propterea non admittendâ esse, nisi prius appellatione recepta, velut emissâ ex causa probabili, iudex superior cognoscere incipiat, ne procedatur inferiori prohibere non poterit.

15. Sed etsi iudex (tàm ordinarius quàm delegatus) sanè vsus consilio, ab eius executione destiterit, quod comminando, vel interloquendo in grauamen partis protulit, nec obstante, quod ab huiusmodi comminatione, vel interloquutione prouocatum fuerit, ne processus negotij friuolis occasionibus retardetur, in causâ cognitione libere procedere poterit.

16. Sed videamus, an ius dicenti obtemperare tenearis, à quo propter grauamen, quod tibi illatum afferis, appellaueris, si tibi is ad docendum de grauamine; & si de ipso liquerit, ad eiusdem reuocationem audiendam, terminum præfixerit. Et sanè cum ad ipsum à iudice perspiciendum sit, nec coram eo de grauamine docere, nec etiam tanquam coram iudice (cum per appellationem eius suspensa sit iurisdictio) comparere teneberis.

17. Quod si tantum, vt reuocationem audias, te vocandum duxerit, licet non compareas, ipse tamen in termino grauamen reuocauerit, in causa procedere poterit, ac si appellatio nunquam fuisset interposita. Hinc est, quod licet appellans non possit suæ appellationi renunciare inuito appellato, iudex tamen reuocando grauamen potest facere, quod appellans renunciaret suæ appellationi, appellante & appellato inuito.

18. Ac veluti in potestate iudicis grauamen reuocantis positum est, non obstante appellatione causam resumere; sic contra, si is, qui vocem appellationis emisit, cuius adhuc nemini est demandata cognitio, petierit, vt ad iudicem à quo prouocauit, rursus causa remittatur, id ei alterius partis contradictione minimè obstante indulgendū erit. Sed hoc ita, vt in legitimis expensis aduersario, quas eum propter hoc fecisse constiterit, condemnetur.



19 Non omnis ergo appellatio indistinctè recipienda erit; nam si adeo sit vaga & generalis, vt incertitudinem afferat, siue quod omisso medio sit interposita, à parte opponatur, causa non deuoluetur. Idem iuris est, si super notorio crimine, vel de quo quis in iure confessus fuit, prouocetur: nec enim ad defensionem iniquitatis, sed ad præsidium innocentiae est appellationis remediū institutū.

20 Et ideo nec Regulares, cum pro aliquo excessu corrigendi fuerint, contra regularem Prælati sui, vel capituli disciplinam appellabunt; sed quod sibi pro salute iniungitur humiliter suscipient. Alias non euaderent notam transgressionis obedientiae. Secus si excederetur modus in illis coercendis.

21 Sed nec tunc appellationi deferendum erit, cum à sæculari iudice, qui temporali Sedis Apostolicæ iurisdictioni nō subiicitur, ad Apostolicum appellatum fuerit; & alijs quibusdam casibus plurimis, puta à mandato de residendo in loco beneficij: à lata sententia contra administratores piorum locorum. Item petita reductione laudi ad arbitrium boni viri coram iudice ordinario, non datur appellatio à sententia tali, quia iudex procedit tanquam arbiter, & persona subrogata loco arbitri. Nec admittitur appellatio ad impediendum absolutionem ab excommunicatione. Similiter quando timetur de dilapidatione fructuum, potest iudex etiam pendente appellatione fructus sequestrare. Etiam non admittitur appellatio à sententia lata super præstatione alimentorum. Et in nonnullis casibus non admittitur appellatio ad finem retardandi executionem. Alioqui is qui legitimæ appellationi etiam de minima causa interpositæ non detulit, canonicis poenis coercendus erit.

22 Licet autem prouocatione canonicè à partibus interiecta, iudicis à quo appellatum fuit, officium in illa quidem causa penitus conualescat; si tamen is, qui ab ordinario appellauit, super alia causa coram eodem conueniatur, præsertim pro graui & manifesto crimine, (vt si

vxorem alterius detineret, vel si manus violentas in clericum iniiceret) appellationis obtentu, quo minus canonica censura puniatur, effugere non potest. Nam appellatio iurisdictionem non suspendit, nisi respectu causæ, in qua fuit appellatum.

23 Interposita ergo à definitiua sententia appellatione, non solum post eam innouata debent per iudicem appellationis penitus & ante omnia reuocari (exceptis tamen casibus, in quibus iura post sententiam prohibent appellare) sed etiam ea omnia, quæ medio tempore inter sententiam & appellationem contigerit innouari, perinde ac si post appellationem innouata fuissent.

24 Illa vero quæ post appellationem interpositam ante definitiuam sententiam innouantur, donec appellationis causam veram esse constiterit, reuocari non debent. Nisi iudex appellationis, postquam sibi constiterit, per appellationem emissam ex causa probabili fore ad se negotium deuolutum, inhibeat canonicè iudici à quo appellatum fuit, ne procedat. Tunc enim quicquid post inhibitionem huiusmodi fuerit innouatū, est per appellationis iudicem ante omnia in statum pristinum reducendum; licet eandem causam, non esse veram contingat. Si autem aliquid attentaretur à tertio, qui non fuit pars vel iudex in causa illa attentata, non reuocatur per modum attentati à iudice ad quem appellatum fuit, sed per suum proprium iudicem cognitio de causa seruato iuris ordine fieri debet: nisi ille tertius per attestationem illam, iurisdictionem iudicis impediret.

25 Appellasse autem dicetur non solum is, qui vocem appellationis emisit, sed etiam qui aliquo indubitato facto prouocandi propositum declarauerit. Vnde rescriptum est, cum, in quem post iter ad Sedem Apostolicam arreptum (vel ad quemcunque Superiorem) excommunicationis sententia ab ordinario promulgata fuerit, excommunicationis vinculo non teneri, quasi appellatione pendente lata fuerit, cum plus sit facto quam verbo prouocare.



26 Idem & in eo responsum est, qui licet ex simplicitate forte verbum appellationis non expreſſerit, se tamen & Ecclesiam suam cum molestaretur &c. Romani Pontificis reſtioni subiecit. Vbi enim ad certum actum explicandum non est præfixa verborum solemnitas, sufficit exprimere effectum rei, licet non exprimantur propria verba actui conformia, quia verba deferuiunt intentioni.

27 Is quoque, quem quominus appellaret iustus metus impedierit, ad appellationis beneficium conuolasse, reputabitur, dummodò infra tempus quo licite prouocatur coram iudice, à quo appellasse vellet: vel si ipsius copiam habere nequierit, coram probatis viris (qui plures esse debent) contestatione super hoc proposita, causas appellationis expreſſerit.

28 Quod si à pluribus iudicibus appellandum fuerit, quia non semper facile eorū præsentia simul haberi posset, coram maiori parte ipsorum appellare, & Apostolos separatim petere licebit: valebitque hæc appellatio perinde, atque si coram omnibus interposita fuisset. Victus tamen subsequutorū (scilicet appellationis delationis, & termini præfixionis) appellato ignoranti intimatio legitime facienda erit.

19 Idem ex contrario, si plures vna sententia cōdemnati fuerint, & vnus solus ad appellationis beneficium conuolauerit, istius victoria cæteris quoque suffragabitur, si communi iure iuuentur, idemque negotiū & eadem causa defensionis existat.

30 Iam dubitari poterit: si ex pluribus articulis vnus precibus comprehensis in vno tantum contingat appellationem vetari, vtrum appellatio teneat, si super alijs prouocatum fuerit. Et cum delegantis hæc sit intentio, vt de omnibus articulis qui in precibus ponuntur, iustitia suum consequatur effectum, in omnibus appellatio interdicta intelligitur. Vnde nihil intererit (vtrum appellatio inhi-beatur in primo, an in secundo, in medio, an in fine.

31 Sed hoc ita intelligi oportet, si capitula connexa  
fue-

fuerint, cæterum quoties clausula, per quam appellationis remedium tollitur, in medio literarum ponitur, si sunt plura negotia, si minimè contingentia, tantum præmissa completitur: nisi fortè & in fine literarum prædicta clausula iteretur.

32 Interdum etiam non obstante prohibitione appellare poterit, ut decretum est in eo, qui per delegatos iudices in iudicium ad locum non tutum vocatus fuerit. Nisi enim locum idoneum iudices assignent, non erit propterea appellationis remedium interclusum, quo *appellatione remota* procedi debere mandatum erit.

33 Idem etiam obtinet cum sententia fertur iniqua: licet enim causa appellatione remota, commissæ fuerit, sententiæ tamen stare non debet, si iniquitatem continet manifestam; puta quia lata est contra ius scriptum, scilicet leges, vel canones.

34 Illud tam iudiciali appellationi, quam ei, quæ extra iudiciū interponitur, cōmune est, quod huiusmodi appellantis annus, & ex iusta causa biennium, à die appellationis interpositæ indulgetur, quo temporis spatio, & proficui, & finire appellationis causam compellendi erunt: alioquin si per negligentiam appellantis hoc temporis spatium fluxerit, adeo causa deserta censebitur, ut etiam si appellans ipse cum appellato, aut appellatus etiam per se, & principaliter prosequatur, non propterea minus in rem iudicatam censebitur transisse sententia, à qua fuerit appellatum.

35 Quamdiu tamen per compromissum, vel alias, de partium expresso consensu differtur prosecutio, tempus ad prosequendam appellationē ab homine, vel à iure præfixum, minimè currit appellanti: nisi forte iudex, ex dilatione periculum imminere (ut in causa electionis & spiritualis matrimonij) videns, in illa procedi præciperet.

36 Et licet anni, vel bienij spatium appellantis indulgeatur, poterit tamen iudex à quo, secundum locorum distantiam, personarum, & negotij qualitatem recisius



tempus moderari, intra quod, si is, qui appellauit, causam appellationis non fuerit prosequutus, tenebit sententia. Coget ergo iudex partes appellatione non admissa, vt vel appellationem interpositam prosequantur, vel coram eo iuris pareant equitati.

37 Superior quoque iudex, si ex dilatione viderit imminere periculum ( ne scilicet Ecclesia in spiritualibus vel temporalibus ex mora incurrat detrimentum ) potest & debet neutro appellationem prosequente, vt periculū cuitetur occurrere; puta, si à sententia lata super confirmatione alicuius electi prouocatum fuerit, & vtraque pars velit etiam ad annum appellationis prosecutionem differre, potest vtrique, immo debet is, ad quem appellatum fuit, proinde terminum moderari, ne diu gregi Dominico cura pastoris desit.

38 Accidit tamen aliquando, vt non per annum, vel biennium, sed etiam vltius causam appellationis alicui prosequi concedatur: vt puta, si quem per impotentiam prosecutionem omisisse constiterit, vel cum iudici ex proprio officio super causa electionis etiam lapso biennio cognoscere conceditur.

39 Pars quoque interdum sibi prosequendæ appellationis terminum præfigit. Sed cum hoc gratia litium citius expediendarum indultum fuerit, iuris terminus à parte præueniri non prorogari poterit, sicut nec in vna causa tertio prouocari licebit.

40 Postremo sciendum est, quod si sententiam appellatione suspensam, antequam ipsius appellationis causa commissa fuerit, vel laudum contra iuris, vel compromissi formam latum, apostolico rescripto in forma cōmuni confirmari obtentū fuerit, talis confirmatio, nec appellationi præiudicium afferet, nec inuolidum laudum vllō firmatum robore muniet. Nam etiam si ante sententiam litigiosa rei cōfirmationem ab Apostolica Sede quis impetrauerit, non propterea minus de causa poterit iudex cognoscere, & eam sine debito terminare. Quanquam si rem pacifice quis posse-

possedisset, cum inde confirmationem obtinuit, non erit licitum iudici de quæstione postmodum exorta absque mandato Sedis Apostolicæ decernere: nisi certum sit, quod per falsi suggestionem fuerit elicitæ, non facta mentione de litigioso.

41 Confirmatio autem data à Superiore quandoque multum tribuit noui iuris, vt confirmatio electionis, nam tribuit potestatem administrandi: quandoque ius vetus cōfirmat & consolidat, maxime apponendo clausulam *ex certa scientia*, nam tunc inferior iudex non potest cognoscere, vtrum iuste possideas, nec ne? quandoque operatur maiorem effectum, nam si iste non possidebat, incipit iam iuste possidere; vnde solet Papa clausulam apponere. *Supplens de plenitudine potestatis omnem defectum &c.* & sic inualidum facit validum.

## T I T V L V S XXIV.

### *De Restitutione in integrum.*

1 **T**Ractatum de iudicijs spiritualium personarum ciuilibus concludere volentes, titulum vltimum de restitutione in integrum apponimus: pro cuius intelligentia, tria sunt breuiter videnda. primo quid sit restitutio in integrum, secundo quotuplex sit, & tertio quibus personis competat & locis.

2 *Restitutio igitur in integrum nihil aliud est, quam in pristinum statum repositio.* Et dicitur restitutio, quasi iterata statutio, renouationem prioris status causæ, vel personæ importans: v.g. quando quis eiectus de loco, vel proscriptus iterum restitutus stat in suo loco & possessione.

3 Et est duplex restitutio eiusmodi. *Prima*, qua totaliter status pristinus innouatur, & dicitur in integrum, cum redditur possessio rei, aut æquipollentis. & fructus, & ius pristinum & audientia & omnia. *Secunda restitutio est*, qua prior status non reuocatur in totum, sed in parte satisfat



de re ablata, & damnò, ac interesse: & significatur aliquando nomine redditionis, & aliquando nomine satisfactionis. Vtraque autem eiusmodi restitutio, aut à iure conceditur; aut per gratiam fit, cum per supplicationem impetratur. De vtraque igitur videamus, cui concedatur, quando, intra quantum tempus, quoties, & coram quo iudice.

4 Qui itaque appellationis remedio destituti sunt, his interdum extraordinarium subsidium à iure conceditur, & auxilio restitutionis in integrum succurritur. Sed nec omnibus, nec semper, nec ab omnibus. Verum minoribus tantum, Ecclesiæ, Collegijs, Hospitalibus, Congregationibus, Vniuersitatibus, & alijs pijs locis approbatis ab ordinario, quorum bona reguntur per syndicos & administratores. Item personis miserabilibus, vt sunt pupilli, viduæ, & lecto perpetuo adhærentes: hi si se prolatione sententiæ grauiter læsos conquerantur (pro modica enim læsione nō datur restitutio in integrum) & appellandi tempora iam effluerint, restitutionē in integrum implorare poterunt.

5 Quod quidem adeo obtinet, vt etiam si ab Apostolico sententia lata fuerit, non propterea magis in integrum restitutionis petitio impediatur. Nec enim negatur Romanæ Sedis sententiam in melius posse commutari, cum aut surreptum aliquid fuerit, aut ipsa pro consideratione ætatum & temporum, seu grauium necessitatum aliquid ordinauit.

6 Sed & si non sententia, sed vel contractu, vel confessione, vel probationis omissione, vel temporis fluxu Ecclesia læsa fuerit, restitutio indulgenda erit: nec solum contra priuatos homines, sed etiam aduersus aliam Ecclesiam, licet Prælatus iuret non repetere, vel non conuenire in cōtractu damnofo Ecclesiæ, etsi contraueniendo deieret, Ecclesia tamen eodem parente, vel alio, ex iudicis officio restituitur.

7 Siue autem sententia, siue cōtractu, vel aliter se læsam prætendat Ecclesia, & propterea se ad beneficium restitutionis in integrum admitti postulet, si quadriennij spatium  
à die

à die læsionis lapsum fuerit, amplius restituenda non erit: nisi præuaricationis vel manifestæ fraudis probetur super hoc interuenisse commentum: aut alia causa subsit, quæ iudicem ad hoc beneficium concedendum mouere debeat. Et si tempore læsa asseratur, non fiet institutio, nisi ad tantū temporis, in quantū se læsam esse legitimè probauerit.

8 Quod si semel restitutio in integrum in alio iudicio denegata fuerit, præter quam ad appellationem omissam, non erit eidem amplius concedenda, (alias nullus esset litium finis) nisi nouis defensionibus (quæ enim de nouo emergunt, nouo indigent auxilio) ad huiusmodi beneficium admittenda fuerit.

9 Mulieri attamen, fisco, minori, Ecclesiæ, & locis pijs, conceditur de iure bis restitutio in integrum: & si iudex denegaret primum & secundum beneficium, vbi esset concedendum, de iure posset appellari.

10 Huiusmodi vero restitutionem causæ solum coram iudicibus ordinarijs administrationem habētibus, vel delegatis ab eis (maxime autem à Principe) tractari poterunt & terminari; siue hoc ipsis delegatis specialiter demandatum fuerit, siue commissio eis negotio huiusmodi quæstionem incidere contingat. Delegati vero ab ordinarijs, qui administrationem nō habent, sed tantummodo iudicandi facultatem, siue arbitri, de his causis cognoscere nequeunt: nisi coram eis incidenter motæ fuerint.

11 Per supplicationem quoque Principi porrectam, aut per querelam, appellationis remedio destituti subueniri solet. Erit autem supplicatio intra decem dies post sententiam offerenda: quo subsecuto, sententia non aliter executioni mandabitur, quam si victrix pars idoneam fideiussionem præbuerit tantum restituendi, cum legitimis augmentis, & fructibus, quantum fuerit in condemnatione; si legitima retractatione sententia resoluatur.

12 Et nisi sub hac forma supplicatio porrigatur, executio sententiæ sine fideiussione procedet, retractationis iure illi seruando, qui se grauatum putauerit, vt intra  
bien-



biennium supplicare valeat. Vnde hoc remedium querelæ, tam in iudicialibus quam in extraiudicialibus competit; & si iudex tardaret expeditionem causæ, licet ab hac tardatione non possit appellari, poterit tamen querelari.

## LIBER SEXTVS.

*De Iudicijs criminalibus ad forum ecclesiasticum spectantibus.*

### TITVLVS I.

*De accusationibus, denunciationibus, & inquisitionibus.*

**I** **D**E iudicijs priuatis seu ciuilibus doctrina explicata, restat videndum de iudicijs publicis, quæ circa delicta seu crimina versantur. Nam etsi leges Pontificiæ poenarum atrocitatem exhorreant, quibus præsertim de sanguine & vita hominis agitur, non tamen ita indulgentes se præbent, vt velint criminali omnino delinquentibus cōdonare; sed vt qui deliquerunt, discant talia post hac non committere, & cæteri poenarum metu, & eorum exemplo, qui dignis supplicijs sceleribus suis debitis affecti sunt, ad scelera patranda nō sint procliuēs; certas poenas adinuenerunt, quæ in fontes pro delicti qualitate, citra sanguinis vindictam, aut membri debilitationem exerceri possint. Et quia in iudicio criminali hæc tria potissimum considerantur, modus agendi, delicta, & poena delictorum: propterea titulo præsentis modum agendi criminaliter in primis describendum esse putauimus; quia criminalia iudicia nihil ferme simile habent cum cæteris iudicijs, de quibus proxime locuti sumus, magnaque diuersitas eorum est, & in instituendis, & in exercendis, quia

quia in ciuilibus agitur, vt aliquid detur aſtori, in criminalibus autem vt puniatur accusatus. Inſtituuntur autem iudicia criminalia aut per accusationem, aut per denunciationem, aut per inquisitionem.

2 Accuſatio itaque nihil aliud eſt, niſi delatio rei de crimine in libello ad vindictam. Ne autem accuſando detur occaſio infamandi viros honeſtos, ideo in delationibus huiusmodi legitime procedendum eſt, vt ſemper accuſationem ſolemnis inſcriptio præcedat: Denunciationem, verò charitatiua monitio.

3 In primis igitur accuſatio debet fieri in ſcriptis (niſi crimen ſit leue, aut notorium, quod nec accuſatorem requirit) licet crimen ſit manifeſtum. Deinde cum inſcriptione, quod ſcilicet accuſator ſe obliget *ad pœnam talionis, ſi in probationibus defecerit*, (quod hodie de conſuetudine non ſeruatur, quia multi metu ſubſcriptionis retrahebantur ab accuſando, quod maximè Reipublicæ incommodum adferebat, cuius maximè intereſt, vt delicta puniantur) tantummodo ad correctionem: accuſatio verò inſtituitur ad deſiſtentionem.

4 Accuſator igitur, ſi legitimis deſtitutus ſit probationibus, eam pœnam debet incurrere, quam ſi probaſſet, reus ſuſtinere debebat. Denuncians verò, licet ad talionem non teneatur; ſi tamen in probatione deficiat, donec ſuam purgauerit innocentiam, ab officio, & beneficio ſuſpendendus erit, vt cæteri ſimili pœna perterriti ad aliorum infamiam facile non proſiliant.

5 Tribus autem modis accuſatio redditur iniuſta. Primo *calumniando*, quando ſcilicet falſum crimen imponitur, & talis præter pœnam talionis de omni damno illato tenetur. Secundo *tergiuerſando*, quando ſcilicet accuſator in totum à lite reſceſſit, ſine licentia Iudicis: & tunc punitur quinque libris auri. Tertio *præuariando*, quando ſcilicet cum reo colludit adiuuans partem aduerſam, falſas probationes adducendo, veras diſſimulando: & talis arbitrio iudicis punitur.



6 Denunciatio quoque triplex est. *Prima iudicialis*, quando iudex non ex mero officio, sed ex denunciatione facta inquit in iudicio. *Secunda Evangelica*, quæ non eo sine sit, vt aliquis puniatur, sed vt emēdetur. *Tertia vero Canonica*, quæ secundum statuta, ac leges Ecclesiasticas priuata, & publica crimina punit. Sed denunciationis faciendæ potestas non omnibus patet, sicut neque accusationis: quare nec publicè concubinas habentes; neque excommunicati ad denunciandum admittuntur. Deficiente tamen denunciatione, vel accusatore, non prohibetur iudex ex suo officio inquirere ad vtilitatem Reip. in delicta perditorum hominum, & providere ne maleficia impunita manerent.

7 Per inquisitionem itaque criminale iudicium instituitur, cum præcedente diffamatione, ac quasi denunciante fama, de crimine iudex inquit. Constitutum est enim, vt criminum facilis nimis sit obiectio, vt sicut accusationē legitima præcedere debet inscriptio, & denunciationē charitativa monitio, ita & inquisitionem clamorosa insinuatō præcedere debeat.

8 Cessat autem inquisitio, quando adest accusatio, quia accusatio est remedium ordinarium, inquisitio vero extraordinarium fama præcedente formatum. Si quis tamen, postquam coram eo, qui contra ipsum super certis criminibus inquisitor deputatus fuerat, eadem crimina confessus fuerit, frustra postmodum eo prætextu confessionem suam impugnare cōtender, quod super eisdem criminibus non fuerit antea diffamatus.

9 Idem etiam erit, si is cui contra te commissā super certis criminibus fuerit inquisitio, te præsentē, nec quidquā super hoc excipiente infamiae inquisitione omīssa, ad veritatem eorundem criminum inquirendam processerit. Nec enim processum huiusmodi, eo quod non fuit de infamia primitus inquisitum, vltius impugnare poteris.

10 Non potest quisquam accusatus procuratorem dare, qui causam eius nomine suscipiat defendendam, sed ipsummet

summet accusatum in iudicio esse, & causam per se dicere oportet. Cōceditur tamen, si absens sit, absentiae ipsius causas per procuratorem proponi, aliasque excusationes quae ipsum crimen, cuius causa ei sit negotium, non attingant.

11 In accusatione vero hoc seruatur inconcusse, vt si legitimus non fuerit accusator, non fatigetur accusatus. Nec laico Clericum accusare cōceditur: nisi suam, vel suorum iniuriam prosequatur, quibusdam articulis, quibusdamque criminibus exceptis, puta in crimine Simoniae, Hæresis, & læsæ Maiestatis, & similibus. Nec conceditur super iisdem criminibus quempiam sæpius, vexari, sed semel absolutus deinceps amplius de eodem crimine molestiam pati non cogitur.

12 Vbi tamen per inquisitionis tramitem proceditur, secundum personæ merita, & qualitatem excessus poena debet iudicis arbitrio moderari: in qua tamen moderatione facienda plures erunt cautiones iudici considerandæ, ne homines innocentes citra aliquam eorum noxam, capitis, fortunarum, aut existimationis discrimen, alicuius impij, & scelerati hominis impudenti audacia subire, & de statu suo conflictari permittantur:

13 Quod si ex his criminibus aliquid delatum fuerit, quæ ordinis suscepti executionem impediunt, etiam post peractam poenitentiam: Vel ex his, quæ beneficij retentionem impediunt. Puta, si homicidium commisisset, vel adeptus esset ordinem, aut beneficium vitio Simoniae, tunc nullus iudicis arbitrio his casibus locus esset: quia, certa tunc erit poena, quæ non iudicis voluntati mandatur, sed legis authoritati reseruatur: Et hoc casu est eodem modo, quo in accusationis tramite procedendum: propterea, quamuis per inquisitionem conuictus sit, certam tamen poenam expectabit, nempe vt ordinis executione, vel beneficij retentione priuetur, quas poenas Iudex moderari non poterit.

14 Accidit autem interdum, vt alicui nec accusando, nec denunciando, nec inquirendo, sed excipiendo crimen oppo-



natur : vt puta, eum quid obijcitur , vt quis ab accusatione, vel testificatione repellatur , quo casu non erit inscriptio necessaria . Et quia cuilibet quantumuis criminoso referuatur defensio legitima, ideo contra excipientem de crimine potest replicari de alio crimine, ad effectum remouendi reum ab exceptione .

15 Sed an , si propterea crimen opponatur , vt quis à promotione officij , vel beneficij asscutione excludatur , necessaria tunc sit inscriptio ? Et proditum est, si ante confirmationem obijciatur, non cogi quemquam inscribere : quia crimen hoc modo probatum promouendum quidem impedit , non tamen iam promotum deijcit . Post confirmationem vero, cum scilicet ordinandus fuerit aliquis, aut etiam consecrandus, quia & ab obtinendo repellit, & ab obtento deijcit , & extraordinariam poenam secundum arbitrium iudicis, circa vinculum inscriptionis , si defecerit in probando, est excipiens adstringendus .

16 Illud generaliter est obseruandum , vt nemo absens iudicetur ; nisi ex contumacia absens fuerit, quia diuinæ, & humanæ leges hoc prohibent . Item nemo de suspicionibus damnari debet, cum satius sit impunitum relinqui facinus nocentis, quam innocentem damnari .

17 Nec omittendum est , quod criminales causæ non Decani, Archidiaconi, aut aliorum inferiorum iudicio, etiã visitando, sed Episcopi tantum examini, & iurisdictioni relinquuntur, vt Sancta Synodus Tridentina sub Pio Quarto constituit: etiamsi in præsentia inter Episcopum, & Diaconum, seu Archidiaconum , aut alios inferiores super causarum ipsarum cognitione lis aliqua in quacumque instantia penderet .

## TITVLVS II.

*De duplici purgatione.*

1 **C**VM ex delicto in iudicio legitimè alicui obiecto, non ramen concludenter probato, cōtrahatur infamia, quæ de iure vnicuique est nociua: sæpiusque contingat, vt quis labore publica infamia alicuius criminis, licet aduersus eum, nec accusator cōsistat, nec testibus, aut propria confessione sit conuictus; propterea qui putatur esse criminofus eiusmodi infamiam euitare cupiens, debet *de obiecto crimine* de iure purgari.

2 *Est autem purgatio demonstratio innocentiæ super obiecto crimine: diciturque esse duplex, alia vulgaris, alia canonica. Vulgaris purgatio est, quam vulgus inuenit, & sequitur interdum. Vt cum quis, aquæ frigidæ, vel candentis ferri, vel sclopeti explodendi, vel singularis certaminis, subit iudiciū, quæ singula sunt prohibita ab Ecclesia, quod Deus per ea tentari videatur. Canonica vero purgatio est, quæ sacris Canonibus est comprobata, vt cum de crimine infamatus iurat se non esse tali crimine, vel macula inquinatum. Et certa compurgatorum manus eundem à crimine immunem, & vtrum credere illum iurasse, ipsa quoque iureiurando firmat.*

3 Erunt autem compurgatores huiusmodi honestatis, & opinionis, vt verisimile sit eos amore, vel odio, vel obtutu pecuniæ non deierare. Necesse etiam est, vt eius quem purgare intendunt, vitam & mores notos habeant. Compurgatores itaque pro Episcopo debent esse duodecim; pro Sacerdote vero pauciores, iudicis arbitrio.

4 Religiosus accusatus si deficit in purgatione, nō punitur à suo Prælato vt conuictus: sed ob violentam præsumptionem poena tunc arbitraria plectitur. In hæreticis vero conuersis, seu apostatis non est arbitraria poena, sed etiam omnino adhibere debent circumspecti Inquisitores abiuratione præmissa.



5 *Est autem abiuratio recessus ab aliquo reatu, cum iuramento de non redeundo ad eundem vomitū, seu lapidem: & sic hæresum detestatio per abiurationem facta, facit pro innocente accusatum; non dicitur sententia definitiua, sed satisfactio poenitentialis, & absolutio à poenis.*

6 Notandum vero est, quod delictum notorium, æquiparatur cum delicto confesso, vel conuicto, tam in cōdemnando, quàm etiam in iudicando. Infamatus quoque, cui indicta est canonica purgatio, cum non poterit se purgare, habebitur pro conuicto, & æquiparabitur criminoso notorio. Super notorio vero nulli erit indicenda purgatio, sed tantum condemnationis promulganda sententia: Cū patratī sceleris euidētia, neque accusatoris clamore indigeat.

7 Criminum autem, quædam diuinæ Maiestatis læsionem continent, quædam vero & hominibus damnum irrogant. Quæ Deum principaliter lædunt, habentur numero septem, scilicet Simonia, Hæresis, Schisma, Apostasia, Sacrilegium, Maledicentia, Sacrilegium. Quæ vero hominibus læsionem inferunt sunt numero octo, Homicidium, Adulterium, Stuprum, Rapina, Furtum, Vrsura, Falsum, Iniurium, de quibus singulis distinctius, sed tamen breuiter videamus.

## TITVLVS III.

### *De Simonia.*

1 **P**OST explicationē modi criminaliter agendi, restat tractare de ipsismet delictis, atque primò de illis quæ principaliter lædunt Diuinam Maiestatem. Inter hæc autem cum Simonia gravissimum censeatur esse crimen, adeo ut cætera quamuis alioqui grauiora, huic tamen comparata leuia æstimentur; propterea ad intelligentiam eius deformitatis ante omnia titulo præfenti, quid, & vnde sit dicta Simonia disquiremus; deinde quo-

quomodo diuidatur, & in quibus rebus committatur considerabimus: atque demum certa dubia circa poenam, & accusationem illius videbimus.

2 *Est itaque Simonia*, studiosa voluntas, siue cupiditas emendi, vel vendēdi spiritualia, puta ordinis Sacramēti, vel spiritualibus annexa ( ius percipiendi fructus, vel ius patronatus. ) Vel Simonia est rei spiritualis, vel spiritualibus annexæ cum aliquo temporali facta commutatio. Appellata est autem à Simone Mago, qui primus huius detestandi sceleris auctor à Petro Apostolo acri fuerat obiurgatione repulsus, cum ab eo pecunia gratiam Spiritus sancti redimere tentasset.

3 Duplex autem est Simonix species, alia Conventionalis, & alia Mentalis. *Conventionalis est*, cum aut aliquid datum est, vel de dando in posterum tractatus intercesserit. *Mentalis est*, cum nullum quidem intercesserit factum, sed sola praua dantis, aut recipientis mens, & intentio concurret dandi, vel faciēdi aliquid, vt donum aliquod Diuinum assequatur. Sæpe enim contingit homines ambitione tractos, immensa, & vasta quadam honorum, & beneficiorum Ecclesiasticorum siti omnia tentare, quæ sibi in mentem modò venire possunt, vt suis desiderijs satisfaciant, & nunc precibus, nunc precio, nunc alijs vijs aggrediuntur, vt quæ gratis esset concedenda, nec nisi benemeritis conferenda spiritualium administratio, quouis modo ad commodam suam extorquere possint. Propterea in huiusmodi labe purgandam nunquam se stertere, nunquam se conuiuerē Pontifices Romani, & Canonice leges ostenderunt. Omnia quantum potuerunt remouētes, quæ huic nefandissimo sceleri causam, vel occasionē præbere posse videbātur: nonnulla etiā introducentes, quibus cōprimi, & coerceri, saltem panē Episcopalis metu possent, qui æternam poenam floccifacerent.

4 Item Simonia duplex est, alia contra religionem infusam, & alia contra religionem acquisitam. *Ilia de iure diuino, & naturali prohibita est*, ex quo est contra donum, & excellentiam doni Diuini, quod gratis nobis è cœlo datur,

& si



& si pretio temporali vellet aliquis donum illud possidere, faceret contemptum, & vilipendiū doni diuini, quasi Deus per pecuniam esset inducendus ad concedenda nobis sua dona. Hinc Petrus Apostolus Simoni Mago dixit, Pecunia tua tecum sit in perditionem, quia donum Dei existimasti pecunia possideri. *Ista iure tunc Ecclesiastico prohibita est,* vt venditio officiorum, & beneficiorum Ecclesiasticorum, exactio pro administratione Sacramentorum, & Sacramentalium. Res enim quæ ex consecratione proueniunt, venales esse non debent. Igitur precium accipiens pro cōsecratione Ecclesiæ, altaris, aut Monialis grauissime peccat, & Simoniam committit. Similiter Episcopus qui oblique per viam Notarij exigeret aliquid ratione ordinis collati à literis testimonialibus, & acciperet partem, Simoniam ex denunciatione Concil. Tridentini committeret. Item nec minister, nec Notarius in ordinatione, aut visitatione pro voce, vel calamo pecuniam recipere debent.

5 Contrahitur enim Simonia non modò cum pecunia ipsa pro re sacra datur, aut recipitur: vel de danda & recipienda tacitè, vel expressè conuentum fuerit: verum etiam cum dans à lingua, vel ab obsequio recipientis munus exigit. Cum tamen spiritualia tribuens manus ab omni munere excutere debeat: id tunc facere<sup>b</sup> intelligitur cum pro diuinis rebus non solum pecuniam nullam, sed nec humanum obsequium, aut gratiam aliquam requirit.

6 Pecuniæ vero appellatione continetur quidquid homines habent. Contrahitur ergo Simonia cum quis sacra quodammodo in commercium deducit, & à baptismo, aut confessione non solum pecuniam à fidelibus exigit, sed etiam pullos, columbos, aut victualia cuiuscumque generis. Similiter Simonia committi dicitur cum ab instituendis Sacerdotibus, aut à sepeliendis mortuis, aut pro nubetium benedictionibus aliquid accipitur. Huius quoque criminis reus est, qui pretio, vel gratia peccatorem publicum cecarit: vel minime pœnitentem reconciliarit, aut è conuerso verè pœnitentem reconciliare detrectarit.

7 Is quoque, qui pro electione præmia largitur, quia per electionem peruenitur ad consecrationem, perinde, Simoniacus habebitur, ac si pro consecratione munera dedisset. Nec distinguemus, sciente an ignorante eo, qui promissionis, vel dationis alterius interuentu postmodum electus fuit, promissum quid vel datum fuerit: quamuis enim electus tempore dationis, vel promissionis conscius non fuerit, non propterea minus electio rei probanda erit.

8 Episcopus non potest dispensare cum electo simoniace, licet ignoranter: sed bene super assertionem beneficii simplicis, præuia tamen resignatione. Datum vero in dispendium eligendi, vel illo etiam reclamante, non facit electionem simoniacam.

9 Simonia committitur, si in conferendis beneficijs per concursum aliquis existimans se cæteris digniorem, daret aliquid electoribus, timens ab eis reijci. Similiter Simonia est dare munera alicui, ut suadeat alteri, ut det ei beneficium. Item dare patrono, ut præsentet. Item consentire in pensionem, ut beneficium possideas, vel resignare beneficium, ut pensionem recipias ab eo, sine autoritate Papæ. At vero Simonia non est renunciare beneficium in fauorem alterius, præsertim si Ecclesiæ utilis esse potest.

10 Sed ut varijs modis Simoniacæ labes committitur, sit etiam varijs poenis Simoniacos percelli admonendi sumus. Nam si quis ut ordinetur pecuniam Episcopo obtulerit, & qui turpissimi lucri commodo sancti Spiritus gratiam vendere tentauerit, amissionis proprii gradus periculo subiacebit. Et qui ordinatus est, à dignitate, quam pecunijs acquisiuit, erit prorsus alienus. Si quis vero tam turpibus, & nefandis datis, vel acceptis mediator extiterit, siquidem clericus erit, à proprio gradu deijciendus: si vero laicus, anathematizandus erit.

11 Hæc tamen de illis intelligere nos oportet, quos nec ignorantia, nec attræctationis excusat violentia, sed Simoniaci simoniace ordinati, vel ordinatores existunt. Cæterum, si quis à Simoniaci quidem, non tamen simoniace

ordinem susceperit: aut simoniacè non simoniacus ordinẽ contulerit, misericorditer in Ecclesia sustinendi erunt: hos enim facit Simoniacos non reatus criminis, sed ordinatio, vel susceptio simoniaci

12 Quod si non ordinem quis, sed beneficium Ecclesiasticum data pecunia cõsecutus fuerit, multum interest per accusationem, an per inquisitionem quis conuictus fuerit. Primò enim casu non solum Ecclesia priuandus, verum etiam honore Sacerdotij presbyter spoliandus erit. Posteriore vero postquam ab Ecclesia, quam sibi per pecuniam comparauerat, amotus fuerit, & iniunctam pœnitentiam egerit; in susceptis ordinibus ministrare permittendus erit.

13 Quinimmo, qui paruuli parentum cupiditate Ecclesias per pecuniam sunt consecuti, ob parentum factum non modo à sacris ordinibus non sunt remouendi; verum etiam postquam eas omnino dimiserint, si canonicè in eisdem viuere voluerint, pro magna misericordia sustineri poterunt.

14 Nec obijciat quis, non consecrationem emisisse se, sed quæ ex consecratione proueniant. Nam sicut anima sine corpore corporaliter viuere non potest, sic corporalis Ecclesia, vel dignitas, & ordo Ecclesiasticus, sine quo alterũ haberi non contingit, neutrum inuenditum reliquisse intelligitur.

15 Quin & perpetua infamiae nota Simoniaci tenentur: & quamuis acta criminis pœnitentia, Dei gratiam recuperent, non tamen alterius beneficii, infamia nimirum impediti, capaces fiunt, nisi cum eis fuerit per Summum Pontificem benignè dispensatum.

16 Tanta siquidem huius criminis est labes, vt etiam serui (qui regulariter non stant in iudicio) aduersus Dominos, & quilibet criminosi admittantur ad accusationem. Item omnis peccator (non præcisus ab Ecclesia per sententiã Canonis, vel iudicis) & pœnitens missam celebrare potest, præterquam Simoniacus, quem adeo quilibet, vt ab ordine male accepto remoueat, accusare potest, vt nec me-



retrix excludatur, quæ alias non est admittenda ad accusationem, ob eius vilitatem.

17 Sciendum tamen est, nondatione qualibet, aut receptione Simoniam contrahi; nam si quid sponte, purè, sine peccato, & conuentione, aut taxatione qualibet fuerit gratis oblatum, id sine scrupulo Simoniacæ prauitatis recipi poterit.

18 Idem obtinet ex contrario, si quid non sponte quis dederit, sed vt indebitè illatam molestationem super quaesito iure redimat, dare coactus fuerit, Simoniam committere non dicitur. Licitum enim est in foro conscientie litiganti, bonamque causam secundum relationem suorum aduocatorum defendenti, dare aliquid iudici, vt pro eo sententiam ferat, vel Prælato, ne ipsam in iure suo de facto molestet, dum modo illud bona fide possideat.

19 Demum sciendum est, eos Prælatos subiacere Canonice distictioni, qui vices suas, vel Ecclesias sub annuo censu (obuentiones iurisdictionis tanquam fructus vendentes) concedunt: quia dum Sacerdotium, sub huiusmodi mercede venale disponitur, ad æternum retributionis premium consideratio non habetur. Non tamen ad eò subtili religione teneatur, vt munere aliquo citra pactum, & conuentionem induci existimet Simoniam: sed dantis, accipientisque personæ qualitatem, & muneris quantitatem, similiter & donationis genus ad cognoscendam Simoniam metiri inspicereque debemus.

## T I T V L V S I V.

### *De Hæreticis.*

1 **P**ostquam vidimus de delicto, quod mutat naturam Dei, & dona illius venalia pecunijs habet, sequitur videre de alio, quod ipsum negat, blasphematur, & tollitur: & dicitur hæresis, quod quisque hæreat in sua opinione, & quæque erronea opinio ita firmi-

ter hæreat in mentē prauorū huiusmodi, vt sæpe maximo labore & industria, crebrisque, & sollicitis vigilijs ei euellende opus sit. Quæ tamen interdum parua, & vana moru primo videatur, tamē quamprimum vestigiorum, vel leuiter premendorum potestatem nacta fuerit, paulatim serpens in dies maiores sibi vires comparat: & postquam eò virium peruenerit, vt iam in multos populos vagata regni sui fines latè protenderit, tum vero sic labem suam mentibus humanum imprimit, vt in tyrannidem potius, & sæuitiam sceleratam, quam in religionem fucatam conuertatur, sæpiusque non minimas calamitates fidelibus inuehat, priusquam extingui, & à radicibus euelli possit: quod res ipsa testatur. Propterea, quò est hæc pestis Orbis Christiano perniciosior, eò vigilantius illi obuiam eundū est. Et titulo præsentī inquirimus, quinam sint hæretici, & qua pœna puniendi, considerandum: deinde, quid iuris sit si ad Ecclesiam reuertantur: tum qui dicantur esse relapsi, & qui suspecti, & quomodo sit cum eis procedendum.

2 *Hæretici itaque sunt, qui vanæ gloriæ, principatusque sui causa, falsas opiniones gignunt, vel sequuntur. Vel hæretici sunt, & dicuntur, qui à fide & doctrina Christi Apostolorum, & Ecclesiæ discedunt, articulos fidei, vel Ecclesiastica Sacramenta cum asseueratione refellentes.*

3 Eorum plures, & diuersæ sunt sectæ. Et alij quidem de nomine suorum authorum nuncupantur, vt Macedoniani, Nestoriani, Arianī, Luterani, Zuingliani, Calvinistæ, & multi id genus alij. quorū vt oī ita nostro quo infinitus est numerus. Alij vero ex causis nouorum rituum, vel opinionum appellantur, quas vel instituerunt, vel tutariconati sunt, vt Aquarij, Alogij, Anabaptistæ, Antropomorfistæ, pluresque alij, qui omnes quibuscunque nominibus censeantur, vel quibuscunque ritibus, & opinionibus inter se differant, etsi facies habeant diuersas, caudas tamen connexas habent, cum vanitate in vnum conueniant, & communi nomine aduersus Ecclesiam Dei conspirent.

4 Eapropter multæ sæpe constitutiones, diuersis temporibus

poribus factæ sunt per Romanos Pontifices, & Sacrosancta Concilia Generalia, quibus multa prudenter statuta sunt, vt vel amore, vel metu homines coercerentur, ne huiusmodi labium authores, adiutoresque, aut sectatores existerent. Quamuis enim ad fidem nemo sit compellendus, sed suo arbitrio, suoque more sibi viuere à principio permittatur, quam tamen scilicet quis acceperit fidem, si deseruerit, coercendus est; nec permittendus est impune abire, qui alios secum in errores suos trahere tentarit: præterquam quod Sacrosanctæ Romanæ Ecclesiæ muneribus, & priuilegijs indignus iudicandus est, qui ab ea dissentire dignoscitur.

5 In hæresi itaque deprehensi (vel euidentia facti, vt quia publice prædicant hæresim: vel legitima probatione, puta per testes: vel propria confessione) præter perpetui vinculum anathematis, si clerici sint, vel religiosi, totius Ecclesiastici ordinis prærogatiua spoliandi erunt (scilicet ab Episcopo qui cognoscit de crimine hæresis, tam contra clericos, quam contra laicos) & omni officio, & beneficio nudati, sæcularis relinquatur arbitrio potestatis, animaduersione debita, puta capitis, puniendi. Nisi continuo post deprehensionem erroris, ad fidei Catholicæ vnitatem recurrere, & errorem suum publice abiurare, & congruam satisfactionem exhibere consenserint.

6 Laici vero nisi prout dictum est, abiurata hæresi, & satisfactione exhibita, ad fidem redierint orthodoxam, sæcularis iudicis arbitrio relinquuntur, quia cognitio criminis hæreseos ad iudicem Ecclesiasticum spectat, sola vero executio relinquitur iudici sæculari post sententiam Episcopi) debitam pro qualitate facinoris ultionem recepturi.

7 Bona quoque damnatorum propter hæresim ipso iure, & omni spe potiundæ hæreditatis filijs adempta, confiscata intelligentur: aut si clerici fuerint, Ecclesijs, à quibus stipendia receperunt, applicabuntur. Confiscationis tamen huiusmodi executio, vel bonorum occupatio facienda non erit, antequam super crimine sententia fuerit promulgata.



8 Sed, & cum alteri per alterum iniqua conditio inferri non debeat, propter hæresim maritorum, vxorum catholicarum dotes confiscari non debent: Nec bona paraphernalia illius, nec donatio facta propter nuptias à marito, aut acquisita per vxorem constante matrimonio.

9 Ecclesiastica quoque sepultura vsque adeo carere debent, vt si qui eisdem credentes, aut fautores eorum scienter Ecclesiasticæ sepulturæ tradere ausi fuerint, excommunicationis sententiam subiacere debeant, nec antea absolutionis mereantur beneficium, quàm proprijs manibus eiusmodi opera extument, & proijciant. Locus autem ille nullius sepulchro Orthodoxi aptus deinceps censebitur.

10 Sed & eorum filij ad beneficia Ecclesiastica, seu publica officia admittendi non erunt, quod quidem per paternam lineam vsque ad secundum gradum, per maternam vero vsque ad primum tantum extenditur. Cum enim secundum legitimas sanctiones, reis læsæ maiestatis capite, punitis, & bonis confiscatis eorum, filijs vita solummodò ex misericordia conseruetur, quanto magis, qui aberrantes in fide Deum offendunt, muneribus, bonis, honoribus debent spoliari? Cum longè sit grauius æternam, quàm temporalem lædere maiestatem. Hoc tamen intelligendum est de filijs & posteris eorum, qui tales esse, vel etiam decessisse probantur: non autem illorum, quos emendatos, & Ecclesiæ vnitati reincorporatos esse constiterit.

11 Sed videamus qui, & quando incorporari debeant: & constat, eos qui pro culpa huiusmodi ad mandatum Ecclesiæ poenitentiam acceptauerint, eamq; vel perfecerint humiliter prosecutioni eius insistat, recipiendos esse. Idè iuris est, si poenitentia nec peracta sit, nec imposita, dum tamen crimini obnoxij ad eam recipiendam parati fuerint. Quod si qui post abiurationem erroris, vel postquàm se proprii Antistitis examinatione purgauerint, in abiuratam hæresim recidisse deprehensi fuerint, saculari iudicio sine ulla poenitus audientia relinquendi erunt. Licet si postmodum poeniteant, & poenitiæ, signa in eis apparuerint

503

manifesta, nequaquam sint relapsis, humiliter petita Sacramenta Pœnitentiæ & Eucharistiæ deneganda.

12 Relapsi autem intelligendi sunt non solum ij, quorū ante abiurationem crimen planè probatum fuerit, verum, etiam ij, qui postquam accusati, vel vehementer suspecti semel hæresim in iudicio abiurauerint, & postmodum in eadem iterum reincidunt. Planè, si ex modica & leui suspicionem semel quis abiurauerit, reincidens quanquam ex hoc sit grauius puniendus, non tamen debet in hæresim relapsorum pœna puniri.

13 Is verò, qui in vna hæresis specie, vel secta commisit, aut in vno articulo fidei, seu Ecclesiæ sacramento errauit, & postmodum hæresim simpliciter, vel generaliter abiurauit si deinde in aliam etiam hæresis speciem siue sectam, aut alio articulo, seu sacramento committat, vt relapsus in hæresim iudicandus erit.

14 Qui vero inuenti fuerunt sola suspitione notabiles, ob eam, quantumuis vehementem, de tam graui crimine condemnandi non erunt, sed nisi iuxta considerationem suspicionis, qualitatemq; personæ propriam innocentiam congrua purgatione monstrauerint, anathematis gladio seseferiendos exponunt. Et vsque ad satisfactionem ab omnibus euitabuntur: & si per annum in excommunicatione constiterint, velut heretici condemnabuntur.

15 Plura quoque ad hoc atrocissimum crimen vindicandum specialiter, & præter ordinarias iuris regulas induta sunt, tam circa iudicium, & processum instituendum, & testium depositiones, carcerem, custodiam, & immurationis pœnam; quam etiam contra fautores, receptatores, & defensores eorum, vt clarè ex lectione sacrarum constitutionum apparere potest.

16 Qui etiam Principi hæresim suadere tentauerit, tanquam relapsus Curia seculari traditur puniendus per Constitutionem in Clementis VIII. Anno 1603. die 3. Feb. quæ incipit, Dominici gregis.

17 Nec potest quidquam hereticis ab Episcopis fieri

byteris, Abbatibus, alijsue Clericis conferri, aut possessiones Ecclesiasticæ eis in vsum dari, quamuis sanguine etiam eis essent coniuncti; nisi velint largitores anathemati obnoxij esse. Idem euenit, qui famulos, œconomos, spenditores, medicos aut iureconsultos in aulis suis fouent, & eorum opera neglectis catholicis, contra Episcopalem decentiam vtuntur, & promouent eos ad dignitates, & fauores sæcularium Principum.

## T I T V L V S V.

### *De Schismaticis.*

1 **S**chismatici dicitur, qui se ab vnitæ Ecclesiæ Catholicæ Romanæ per inobedientiam separant, suos sibi seorsum constituentes Sacerdotes, Episcopos, & Patriarchas. Differunt aut Schisma, & Hæresis, sicut dispositio & habitus: quia Schismaticus separans se ab vniõne Ecclesiæ, disponitur ad incidendum in mille errores, in quibus pertinaciter permanēs fit deinceps hæreticus, dum re ipsa negat articulum Symboli, *Et vnā sanctam Ecclesiam*, & proinde hæreticis annumeratur.

2 Schismaticos quoque suis excommunicationis sententia Canones infectantur, & si nec sic resipuerint, à sacris ordinibus, omniq; ministerio Ecclesiastico deponentur: adhibito etiam si necesse fuerit brachij sæcularis auxilio, ad illorum insolentiam coercendam, cum omnium etiam bonorum confiscatione.

3 Ordinationes quoque ab eis factæ irritæ habentur. Et qui dignitates Ecclesiasticas, vel beneficia per ipsos sunt consequuti, eis priuantur. Item alienationes rerum Ecclesiasticarum per ipsos factæ nullius sunt momenti.



## TITVLVS VI.

*De Apostatis.*

1 **A**postatæ sunt, qui à statu fidei, obedientiæ, vel religionis, quam se teneri professi sunt, temerariè recedunt. Diciturque apostasia, veluti postitatio, seu retrogradus status; & Apostata quasi retro stans. vel retro abiens, à suo proposito.

2 Apostasiæ triplex est species: alia enim est perfidiæ, alia inobedienciæ, & alia irregularitatis. *Apostasia perfidiæ est*, quando quis à fide Christiana recedit, & ad Iudaicos, vel M. hometanos ritus, & impietatem se conuertit; aut in Atheismum incidit. *Apostasia inobedienciæ est*, quando quis præcepta regulæ & superioris sui, quæ iurauerat sponte, transgreditur, & relicto sacerdotio patrû constitutionibus non obtemperat. *Ap. st. sive Irregularitatis est*, quando quis ab Ordine suo recedit & Religionis susceptæ desertor existit.

3 Licet igitur pro diuersitate apostasiæ, diuersæ delinquentibus inferantur poenæ, omnes attamen æqualiter Sacri Canones tam inter infames deputant, quam etiam excommunicationis vinculo innodandos esse præcipiunt.

4 Nec possunt tales condere testamentum, quia omnia bona ipsorum confiscantur. Nec peracta poenitentia redeunt ad prius statum, Et repelluntur à testimonio, & dignitatibus, & per omnia vt hæretici puniuntur si correctionem nullam admoniti admiserint. Deponi etiâ possunt, & demum foedi carceris squalorem etiam experiri coguntur; donec ad saniores mores, à quibus tam obstinatis animis declinarunt, suos peccati errores reuertantur.

## TITVLVS VII.

*De Sortilegis, Maledicis, & Sacrilegis.*

1 **C**VM nobis dissertatio sit de delictis, quæ immediate respiciunt Deum, & inter ista connumerentur etiam Sortilegia, maledicta, &

Sacrilegia, propterea cōgruēti ordine illa in presenti titulo discutiemus, quærentes inprimis an ista delicta pertineant ad Inquisitorem hæreticæ prauitatis: deinde quid sint, & quomodo committantur: & tandem quomodo aut qualiter puniantur.

2 Sciendum itaque est, hæreticæ pestis inquisitores, (qui certis in prouincijs habentur) de diuinationibus, & sortilegijs (nisi hæresim saperent manifeste, sicuti est circa aras idolorum nefarias preces emittere, sacrificia offerre, demones consulere, adorare, ac eorum responsa accipere) sese intromittere non debere, vt Episcoporum iurisdictio minus lædatur, nec talia exercentes posse punire: sed eos suis debere iudicibus (puta Episcopis, & Legatis aut iudicibus secularibus) puniendos relinquere. Cum negotium fidei, quod summè priuilegiatum esse conuenit, per occupationes alias non debeat impediri.

3 Sortilegij nomen generale est, sub quo continentur diuinator incantatores, malefici, Superstitiosi, Magi, Arioli, Aruspices, & alij. Proprie tamen Sortilegi sunt qui prætextu religionis, per quasdam sortes diuinationis scientiam profitentur, aut quarumcunque scripturarum inspectione facta, futura promittunt. Superstitiosi verò, qui cultum diuinum exhibent, cui non debent: vel Deo ipsi, sed eo modo quo non debent.

4 Diuinationis aut sunt diuersæ species, sed bifariam diuersæ: quædam cum inuocatione demonum, quædam sine inuocatione. Prioris generis sunt nouem 1. *Præstigium*, ex eo dictum, quod oculi hominum præstinguntur dum demones præstigijs apparitionibus se aspectui, & auditui hominum ingerunt. 2. *Somniorum Visio*, & interpretatio. 3. *Necromantia* per mortuorum allocutionem diuinatio. 4. *Pitonomia* per homines viuos arreptitios futurorum annuntiatio. 5. *Pronunciatio seu demonstratio futurorum per figuras*, & signa in rebus animatis apparentia quæ si apparent in corpore terrestri vocatur 6. *geomantia*: si vero in aqua vocatur 7. *hydromantia*: si in igne 8. *pyromantia*: si in aere 9. *heremoman-*

*tia*: si in visceribus animalium immolatorum in aris dæmonū, vocatur aruspiciū. Secundi vero generis sunt sex 1. *Genantici*, qui ex motu siderū natalem diem hominis considerant, & futura prædicunt. 2. *Aruspices*, qui à garritu auiū nunciant futura. 3. *Augures*, qui ab inspectione intestinorum auium auspicia prænunciant. 4. *Ominatores*, qui dicta hominum absque intentione prolata ad futuros euentus detorquent. 5. *Chiromante*, qui ex lineamentis manus diuinationes sumunt. 6. *Spatulatores*, qui ex signis in spatula alicuius animalis apparentibus futura prædicunt.

5 Sapiunt autem manifestam hæresim sortilegia illa, in quibus sortita miscentur, & in quibus fit inuocatio Dæmonum, & interrogatio de futuris euentibus, & in quibus admiscuntur verba sacra, vel admiscetur vsus candelæ aut aquæ benedictæ, baptizando imagines, rebaptizando pueros: vel dum in annulo aut aliqua alia re includuntur dæmones, & pacta cum illis concluduntur: conscribunturq; characteres. Sed de his omnibus, vbi non sunt Inquisitores, cognoscit Episcopus, tanquam iudex ordinarius, aduocatis ad consilium prudentioribus Sacerdotibus.

6 Ariolorum igitur, aruspicum, incantatorum, & omnium sortilegiorum maleficiorumq; artes, cum sint ex quadam pestifera societate dæmonum, atque hominum, quasi pacta infidelis, & dolosæ amicitie constituta, penitus sunt ab Ecclesia eliminandæ. Et superstitiosi artifices, nisi per poenitentiam resipiscant, perpetuo anathemate feriendi, & si Clerici sint, degradandi.

7 Diuersa est poena Maledicorum. Nam si quis in Deum, vel aliquem Sanctorum linguam in blasphemiam publicè relaxare ausus fuerit, poenæ iuxta Gregorianæ constitutionis tenorem subdendus erit: quam si recipere, & poenitentiam peragere recusauerit, & Ecclesiæ eidem interdicitur ingressus, & in obitu ecclesiastica carebit sepultura.

8 Est autem blasphemia, dictio tacita, vel expressa, vel etiam scripto concepta contra Deum, aut Sanctos eius, contumeliam aliquam in se continens, vel tribuens Deo



quod Dei non est, & negansue de Deo quod Dei est, vel sibi quod Dei est, temerariè vsurpans.

9 Species etiam blasphemix duæ sunt, vna simplex, & altera hæreticalis. *Simplex est*, quando aliquis Deum, aut Virginem Beatam, Sãctosue eius maledicit, & turpia de eis loquitur. *Hæreticalis vero est*, quando aliquis dicit contra articulos fidei, damnatue sacramenta, aut deridet ceremonias Ecclesiæ, & Sãctos Dei. Sed olim Clerici blasphemii arbitrio iudicis puniebantur, & degradabantur. Laicis alia pœna imposita erat per Greg. IX,

10 Similibus, interdumq; acrior bus vrgentur pœnis, qui in sacrilegij crimen incidunt, & Ecclesias incendere, & violare minime verentur. Nam pro modo sceleris admissi facinorisq; perpetrati, nisi plenè satisfecerint, aut de satisfaciendo plenam securitatem exhibuerint, nunc pœnitentiæ beneficium sacrilego penitus denegatur, nunc anathemate vincitur, nunc perpetua damnatus infamia carceri traditur: aut ex illo perpetuæ deportationis, & depositionis animaduersione coercetur: aliquando etiam pecuniaria pœna mulctabitur.

11 *Est autem sacrilegium* rei sacræ læsio, violatio, aut vsurpatio; Cuius quatuor species esse videntur. *Prima* circa personam, puta percutiendo Clericum. *Secunda* per coniunctionem carnalem, puta cum moniali Deo sacrata. *Tertio* circa locum sacrum, vt puta violando Ecclesiam aut cimiterium. *Et quarta* per ablationem rei sacræ, vel in loco sacro. Cum igitur sacrilegium pluribus modis committatur, non propterea semper eadem pœna (capitis,) sed vt i supra diximus pro diuersitate, & grauitate criminis, arbitrio Antistitis diuersimodè punietur. Clerici deponantur ex Concil. Lateranense sub Leone X. vel in monasterium detrudantur.

12 Nec solum talibus pœnis illi plectendi erunt, qui sacrilegium admiserint, sed etiam consentientes eis, aut adiuuantes. Presbyteri quoque, vel Clerici, qui in vita vel morte sacrilegis pœnitentias dare (quod intèllige de illis, qui

qui nec in vita, nec in morte satisfacere volunt, & possunt; his enim deneganda est poenitentia in fine, & alia Ecclesiastica sacramenta, cum in peccato mortali decedant, aut sepulturæ interesse, vel eorum eleemosynas accipere ausi fuerint, à publico enim peccatore non debet sacerdos recipere eleemosynam, ne videatur illum fouere in delicto suo siue rapinæ participes inuenti fuerint, Ecclesiastico beneficio priuati, ordinis sui damnum irreuerabiliter patietur.

13 Obserua hic, quod Clericum ob scelus aliquod depositum Episcopus proprius non potest restituere: sed requiritur dispensatio Papæ. In beneficio tamen quo priuatus, fuerit potest Episcopus dispensare.

## T I T V L V S V I I I.

### *De Furtis.*

1 **Q**uia titulo superiore diximus, sacrilegium, committi etiam per furtum, seu rei sacræ, vel in loco sacro profanæ ablationem, ideo titulo præsentividebimus singulariter quid sit furtum, & quomodo puniatur, & de quo facto id intelligatur, cum furti nomine omnis illicita usurpatio contineatur.

2 *Furtum itaque est*, contrectatio rei alienæ mobilis fraudulenta, inuito diuino, lucri faciendi gratia, siue ipsius rei, vel usus possessionisue, quod lege naturali prohibitum est, admissa. In re enim immobili non consistit propriè furtum, quia non mouetur de loco ad locum. Dicitur autem furtum à furuo, idem nigro, quia clam fit & obscurè, & plerumque de nocte. Latrocinium vero fit cum violentia & aperte. Vnde non mirum, si differentia etiam est in poenis: nam & ius ciuile acrius punit latrones, quam fures occultos.

3 Fures igitur non solum sæculares leges, verum etiam  
Ca-

Canones acriter infectantur : nam nec ad sacros ordines promoueri ( nisi de eiusmodi delicto nulla fama fuerit , & ipse delinquens cui damnum intulerat , satisfactionem dederit ) promoti ab eisdem deiici , & si depositi incorrigibiles fuerint , excommunicari , & demum potestati seculari tradi debent. Et si dum furtum committitur occisi fuerint , pro eis minimè orandum erit : quanquam si comprehensi , aut vulnerati confessi fuerint , communicatio eis non sit deneganda .

4 Sed hæc de illis intelligere nos oportet , qui nulla necessitate adacti furtum commiserunt . Cæterum si quis propter necessitatem summam cibaria , vestem , vel pecus furatus fuerit , longè mitiori poena puniendus erit . Quia , igitur tempore necessitatis omnia sunt communia , & voluntas tantum faciat furtum ; ideo grauius punitur furtum commissum ex avaritia , quam commissum ex inopia .

5 Nec fures solum supradictis poenis tenentur , sed ij quoque , qui aut cum furibus partiuntur , aut qui furtorum consilij fures querentibus possessoribus nō indicant . Quod si quis verò emeret res furtiuas scienter sine voluntate restituendi , si contigerit dominum reperiri , vtique peccat mortaliter , & pretium solutum amitteret . Secus si voluntatem habuit conseruandi rem illam domino suo .

## TITVLVS IX.

### *De Vsuris.*

1 **C**Um vsuram exercens quodammodo furtum committere videatur , ideo post titulum de furtis , statim videndum est de vsuris : nimirum expendendo quid sit vsura , vnde dicatur , quotuplex sit , quomodo puniatur , & demum quo iure sit prohibita .

2 *Est igitur vsura* , lucrum ex mutuo pacto debitum : vel est crimen ex lucro proueniens , quo fors mutuo data acceptionem accipit , vel ex pacto , vel intentione mutuantis . Et cum



cum dixerimus *vsuram* ex mutuo oriri, consequens est etiã vt in his duntaxat rebus committi possit, in quibus & mutuum consistit, nempe his, quæ pondere, numero, mensurare constant. Dicta vero est *usura* ab *vsu*, quia scilicet pro *vsu* pecuniæ mutuata recipitur. Et nitantum est crimen & testamenti vtriusque lege, & prohibita, quod dicens *vsuram* esse licitam dicitur hæreticus. Siue id sit, qui à naturam superare, & quodammodo violare velle videntur, qui id agunt, vt pecunia res suapte natura nulli propagationi apta, nullo tamen domini labore, nullaque eius industria, quasi fructus ex se gignat. Seu quia pietati contrarium sit, & à Christiana charitate alienum, nolle opibus sibi superantibus proximo egenti gratis suppetias ferre. Seu etiam, quia si huiusmodi mercimonia exercere fas esset, cætera omnia, vt agricultura, & quæ generi humano vtiliora sunt, facile posthaberentur, quod huius lucrum certius, tutiusq; sit.

3 Si quis itaque pignoris obtentu rei alicuius nactus fuerit possessionem, si sortem suam deductis expensis de fructibus iam perceperit, si eadem debitori restituere recuset, & perceptos fructus in sortem computentur, proculdubio *vsurarium* committitur crimen.

4 Duplices sunt *vsurarij*, alij qui exercent *vsuras* simpliciter, & alij qui exercent *vsuras vsurarum*: vtrique tam Cæsareo quàm Pontificio iure damnandi, sed magis qui manifesti sunt, & credunt licitas esse *vsuras*, & sine peccato posse exerceri, quam illi qui non sunt manifesti, & improprie *vsuram* exercent vendendo fruges aut merces carius ad tempus, licet sciant esse peccatum, seq; teneri ad restitutionem.

5 Multiplicibus autem poenis Sacri Canones *vsurarios* insequuntur: nam præter inustam infamiam, nec ad Christianam nec ad communionem admittuntur altaris: (idem ad suscipiendum sacramentum Eucharistiæ) nec quisquam de manu eorum oblationes accipiet. Et si Clerici fuerint tam officij, quam beneficij Ecclesiastici pericu-

lum patientur , si admoniti , in hoc crimine incorrigibiles extiterint . Clericus vero mediator , seu proxeneta illicitorum contractuum , & usurarum , tenetur reddere usuras , ac si ipse eas accepisset .

6 Nullus quoque sub pœnis in Gregorij X. constitutione comprehensus , manifestis usurarijs , aut locabit domus , aut conductas habere permittet , sed & si in hoc scelere decesserint , Ecclesiastica carebunt sepultura . Nec proderit defuncto , quod hæres eius velit satisfacere : nam oportet , quod ipsemet restituat , vel de restituendo caueat ita quod appareat illum non decessisse in illo peccato .

7 Et id adeo obtinet , vt etiamsi morituri in vltima voluntate de usuris satisfieri expressa quantitate , vel indistincte mandauerint , donec secundum Gregorianæ constitutionis tenorem satisfactum fuerit , Ecclesiastica sepultura carere debeant . Quicumque vero manifestos usurarios contra prædictæ sanctionis formam , tumulare ausi fuerint , pœnæ Lateranensis Concilij sub Alex. III. contra usurarios promulgatæ subiiciendi erunt .

8 Debet autem satisfieri ei , à quo pecunia fuit extorta , vel eius hæredibus : illis verò non extantibus , vel non petentibus , vel non curantibus , pauperibus extortum erogabitur , pro arbitrio loci Ordinarij , vel Rectoris Parochiæ , sub qua testator ipse usurarius habitat .

9 Testamenta quoque ab usurarijs facta , & codicilli , aliter quàm secundum dictam Constitutionis formam ( hoc est præstita cautione de restituendis usuris per pignus , aut fideiussionem illis quibus restituenda est usura , aut illorum procuratoribus , vel ipsis absentibus Ordinario loci , aut Parocho Ecclesiæ ) non valebunt , etiamsi ad pias causas aliquid legauerint ; sed ipso iure erunt irrita .

10 Nec quidquam proficiet , quod quis pro captiuis redimendis , vel eleemosynis dandis sese usuras exercuisse alleget ; nec enim propterea magis cum usurario dispensari poterit , cum pro vita alterius , nec mentiri quidem , nedum rapere liceat . Sic etiam eleemosyna non potest fieri  
de

de rebus restitutioni subiectis, quia prætextu boni, malum fieri non debet.

11 Planè, si nec ij, à quibus quis vsuras extorserit, nec illorum sint hæredes superstites, iudex tamen Ecclesiasticus ex officio suo parte non petente, tenetur cogere vsurarium, eiusque hæredem ad restitutionem faciendam, vt elargiatur pauperibus illius loci, vbi pecunia fuit extorta. Optimum autem erit, publicis edictis pronunciare in locis à quorum incolis soluta est vsura, vt quisquis foeneris nomine à se aliquid, sciat ablatum, id veniat recepturus. Sed si principales fuerint superstites, & extortas vsuras vsurario remiserint, hinc sufficiet illi vt liberetur à peccato.

12 Nec ist tantum Ecclesiastica dispensatione extortas vsuras restituere cogendus erit, qui foeneratus est, verum etiam filij, & quicumque extranei hæredes, qui omnes super vsuris conuenti nullius appellationis remedio restitutionem subterfugere permittendi erunt. Alias, si iniuste grauaretur, non est appellatio deneganda.

13 Sed & si quis sub vsuris pecuniam acceperit, & de eis nunquam repetendis foeneratori iurauerit, adhuc iudex vsurarios per censuram Ecclesiasticam compellere poterit, tam vt ab earum desistant exactione, & iuramentum remittant; quam etiam vt exactas restituant, ne de dolo, & fraude quemquam contingat commodum reportare. Iuramentum enim præstitum de vsuris non repetendis, non inducit liberam remissionem vsurarum, immo vsuræ præsumuntur magis extortæ, cum iuramentum huiusmodi nõ præsumatur interuenire ex libero consensu iurantis.

14 Iudæi quoque si à Christianis quocunque prætextu graues immoderatasue vsuras extorserint, & per sæculares principes, & potestates illas remittere sunt compellendi, & donec de immoderato grauamine competenter satisfecerint, ab vniuersis Christi fidelibus tam in mercimonijs, quam in alijs, per excommunicationis sententiam eis omnimoda communio denegabitur.



15 Sunt tamen casus, in quibus aliquid ultra sortem, absque vitio usurarum licite recipitur: ut puta, si Clericus Ecclesiasticum beneficium aliter redimere non valens, pre-textu pignoris de manu laici illud acceperit. Nec enim hic in sortem fructus tenebitur computare. Idem si terra non sit beneficii alicuius Ecclesiastici, sed ad accipientem in pignus iure dominij directi pertinere noscatur.

16 Idem si possessiones pro non numerata dote genero à focero pignori obligatae fuerint. Cum enim frequenter dotis fructus non sufficiant ad onera matrimonij supportanda, pignoratuum possessionum fructus in sortem computandi non erunt.

17 Ille quoque qui dat decem solidos, ut alio tempore totidem sibi grani, vini, vel olei mensurae reddantur, ex hoc usurarius censeri non debet: quia licet tunc plus valeant, utrum plus vel minus solutionis tempore fuerint valiturae verisimiliter dubitatur. Et licet dubia in meliorem partem interpretari debeant, tamen si certum esset, quod tempore solutionis plus valerent, obtinendum esset à talibus contractibus ob periculum animae.

18 Aliud autem iuris est, si quis nauiganti, vel ad nundinas eunti certam pecuniae quantitatem mutuatur, & ex eo quod in se mutuans periculum suscipit, aliquid ultra sortem ut recipiat conuenit: nam hic usurarius reputandus erit. Similiter, quando quis ultra sortem mutuata aliquod factum exigit, quod sit pecuniae aestimabile, v.g. certos dies laboris circa agriculturam excolendam, is hoc modo faciens usuram committit. Idem censendum est, quando aliquis mutuando recipit aliquid in pignus mobile, vel immobile, & intendit recipere utilitatem aliquam ex usu illius pignoris ratione mutui; ut puta recipit villam, vel agrum aut equum, & fructum horum recipit tandem, quando mutuata pecuniae summa illi non restituatur. Singitur pretium fructuum illorum in partem sortis non computat, usurarius reputandus erit.

19 Sed si quis mutuatarius generositatis suae causa, &

ex beneuolentia mutuanti donat aliquid , potest prædictus mutuans absque peccato donū illud recipere . Similiter si mutuanti ex mera liberalitate mutuatarius præstat aliquod beneficium, vel promotionem ad aliquam dignitatem facit, in eo nō committitur vsura, quia beneuolentia sub estimatione pecuniæ non cadit . Prout & ille , qui recipit ex mutuo interesse ratione damni emergentis , vel lucri cessantis, vsuram non committit.

---

## T I T V L V S X.

### *De Adulterijs , & alijs coniunctionibus illicitis .*

1 **A** *Dulterium est alieni thori violatio . Et fit tribus modis .* Quando scilicet vir coniugatus ad mulierem coniugatam accedit; secundo, quando solus ad coniugatam; tertio, quando coniugatus ad solutam . Pœna in laico excommunicatio , in Clerico depositio : si adulterium fuit notorium in , utroque certę penę impositio , in foro pœnitentia, si adulterium erat occultum; Alias ex lege veteri mosaica, & iure diuino adulter, & adultera morti adiudicantur .

2 Eadem, vel etiam pro iudicis arbitrio maior aut minor eos maneat pœna, qui incestum commiserunt. Vt puta, cum qui contra naturam humanę societatis parentibus, vel alijs consanguineis personis impudice adhæreat: aut si cum illa, quam quis de sacro fonte suscepit , aut quam ante Episcopum tenuerit, cum sacro Chrismate vngeretur fornicationis scelus perpetraverit : aut cum relicto naturali vsu contra naturam more sodomitico fornicabitur , aut humani generis naturam transgressus sese brutis commiscuerit .

3 Incestus igitur est, vti diximus, consanguineorum , vel affinium abusus: & duplici modo committitur; vel cum

matrimonio, & punitur poena mortis: vel sine matrimonio, & punitur poena depporationis; quæ poena quia hodie nō est in vsu, ideo poenam hanc arbitrariam esse diximus.

4 Sodomitæ autem poena semper est, poena mortis de iure diuino, & post mortem igne concrematur, & bona ipsius confiscantur. Clericus vero per hoc crimen beneficijs priuatus deponitur, & in monasterium detruditur, vel degradatus potestati sæculari traditur secundum Bullam Pij V. Similiter & Regularis quilibet eo delicto notatus.

5 Quod si quis stuprum admiserit, multum intererit, utrum cum muliere honeste viuente rem habuerit, aut virginem deflorauerit. Primo enim casu stuprator poenitentia subditus pecuniaria etiam poena coercendus erit iuxta qualitatem facti, & conditionem personarum. Posteriore vero, dotata virgine eandem patre consentiente, habebit uxorem: si vero pater virginis dare noluerit, aut stuprator eam uxorem habere legibus impediatur, reddet pecuniam iuxta modum dotis, quam virgines arbitrio iudicis accipere consueuerunt, consideratis facultatibus stupratoris & dignitate puellæ, & impositā penitentia subibit.

6 Quod si consentiente patre, stuprator ipse corruptā virginem in uxorem ducere renuerit, corporaliter castigatus carcere verberibusue, ad arbitrium iudicis ( licet seuerius de iure ciuili agatur ) & excommunicatus ( quoad communionem sacramentorum ) in monasterium ad agendam poenitentiam retrudetur, de quo nulla erit ei egrediendi sine iudicis permissione licentia.

7 Maior legum seueritas raptotes cohibet: nam præter sæcularium sanctionum poenas, idest poenam capitis, & bonorum adscriptionem raptæ, si sæcularis, si vero monialis monasterio, anathemate cum suis adiutoribus feriri, aut si Clerici sint, proprii ordinis, & honoris amissionem sustinere debent. A qua poena rapiens non excusatur, etiam si mulierem rapuerit animo contrahendi cum illa matrimonium, non solum cognoscendi eam carnaliter. Prædictæq; poenæ habent locum non tantum in rapientibus puellas



las virgines; sed etiam in rapientibus nuptas, desponsatas viduas, seruas, libertinas, tam viles quam nobiles: licet ipsa mulier in raptum consenserit.

8 Statuitq; Concil. Trid. nullum matrimonium posse consistere, quamdiu rapta in potestate raptoris manserit, nisi separata ab illo, in loco tuto & libero constituta fuerit: & nihilominus raptor ipse ac fautores adiutoresque illius acerrimis poenis punientur.

9 Raptus autem tunc committi dicitur, cum illa de cuius nuptiis nihil actum fuerit antea, de loco in locum inuita asportatur. Vnde qui sibi desponsatam, vel parentibus reclamantibus adduxerit, in crimen raptus, & in penas minimè incidit. Rapta quoque puella legitimè cum raptore matrimonium contrahet, si prior dissensio in consensum transeat. Raptorem enim & rapta; nomina sunt vitiorum, non personarum. Vitia autem cum purgata fuerint, eorum etiam nomina abolentur.

10 Sed hæc de illis intelligenda sunt, qui mulierum laicarum consensum habuerunt: nam si quis Deo dicatas virgines, vel rapuerit, vel volentes matrimonio sibi sociare tentauerit, tanquam sacrilegium admittens, pro tam nefandi criminis atrocitate plectendus erit; nulla prorsus voluntatis sacrarum virginum habita ratione.

11 Demum, si quis cum muliere soluta, & impudica, simpliciter fornicatus fuerit, tam pœnitentiæ modus, quàm etiam alia poena in iudicis potissimum reponetur arbitrio: qui ex qualitatibus varijs, minorem, vel maiorem poenam statuet.

## TITVLVS XI.

### *De Crimine Falsi.*

1 **C**Rimen quoque falsi magnū, & fictum, magnisq; pœnis vindicatur, quod illo in primis Deus læditur, deinde Princeps, cuius literæ fals-

falsificantur, & postmodum is, aduersus quem falsum adstruitur. Committiturq; hæc falsitas (vt hic sæcularem potestatem excludam) vel in literis Pontificijs, quæ vel à Cancellaria Apostolica, vel à summo Pœnitentiarario Papæ proficiuntur: vel in literis aliorum Prælatorum & Iudicum inferiorum: vel denique in Instrumentis publicis, & testimonijs ferendis.

2 Quatuor autem modis hæc falsitas in scripturis committitur. *Primo*, cum scribitur quod aliquis est præsens, cum realiter non erat. *Secundo*, cum scriptum alterius manu simulata subscribitur. *Tertio*, cum est alterius sigillo munitum. *Et quarto*, cum est contrarium scriptum, vel falsè aliquid additur.

3 Vt igitur quis de crimine falsi puniri possit, hæc tria in falsis literis requiri debent. *Primo*, mutatio veritatis. *Secundo*, dolus & culpa. *Tertio*, iactura seu damnum.

4 Quamuis itaque aduersus eos qui falsi crimen commiserunt, varie statutum in Canonibus sacris reperiatur, illos tamen cæteris acris leges infestantur, qui literis Apostolicis falsis vsi fuerint. Talium enim literarum falsarij cum fautoribus, & defensoribus suis anathemate feriuntur. Et si Clerici fuerint, omnibus officijs & beneficijs ecclesiasticis perpetuò priuabuntur: ita vt qui per se falsitatis vitium exercuerint, postquam per Ecclesiasticum iudicem degradati fuerint, sæculari potestati tradendi sint, secundum legitimas constitutiones puniendi, (hoc est de portatione, & bonorum propriorum publicatione, si liber quis fuerit; si seruus, vltimo supplicio) per quam & laici, qui fuerint de falsitate conuicti, legitime punientur.

5 At qui non ipsi falsum perfecerint, aut fieri mandarent, falsis tamen ab alijs fabricatis literis scientes vsi fuerint officijs, & beneficijs Ecclesiasticis spoliandi sunt. Laici excommunicatione innodandi, à qua tunc demum soluendi erunt, cum satisfecerint competenter. In vtrisque tamen malitia grauius quam negligentia punietur: quod & de his qui falsas literas impetrant obseruabitur.

6 Qui vero alterius Principis secularis literas aut sigillum falsauerit, is si Clericus fuerit, ab ordinibus depositus, charactere compungendus erit, ac in exilium mittendus. Sed si Prælati alicuius literis, aut iudicis inferioris falsitatem Clericus adhibuerit, ab ordine deponetur, & omnibus beneficijs exutus in monasterium ad agendum poenitentiam detrudetur, si accusationis tramite conuictus fuerit. Sed si per modum inquisitionis contra eum fuerit processum, ab officio & beneficio suspendendus erit, donec indulgentiam Sedis Apostolicæ meruerit obrinere,

## T I T V L V S XII.

### *De Homicidio.*

1 **H**omicidium, vt est delictum contra quintum Decalogi præceptum commissum, nil aliud est, quam corporis humani animati occisio facta contra iustitiam proximo debitam. Et committi potest non solum opere ipso, sed etiam mandato, consilio, auxilio, fauore, coopératione, permissione, approbatione.

2 Est autem homicidium duplex, voluntarium vnum, & alterum casuale. *Voluntarium* aliud simpliciter, & directe commissum, & aliud secundum quid indirecte, & reductione. *Similiter & casuale* aliud simpliciter, & directe, & aliud secundum quid, & indirecte, vt latius de hac re Theologi. Semper tamen est iniustum, cuiuscunque hominis, siue pagani, siue Iudæi, siue excommunicati, siue banniti.

3 Et cum non ad opera tantum sit respiciendum, sed tempus quoque & causa, tum voluntas etiam ipsa, & personarum differentia, & omnia quæ operibus accidunt sint peruestiganda, sequitur vt non sit omnium homicidiorum eadem conditio, & poena. Cunctorum vero illud atrocissimum videtur, quod *Assassinium* vulgo Itali nuncupant, cum quis libera voluntate suggerente in vijs publicis ho-



mines interficit, aut domos inuadit, horrenda inhumanitate mortem sitiens aliorum magis quam prædam aut lucrum temporale. Vnde non solum Assassini ipsi, sed etiam receptatores, occultatores, & defensores eorum, & qui per eosdem quenquam interficij fecerit aut mandauerit, dignitatibus, honoribus, officijs, beneficijs, omnibusq; bonis nudatus, excommunicationis & depositionis incurret ipso iure sententiam, & tanquam Christianæ religionis hostis à toto Christiano populo perpetuo diffidatus erit.

4 Non absimilis eum tenet pena, qui licet non per assassinium, per insidias tamen & ex proposito hominem interfecerit: qui si laicus sit, iudex eius Ecclesiasticus causam seculari iudici mandabit, vt ille iustitiam faciat, & secundum leges seculares, decretas in eum poenas statuatur. Si Clericus sit, deponetur, atque etiam, si adiacentes crimini loci valde illud exaggerent, vt iam non videatur amplius dissimulanda, aut ferenda rei proterua temeritas, laicorum manibus, sacris ei ordinibus antea ablatis, plectendus dimittetur.

5 Quod si quis latronem, vel furem peremerit, liberando se & sua, an aliqua poena sit puniendus? Et si quidem furem absque occisione comprehendere potuit, certa aduersus eum statuta poenitentia reperitur: quod si non potuit, nulla occisori erit ex necessitate iniungenda poena.

6 Idem etiam obtinebit, si casu perpetratum fuerit homicidium, vt puta, si quis necessario insistens operi arborem inciderit, & aliquis subitus transiens opprimatur: nam si neque uoluntate, nec ulla incidentis culpa factum fuerit, ut pertransiens opprimeretur, arborem incidens homicidij poenis obnoxius non erit.

7 Alia ratio est eorum, qui proprios filios oppressisseperiuntur in lecto, vel eisdem alimenta denegant, uel consentiunt denegari. Cum enim hos grauiter deliquisse non sit dubium, certorum annorum erit illis iniungenda poenitentia, quia parentes debent prouidere salutem liberorum suorum, nec habent eos quoad uitam in sua potestate.

8 Quod si filius infans, aut languidus cuiuscunque ætatis à patre, vel ab alio, patre sciente, fuerit expositus, aut eidem alimenta denegata fuerint, hoc ipso à potestate patria liberabitur. Nec tamen propterea, qui expositos susceperit, aliquod in eis ius uendicare poterit.

9 Is quoque, qui vel causa explendæ libidinis, vel odij meditatione, propter amorem scilicet, vel lucrum, sperans successionem ab intestato, viro aut mulieri aliquid fecerit, vel potandum dederit, quo minus possit generare vel concipere, vel nasci soboles, vt homicida puniendus erit, quia par est impedire natiuitatē, & eā tollere, quia in vtroq; casu infans priuatur vita. Quamquam alias si conceptus nondum viuificatus fuerit, nec vt abigeretur quisquam dolo malo fecerit, qui abortui occasionem tradidit, puniendus non erit.

10 Denique sciendum est, pro his qui quocumq; prætextu, puta tadio vitæ, morbo, furore, doloris impatientia, conscientia criminis, pudore, voluntarie, ferro vel veneno, uel suspendio, vel quolibet modo sibi mortem inferunt nullam in oblatione faciendam esse commemorationem: & Ecclesiastica eos debere catere sepultura, non aliter atque illos, qui pro suis sceleribus impoenitentes moriuntur. Quia non solum iure ciuili, & canonico, sed etiam naturali prohibitum est seipsum occidere, quæ secum quandam ordinatam charitatem habet, vt quod in alium nefas, multo magis in seipsum nefandum iudicet. Vnde etiam non sequuto effectu in isto crimine punitur, si seipsum percutiens aut vulnerans animo occidendi ab alijs fuerit detentus seu impeditus.

## TITVLVS VLTIMVS.

### *De Iniurijs, & damno dato.*

1 **C**oncludens iudicia publica quæ circa delicta in Deum, & proximum lædentia versantur, restat  
E e e hoc



402  
hoc ultimo titulo agere de iniuria, vel ab homine, vel ab aliquo animali illata, considerando diligenter quot modis committantur, & quibus pœnis puniantur. Cum aliæ iniuriæ sint personales, & alię verbales. Et personæ aliæ sint spirituales aliæ sæculares; aliæ in iurisdictione, & præeminentia aliqua positi, & aliæ simplices, & subiectæ.

2 Personalis iniuria graue delictum dicitur, & potest inferri pluribus modis. *Primo* cum quis Ecclesiasticas personas, non habens in eas iurisdictionem vllam, carceratas detineret: quod peragendo non modo incideret in iniuriarum actionem, sed etiam in excommunicationis sententiam; hoc tamen nō procedit, si in fragranti fuisset captus & remissus ad suum superiorem, quod fieri potest lege permittente. *Secundo dicitur* inferri iniuria, cum Ecclesiastica persona per vestes inuita detinetur, vt interim afficiatur aliquibus opprobrijs, & verbis contumeliosis ab alio. *Tertio* dum proceditur ad verberationem, & alapæ percussione. *Quarto* dum de possessione sua fugatur, & eiicitur contumeliose. *Quinto* dum inuaditur in domo sua, & molestijs iniurijsque aut damno aliquo afficitur. Tum & alijs pluribus modis.

3 Verbalis quoque iniuria, quæ voce profertur, similiter pluribus modis fit: sed generaliter loquendo dicitur omne id per quod alicui impropertur, & turpiloquium, execrationes, mendacia, aut maledicta ingeruntur, dicendo esse filium meretricis, hæretici, aut pagani alicuius: aut dicendo aliquem esse nugatorem, impostorē, parasitū &c.

4 Sed verbalis iniuria quæ scripto committitur, multo grauior est illa quæ conuicium voce iactat, scribensq; in alterius vituperationem carmen, aut famosum libellum, pro atrocitate criminis prudentis iudicis arbitrio pœnas luet, secundum leges ciuiles decapitationis, secundum vero Canones verberum, carceris, depositionis, & anathematis, si conuictus fuerit: mitius cum non possit probari. Sed & qui famosum libellū inuenerit, & nō statim eū cōbuserit, sed eius tenorē dolose manifestauerit, qua auctor ipse pœna plestendus erit.



5 Item alia iniuria est atrox, alia levis, & alia tolerabilis. *Atror est*, cum Clericus in sacris constitutus offert duellum, vel oblatum suscipit, & pugnat: hoc enim enorme crimen est dum vel vulneratur, vel vulnerat, aut sustibus excipitur. Aut in Episcopum, vel Abbatem suum insurgit, & contra vitam aut honorem illius coniurationem, aliquam machinatur. *Levis vero iniuria est*, quam facile quisque iniuriatus condonare potest. *Tolerabilis* demum, quæ vel statim similibus verbis aut factis, absq; commotione animi refundi potest, vel per dissimulationem subtrahi.

6 Sed quia secundum varietatem locorum, personarum, temporum & factorum iniuriæ illatæ sunt grauiiores aut leuiiores, ita quoque & poenarum; non potest præscribi certa regula & modus: sed vt crimina extraordinaria fieri solent, ita, & poenas extraordinarias merentur. Nihilominus in eiusmodi delictis hæc quatuor sunt obseruanda. *Primo*, an sit Sacerdos, vel Prælati alicuius maior. *Secundo*, an in loco sacro delictum factum, puta in Ecclesia, cœmeterio aut capella aliqua, seu Monasterio aut Sacristia. *Tertio*, an tempore celebrationis officiorum diuinorum. *Et quarto*, an per hoc officium diuinum fuerit turbatum, & scandalum aliquod fidelibus præbitum: tunc enim imponenda esset vltimi supplicij poena.

7 Læsæ quoque maiestatis crimini obnoxius Clericus, cuiuscumq; ordinis sit, deponendus est.

8 Maximum porro eius crimen æstimatur, qui S. R. E. Cardinalem hostiliter insequitur, vel percutit, aut capit: Vel socium hæc patranti se adiungit: vel fieri mandat; vel facta rata habet, aut consilium & fauorem dat, aut postea receptat, & defensat scienter. Is enim sicut læsæ maiestatis criminis reus, perpetuò fit infamis, vt nec testamenti liberam habeat factionem, nec ad alicuius bona ex testamento, vel ab intestato vocetur, quatenus ab omni successione repulsus, publicaq; repulsa confusus, minus inueniat suum malitiæ successorem. Fieri iubentur habitationes eius desertæ, vt non sit qui eas inhabitet; dari præciuntur cun-

Sta eius ædificia in ruinam, & vt perpetuam notam infamiae perpetua ruina testentur, nullo tempore instaurari permittuntur. Nullusq; eidebita reddere, nullus respondere in iudicio tenetur. Bona eius omnia fisco vel Reip. applicantur: feuda, locationes, officia, & beneficia omnia quæ ab Ecclesijs habebat, ad easdem pleno iure reuertuntur. Filij & nepotes ipsius omnibus beneficijs, ac etiam Pontificali dignitate sunt ipso iure priuati; nec ad aliquam dignitatem, vel officium publicum, aspirare possunt, nec alicuius legitimi actus capaces sunt. Multaq; alia aduersus huiusmodi sacrilegos homines per Bonifacium VIII. statuta sunt: quemadmodum & ferè easdem poenas Clemens V. contra eos sanxit, qui Pontificem quemlibet supradictis modis affecerint, insæcuti fuerint, vel ei iniurijs extiterint.

9 Mitius cum his agitur, qui in pugna, vel rixa aliquem lapide, vel pugno percusserint. Si enim ille mortuus non fuerit, sed in lecto iacuerit, vel operas exercere fuerit impeditus, qui percusserit, & opera eius, & impensas in medicos restituet. Et generaliter, si culpa tua datum est damnum vel iniuria irrogata, vel alijs irrogantibus opem tulisti, aut hæc imperitia tua, sine negligentia euenierunt, iure te super his satisfacere oportebit. Nec te excusabit ignorantia, si scire debuisti ex facto tuo iniuriam verisimiliter posse contingere, vel iacturam.

10 Quod si animalia tua nocuisse proponantur, nihilominus ad satisfactionem teneberis: nisi ea pro noxa dando damnum passis, te ipsum velis liberari; quod tamen ad liberationem non sufficit, si fera fuissent animalia, & quæ nocere consueuerant, & quam debueras diligentiam non adhibuisti, quia eiusmodi animalia non debent teneri in publico, & ubi est publicum iter. Diuersum statuitur in eo, qui vt damnum non contingeret, nihil omisit.

11 Cæteras autem delictorum species, si quæ sunt, & eorū poenas studiosus ex corpore Iuris Canonici excipiet; nos enim de his tactum diximus, quantum pro instituto



nostro necessarium esse iudicauimus. Restat vt poenarum ipsarum, quibus Ecclesia in delinquentes seuerè, vel remissè vtitur, genera & varietatem prænueremus; vt proinde sciant iudices acri iudicio æstimare, quænam pro delicti qualitate, & delinquentis statu, & conditione, omnibus maturè circumspectis, vnicuique statuenda sit.

# LIBER VLTIMVS.

*De Poenis, & Censuris Ecclesiasticis.*

## TITVLVS I.

*De Appellatione Censuræ, & Poenæ Ecclesiasticæ.*

**P**ostquam duobus libris prioribus personarum, deinde duobus sequentibus rerum Ecclesiasticarum tractatum complexi fuimus, subinde ad reliquos duos descendentes, iudiciorum tam civilium, quàm criminalium materiam & seriem explanauimus, delictorū naturā & poenas breuiter perstringentes. Cum tam ratione contumaciæ, quam etiam aliorum excessuum, Ecclesiasticis Censuris interdum aliquos innodari varijs locis admonuerimus: superest nunc, vt operi finem impo-  
nentes, de ipsis censuris hoc vltimo libro fusius, & distinctius disseramus. Et nominatim hoc primo titulo, quid sit Censura, & quæ eius etymologia: tum quoduplex sit, & quot modis ab Ecclesiasticis scriptoribus vsurpetur, dilucidè explicemus.

**2** Est igitur *Censura*, poena spiritualis fori exterioris Ecclesiæ, qua spiritualium vsus impeditur, vt à contumacia discedatur. Vel, est vinculum spirituale Ecclesiasticum ordinatum ad salutem spiritualium, tum illius qui ligatur, tum



tum etiam ad salutem aliorum . Nam licet ab Ecclesia inferantur poenae ieiunij , verberum , seruitutis , exilij , pecuniarum , atque carceris , istae tamen non dicantur poenae spirituales , nec proprie censurae appellantur Ecclesiasticae , sed interdum poenae corporales duntaxat adnexae spiritualibus pro grauitate criminis seu delicti cuiusque , veluti accidens suo subiecto ; Anima enim cum spiritus sit purus , spirituali poena puniri debet , quae ad differentiam poenae corporalis proprio vocabulo Censura Ecclesiastica appellatur . Et fieri non debet sine causae cognitione , per eum , qui fori contentiosi iurisdictionem habet : vnde poena quae à laicis infertur , censura non est : neque illa quam Sacerdos in foro poenitentiali iniungit , licet spiritualis sit .

3 *Dicitur autem Censura à censendo* , quod nomen in vsu fuit apud antiquos Romanos , in duplici significatione , vt primo pro Censoris dignitate , & deinde pro censione , sententia , seu correctione ipsius censoris acciperetur .

4 Et est triplex , Excommunicatio scilicet , Suspendio , & Interdictum . Excommunicationi subiiciuntur tam laici quam clerici : Suspendio soli clerici afficiuntur : Interdicto vero & loca , & personae subiiciuntur . *Excommunicatio est* , à communione fidelium , & sacramentorum exclusio . *Interdictum Ecclesiasticum est* , à certis sacramentis , & omnibus diuinis officijs , & sepultura Ecclesiastica facta , prohibitio . *Suspendio denique est* , inhabilitas quaedam ordinum , vel officiorum executionem impediens .

5 Excommunicatio omnibus alijs censuris maior atq; grauior est : tum quia inter homines esse , & hominum carere commercio maxima poena est ; tum quia per eam quis traditur Satanæ in interitum carnis ; tum denique quia priuat medijs ad vitam animae oportunis , vt Sacramentis , & suffragijs Ecclesiasticis , ac per consequens profanis etiam Ecclesiae bonis caremus .

6 Censura igitur cum sit quaedam poena , consequenter dicitur hominem priuare aliquo bono , vel executione officij , vel communione rerum , & hominum . Si primum , aut

ho-

homo priuatur simpliciter, & si non pertinet ad censuram aut priuatur ad tempus & hinc datur suspensio. Si secundum; aut respicit hominem; vt est persona priuata & hinc habetur excommunicatio; aut est pars vniuersitatis; & inde oritur interdictum.

7 Ceterum, maxima iure nostro in Clericum poena est degradatio, id est omnibus gradibus; & ordinibus spoliatio: quæ etiam in Clericum minorum ordinum cadere potest. Ea; est duplex: *altera* quæ solis verbis fit, & depositio simplex appellatur: *altera* quæ non tantum verbis, sed etiam factis celebratur, ideoq; actualis appellatur degradatio. Et Episcopo deponendo duodecim Episcoporum præsentia opus est, quæ tamen sine autoritate Summi Pontificis fieri non debet, vt supra libro primo diximus: Præbytero autem deponendo olim sex Episcopi interesse debebant; Diacono, & Subdiacono tres, præter proprium ipsius Episcopum. Nunc sola proprii ipsorum Episcopi sententia sufficiet, conuocatis Abbatibus alijsq; Prælati & religiosi personis, & literatis suæ Diocesis.

8 Multa autem solennitas in solenni degradatione requiritur, quæ tam ex Concil. Carthaginensi secundo, quàm ex Bonifacii Octauil responso ad Arelatensẽ Episcopum præscripta est. Eo enim modo fit, quo exauthorari solet, qui in militiam armatam adscriptus est. Nam sicut illi militaria detrahuntur insignia, atq; à militia, & castris exturbatur priuatus consortio & priuilegio militari: ita Clericus in cælestem militiam adscriptus, singula ordinum, quos receperit insignia reddere compellitur. Qua degradatione perfecta exinde curiæ seculari præsentis est tradendus, vt eum in forum suum recipiat, & poenas quas ei visum fuerit infligat: habita eius erroris tamen aliqua miseratione. Quod vt iudex secularis faciat, & præsertim ne mortem ei inferat, à iudicibus Ecclesiasticis est impensè monendus, & rogandus.

9 Simplex autem depositio nullam facti solennitatem desiderat, quippe eius executio est degradatio actualis: &



si non tamen semper depositio verbalis fiat; quo actualis executionem secum trahat; quo casu multa ex supradictis remitti aliqui censuerunt. Non solet autem depositio nisi pro grauibus & capitalibus delictis inuri, & nisi legibus Canonicis cautum sit, & grauius etiā negocium esse oportet, vt actualis degradatio fiat. Et ex his causis fieri potest videlicet propter hæresim, crimen falsi, schisma indomitū, homicidium atrox, puta parricidiū, vel Episcopi, aut Presbyteri cedem.

10 Carcerem quoque ad perpetuum damnatio non infima est inter poenas, quæ hoc iure irrogari solent: nam etsi reis custodiendis magis, quam puniendis, carceris angustiae inuentæ sint; iure tamen nostro hic quoque carcerū vsus pro delinquentium supplicio est receptus. Atque hæc poena capitalibus interdum annumeratur, eiq; supplicio quàm simillima est, quo seculares vtuntur, dum quempiam in metallum, vel ad triremes damnant: & in eum qui depositus fuerit exerceri potest, his videlicet casibus, quibus in foro laicorum vita adiungetur. Potest tamen etiam ad tempus fieri in carcerem relegatio.

11 Item beneficiorum ademptio grauis pœna censetur nec nisi pro grauibus delictis imponi solet, nec nisi delictū eam priuationis pœnam mereri in iure sit expressum: vt contingit etiam, cum agitur de aliquo priuando potestate eligendi, vel præsentandi. Et in bonorum quoque publicatione hæc locum habent.

12 Supplicij etiam loco detruduntur fontes, quandoq; in arctum Monasterium, extra quod eis facultas non sit exiliendi, quod ferè post depositionem factam contingit. Hinc iudicari potest, ex grauissimis duntaxat delictis hanc pœnam irrogari solere.

13 Item possunt Clerici notis, & stigmatibus compungi, dum citra sanguinem id fiat, idq; post depositionem duntaxat. Seruitutem quin etiam in pœnam interdum Canones irrogant. Verberibus quoque, & flagellis fontes affici possunt, dum moderate id fiat citra sanguinis effusionem,



nem, & præsertim citra vitæ, & membrorum periculum;

4 Mittuntur etiam interdum in exilium delinquentes ex Iuris Canonici Constitutionibus. Alijs admititur in poenam priuilegium Clericale. Indiciuntur ieiunia, & pecuniariæ multæ irrogantur, quæ tamen pauperibus aut pijs locis, non verò vsui iudicum adscribendæ sunt. Sunt & aliæ poenæ complures, quæ iudicum arbitrio pro varietate delictorum inferuntur, sed non vocantur censuræ. Nam hæ tantummodo tres sunt, vt supra admonuimus, Excommunicatio, Suspendio, & Interdictum, de quibus mox subiiciemus.

## TITVLVS II.

### *De Excommunicatione.*

1 **P**rimum locum inter censuras Ecclesiasticas Excommunicatio habet, vel quia est in vsu frequentior, vel quia reliquæ præsupponunt eam, & aliquo modo dependent ab ea: quæ sicut medicinam affert eam metuenti, atque ut decet magni facienti, sic contra, si fuerit contempta, mortem æternam inuehit, nisi resipiscat, cuique delinquenti.

2 Est igitur Excommunicatio censura Ecclesiastica, à Canone uel Iudice prolata, & inflicta, priuans Christianum legitimam communionem Sacramentorum, & quandoque hominum. Vnde hoc nomen accepit, quasi extra communionem: & æquiparatur banno dato contumaci, quod pariter dicitur medicinale, quia per inobedientiam fit. prout & excommunicatio.

3 Excommunicationum duæ sunt species, maior scilicet, & minor. *Minorem*, per quam quis à sacramentorum participatione conscientia, vel sententia arceretur, non vero hominum consuetudine. *Maiorem*, per quam quis non solum à sacramentorū excluditur perceptione, verum etiam à

communione fidelium, quæ ab omni actu legitimo separat ac diuidit: & alio nomine anathema appellatur.

4. Rursus excommunicationum alia Canonis, alia Iudicis. *Canonis est*, quæ quis ab ipso solum Canone absque iudicis ministerio innodatur: quæ etiam alio vocabulo, latæ sententiæ excommunicatio nuncupatur. Complures enim casus sunt, in quibus nulla expectata iudicis prolatione, ipso iure delinquens excommunicationis vinculis innodetur. Exempli causa. Si quis in clericos, regulares monachos professos, vel nouitios, vel conuersos, violentas, & impias manus iniecerit, ipso iure Canonis incurreret sententiam, à qua præterquam à Romano Pontifice, vel eius de latere legato, à quoquam absolui non poterit.

5. Sed etsi manus quis violentas non iniecerit, inferenti tamen, vel auctor, vel fautor, vel adiutor fuerit, aut factum ratum habuerit, pari poena illum plectendum Catholica sanxit auctoritas, delinquentibus fauere interpretata, qui cum possunt manifesto sceleri desunt obuiare.

6. Interdum etiam si nullam corporis læsionem Clericis quis intulerit, excommunicationis tamen poenam non euadet: ut puta, si laicus in publica, vel priuata custodia illos detinuerit, vel in vincula coniecerit, nisi tamen id de mandato faciat Prælatorum, quorum illi sunt iurisdictioni subiecti: tunc enim citra excommunicationis metum, capere clericos, & ad iudicium violenter ducere laici poterunt; cum hoc non ipsi, sed illi quorum autoritate hoc faciunt agere videantur. Dum tamen non amplius eorum se extendat violentia, quam defensio Clericorum exigit.

7. Item excommunicatio diuiditur in iustam, & iniustam. *Iusta dicitur illa*, quæ fertur à legitimo iudice ob iustam causam, seruatis debito ordine, & fine. *Iniusta est illa* cui deest aliqua ex conditionibus assignatis excommunicationis iustæ.

8. Et hæc item iniusta excommunicatio fit dupliciter iniusta, aut accidentaliter, cum deest illi aliqua conditio; aut substantialiter, cum deest illi causa, quæ est veluti anima



excommunicationis . Vtraque harum fit nulla quinq; modis . *Primo* quando fertur à non iudice : vel à iudice excommunicato nominatim , & publicato . *Secundo* quando fertur contra tenorem privilegiorum . *Tertio* quando fertur post legitimam appellationem . *Quarto* quando continet expresse errorem , excommunicando illum qui non fecit delictum , loco alterius qui fecit . *Quinto* quando iudex excommunicat participantes cum excommunicato , non tamen eos nominat expresse .

9 Cum vero dicitur complices, fautores, & auxiliares percutientium clericos , eandem incurrere excommunicationem quam incurrit & ipse delinquens , intelligendum est , cum assistunt & iuvant percutientem aut violentiam inferentem . Qui vero post delictum auxilio sunt percussori , vel fauprem aliquem præstant , vt eum à iudice liberent , illi non incidunt in excommunicationem , quia non dant operam delicto , sed delinquentē , vt à peccato resurgat , & reconcilietur offenso , iuvant pro posse suo ne poena puniatur temporali .

10 Qui delicto assistit , vel dat auxilium volenti aliquē verberare , vel occidere , talis licet non excusetur à poena temporali , ex quo sciebat delictum committendum ; excusabitur tamen à poena excommunicationis , quia ne sciebat illud delictum fore contra clericum qui verberatus aut occisus fuit . Quemadmodum & ille qui volens percutere laicum , percussit Clericum , ignoranter non erit excommunicatus .

11 Item si quis mandaret vt Clerico inferatur iniuria realis , vel verbalis , & mandarius excedens mandatum faceret illi iniuriam personalem , tunc mandans non erit pro delicto mandatoris excommunicatus . Sicut nec capiens eum non incurrit excommunicationem vt eum præsentaret suo Superiori quam primum poterit . Vel quando detinet eum , cum videt resolutum delictum velle committere vel seipsum occidere .

12 E contra , si Abbas imperet laico , vt monachum etiā



412  
causa disciplinæ verberet, vterque incidit in excommunicationem. Nam si disciplinæ regularis gratia id faciendum sit, vel Abbas id per seipsum faciet, vel si necessitas urgeat, per clericum, vel monachum id fieri iubebit.

13 Percutiens vero clericum, quem cum vxore, sponsa sua, matre, sorore, aut filia turpiter se gerentem innuerit, in Canonem latæ sententiæ non incurrit. Ignoscit enim lex iusto dolori, licet occidere eum non permittant Canones. Idem statuitur, & de eo qui Clericum percusserit, quem probabiliter ignorabat esse Clericum, quia incedebat in habitu non-congruenti ipsi clerico, & non deferbat tonsuram clericalem. Item quando quis causa defensionis clericum percutit inuasus ab eo, vel res suas rapi nō permetteret ab eo qui defensio rei equiparatur vitæ. Modo nō sit res parua. Alias etiam occidens in his casibus (dico in ipso actu inuentionis) non solum erit tutus à poena excommunicationis, sed nec puniri potest pro tali delicto, quia frustra implorat Ecclesiæ auxilium, qui in Ecclesiam ipsam committit. (Hinc est quod cognoscens monialem incedentem in habitu laicali, non punitur tanquam stuprans monialem.) Quod si percussio hæc fieret ex intervallo, post delictum commissum, percutiens incurreret excommunicationem.

14 Item si qui ratione officij, quod obtinent in Ecclesia, aut si Clerici seniores pueros, vel adolescentes in minoribus ordinibus constitutos diuinum turbantes officium: vel etiam si qui magisterij, vel prælationis obtentu subditos, & scholares correctionis causa percusserint, excommunicationis sententiam non incurrent. Quod & de his intelligendū est, qui aliquos de familia sua, vel propinquos inferiorum graduum simili modo, vt ab excessibus prohibeantur, & scientia, bonisq; moribus informantur, corrigendos duxerint: & alijs casibus compluribus. Sic & iudex compescere potest omnes turbantes, & impediētes iurisdictionem suam. Quod si vero excederet modum correctionis grauitèr, tunc iam esset excommunicatus Insuper-

perioribus enim gradibus constitutus liberatur à patria potestate, & à percussionibus, vt deferatur sacro ordini.

15 Quod autem supra diximus, ab hac excommunicatione, ab alio, quam ab Apostolico, aut eius Legato absolui neminem posse, non est perpetuum. Nam si quis excommunicationis latæ sententiæ vinculis innodatus in mortis articulo constitutus reperiatur, aut capitales habeat inimicitias, aut nauigaturus est mare, aut conflagrare deberet cum hoste in acie, vel per loca insidiosa, transiturus, vel obsessus ab hoste, vel crudelitatem tyranni potentis timeret, aut senex, & valetudinarius esset, membris destitutus, vel contractus, pauper & mendicus, aut alias iustas excusationes, ita vt sine periculo, Apostolico se nequeat conspectui præsentare, licebit Diocesano Episcopo, & cuicunque sacerdoti (etiam non approbato, si alius inueniri non potest) absolutionis gratiam sibi impertiri. Periculo tamen & impedimento cessantibus, quamcitò commodè poterunt ad Sedem Apostolicam se præsentabunt, mandatum illius super excessibus, pro quibus excommunicati fuerunt humiliter recepturi, & satisfacturi. Mulier tamen non est obligata pro petenda absolutione accedere ad Sedem Apostolicam.

16 Si vero non enormis, sed modica, & leuis iniuria fuerit clericis irrogata, inferens per Episcopum absolui poterit. Item ætatis intuitu iuris rigor mansuetudine temperatur. Vnde si in pueritia constitutus in Canonem inciderit sententiæ promulgatæ, siue ante, siue post pubertatem sese absolui postulet, diocesanus Episcopus absolutionis beneficium impertiri poterit.

17 Monachi quoque, & alij regulares quomodocunque dum tamen non in Episcopum aut Abbatem aut Clericum sæcularem manus violentas iniiciant, in claustro sese inuicem percusserint, non ad Apostolicam Sedem remittendi, sed secundum prudentiam proprii Abbatis coercendi erunt. Quod si Abbas non sufficit, Episcopus adhibendus erit. Si vero monachum alterius monasterij percusserint, tunc



utriusque monasterij Abbas cōcurrere debet in absolūdo.

18 Simile statuitur de monialibus: nam si vel in se inuicem, vel in conuersas suas, aut etiam in clericos violentas manus iniecerit, ne contra muliebris sexus verecundiam, regularisq; obseruantiae decorem peregrinari compellantur, per Episcopum in cuius dioecesi monasteria fuerint, absolutionem consequentur (non Abbatissa, quia sexui foeminino clauēs Ecclesiae non sunt commissae) qui ex causa certis casibus absolutionem potest alteri delegare.

19 *Iudicialis vero excommunicatio est, quae iudicis sententia infertur; siue ille ordinarius sit, siue delegatus. Sed excommunicationis sententiam praecedere debet trina monitio intra 15. dies, & debet ferri in scriptis, ita vt causam, expresse ob quam profertur contineat, & copia debet dari petenti; Contra vero faciens per mensem suspensus existit. Qui vero cum excommunicato denunciato, vel manifesto percussore clericis communicauerint, ipso iure excommunicationem incurrunt, vt hi versus habent.*

*Os, orare, Vale, communicatio, mensa negatur;  
Si quis pro delicto Anathema efficiatur.*

Hoc est, prohibetur osculum pacis & amplexus, locutio per se, & per nuntium, & per epistolas, (nisi in ijs quae ad salutem excommunicati pertinent) orare cum illo in templo aut missam simul audire, salutare ipsum, inuicem comedere. Debentq; iudices Ecclesiastici monere iudices saeculares, vt excommunicatos ab agendo, patrocinando, & testificando in suis curijs, & iudicijs repellant; donec constet de absolutione.

20 Cum autem non communicamus uiuo, nec mortuo communicabimus: nisi dum uiueret ostenderit signa poenitentiae: tunc & absolui mortuus potest, & sepultura Catholica cohonestari; haeredesq; eius, vt pro ipso satisficiant, si sponte nolint, Ecclesiastica censura compelli poterunt.

21 Sed etsi, qui pro sacrilega manuum iniectione in edictum excommunicationis incidit, denunciatus quidem

non



non fit, sed de patrato scelere publica laboret infamia, nemò sibi pari ratione cōmunicare debet nisi, vel ad arbitriū Episcopi de hoc se purgauerit, vel ad cautelam absolutionis beneficium consequatur: Nisi forte soli sibi de facinore constet: hoc casu quamdiu toleratus ab Ecclesia, priuatim tantummodo à te vitandus erit, vt saltem verecundiæ rubore suffusus pro latenti excessu satisfacere compellatur.

22 Criminosa igitur participatio cum excommunicatis (dando videlicet auxilium, consilium, vel fauorem) implicat participantem eadem excommunicatione. Participatio vero non criminosa (puta in mensa, in sermone &c.) alligat participantem minori excommunicatione, à qua per ordinarium absolui potest. Si vero in ista excommunicatione minori indurescat, post iudicis monitionem, in maiorem excommunicationem incurrer, sicut & ille qui in contemptum Ecclesiasticæ discipline commercium habet cum excommunicatis. Quod & in suspensionis, & interdicti sententijs obseruandum erit.

23 Interdum tamen excommunicato communicans, neutris excommunicationis vinculo obstringitur, vt accidit in eo, qui omni illo conuersatus fuerit, quem excommunicatum propabiliter ignorabat. Vnde vt excusationis causa omnibus auferatur, prouidere debent Episcopi, vt excommunicatorum omnium nomina, tam suis parochianis, quam vicinis Episcopis pariter indicent, eaq; in celebri loco posita, pro foribus Ecclesiæ cunctis conuenientibus inculcent, vt huiusmodi adhibita diligentia excommunicatis Ecclesiasticus aditus adimatur.

24 Omnes autem qui ante prolationem sententiæ tenebantur excommunicato communicare, tenentur etiam post prolatam excommunicationem participare, nullum incurrentes excommunicationis periculum, vt sunt, vxores, filij, serui, ancillæ, rustici, & quicunque ei deseruiunt. Item procuratores, oekonomi, factores, peregrini, & viatores qui non habent vnde emant aut vbi hospitentur, transeundo, nisi in domo excommunicati. Dum tamen in his cri-

criminibus, (in talibus enim nulla consentiendum aut obediendum est ) pro quibus illi excommunicatione sunt notati, non communicent .

25 Prædicatores quoque, præsertim qui alias sustineri non possunt , ab excommunicatis , & alienorum bonorum detentoribus, eleemosynam, non tamen oblationes , quia eleemosyna recipitur in secreto , oblatio in publico : unde ne Ecclesia fauere videatur excommunicatis , & detentoribus rerum alienarum , non debet ab eis oblationes recipere licitæ percipere possunt . Idem iuris est de ijs, qui adeo sunt rudes , & rustici vt eorum consilio verisimiliter scelera perpretrari non possunt : aut qui cum ijs communicant qui participationem habent cum excommunicatis .

26 Coactus quoque communicans excommunicatis, labe excommunicationis non inquinatur . Sed communicans metu , excommunicationis poenam non euadet , cum nullius metus obtentu mortale peccatum quis incurere debeat .

27 Hoc neminem lateat , non debere in Collegium , vel Vniuersitatem proferri excommunicationis sententiam vt animarum periculum euitetur , quod exinde sequi posset , cum nonnunquam contingeret innoxios huiusmodi sententiam irretiri ; debet igitur in illos tantum ex collegio, vel vniuersitate , quos in culpa esse constiterit , promulgari . Addiditq; Synodus Trid. vt excommunicatus quicumque , si post legitimas monitiones non resipuerit , non solum ad Sacramenta, & communionem fidelium , ac familiaritatem non recipiatur : sed si obdurato animo censuris annexus in illis per annum inforduerit , contra eum etiam tanquam de hæresi suspectum procedi possit .

28 Sententia vero excommunicationis ab homine prolata, ab eodem etiam auferri potest, à quo fuerit prolata . Et in minoris quidem excommunicationis vinculo dissoluendo alia solennitas non exigitur , quam vt Sacerdos detectam sibi ab excommunicato , causam excommunicationis in Sacramento Poenitentiae cognoscat , & eum absoluat ,

uat, restituendo cum Ecclesiasticis Sacramentis, quibus fuerat priuatus.

29 In maioris autem Excommunicationis relaxatione maior etiam solennitas adhibenda est, siue à lege, siue ab homine inflicta sit. Nam primum non ante absoluendus est, cum offensa est manifesta, quam cum iuramento promiserit, se Ecclesiasticis mādatis, vt supra diximus, pariturum, & de omni damno illato, omniq; offensa plenè satisfecerit, vel saltem cautionem cum iuramento præstiterit (vbi tunc de damni summa non constaret, vel vbi soluendo non esset) se satisfacturum. Quibus peractis ille, qui absoluendus habet, vel cui mandatum sit à potestate habente, huiusce negotij causa aditus excommunicatum coram se, suppliciter prostratum seruata forma absoluet.

30 Conceditur tamen & quandoque absolutio ad cautelā, vt cum quis sententiam excommunicationis in se latā asserit esse nullam. Vel iudicem esse incompetentem, vel excommunicatum, vel intrusum, aut à iurisdictione suspensum, alijsque modis: que relaxatio quidem ad cautelam cōcedenda est, quamuis ei excommunicator, vel aduersarius se opponat. Nisi cum pro manifesta dicat offensa excommunicatum: quo casu terminus octo dierum indulgebatur sic dicenti, vt si probauerit, quod opponit, nō relaxetur sententia, nisi prius sufficiens fiat emendatio, vel cōpetens cautio de parendo iuri, si dubia offensa sic proponatur. Cum vero ad probandum admittitur, qui absolutionem ad cautelam impetrauit, pendente probationis articulo in cæteris, quæ vt actor in iudicijs intentauerit, interim euitādus est, sed extra iudicium tamen in officijs, postulationibus, & electionibus, ac alijs legitimis actibus est admittendus.

31 Qui vero in causis exceptionem excommunicationis opponit, speciem illius, & nomen excommunicatoris exprimere tenetur, quam intra octo dierum spatium (die in quo proponitur minime computato) probare appertissimis documentis debet. Quod si non probauerit, iudex in causa procedere non omittat, reum in expensis, quas actor ob



hoc diebus illis se fecisse docuerit, præhabita taxatione damnans.

32 Si verò postmodum instantia durante iudicij, & probationis copia succedente, de eadem excommunicatione, vel alia iterum excipiat, & probetur, actor in sequentibus excludatur, donec meritis fuerit absolutionis gratiam obtinere; his, quæ præcesserunt, nihilominus in suo robore duraturis.

33 Ut tamen ultra duas vices hæc exceptio non opponatur, præterquam si excommunicatio noua emerferit, vel euident, & prompta probatio superuenerit de antiqua. Sed si post rem iudicatam talis exceptio proponatur, executionem impedit; sententia tamen quæ præcessit, non minus robur debitum obtinebit: eo tamen saluo, quod si actor publicè excommunicatus sit; hocq; iudex nouerit, quando-cumque, & si de hoc reus non excipiat, iudex repellere actorem ex suo officio debet.

34 Absolutio surreptitia non tenet: Quinimmo si ordinarius sciat per surreptionem impetratam ab Apostolica Sede absolutionem, debet remittere perperam absolutum ad Sedem Apostolicam, Ecclesiastica censura eum compellens. Si vero hoc sibi non constat, sed suspicetur, debet absolutum cogere ad purgationem præstandam.

35 Illud etiam admonendi sumus, quod licet vi, vel metu facta regulariter mero iure teneant, si quis tamen excommunicationis, suspensionis vel interdicti sententia, absolutionis, aut reuocationis cuiuscunque beneficium, per vim, vel metum cadentem in virum constantem, puta mortis, vel cruciatus, extorserit, viribus omnino cariturus. Quin potius, ne sine vi dicta violentiæ crescat audacia, qui absolutionem, vel reuocationem vi, vel metu extorserit, quasi propria confossus sagitta iteratæ excommunicationis sententiæ subiacebit, vt per Concil. Trid. statutum est. Idq; non solum quando extorquet absolutionem à censura contra se lata, sed etiam quando lata esset contra alium: Siue extorqueat per se, siue per alium. Quod si verò per vanum metum  
fuit

419

fuit absolutior compulſus , non habebit locum hæc poena .  
Et hæc de excommunicationis ſententia deliberaſſe ſufficiat ;  
nunc de Suspensione ſecunda ſpecie Censuræ Eccleſiaſticae  
paucis diſpiciamus .

## T I T V L V S III.

### *De Suspensione .*

1 **S**uspensio eſt Censura Eccleſiaſtica, qua Clericus  
tàm ſecularis, quam regularis, ob aliquam culpã  
à iure, vel à iudice, à beneficiis, officiis,  
vel Eccleſiaſticae iuriſdictionis executione, in totum, vel in  
partem, perpetuò vel ad tempus prohibetur .

2 Triplex autem eſt Sufpenſio, ab officio, à beneficio,  
& ab utroq; ſimul . Sed qualiſcunq; ſit, ſemper in ſcriptis  
ferri debet, & cum cauſa in eis expreſſa, & monitione præmiſ-  
ſa . Nullam autem earum ſuſpendit appellatio ſubſequuta,  
ſed quamlibet annullat præcedens .

3 Item alia Sufpenſio eſt Canonis , alia Iudicis , ſicuti  
Excommunicatio, & Interdictum . *Canonis eſt*, cum quis ob  
Simoniam , vel ob notoriam fornicationem , vel aliud cri-  
men ipſo iure à ſui executione ordinis , vel officij arcetur  
puta , ab oblatione altaris , à conſecratione Episcoporum ,  
aut preſbyterorum , ab adminiſtratione Sacramentorum ,  
&c. *Iudicis Sufpenſio eſt*, ut cum ſententia quis per iudicem  
lata ab eadem executione ex cauſa remouetur .

4 At ſi crimen per ſententiam , vel per confeſſionem  
factam in iure, aut per rei ipſius evidentiam notorium non  
ſit: etſi quilibet pro mortali peccato quoad ipſum ſit ſuſpẽ-  
ſus, quo ad alios tamen pro ſuſpenſo non habetur , ideoq;  
in officijs Eccleſiaſticis vitandus non erit .

5 Eſt autem ſuſpenſio ( velut Eccleſiaſtica Censura  
conſiderata ) reſpectu quodam , aliquanto quam excom-  
municatio, vel interdictum ſtrictior : quippe quod, & ex-  
communicatio, & interdictum, non ſolum Clericos, verum  
etiam laicos innectere poſſunt : At ſuſpenſio, cum nihil

aliud sit, quam inhabilitas quædam ad exequendos ordines, & officia Ecclesiastica, nullos præterquam ipsos Clericos attingere potest. Nec enim ulli eius ordinis, vel officij, cuius est penitus expers, administratio verari, & interdici potest.

6 Cauebunt igitur Clerici, iudices, & Ecclesiarum Prælati, ne pœnam hanc suspensionis incurrant, scituri, quod si ea durante sese diuinis ingesserint, secundum canoniarum sanctionum tenorem, & distractionem, irregularitatis laqueo sese inuolent, à quo interim non nisi per Summum Pont. liberari poterunt.

7 Suspendio vero quæ infligitur à Confessario in foro pœnitentiali, cum non sit verè cēsura Ecclesiastica, quamuis seruari debeat, contraveniendo tamen non inducit irregularitatem.

8 Item si quis violat suspensionem fluentem ex defectu corporis, vel animæ, quæ potius, & verius est irregularitas quam suspensio, non incurrit nouam irregularitatem. Est autem irregularitas nota seu canonicum impedimentum, ex facto seu defectu proueniens, quo quis tam ad Ecclesiasticos ordines promoueri, quam promotus in iisdem ministrare prohibetur. Quod qualiter accadat, supra libro secundo titulo sexto satis prolixè diximus.

9 Suspendus ab ordine nō dicitur suspendus ab actu iurisdictionis, quæ fundatur in ordine, qui specie differt à iurisdictione. Vnde sacerdos suspendus ab ordine potest absoluerè ab excommunicatione, sed nō solemnibus precibus adhibitis, nec à peccato, cū hoc sit de ordinis illius iurisdictione. Et suspensius ab ordine pōtificali, intelligitur suspensius quo ad proprios ordines pōtificales, nō autè iurisdictionis, vnde poterit iudicare, instituere, corrigere, & excōmunicare.

10 Suspendio à voce actiua, & passiua & à Pontificalibus, potest suspendi per subsequentem appellationem legitimam, hæc enim valde differunt à suspensione ab officio diuino, & ingressu Ecclesiæ, quæ non suspenduntur per subsequentem appellationem. Ideoq; cum in iure non sit mētio



de ipsis, non est de illis intelligendum, neque de suspensione à beneficio, vel ab eius administratione.

11 Suspendo à beneficio, inualide fieret collatio alterius beneficii. Taliter autem suspensus non fit irregularis si diuina faciat, sed tamen prohibetur percipere fructus beneficii. Quod tamen locum non habet quoad fructus patrimonij, ad cuius titulum fuit ordinatus.

12 Suspendus ad tempus, sed non expresso temporis spacio, intelligitur suspensus in decennium, à simili damnato ad tempus in metallum, qui decennium eam poenam patitur. Verum quo persona est dignior, eo in dubio dicitur de iure magis priuilegiata, & propterea optima ratione Innocentiana Constitutione cautum est, ne Episcopi eorumq; superiores, vllius constitutionis sententiae, siue mandati occasione, interdicti, vel suspensionis sententiam (nisi in ipsis de Episcopis expressa mentio habeatur) ipso iure incurrant: esset enim hoc nimis periculosum, ob Pontificalis officij, quod frequenter exercere compelluntur, executionem.

## T I T V L V S I V.

### *De Ecclesiastico interdicto.*

1 **I**nterdictum est, sententia à Iudice Ecclesiastico lata, quae diuina officia prohibet palam celebrari, & Sacramenta Ecclesiastica ministrari.

2 Interdicti autem solent, vel homines, vel loca, vel vtrumque Et homines quidem Interdicto supponi possunt, vel generaliter, vel specialiter, vel singulariter.

3 Generale Interdictum hominum dicitur, cum alicuius Regni, vel Ciuitatis, vel Castri populus distringitur; quo casu locus ipse interdicto non continetur, nec clerus. Quare poterit tunc in Ecclesijs non secus, ac prius celebrari, peregrinis admissis, interdictis vero hominibus exclusis.

4 Speciale autem contra homines dicitur Interdictum, cum

cum aliqua multitudo sub certo vocabulo comprehēsa, sed in populo tamen inclusa, interdicitur, veluti Collegium, Capitulum, Vniuersitas, Confraternitas: quo interdicto singuli eius congregationis homines dicuntur adstricti, tam Clerici, quam Laici.

5 Singulariter vero dicuntur interdicti, qui non sub nomine collectiuo multitudinis, sed nominatim sunt expressi, vt quicumque aliquid commiserit, interdictus sit.

6 Hoc autem interdicti genus in homines contortum quocumque ex tribus supradictis modis, hominem quocumque se transferat vsque comitatur, nunquam eum deferens, vt vbicumque locorum sit, ab illis actibus arceatur, qui ex interdicticausa sunt prohibiti.

7 Similiter loca tribus modis interdici possunt: Generaliter specialiter, & singulariter. *Generale loci interdictum est*, cum Prouincia, Regnum, vel Dioecesis interdicuntur. *Speciale*, cum Ciuitas, rus, castrum. *Singulare*, cum Ecclesia, Sacellum aut Oratorium aliquod. Quibus locorum interdictis nunquam homines continentur, sed possunt extra hæc loca interdicta diuinorum celebrationi interesse, Ecclesiastica Sacramenta accipere, & sepulturæ Ecclesiasticæ concedi. Nisi ex his sint, quorum odio ea loca interdicta fuerint: quo fit, vt cum propter delictum Domini, vel Rectoris ciuitas est interdicta, aut alius locus, ciues tamen, & indigenæ ciuitatis illius, qui in vitio non sunt (dummodo & ipsi in vltionem Domini aut Rectoris non fuerint interdicti) possunt extra locum interdictum diuinis interesse.

8 Est autem interdictum duplex: aliud iuris, & aliud iudicis. Iuris ipsius dispositione interdictum inducitur, cum in Ecclesia sanguinis humani effusione polluta, aut simoniace consecrata celebrare iure vetatur. Iudicis vero sententia interdictum inducitur, cum competens iudex ex aliqua causa terram, vel homines à diuinis arcendos pronunciat, generaliter, vel specialiter, vt supra iam diximus.

9 Sciendum vero, quod loco principali interdicto, censetur interdictus esse accessorius vicinus, & contiguus, vt  
sub-

suburbia ciuitati adiacentia, & prædia circumuicina, Ecclesiæq; extra urbem ædificatæ. Alioquin, si in illis locis posset licite celebrari, Ecclesiastica censura facile contemui posset. Eadem ratione, si Ecclesia interdicto sit supposita, nec in capella ei adnexa celebrari, nec in cæmeterio eiusdem Ecclesiæ sepeliri poterit. Similiter interdicta vniuersitate, singuli de vniuersitate censentur interdicti esse, nec interdictum reddatur elusorium.

10 Si tamen sententia Interdicti proferatur in populum, Clerus interdictus non intelligitur, nec è conuerso: vnde interdicto alterutro, ad diuina licite alter admittitur.

11 Excepti vero casus sunt, si qui ad Baptismi, Chris-matis & Poenitentiae, Sacramenta, vel ad verbum diuinum audiendum admitti velint, tam si infirmi sint, quam si sint in bona valetudine constituti. (Quod tamen in his, qui interdicto causam dederunt, non obtinet indistincte; nisi prius dederint idoneam cautionem de satisfaciendo) Sed & alia quædam interdicti tempore Canones permittunt, vt celebrare ianuis Ecclesiæ clausis, & excommunicatis interdictisq; exclusis, sine campanarum tinnitu.

12 Quatuor autem solennibus anni diebus ianuas quoque patefieri Ecclesiæ, campanas pulsari, & clara voce officia celebrari, concedit Bonifacius VIII. qui dies sunt, Natalis Dominici, Paschæ, Pentecostes, & Assumptionis Virginis sacrae. Addito etiam per Martin. V. & Eugenium IV. Solenni Corporis Christi die vsque ad eius octauam.

13 Quæ quidem supra dicta, de Interdicto generali, vel speciali, intelligenda sunt, non de singulari. Nā si singularis aliqua Ecclesia interdicta esset, in ea, nec prædictis diebus solennibus ea licerent, nec alijs diebus etiam submissa voce celebratio officiorum permetteretur.

14 Et licet regio sit Interdicto supposita, potest tamen Chrisma die Coenæ Domini confici. Et matrimonij celebratio non censetur esse adempta. Sed vnctio extrema, sepultura Ecclesiastica, & diuinorum celebratio sunt prohibita, nisi concessa quibusdam sint ex privilegio.



15 Quod si quis à Summo Pont. hoc privilegij, tantum Clericus, quam Laicus, cuiuscumq; ille dignitatis, gradus, conditionis, aut status sit, retulerit, ne interdicti à quocunque, vel excommunicari possit; nec terræ, vel Ecclesiæ ipsius Ecclesiastico interdicto supponi sub quacunque forma verborum concessa; is tamen effugere non poterit, quin Ordinariorum sententijs huiusmodi interdicti, vel excommunicationis distringatur: nisi is, qui tali privilegio gaudet, Rex sit, vel Regina, vel Regum filius, vel Religiosus ex illo ordine, vel loco, cui hæc immunitas largita sit.

16 Episcopi autem, & alij superiores Prælati, vltius constitutionis sententiæ, vel mandati occasione, nullatenus ipso iure sententiam interdicti incurrunt: nisi de Episcopis expressa mentio habeatur.

17 Interdicti vero sententiam omnes illi ferre possunt, qui & excommunicationis ferendæ potestatem habent, ratione ordinariæ, vel delegatæ iurisdictionis. Ne autem temere hanc interdicti pœnam irrogari contingat, statuit Bonifac. VIII. ne quis interdicti sententiam proferat, qui canonicam monitionem non præmiserit. Et ut sententiam proferat in scriptis, causa interdicti addita, eiusq; exemplum passis sententiam, si fuerit petiturum, edatur.

18 Religiosi tam exempti, quàm non exempti, cuiuscunque Ordinis, vel conditionis sint, interdicta Sedis Apostolicæ authoritate, vel à locorum Ordinarijs, vel Conciliorum Prouincialium statutis inflicta obseruare inuiolabiliter tenentur (cum illa tamen moderatione, quam supra ex Bonif. VIII. constitutione retulimus) cum Cathedrali, vel Matricem, seu Parochialem loci Ecclesiam illa viderint vel scierint obseruare (non obstantibus, quibuscumq; appellationibus antea ad Sedem Apostolicam, vel alios interpositis, nec obiectibus quibuscumque) quæ non obseruantes excommunicationis sententiam eo ipso incurrunt.

19 Ac Dominum temporales excommunicationis sententia, à qua per Sedem Apostolicam tantum absolui possunt innodantur, si in locis interdicto suppositis quemquam

di-

diuina officia celebrare quomodolibet cogere ausi fuerint; aut si modo prædicto ad officia audienda aliquos excommunicationis præsertim, vel interdicti sententiam ligatos euocare, seu ne interdicti Ecclesias, dum in ipsis Missarum aguntur solemnia, à celebrantibus moniti exeant, prohibere non formidarint. Nec non & hi, qui cum interdicti sint, in Ecclesijs tamen contra expressam celebrantium monitionem, remanere non exhorruerint, quæ quidem à Clemente V. statuta fuerunt.

20 Sed & ante eum Greg. IX. iusserat, vt quisquis interdictum violasset, ab officio, & beneficio, omniq. iurisdictione suspenderetur. Et Innocent. III. sanxerat, vt Clerici, qui post latam interdicti sententiam in locis interdicto suppositis diuina officia celebrare ausi fuissent, Ecclesiasticis beneficijs spoliarentur. Monachi vero, vel Moniales, in arcta Monasteria ad poenitentiam agendam detruderentur.

21 Interdictum soluitur lapso temporis spatio, ad quod vsque indictum fuerat: puta, si vsque ad annum positum fuerat, lapso anno interdictum erit finitum. Sic, si interdictum aliquam conditionem ferebat puta, donec quis satisfecerit, vel quamdiu quis aliquid egerit, Interdicti vis ipso facto, cum fuerit satisfactum, desinet: vel cum id agere desierit, nec vlla absolutio desiderabitur. Quamuis excommunicatione ad tempus lata, post id temporis etiam absolutionem desideret: absolutioni enim faciendæ ab excommunicatione, certa forma præscripta est.

22 Sed si interdicti sententia simpliciter lata sit, absolutionem expectabit: & si quidem à Iudice lata sit, ab eodem iudice, qui eam tulerit, auferetur: vel ab eius superiore. Sin à iure interdictum sit impositum, Ordinarius, vel Legatus Sedis Apostolicæ ipsius tollendius habebunt, nisi Canonis conditor ipsius auferendi potestatem sibi reseruauerit.

## TITVLVS VLTIMVS.

*De Cessatione Diuinorum.*

1 **I**nterdicto Ecclesiastico quam simillima est cessatio, quam Clerici faciunt, dum diuina officia Laicorum irritati iniurijs intermittunt. Nam & ipsa quandoque generalis est, plerumque specialis: sed cum specialiter tantum fit, videlicet in aliqua Ecclesia solū, non modicum ab interdicto discrepat. Nam, nec irregularis efficitur, qui in ea celebrat, nec Religiosus eam non seruans excommunicatur, quamuis ea Ecclesia matrix sit.

2 Oporteret autem eos, qui hoc modo cessant, hoc ius cessandi habere, saltem ex consuetudine: & interdicti exemplo non pro quauis offensa leui, sed pro grauioribus tantum fieri debet: puta, si onera Clericis per Laicos imponantur. Si contra eorum libertatem statuta à laicis facta sint. Si à Principe seculari Clericus detineatur captiuus. Si Episcopus Ecclesiæ onerosus sit, vel alius Clericus ei sit iniurius. Hæc quippe, & similia possunt iustam causam cessionis præbere. Pensionis autem subtractæ causa nequaquam cessatio fieri potest.

3 Et quid in cessionem faciendam seruari debeat, Romana manifestè præscripsit Sedes. Bonifacius VIII. statuit, ut quibus à diuinis cessandi ex iure, vel consuetudine facultas competit, seculare, vel regulare Capitulum, Collegium seu Conuentus Ecclesiæ cuiuscumque id ne faciant nisi omnibus vocatis, perinde ac si electio quæpiam esset celebranda, & deliberatione inter se facta, ab eo percūtentur, qui cessionem causam præbet, an velit irrogatam offensam sarcire. Qui si velle se sarcire responderit, non cessabunt: si contra, cessare poterunt; ita quod intra mensem à cessionem vtraq; pars, vel per se, vel per procuratores ad Summum Pont. iter arripiant: nisi concordia interim inter eos contracta sit, & quam celerrime poterunt, se coram Pontifice Maximo sistant, ut ille negotium finiat, meritosque



condigne puniat . Quæ si pars cessare volens non seruarit, cessatio parui erit æstimanda .

4 Gregorius vero Nonus hanc formã dedit , vt qui cessare volunt , propositi huius causam instrumento publico, vel literis patentibus exarent, suo aut alieno authentico sigillo obfiguatis, illiq; edant, cuius odio cessare decreuerint, Quam si formam prætermiserint . Vel causam non legitimam prætulerint , quicquid medio tempore ab ea Ecclesia tulerint, vel perceperint , restituere cogentur ; nec aliquid deinceps percipient : Eiq; in cuius cessauerint contumeliam , de iniuria satisfacient .

5 At si non iniuste eos cessare constiterit , quicquid sua interfuerit, ab his repetent, quorum irritari iniurijs cessauerint , & certam præterea quantitatem, quam Prælati fuerit arbitratus . Reiecit autem, & damnauit consuetudinem eorum , qui in huiusmodi cessationibus, Crucem, aut Virginis Sanctæ, aliorumue Sanctorum imagines spinis, vel vrticis obruere consueuerunt .

6 Innocentius vero Tertius ante hos statuerat , vt si Canonici absque manifesta, & rationabili causa, maxime in contemptum Episcopi, cessauerint à diuinis , Episcopus si voluerit , nihilominus celebret in Ecclesia Cathedrali , & Metropolitanus ad querelam ipsius tanquam super hoc à Sede Apostolica delegatus sic eos per censuram Ecclesiasticam cognita veritate castiget, vt poenæ metu talia de cetero non præsumant .

7 Si qui autem Religiosi tam exempti , quam non exempti, cuiuscunque ordinis societatis, & conditionis existant, cessationes generalis à diuinis Ciuitatum , Terrarum , & aliorum locorum, quas ex consuetudine, vel alias Capitula Collegia , vel Conuentus secularium aut Regularium Ecclesiarum sibi vendicant, non obseruarint, cum Cathedrali, vel Matricem, seu Parochialem loci Ecclesiam illam viderint , vel sciuerint obseruare, excommunicationis sententiæ ipso iure subiacebunt : non obstantibus quibuscunque appellationibus antea etiam ad Sedem Apostolicam ,

vel alios interiectis, & obiectionibus quibuscumque.

Et hæc Deo Opt. Max. annuente, publicæ utilitatis studentes, in vsum simplicium Sacerdotum, & Tyronum Iuris Pontificij absque Doctorum, & Décretorum allegationibus, ex immensis Canonum, & Interpretum spatijs collegimus, omnia Sanctæ Romanæ Ecclesiæ, & Iurisperitorum censuræ subijcientes.

F I N I S.



Book 2 K.





75'24  

---

5



